

INSTITUTIONES
METAPHYSICÆ
IN USUS ACADEMICOS,

AUCTORE

EDUARDO
CORSINO

CLERICORUM REGULARIUM
SCHOLARUM PIARUM,

in Academia PISANA

PHILOSOPHIÆ PROFESSORE.

TOMUS SEXTUS.



VENETIIS

EX TYPOGRAPHIA BALLEONIANA.
MDCCLIV.

Superiorum Permissu, ac Privilegiis.

THE UNIVERSITY OF CHICAGO
ADDITIONAL
PUBLICATIONS

CHICAGO

1911
THE UNIVERSITY OF CHICAGO
PUBLISHED BY THE
UNIVERSITY OF CHICAGO
PRESS



THE UNIVERSITY OF CHICAGO
PUBLISHED BY THE
UNIVERSITY OF CHICAGO
PRESS



INDEX.

I*N* *Metaphysicas Institutiones* *Praefatio.* pag. xv

METAPHYSICÆ

Pars Prima.

Sive Ontologia. pag. i

Cap. I. *De Ente.* 3

Cap. II. *De proprietatibus Entis, Unitate, Veritate, ac Bonitate.* 10

Cap. III. *De Essentia, existentia, & substantia.* 19

Cap. IV. *De Ente possibili, ac impossibili, necessario, & Contingenti; mutabili, & immutabili.* 30

Cap. V. *De Spatio, Motu, ac Tempore.* 45

Cap. VI. *De Ente finito, indefinito, ac infinito.* 58

Cap. VII. *De Ente corporeo, & incorporeo, sive de Corpore, ac Spiritu.* 69

Cap. VIII. *De Ente relativo, sive de variis Entium Relationibus.* 87

METAPHYSICÆ

Pars Secunda,

Sive Pneumatologia, aut Psychologia, aut Noologia. 109

Cap. I. *De Mentis humane natura, & Origine.* 111

Cap. II. *De Animi Spiritualitate.* 123

Cap. III. *De Mentis humane, vel Animi immortalitate.* 134

Cap. IV. *De Mentis humane intellectu, ejusque cognitione, ideis, & affectionibus.* 143

Cap. V. *De Mentis humane Voluntate, ejusque libertate, & affectionibus.* 156

Cap. VI. *De Corporis, Animique unionem, ipsorumque Commercio.* 175

M E T A P H Y S I C Æ

Pars Tertia,

Sive Theologia Naturalis. 193

Cap. I. De existentia Dei. 194

Cap. II. De essentia, vel constitutivo Dei. 209

Cap. III. De attributis physicis Dei. 214.

Cap. IV. De moralibus attributis Dei. 234.



vi
NOI RIFORMATORI

Dello Studio di Padova.

A Vendo veduto per la Fede di Revisione, ed Approvazione del P. F. Paolo Tommaso Manuelli Inquisitor General del Santo Officio di Venezia nel Libro intitolato *Institutiones Metaphysicae ad usus Academicos Auctore Eduardo Corsini Clerico Reg. Scholarum Piarum MS.* non v'esser cos' alcuna contro la Santa Fede Cattolica, e parimente per Attestato del Segretario Nostro; niente contro Principi, e buoni costumi, concediamo Licenza che possi esser stampato, osservando gl'ordini in materia di Stampe, presentando le solite Copie alle Pubbliche Librerie di Venezia, e di Padova.

Dat. li 3. Ottobre 1753.

{ Giovanni Emo Proc. Rifer.

{ Alvise Mocenigo 4. Kav. Proc. Rifer.

Gio: Girolamo Zuccato Segr.

Adi 19. Novembre 1753.

Registrato nel Magistrato Eccell. degl' Esecutori contro la Bestemmia.

Dionisio Querini Segr.

AU-



AUCTORIS

PRÆFATIO.



Non immerito fortasse ego ve-
reor, ne facile plerisque,
quibus Superior Studiorum
meorum ratio perspecta fue-
rit, id novum, planeque
mirum accadat, quod hoc præsertim tem-
pore de Metaphysicis Institutionibus eden-
dis cogitaverim; eamque methodum in
adornandis illis usurpaverim, qua à
recepta jam consuetudine, aliorumque
Scriptorum methodo recedere videatur.
Etenim, cum pluribus ab hinc annis ex
Philosophicis disciplinis, in quibus an-
tea versatus fueram, ad erudita Anti-
quitatis studia conversus labores omnes,
industriam, ac ingenii vires ad ea ex-
colenda jucundissime contulissem, plera-
que jam à me conscripta in Attica
præsertim Historia, variisque Græcorum
Monumentis opportune illustrandis su-

periori tempore in lucem edidi: plurima quoque tum in quarto postremoque Fastorum Atticorum volumine, tum in Asiaticis Inscriptionibus recensendis, interpretandis, explicandisque disposita, atque edenda supersunt. Itaque à suscepto semel consilio, & jucundissima studiorum meorum ratione abhorreere plurimum videbitur, si operum illorum seriem abrumpens ad hæc alia repente digrediar; atque iterum ad Philosophiam ipsam, veluti tempestate quadam delatus, eam potissimum ipsius partem exponendam suscipiam, quæ ceteris omnibus aut elegantia, aut jucunditate concedere existimatur. Deinde vero, cum hæc præstantissima Philosophiæ pars, quæ avorum nostrorum ætate vel omnino deserui, vel certe rudis, aspera, atque indecora prodire, ac languere propemodum videbatur, superiori sæculo à doctissimis viris admirabili prorsus ingenii acumine, nitore, atque ubertate pertractata fuerit, adeoque nostra hæc ætate Leibnitio, Clarkio, Loxio, Wolfio, aliisque pluribus faciem præferentibus uberrima quadam luce perfusa & incredibili questionum varietate amplificata sit, ut nulli propemodum Facultati concedere merito censeatur, reprehendi posse ego videar, qui in tanta rerum copia, & præceptorum numerosa

pau-

pauca solum hic delibaverim ; atque
 ex uberrimis fontibus illis tennes solum
 veluti rivulos in Institutiones à me di-
 spostas derivaverim . Utrumque tamen
 neque temere , neque inconsulto à me
 factum esse facile intelliges quicumque
 noverit quo plane consilio , quave de
 causa id operis susceperim . Etenim sex-
 tus jam annus agitur , ex quo plurima
 in Pisana Academia Imperatoris Cesa-
 ris Francisci I. auctoritate , ac benefi-
 centia vel recens instituta , vel meliori
 quadam , nobiliorique methodo disposita
 sunt ; ut exinde novus Academia no-
 stra splendor , simulque nova studiosæ
 Juventuti præsidia accederent . Quemad-
 modum enim Astronomie , Analyseos ,
 Juris Publici , Physices Experimenta-
 lis studia impensus hic colit Ille voluit ,
 earumque Facultatum publice docenda-
 rum munus præstantissimis viris conces-
 sit ; ita quoque decreto suo sancivit ut
 Dialectices , ac Metaphysices studia ,
 quæ à nonnullis Adolescentibus aliquan-
 do deserî , vel remissius , quam par erat ,
 aut levius delibari consueverant , à sin-
 gulis omnino Auditoribus severius in
 posterum , atque accuratius perficeren-
 tur , nec ulli prorsus ad honores , &
 gradus , qui peracto jam studiorum cur-
 niculo veteri solemni que ritu conferun-
 tur , aditus pateret , nisi prius hæc ipsa

* AUCTORIS

duarum Facultatum studia coluisset . Quandoquidem vero mihi , cui tum Moralis Philosophiæ publice tradendæ munus obtigerat , illud etiam ab Imperatore Cesare , ac sapientissimis Academia nostra Moderatoribus commissum fuit , ut singulis annis privatim , iisque solum diebus , quibus in Academia publicæ Praelectiones habendæ non forent , Metaphysicas Institutiones exponerem , facile intellexi id commode fieri non posse , nisi præcipua solum , ac nobiliora præstantissimæ Facultatis capita complecterer , quæ excitandis , dirigendis , erudiendisque Adolescentum ingeniis magis conferre viderentur . Ac certe quidem si in latissimis , ac infinitis fere Disciplinæ hujus spatiis liberius excurrere , atque pro rei dignitate singulas ipsius partes ac quæstiones omnes persequi libuisset , quæ à doctissimis viris in Metaphysica proponi jam solent , hæc universa unius anni finibus coerceri sane non poterant , & Adolescentes illi , qui Pisas concesserant , ut gravioribus disciplinis aliis , præsertim vero Jurisprudentiæ , ac Medicinæ se traderent , non sine maxima temporis jactura , adeoque nobiliorum ejusmodi studiorum detrimento in primoribus his disciplinis longiorem operam collocassent .

Itaque temporis angustia , Adolescentum
sum

tum commodo, prudenti Moderatorum consilio gerendus mos fuit; eaque prorsus methodo *Metaphysicæ Institutiones* adornandæ à me fuerunt, ut in solos Academicos usus dispositæ, atque editæ viderentur. Cumque experimento ipso, diuturnaue plurimam annorum observatione compertum foret Adolescentibus ipsis incommodum plerumque, ac mire molestum esse si in exscribendis illis non mediocrem temporis partem insumerent, ideoque à plerisque omnibus optari intelligerem ut *Institutiones* illæ typis editæ circumferrentur, facile ipsorum desiderio assentiri me decuit; adeoque *Institutiones*, quas jampridem Auditoribus meis exscribendas tradideram, paullo nunc uberiores, & exemplorum varietate, rationum numero, gravissimis interdum veterum testimoniis subinde illustratas, nitidiorique cultu ornatas edere decrevi. Ita nimirum facile fieri posse putavi, ut *Adolescentes* ipsi *Metaphysicæ præcepta* eleganter typis excusa, atque à pluribus etiam mendis, quæ scribentibus irrepere plerumque solent, expurgata libentius, atque alacrius percurrerent; simulque plurima, quæ viva Præceptoris voce fusius exposita, atque opportune variis in locis adjecta fuerint, accuratius imbiberent. Quamvis tamen ejusmodi *Me-*

metaphysicarum rerum doctrina hic à me
 tradita ea de causa angustioribus velu-
 ti finibus circumscripta sit, satis tamen
 Auditorum nostrorum commodo consul-
 tum esse confido. Quidquid enim ad
 primam Metaphysicæ Partem referri fa-
 cile poterat, aut certe quidquid ex il-
 la præsidii, ac splendoris in ceteras di-
 sciplinas omnes manare posse videbatur,
 partim ex accuratissima Dialecticæ Fa-
 cultatis cognitione, quam adepti jam fue-
 rant, partim ex hac ipsa Institutionum
 nostrarum serie haurire illi poterunt,
 ingenium, solertiam, exercitationem,
 acrioremque meditationem attulerint.
 Quidquid vero ad alteram Metaphysicæ
 partem, siue Psychologiam spectare de-
 bet, ex uberrimis Physicæ fontibus,
 quibus eximia Præceptorum cura admo-
 ventur, obtinere illi solent; quemadmo-
 dum plurima, ac infinita fere, quæ ad
 tertiam Metaphysicæ partem, siue Theo-
 logiam naturalem attinent, in sacris
 disciplinis, quibus hic optime erudiun-
 tur, feliciter assequuntur. Illud unum
 mihi propositum fuit, adeoque maxime
 cordi esse debuit, ut in singulis Meta-
 physicæ partibus ea præsertim lumina
 studiosè mihiq; credita Juventutis men-
 tibus affulgerent, quibus Adolescentes
 ipsi in gravioribus Disciplinis aliis ve-
 luti præsidii uti possent; præcipue ve-

P R Æ F A T I O. xiii


no ipsorum animus ita in perspicienda, afferendaque humane Mentis immortalitate, arbitrii libertate, supremi Numinis existentia, ceterisque Theologiae naturalis dogmatibus informarentur, ut facile à perniciosis quibusdam opinionibus, quæ liberius in dies serpere aliquibi conspiciuntur, cavere illi possent. Quod si fortasse cui libeat gravissima id genus Metaphysica capita, ex quibus morum honestas, legum vis, tranquillæ civium societas, ipsa demum religio pendere debet, accuratius cognoscere, non modo præstantissimos Scriptores alios adire ille poterit, qui de rebus istis subtiliter, accurate, & uberrime disputarunt; sed eximia quoque Academiæ nostræ lumina, doctissimos nempe viros consulere, qui hæc ipsa aut voce aut aureis etiam scriptis editis illustrarunt.

Id operis hujusce mei, simulque impositi muneris esse debuit, ut sincere, vereque doctrine capita, adeoque prima honestatis, virtutum, ac religionis semina Auditorum nostrorum animis insererem; quæ facile deinde adolescere profecto possent, nisi aut ingenio liberius indulgeant, aut effræni novitatis ardore perciti sint, aut demum pravis animi cupiditatibus ac perditis etiam quorundam opinionibus abripiantur, Eiusmodi

xiv AUCT. PRÆFAT.

modi vero syrtis declinare, vereque sapientia tramitem insistere illi poterunt, si ad hæc studia ingenium veritatis inquirendæ amorem attulerint, si perspicuo rationis lumine constanter ubique dirigantur; si denique in iis, quæ tenues Mentis humane vires excedunt, solam certitudinem, non vero perspicuitatem temere inquirent, ut suis in locis opportunius observabitur. Quod si ad eximium hunc fructum facilius assequendum Metaphysicæ Institutiones istæ aliqua ex parte conferre possint, erit certe cur studium, ac laborem in adornandis illis susceptum optime collocatum existimem; cum nihil sane aut jucundius, aut optabilius esse debeat, quam si studia nostra aliis prodesse, eosque ad veritatem, honestatem, religionem, veramque hominis sapientiam dirigere possint.

Pisis, Kalendis Aprilis anni 1752.



IN METAPHYSICAS INSTITUTIONES

P R Æ F A T I O .

I.



Apientes illi, qui Facul-
tatum omnium natu-
ram, causas, origi-
nem, munera, varietatem, ipsarumque di-

scrimina subtilius explorarunt, in-
numeris disciplinis aliis, quæ erudien-
dis hominum mentibus, variisque re-
rum generibus accurate cognoscendis
institutæ fuerant, Facultatem aliam
adjungendam esse putarunt, quæ ce-
teris omnibus longe sublimior attri-
buta illa, vel affectiones omnes expo-
neret, quæ singulis entium generibus
inesse possunt; ideoque ad Ens ipsum
à circumstantiis omnibus, ac differen-
tiis secretum, veluti objectum, dirige-
retur. Etenim Facultates omnes, quæ-
cumque illæ fuerint, peculiare quod-
dam

dam entis genus considerant, & affectiones illas exponunt, quæ in ejusmodi solum entis genere continentur; nihilque prorsus in disciplinis illis inquiritur, aut explicatur, quod in hoc ipso certo, distinctoque entis genere non comprehendatur, aut illi arctissimo veluti fœdere non jungatur. Itaque Facultates ipsæ quibusdam velati finibus circumscriptæ sunt; & quamvis maxima, ac infinita fere cognitionum series in illis acquiratur, universa tamen hæc series ad unicum objectum illud dirigitur, quod eidem Facultati cognoscendum proponitur; ut proinde ex hac ipsa objectorum varietate, sive discrimine varietas etiam illa, sive distinctio profluxerit, qua Facultas una à Facultatibus, vel disciplinis aliis secernitur. Sic, ut exemplo quoque res clarior fiat, *Mathematica* Facultates omnes *Quantitatem* veluti objectum considerant; nihilque prorsus in illis inquiritur, proponitur, aut demonstratur, quod ad *Quantitatem* ipsam, variasque illius species, aut affectiones non pertineat. *Astronomia* cælestia corpora veluti objectum sibi propositum contemplantur; adeoque quidquid corporibus ipsis inesse potest, accuratissime exponit. *Physica* universa corpora movi,

tui,

tui ; vel mutationi subjecta considerat ; *Botanice* Plantas , *Anatome* corporis animati structuram , *Medicina* corporis ejusdem ægritudinem , aut sanitatem contemplatur ; atque , ut uno omnia verbo complectar , Facultates omnes , cum peculiari cuidam , distinctoque entis generi cognoscendo sint institutæ , ad objectum ipsum constantissime diriguntur , easque solum affectiones considerant , quæ ejusmodi objecto conveniunt , ceterisque rebus inesse , vel objectis aliis convenire non possunt .

II. Quamvis autem maxima , ac infinita fere affectionum varietas in objectis illis appareat , quæ vel à sensibus percipi , vel ab intellectu nostro cognosci ; vel in variis disciplinis accuratissime exponi possunt , plurimæ tamen affectiones aliæ , principia , vel attributa reperiuntur , quæ singulis entium generibus inesse debent ; ut proinde affectiones illæ , non entis alicujus propriæ , sed entibus ac objectis omnibus communes esse , vocarique debeant ; quippe quæ non alicui solum peculiari , distinctoque entium generi conveniant , sed nullis propemodum finibus circumscriptæ ad universa potius entium genera , vel objecta singula diffundantur .

Ita

Itaque, sicuti affectiones illæ, sive attributa, quæ peculiari solum distinctoque entis generi inesse possunt, peculiaris etiam distinctæque Facultatis opera, sive præsidio cognoscuntur, atque ex ejusmodi affectionum discrimine ipsa quoque Facultatum varietas, atque distinctio profluxit; ita quoque affectiones illæ, principia, vel attributa, quæ singulis entium omnium generibus inesse possint, alterius Facultatis opera cognosci debent, quæ ceteris disciplinis omnibus longe sublimior ad singula objectorum, vel entium genera latissime diffundatur; adeoque non peculiare quoddam entis genus consideret, sed Ens ipsum, prout est ens, contemplatur; illud nimirum à circumstantiis omnibus, & affectionibus secretum considerat, quarum ope, veluti discrimine vel caractere quodam, Ens ipsum varias in classes, aut entium genera distinguitur. Quandoquidem vero affectiones illæ, sive attributa, quæ ab ejusmodi Facultate spectari debent, singulis omnino entium generibus inesse possunt, perspicue apparet quod Facultas illa non corporeas solum, sed incorporeas etiam, substantias, ipsarumque vires, naturam, & affectiones omnes considerat; quidquid nimirum in ipsa
in-

inquiritur, aut explicatur non corporeis modo, sed incorporeis quoque rebus commune esse debet; ut proinde uberrima hæc Facultas nullis, ut antea diximus, rerum terminis circumscripta, incorporea quoque objecta ambitu suo, atque infinita propemodum amplitudine complectatur. Hinc illa à Philosophis omnibus optime accurateque definiti jam solet: *Facultas, quæ generales omnes Entis affectiones corporeis, & incorporeis etiam entibus communes considerat; adeoque incorporeas etiam substantias, ipsarumque affectiones solo rationis lumine nobis perspicuas contemplatur.*

III. Ejusmodi vero Facultas ab Aristotele, (a) aliisque pluribus Σοφία Sapientia dicitur: perinde quasi nobilior, ac sublimior censi illa debeat, quam ut, aliarum Facultatum instar, communi Scientiæ nomine vocari possit. Interdum etiam ab Aristotele (b) φιλοσοφία Philosophia, si-
ve (c) φιλοσοφία πρῶτη Philosophia prima vocata fuit; non modo quod illa ceteras Philosophiæ partes excellere.

(a) Metaph. Lib. 1. cap. 2.

(b) Lib. 4. cap. 1.

(c) Lib. 6. cap. 1.

lere videatur ; verum etiam quod in reliquis Philosophiæ partibus, adeoque disciplinis omnibus rite, ac feliciter comparandis faciem præferat, ideoque ante ceteras Facultates omnes exponi consueverit. Ita propemodum Facultas ipsa ab Aristotele Θεολογικὴ *Theologica* appellata fuit, quod omnes fere *Physicæ*, sive creatæ naturæ fines excedens naturæ Auctorem, Deumque consideret : quemadmodum prorsus à plurimis *Theologiæ naturalis* nomine designari illa solet, quippe quæ Deum ipsum, ejusque attributa solo tamen rationis lumine, sive naturæ viribus contemplatur ; cum purior, ac nobilior Facultas illa, quæ *Theologia*, sive *Theologia supernaturalis* vocatur, Dei naturam, attributa, ac mysteria singula naturæ viribus impervia, divinæ quoque revelationis præsidio, adeoque divinæ fidei lumine speculetur. Denique Facultas ipsa ab aliis Πνευματολογία *Pneumatologia*, sive *Spirituum scientia* appellatur, quod singula *Spiritus*, sive incorporearum substantiarum genera contempletur, *Angelos* nimirum, *humanos animos*, ac *Deum*, ut accuratius exponetur ubi de variis Metaphysicæ partibus, atque discrimine agendum erit. Frequentius tamen uberrima hæc Facultas *Meta-*
physicæ

physica nomine vocari solet; quamvis ejusmodi nomen & Aristoteli, & ceteris etiam antiquioribus Græciæ Philosophis incognitum fuerit, atque ab Interpretibus Aristotelis, sive Grammaticis quibusdam temere solum, ac fortuito inventum memoretur.

IV. Etenim, cum Aristotelis Opera Theophrasto primum, tum Neleo cuidam Scepsio relictæ, (a) Athenas deinde delatæ, ibique ab Apelliconte Tejo empta, recensitæ, variisque in locis, ubi lacunæ plurimæ ac hiatus irrepperant, restituta fuissent (b), direptis deinde à Sylla Athenis Romam translata fuerunt, (c) ibique à Tyrannione quodam Grammatico, & Andronico Rhodio dispositæ, variisque in classes distributæ sunt. (d) Itaque, cum Interpretes illi Aristotelis Opera mirifice jam vitiatæ tres in partes hoc ordine digessimus, ut alia quidem *Λογικὰ Logica*, alia vero *Ἠθικὰ Ethica*, alia denique *Φυσικὰ Physica* inscriberentur, simulque tamen scri-

pta



(a) *Lact. Lib. 5. seg.*

(b) *Athena. Lib. 5. cap. 14.*

(c) *Plutarch. in Sulla.*

(d) *Strabo Lib. 13. pag. 600.*

pta plurima superessent, quæ promiscua fuerant, nullique certæ classi conjungi vel inferi posse videbantur, hæc opera, sive *biblia* à Grammaticis illis græca voce *μὲτὰ τὰ φυσικά* post *Physica*, vel *Μεταφυσικά* *Metaphysica* sunt appellata, quod illa nimirum Physicis Libris subjecta, vel temere Physicis adnexa forent. Hinc *Metaphysica* nomen non ex Operis argumento, sed ex fortuito solum Librorum ordine, ac situ derivatum fuit. Ac certe quidem quicumque XIV. illos Aristotelis Libros accuratius inspexerit, qui *Metaphysicis* inscribi solent, facile profecto intelliget ipsorum singulos confusos adeo, ac perturbatos esse, ut in iis plurima quidem de *Logicis*, aliqua de *Physicis*, pauca vero de *Metaphysicis*, hoc est de communibus Entis affectionibus, vel incorporeis rebus, disputerentur, atque universa fere adeo discerpta, levia, ac vitiata fuisse, ut Aristotele prorsus indigna, ipsique supposita à Gassendo, aliisque pluribus existimentur; cum præsertim Laertius, qui singula Aristotelis Opera recensuit, nullibi vel *Metaphysica*, vel *Metaphysica Libros* memoraverit. Hac ipsa tamen Opera ad Aristotele profluxisse plurimis, iisque perspicuis characteribus ostendi posset. At certe quidem,

ne

ne argumentis aliis hic immorer, Plurarchus ipse Libros illos, qui ipsius ætate jam *μετὰ τὰ φυσικὰ* *Post-Physica* inscripti fuerant, ab Aristotele exaratos esse demonstrat, eosque tamen prorsus inutiles, tantoque Viro indignos esse testatur: (a) *ἀληθὺς γὰρ ἡ μετὰ τὰ φυσικὰ πραγματεία πρὸς διδασκαλίαν, καὶ μάθησιν ἔδεν ἔχουσα χρῆσιμον* *tractatio illa, quæ Post-Physica inscribitur, nihil vere continet, quod eruditioni, doctrinaque conferre possit.* Itaque quidquid in Libris illis tenere, atque confuse differitur, Aristoteli adscribi debet; quamvis ejusmodi Librorum compages, ipsumque nomen non ab Aristotele, sed à Grammaticis, aut Interpretibus illis, prodierit; eaque de causa à Laertio memorati non fuerint, qui eos solum Libros recensendos suscepit, quibus Aristoteles ipse titulum, verumque nomen inscripserat.

V. Quemadmodum vero Interpretum illorum studiis, atque consilio ex disjectis illis, vitiatis, confusisque Aristotelis scriptis peculiare quoddam, novumque Aristotelis Opus erupit; ita

(a) *In Alexan.*

ita quoque iis præsertim ducibus institutum fuit ut Metaphysica ceteris Philosophiæ partibus accenseri, ac veluti nova quædam, sive distincta Philosophiæ pars haberi consueverit, adeoque in posterum quatuor Philosophiæ partes numerari ceperint, *Logica* nimirum, *Metaphysica*, *Physica*, atque *Ethica*. Verum, ut præstantissimi Viri observarunt, Logica, sive Dialectica dirigendo solum perficiendoque rationis lumini instituta fuit, ut ipsius præsidio occulta veritas inveniri, inventa nitide, accurateque ceteris ostendi posset; vitia, quæ differendo obrepere plerumque solent, vitari; omnia nitide definiri, suas in partes distribui, clariorique methodo exponi possent. Hinc Logica ipsa non peculiaris quædam, atque distincta Philosophiæ pars, sed Facultatum omnium præsidium, instrumentum, atque, ut Aristoteles ipsam inscripsit, *Organum* censeri solet; cumque illa, ut eleganter ait Cicero, (A) sit quædam *Sapientie pars, quæ per omnes Sapientie partes manat, ac funditur*, non Philosophiæ solum, sed omnium potius

(A) *Tuscul. Quæst. Lib. 5. cap. 25.*

potius Facultatum , pars haberi illa poterit. Ita propemodum Metaphysica , quæ communes entium omnium affectiones inquirat , nullique objecti alicujus , aut Scientiæ finibus circumscribitur , prius veluti Facultatum aliarum semina complectitur , Facultates omnes pervadit , adeoque non Philosophiæ pars , sed Facultatum omnium præsidium , ac veluti fons uberrimus esse debet , ex quo nitida quadam , nativæque serie peculiæres illæ cognitiones dimanant , quæ in ceteris Facultatibus acquiruntur . Itaque , licet communi jam receptoque more quatuor Philosophiæ partes distingui consueverint , optime tamen à Cicero-
ne (a) dictum accepimus quod *plena Philosophia est , quæ constat ex duabus Physica , & Ethica ; quod nimirum Logica , & Metaphysica veluti præsidia , vel instrumenta quædam habendæ sint , quibus mens nostra in disciplinis omnibus comparandis dirigatur , ac illustratur . Ceterum si reliquis Philosophiæ partibus hæc accenseri , siue peculiaris Facultatis instar ha-*

(a) *Rhetor. cap. 1.*

haberi illa debeat, perinde est: illud unum hic opportune observasse juverit, quod *Metaphysica* reliquis Philosophiæ partibus adjungi tunc cœpit, cum ab Interpretibus Aristotelis hæc à Logicis, Ethicis, Physicisque Libris sejuncta, atque in unum veluti corpus congesta fuit; quamvis Aristoteles, alique Veteres hoc *Metaphysica* nomen, partiumque seriem, aut ordinem ignoraverint.

VI. Quamvis autem hoc celebre, magisque usitatum *Metaphysica* nomen à Grammaticis illis incœperit, eximia tamen Facultas, quæ hoc ipso nomine designatur, à primis usque temporibus non apud Græcos solum, sed etiam Ægyptios, Arabes, Persas, Chaldaeos, aliosque Populos sapientiæ glória commendatos floruisse conspicitur. Etënim plurima à Veteribus illis de Ente, de unitate, bonitate, varietate, de universalibus Ideis, de mentis humanæ natura, de Spiritibus, de Deo ipso subtiliter inventa, præclare exposita, accuratissime demonstrata memorantur, ut ex Platone, Lættio, Cicërone, Empirico, aliisque Scripto-ribus erudimur, atque in aureolo Clerici Libro demonstratur, in quo *Orientalis Philosophiæ Historiam*, nobilio-

Ita nempe Gentium illarum dogmata, exposuit. Ita quoque plurima, ac universa fere Metaphysicæ doctrinæ capita; quæ ab antiquioribus Philosophis illis tradita, ac illustrata fuerant, in eximio præstantique Opere Brukerus complectitur, quod *Criticam Philosophiæ Historiam* inscripsit; quemadmodum universa fere veterum Philosophorum placita, quæ ad Metaphysicam ipsam spectare poterant, incredibili eruditionis copia, & ingenii acumine Cudvorthus exposuit in aureo, atque immortali Opere, quod *Intellectuale Mundi Systema* inscripsit, atque nuperrime Cl. Moshemius eruditissimis, optimisque observationibus uberrime illustravit. Ceteros tamen Sapientes omnes, aut Græciæ Philosophos, qui plurima ab Ægyptiis, Chaldæis, exterisque Gentibus aliis acceperant, ingenii acumine, ac Metaphysicæ doctrinæ studio Pythagoras superavit; ut proinde plurima à Pythagoricis ipsis egregie inventa, optimeque exposita inmemorentur; iisque prima *Categoriarum* inventio, sive suprema Entis divisio adscribi consueverit. Plurima quoque ex Pythagoricæ doctrinæ fontibus, præsertim vero ex Parmenide, Zenone, Melisso, Archyta, Theæteto,

Ocelo , Timæo , aliisque Italica vel Pythagorica Sectæ Philosophis in *Academicam* Sectam à se conjunctam derivavit Plato , quæ à Jambycho , Porphyrio , Plotino , aliisque Platonis Interpretibus aucta , ac illustrata ad hæc usque tempora pervenerunt : ne quidpiam de Themistio , Philopono , Alexandro Aphrodisiensi , ceterisque Philosophis dicam , qui Metaphysicos Aristotelis Libros florentibus adhuc in Græcia Sapientiæ studiis uberrime explicarunt.

VII. Ubi vero prostrata jam Imperii Romani majestare , & extincta fere apud Græcos , Latinosque sapientiæ gloria , immanis quædam barbaries ubique gentium incubuisset , Aristotelis Opera in Arabicam linguam translata ex Hispaniâ , quam Arabes ferro , flammaque occupaverant , in finitimas Europæ Provincias invecta fuerunt : ac Metaphysicæ studium à Scholasticis Aristotelicæ doctrinæ cultoribus incredibili prorsus ardore susceptum fuit. Sed inutilibus tamen , ambiguis , & obscuris questionibus illud implicatum fuit , ut subtilitas illa , questionum numerus , ac infinita varietas opprimendo potius , & extinguendo , quàm excitando , dirigendo-
que

que rationis lumini conferre videretur . Quicumque tamen in Scholasticos ipsos subtilius inquirere aut possit , aut velit , facile profecto intelliget ; ipsorum plerisque neque vividum ingenii acumen , neque eximiam cogitandi vim , neque accuratum discernendi robur debuisse , quod optimo maximoque jure de Origene , Tertulliano , Arnobio , Augustino , Lactantio , Hilario , aliisque pluribus Ecclesiæ Patribus , intelligi , censeri que debet ; sed illud unum in Scholasticis ipsis reprehendi merito poterit , quod Aristoteli nimium addicti ipsius sententias inutilibus , atque infinitis questionibus varias in partes detorse-
runt .

VIII. Itaque præclare de Metaphysicæ Facultatis studio , ceterisque disciplinis omnibus meriti sunt qui incunante fere superiori seculo de restituendo Metaphysicæ quoque splendore sedulo cogitarunt , ut Verulamius , Cartesius , Motus , Claubergius , & Malebranchius , qui eximiam hanc Facultatem novam , clariorique methodo pertractarunt . Maximus deinde splendor ex accuratis Parkerii , Clarchii , Cudvorthi , Lokii , aliorumque studiis Metaphysicæ accessit , qui singulas , aut nobiliores

certe Metaphysicæ partes incredibilē subtilitate, ingenii acumine, elegantia, perspicuitate uberrime illustrarunt; quemadmodum plurima Metaphysicæ capita Leibnitijs, ac Volfius nostris fere temporibus explicarunt, ut suis in locis opportunius ostenderetur.

EX. Illud hic tamen ingenue fateri, vel opportune monuisse juverit, quod in doctissimis etiā, atque acutissimis Viris aliqua subinde occurrant, quæ, quamvis subtiliter inventa, eleganter exposita, magnificeque à Scriptoribus alijs commendata fuerint, perspicue tamen & à puriori sinceroque rationis lumine, & ab ipsis etiā divinæ fidei, veræque Religionis legibus abhorrent. Etenim acrior illa subtilitas, simulque vehemens ac impudens novitatis ardor, maxima cogitandi, scribendique licentia nullis fere divinis humanisque legibus circumscripta liberioris ingenii viros aliquando in errores, atque impietatem abripuit, ut opportune demonstrabitur ubi de incorporea mentis humanæ substantia, de arbitrii libertate, de ipsa quoque Dei existentia, aliisque pluribus agendum erit.

X. Quod si Metaphysicæ doctrinæ series suis ex fontibus, hoc est ex pri-

primis cognitionis nostræ principiis, primisque notionibus, quæ mentibus nostris impressæ fuerant, perspicuo quodam ordine deducatur, ut à melioribus sane Scriptoribus factum esse conspiciamus, tantum abest ut illa divina fidei lumini, sacrisque Religionis nostræ legibus adversetur, aut in errores abripere fortasse possit, ut plurimum potius humanos animos ad honestatem, veramque Religionem informet: atque eximiam prorsus opem ad Theologiam, sacramque divinorum scientiam informet. Ita quoque Metaphysicæ studium maximo Jurisprudentiæ ceterisque disciplinis omnibus præsidio esse debet; cum præsertim in singulis Metaphysicæ partibus insignis adeo perspicuitas, certitudo, atque admirabilis rerum connexio reperiatur, ut, si Mathematicas solum Facultates exceperis, nulla Facultas alia inveniat, quæ varias quæstiones dirimere, suasque veritates geometrica fere methodo exponere perfectè possit; quemadmodum sane Spinosæ Metaphysicæ Cartesii Meditationes, atque nuperrime Volsius universam Metaphysicæ doctrinæ seriem synthetica, ac geometrica methodo demonstravit.

XI. Exinde vero maxima, & eximia
 pror-

prorsus Facultatis hujus dignitas, atque præstantia deduci poterit; cum disciplinæ singulæ eo puriores nobilioresque debeant censerī vocarique, quo uberior in iis perspicuitas, & certitudo reperiatur. Itaque, cum Metaphysica tum certitudine, tum perspicuitate excellere videatur, optimo maximoque jure à Leibnitio *Scientia omnium princeps* vocatur. Ex ipsa quoque objecti præstantia, vel Entis illius dignitate, quod in ipsa proponitur, & explicatur, Metaphysicæ nobilitas, atque præstantia deduci poterit; cum incorporeæ substantiæ, ac Deus ipse, qui in illa à nobis inquiritur, ac demonstratur, ceteris omnibus Facultatum aliarum objectis longe nobilior, atque sublimior haberi debeat. Hinc Aristoteles observavit Physicam de mutabilibus solum, corporeisque rebus differere; Mathematicam vero incorporeas quidem, atque immutabiles res contemplari; sed eas tamen, quæ *substantiæ* nomine decorari non possint, sed affectionum instar haberi debeant, quæ corporeis substantiis accidere, ac inhærere possint, adeoque ab illo *inseparabiles* appellantur: tandemque concludit nobiliorē Facultatem aliam admittendam esse, quæ circa immutabiles, simulque *separabiles*,

hoc

hoc est subsistentes res, incorporeas
 nempe substantias, occupetur: (a)
 Ἡ μὲν ἐν φυσικῇ περὶ τὰ κινήσεως ἔχον-
 τ' ἀρχὴν ἐν αὐτοῖς ἐστίν· ἡ δὲ Μαθηματι-
 κή θεωρητικὴ μὲν, καὶ περὶ μέγιστά τις
 αὐτῇ, ἀλλ' ἔχει χωριστά· περὶ τὸ χωριστὸν
 ἄρα ὂν, καὶ ἀκίνητον ἑτέρα τέττοι ἀμφοτέ-
 ρων ἧς ἐπιστημῶν ἐστίν· καὶ ἕτερον ἐστὶ
 τις ποιῶντα φύσις ἐν τοῖς ἕσπερ, ἐκταυθα-
 αῖν εἶηται καὶ τὸ δοῖον, καὶ αὐτὴ αὖ εἰν πρῶ-
 τη, καὶ κυριωτάτη ἀρχή· Βέλτιστον μὲν
 ἔν τῷ ἧς θεωρητικῶν ἐπιστημῶν γένος· τῶ-
 των δ' αὐτῶν ἡ τελειοτάτη λεχθεῖσα, περὶ
 τὸ τιμιώτερον γὰρ ἐστὶ ἧς ὄντων. Βελτίων
 δὲ καὶ χείρων ἐκείνη λέγεται κατὰ τὸ οἰ-
 κῆλον ἐπιστητῶν. *Physica quidem circa ea*
est, quæ motus principium in se ipsis
habent; Mathematica vero speculativa
quidem est, & ipsa circa manentia,
vel immutabilia occupatur; non tamen
separabilia.. Circa separabile igitur
Eus, & immobile alia, præter has
ambas, scientia quadam est..... &, si
aliqua quidem talis in entibus natura
sit, illuc profecto divinitas erit, &
hec erit primum, & principale prin-
cipium.... Optimum igitur speculativa-
rum.

(a) Metaphys. Lib. 13. cap. 7..

rum quidem Scientiarum genus, huius vero ipsum ea est, quæ ultimo dicta est; etenim circa honorabilissimum entium est: unaquaque vero melior, aut deterior dicitur secundum proprium objectum, aut scibile.

XII. Ex ejusmodi vero Metaphysicæ objecto, fine, muneribus, ac natura, quæ hactenus à nobis exposita, vel demonstrata sunt, facile ipsius divisio, partium numerus, atque discrimina deduci poterunt. Itaque, cum Metaphysica communes Entis affectiones, adeoque incorporeas etiam substantias veluti objectum sibi propositum contempletur, tres in partes optime, accurateque distingui solet. Ipsarum prima Οὐτολογία *Ontologia*, sive Οὐτοσοφία *Ontosophia*, hoc est *Entis scientia* vocatur, adeoque Ens ipsum, & communes ipsius affectiones omnes exponit. Altera de creatis Spiritibus, præsertim vero de humanis animis, vel humanæ mentis substantia, viribus, attributis differit, adeoque Πνευματολογία *Pneumatologia*, sive Σπῖριτυμ-σκιένζια dicitur; quævis ab aliis Ψυχολογία *Psychologia*, hoc est *Animi scientia* vocetur, & à Philosophis aliis Νοολογία *Noologia*, sive *Mentis scientia*, præsertim vero *Intellectus humani cognitio*.

tio dicatur: quod altera nimirum men-
 tis humanæ potentia, sive *voluntas*,
 ejusque affectiones, & actus fufius,
 atque opportunius in *Ethica* demon-
 ftrentur. Tertia denique Metaphyficæ
 pars Deum ipfum, ejusque existen-
 tiam, naturam, atque attributa singu-
 la folo rationis lumine, sive creatæ
 naturæ viribus contemplatur, adeoque
Θεολογία Theologia naturalis vocatur.
 Nonnulli tamen Metaphyficam ipsam
 duas folum in Partes dirimunt, *Onto-*
logiam fcilicet, ac *Pneumatologiam*; cum
 in altera Metaphyficæ Parte de creato
 fimul, atque increato Spiritu diffe-
 rant, adeoque in illa fingula Spiri-
 tuum genera complectantur; quæ ta-
 men ita concinnius atque accuratius
 fejungi poterunt, ut prius de creatis,
 finitifque Spiritibus, deinde vero de
 infinito, & Increato Spiritu, de ipfo
 nimirum Deo, differatur. Denique
 Volfius, aliique plures peculiarem
 quandam, diftinctamque Metaphyficæ
 Partem *Cosmologiam*, *Cosmosophiam*,
 sive *Cosmogoniam* appellant; quod ipfa
 nimirum prima fubftantiarum genera,
 adeoque primas communesque partium
 illarum affectiones exponat, quibus
 adfpectabilis Univerfi partes, vel
 Mundus ipfe componitur, ut *Tempo-*
ris,

vis, *Spatii*, *Motus*, *Materia* naturam, atque attributa, quæ ipsorum singulis inesse possunt. Hæc omnia tamen facile in Prima Metaphysicæ Parte exponi, sive ad *Ontologiam* referri poterunt; adeoque triplex illa Metaphysicæ Facultatis divisio superius instituta veluti clarior, longeque commodior à nobis eligitur.





METAPHYSICÆ

PARS PRIMA,

S I V E

ONTOLOGIA.



Ingu^las Metaphysicæ Partes ordine superius exposito tradituri ab illa nunc exordimur, quæ græco nomine *ὄντολογία* *Ontologia*, vel *Entis scientia* dicitur: illa nimirum, quæ Ens ipsum in genere, in abstracto, live in communi considerat; hoc est Ens ipsum à circumstantiis, subjectis, ac differentiis omnibus secretum contemplatur, ut ex universali hac Entis idea, vel cognitione, cujuslibet peculiaris entis cognitio, quæ in variis disciplinis aliis inquiritur, clarior, atque accuratior oriatur. Itaque hæc prima Metaphysicæ Pars ceteris quidem disciplinis omnibus aditum præbere, ac faciem veluti præferre dicitur; sed ab iis tamen perspicue, accurateque distingui debet. Etenim, ut optimè ait Aristoteles, (a) *Ontologia εἰσις ἐπιστήμη*

(a) *Metaphys. Lib. IV. cap. I.*

Corsini Metaphys.

τις, ἡ διαρεῖ τὸ ὄν ἢ ὄν, καὶ τὰ τῆς οὐκ ὑπάρχοντα
καθ' αὐτὸ. αὐτὰ δὲ εἰσι ἑδαιμία ἢ ἐν μέρει δι-
χομέων ἢ αὐτῶν ἑδαιμία γὰρ ἢ ἄλλων ἐπισκοπεῖ
καθ' αὐτὸ περὶ τοῦ ὄντος ἢ ὄν· ἀλλὰ μέρος αὐτῶν τι
ἀποτεμνόμεναι διαρεῖται περὶ τοῦ τοῦ συμβεβηκός,
ὅτι αἱ μαθηματικαὶ ἢ ἐπιστημῶν. *Est scientia*
quedam, quæ speculatur Ens prout ens est, &
quæ ei per se insunt. Hæc autem ab omni-
bus, quæ particulares Scientiæ dicuntur, di-
versa esse debet. Etenim ipsarum nulla uni-
versaliter de ente, prout ens est, considerat;
sed ejus aliquam partem abscindens quod ei
accidit speculatur, ut Mathematicæ Scientiæ.
Exinde verò, Aristotele ipso duce, observa-
ri facile poterit quod in ejusmodi Metaphy-
sicæ Parte maxima subinde difficultas, simul-
que tamen certitudo maxima reperitur. Ete-
nim (a) σχεδὸν καὶ χαλεπώτατα γνωρίζειν τοῖς
ἀνθρώποις εἰσι τὰ μέγιστα καὶ ὀλίγα· πρῶτον γὰρ
ἢ αἰσθησίων εἰσι· ἀκριβέστατα δὲ ἢ ἐπιστημῶν καὶ
μέγιστα ἢ πρώτων εἰσὶν fere difficillima cogni-
tu sunt hominibus illa, quæ maxime univer-
salia sunt; à sensibus enim remotissima sunt.
Scientiarum autem illæ certissima sunt, quæ
maxime primorum sunt. Singula tamen On-
tologiæ capita meliori, quo poterit, ordi-
ne, & perspicuitate ita complectemur, ut ini-
tium quidem de *Entis* nomine, natura, va-
riisque ipsius divisionibus, & affectionibus
differamus; deinde verò de variis Entium
quorundam generibus, ipsorumque discrimi-
ne loquamur, singula demum *Entis* attributa,
vel nomina exponamus, quæ entibus
ipsis inesse possunt, aut in iis concipi so-
lent, si cum aliis entibus conferantur.

De Ente.

I. **Q**uidquid ab intellectu nostro percipitur, quidquid existere, intelligi, vel esse potest, quidquid etiam intelligi, existere, sive produci non potest, amplissimo, communi, vel universali *Entis* nomine designatur; nihilque de re concepta affirmari, sive negari unquam poterit, quin prius hæc *Entis* idea in nobis excitetur, quæ communis adeo, vaga, atque indifferens sit, ut ad infinita fere Entium genera diffundatur, adeoque singula, atque suprema quoque Entium genera in hæc amplitudine complectatur. Hinc, ut amplissima hæc *Entis* idea, atque infinita propemodum ipsius extensio facilius percipiat, suprema entium genera nunc observari, sive prima *Entis* ipsius divisio proponi debet; cum præsertim plurima ex ejusmodi entium divisione, sive discrimine deduci soleant, quæ in reliquis Metaphysicæ partibus exponi debent.

II. Itaque primum Ens illud, quod ab intellectu nostro concipitur, ita distingui poterit, ut aliud quidem *reale*, aliud vero *rationis* dicatur. Ens *reale* vocatur illud, quod ab intellectu nostro cognoscente, vel à perceptione nostra non pendet; ideoque extra mentem ipsam existere, sive produci potest, ut *lapis*, *albedo* &c. Sin verò aut illud à nobis perceptum in ipsa solum intellectus perceptione positum sit, ab illa ita pendeat, ut sine intellectu cogitante existere, concipi, sive produci non possit, tunc ens *rationis* vocatur, ut *syllogismus*, *definitio*, *idea*, aliaque id genus intellectus cogitantis opera, sive perceptionum nostrarum genera, quæ ab

4 METAPHYSICÆ.

intellectu solo producuntur, in illo remanent, neque sine intellectu cogitante ullibi existere, vel esse possunt; quamvis eadem, si in seipsis spectentur, vere ab intellectu produci, mentem afficere, vereque in illa existere concipiuntur; adeoque hoc sensu *realia* quædam entia vocari, totidemque in classes distinguere illa possunt, quot varia cogitationum, vel idearum nostrarum genera distinguere possunt, ut in Logica demonstratur.

III. Ens vero *reale* ita supremas veluti in partes distinguere poterit, ut aliud quidem *substantia*, vel *res*, aliud vero *accidens*, vel *rei modus*, dicatur. Substantiæ nomine designatur ens illud, quod existere, concipi, sive produci potest independentem ab alio, nihilque prorsus requiritur, ut illud existere, vel produci possit, quam causa, à qua producat. Ita *Sol*, *lapis*, *homo*, *Pythagoras* &c. substantiæ vocantur, quod ipsorum singula accurate concipi, existere, vel esse possunt, quamvis nulla prorsus entitas alia existere concipiatur. Accidentia verò, seu modi vocantur entia illa, quæ existere, produci vel conservari non possunt, nisi substantiæ cuidam inhæreant, quam *afficere*, vel *modificare* dicuntur; adeoque ne quidem ab intellectu nostro concipi perfecte possunt, nisi ad substantiam ipsam veluti subjectum referantur, in quo subsistant. Ita *motus* sine re mobili, *cogitatio* sine re cogitante, *figura* sine corpore figurato, *quantitas*, & *extensio* sine substantia extensa haberi non poterit; ipsorumque singula accurate percipi, vel explicari non possunt, nisi ad substantiam illam referantur, quam afficere, vel modificare concipiuntur, eaque sublata interire, vel auferri videntur.

IV. Altera quoque suprema, ac veluti prima

ma Entis ipsius divisio ita fieri, proponique poterit, ut Ens ipsum, sive substantia, sive accidens, sive reale, sive rationis sit, aliud *existens*, aliud *præteritum*, aliud *futurum*, aliud *possibile*, aliud denique *impossibile*, sive *repugnans* dicatur.

Ens existens vocatur illud, quod nunc temporis in rerum natura, hoc est in productorum entium numero, serie, sive compage reperitur: illud nimirum, quod ex nihilo jam eductum, suisque à causis productum fuit.

Præteritum vero dicitur illud, quod, quamvis nunc interierit, neque amplius existat, aliquando tamen existens fuit; hoc est, existentium instar, suis à causis productum fuerat.

Futurum vocatur ens illud, quod, quamvis nondum existentiam illam acceperit, sive nondum ex nihilo, suisque ex causis productum fuerit, aliquando tamen existentiam illam est habiturum, adeoque produci debet; cum causa reperiatur, quæ ipsi producendo par esse possit, simulque disposita, vel determinata jam fuerit ad operandum.

Possibile est illud, quod, quamvis existere, sive produci non debeat, nullam tamen contradictionem, vel repugnantiam in se continet ut existere, sive produci possit; adeoque, existentium, vel futurorum instar, existere producique posset, si causa quædam ipsi producendo par foret, aut ipsi producendo disposita, sive determinata reperiretur.

Impossibile denique, contradictorium, sive repugnans vocatur Ens illud, quod si fortasse temere ab intellectu nostro conceptum fuerit, repente quoque intelligitur illud existere, sive produci non posse, sed intrinsece potius repugnare: cum attributum unum in ipso perceptum alteri repugnare, attributum unum

● METAPHYSICÆ

ab alio destrui videatur : ut , si triangulum quatuor lateribus compositum , circulus inæqualibus radiis præditus , totum aliqua sui parte minus concipiatur .

Itaque cum *Ens* a Grammaticis , simulque Metaphysicis definitur *id , quod est* , non ita sumitur *esse* , ut *existere* , vel *existentiam* significet , adeoque iis solum entibus , vel objectis illis conveniat , quibus *existere* , sive produci contingerit ; sed ita potius *Entis* nomen accipitur , ut illa quoque complecti , vel exprimere perfecte possit , quæ *existere* , vel non *existere* fortasse possint : ut proinde communis illa *Entis* idea tum existentibus , tum præteritis , tum futuris , tum possibilibus , tum repugnantibus etiam , vel impossibilibus rebus conveniat .

V. Aliquando tamen hæc *Entis* idea , vel *Entis* nomen *existentibus* solum rebus , vel objectis tribuitur , ut illa à præteritis , futuris , possibilibus , vel impossibilibus distinguantur ; quandoquidem illa , si cum existentibus conferantur , veluti purum *nihil* , sive *non-entia* concipiuntur .

Interdum etiam hoc *Entis* nomen non omnibus entibus , ac objectis illis , quæ producta jam sunt , atque *existentia* sint , sed *substantiis* totum , concedi solet ; quod illæ nimirum , si cum accidentibus comparentur , quibus substantiæ præditæ , vel affectæ sint , nobiliori quodam existentiae genere præditæ fuerint , quippe quæ in seipsis independentem ab alio subsistant .

Denique tum à Platone , (a) tum à pluribus etiam Philosophis aliis emphasi , antonomasia , vel excellentia quadam *Entis* nomi-

(a) In *Theat.* & *Timæo* .

mine Deus ipse intelligi vocarique solet : quod ille nimirum puriori , perfectiori , atque infinito prorsus essentia , vel existentia genere fruatur ; existentiam illam à nullo receperit , sed necessario perfectissimeque existat ; ipsius essentia ab existentia non distinguatur ; quaecumque demum ab illo creata fuerint , sive produci etiam possint , si cum illo conferantur , potius *non esse* , quam *esse* , videantur ; adeoque potius *nihil* , quam *ens* , appellari illa possint .

Hinc in Sacris Literis (a) Deus ipse de se dixit : *Ego sum ens* ; sive , ut latine reddatur , *Ego sum qui sum* : perinde quasi hebraica vox *Jehovah* , græca *ὄν* , latina *Ens* Deo soli convenire , ipsumque exprimere , vel definire , à ceteris entibus aliis distinguere perfecte possit . (b) De creatis verò rebus dicitur : (c) *Omnes Gentes quasi non sint* , *sic sunt coram eo* ; & *quasi nihilum* , & *inane reputatae sunt* : perinde quasi entitas illa , quæ creatis rebus inesse concipitur , si cum infinita Dei substantia conferatur , evanescere , nihilque prorsus esse videatur .

VI. Ceterum , si peculiare illæ dicendi formulæ , seu phrasæ à Sacris Litteris , atque à Philosophis usurpatæ reponantur , *Entis* idea nullis omnino rerum finibus circumscribitur , sed infinita prorsus extensione vel amplitudine quodlibet entis genus ita complectitur , ut in ipsorum singulis concipi , omnibus inesse , de omnibus affirmari perfecte possit . Quin etiam licet aliqui existiment *Entis* ideam non *una voce* , eadem nempe ratione , vel modo , sed *analogice* solum , hoc est

(a) Exod. cap. 3. v 14.

(b) Vid. Petav. Theol. Dgm. Lib. 1. cap. 6.

(c) Isai. cap. 40.

est proportionem quadam, & similitudine Deo, & creatis rebus, itidemque substantiæ, & accidenti convenire posse, quemadmodum prorsus *vita* nomen aut idea *aeri*, *charitati*, *aqua*, *animali* tribuitur, verisimilius est tamen quod communis ille *Entis* conceptus univocè prorsus objectis illis conveniat; hoc est *entis* idea, entisque nomen una prorsus eademque ratione, vel sensu tum Deo, & creatis rebus, tum substantiæ, & accidenti tribuatur. Siquidem discrimen illud, atque infinita varietas, qua Deus ipse à creatis rebus distinguitur, non ab ipsa *Entis* idea, sive conceptu, sed ab attributis, ac perfectionibus illis oriri debet, quæ in Deo, non autem in creatis rebus, reperiuntur: quemadmodum prorsus discrimen, quo substantia ab accidente, sive res à modo distinguitur, à differentiis illis, vel attributis exoritur, quæ substantiæ solum, non accidenti, conveniunt: adeoque, si *Entis* idea à differentiis, attributis, ac perfectionibus illis abstracta, accurateque sejuncta fuerit, omnino simplex, eadem, indivisibilis est futura; ut proinde in subjectis omnibus eadem; atque univoca censi illa debeat, ut in Logica demonstratur.

VII. Illud unum coronidis loco subjecisse nunc libet, quod communis illa *Entis* idea indifferens adeo, vel universalis esse concipitur, ut non modo singula entium genera superius exposita complectatur; verum etiam ipsi quoque *nihilo* adscribi illa soleat: perinde quasi *nihilum* veluti quoddam *entis* genus haberi, vel entis instar concipi consueverit. Etenim ubi *nihil* ipsum à nobis concipitur, entis alicujus idea in nobis excitatur, simulque tamen ejusdem entis *carentia*, sive *privatio* percipitur. Ita, si dixerim spatia, quæ extra Universi fines concipimus, ac *imagina-*

ria vocantur, esse *nihil*, spatia ipsa, sive *nihilum* illud *entis* alicujus instar concipio, simulque tamen intelligo ibi nullum *ens* reperiri. Itaque *nihili* conceptus; aut idea ex utraque tum *entis*, tum *privationis* idea resultat, ipsasque una permixtis componitur; quamvis una alteri perspicue opponatur, ipsamque destruat; quemadmodum prorsus, ut in Logica demonstratur, plurima velut entia quædam aut *positivæ* rerum affectiones concipi solent, quæ tamen nihil sunt aliud, quam meræ entium quorundam ipsis oppositorum *privationes*, purumque *nihil*. Ita *peccatum*, *mors*, *quies*, *tenebræ*, aliaque id genus plurima ita à nobis concipiuntur, perinde quasi *gratia*, *vita*, *motus*, ac *lucis* instar entia forent, vereque illarum instar in substantiis existerent; cum tamen peccatum *gratiæ*, *mors* *vitiæ*, *quies* *motus*, *tenebræ* *lucis* *privatio* sint, neque communi illo *entium* *realium* nomine sive conceptu comprehendì possint; sed *nihil* potius censerì, aut *privationis* nomine vocari illa debeant.

VIII. Exinde vero, hoc est ex nitida distinctaque tum *entis*; tum *nihil*, sive *non-entis*, vel *privationis* idea superius exposita axiomatis illius sive principii veritas maximumque robur inferri debet, quod *Principium contradictionis* vocatur: quod nempe *Idem non potest simul esse, & non esse*: Etenim, si *entis*, simulque *non-entis* idea una conferantur, una alteri perspicue adversari, una aliam excludere, simulque vicissim ab illa destrui concipitur; adeoque ipsarum utraque simul componi, idemque simul esse, ac non esse non potest. Hinc Aristoteles (a) prin-

(a) *Metaph. Lib. IV. cap. 4.*

principium illud exponens αὐτὸ βεβαίῳτι αὐτὴ
 τῆ ἀρχῇ παντὶ certissimum hoc cunctarum
 principium est. Cartesius (a) huic uni velu-
 ti perspicuo, certissimoque principio propo-
 sitionum omnium veritatem innixam esse pu-
 tavit; denique ex hoc ipso *Contradictionis*
Principio veluti fonte uberrimo universalium
 fere cognitionum nostrarum seriem ipsarum-
 que veritatem profluere Vossius (b) existi-
 mavit; adeoque subtiliter, accurateque leges
 illas exposuit, quibus aliqua propositio alte-
 ri *contradictoria* esse possit, ut ex unius ve-
 ritate alterius falsitas inferatur. Sed hæc,
 aliaque id genus fusius, atque opportunius
 in Logica ostendi solent, ubi *contradictionis*
 indoles, characteres, & leges accuratissime
 exponi debent.

C A P U T II.

*De proprietatibus Entis, Unitate, Veritate,
 ac Bonitate.*

I. **C**UM *Entis* idea; sive conceptus com-
 munis adeo indifferens, ac univer-
 salis sit, ut nullis omnino differentiis, re-
 rumque terminis circumscribatur, sed fines
 omnes excedens ad singula Entium genera
 diffundatur, singulae quoque affectiones illæ,
 attributa, vel proprietates, quæ huic Enti
 conveniunt, amplissimæ nimirum, abstractæ,
 communique Entis ideæ conjungi, vel inesse
 concipiuntur, fines omnes excedere, sive
transcendere existimantur; ideoque *transcen-*
dentes vocantur, ut à categoricis attributis
 illis.

(a) *Medit. I.*

(b) *Ontolog. Part. I. Sect. I. cap. I.*

illis distinguatur, quæ peculiaribus solum entis generibus inesse debent; iis nimirum entibus, & objectis solum conveniunt, quæ in certo quodam distinctoque entis genere, sive *categoria* continentur.

II. Ejusmodi verò *transcendentales* Entis proprietates tres à Philosophis distingui solent, *Unitas*, nempe, *Veritas*, ac *Bonitas*, de quarum singulis hic ordine differetur.

Unitas Entis nihil est aliud, quam *carentia*, sive *privatio divisionis*; neque alia de causa conceptus *Entis* unus, & simplex vocatur, nisi quod ille varias in partes dirimi, sive distingui non potest; nec ens aliquod à nobis perceptum *unum* vocatur, nisi quod illud in seipso indivisum, atque a ceteris entibus distinctum concipitur. Quamvis autem *unitas* ipsa, quæ in Ente concipitur, *negative* solum exprimi, vel definiri convenit; ipsa tamen in se *positiva* quædam perfectio, verusque entis modus haberi debet, quo ens ipsum accurate in se simplex, & ab entibus aliis distinctum efficitur; quemadmodum propterea plurimæ affectiones aliæ, ut *immortalitas*, *impenetrabilitas*, quamvis ubi definiri illæ debeant, *negative* solum exprimantur, *positive* tamen censi debent, ut opportunius in Logica observatur.

III. Itaque, cum *Unitas* sit *carentia divisionis*, vel distinctioni opponatur, totidem unitatis genera distingui poterunt, quot sunt divisiones ipsæ, vel distinctionis genera, quæ in duobus entibus à nobis perceptis inesse possunt, distinctio verò, varietas, atque divisio, quæ duobus entibus inter se comparatis inesse potest, alia *generica*, alia *specifica*, alia *numerica* vocatur.

Generica distinctio dicitur illa, quæ reperitur in entibus, quæ sub diverso, distinctoque genere continentur, ut inter *circulum*,

& *lineam* circulus enim sub *figura*, linea vero sub *longitudinis* genere collocatur.

Specifica vero vocatur illa, quæ reperitur in entibus, quorum utrumque sub uno eodemque genere collocatur, sed ad diversas tamen *species* referri illa debent: ut inter *circulum*, & *triangulum*, qui sub uno eodemque *figura* genere continentur, sed varias tamen, distinctasque figuræ *species* constituunt. Sic inter *hominem*, ac *leonem* distinctio *specifica* reperitur; cum uterque sub *animalis* genere collocetur, sed ad diversas tamen animalis *species* referantur.

Numerica demum distinctio censetur illa, quæ reperitur inter *individua* ejusdem speciei; illa nimirum, quæ quamvis sub uno eodemque genere, simulque specie collocata sint, à circumstantiis tamen, vel affectionibus singularibus ita distinguuntur, ut unum cum altero confundi non possit, ut *Socrates* à *Pythagora*, *circulus A* à *circulo B*.

IV. Atque ex ejusmodi quidem varietatis, differentiæ, vel distinctionis generibus illa, quæ *generica*; & *specifica* fuerit, oriri concipitur ab essentia ipsa; nimirum à differentia, qua ens unum ab alio, veluti intrinseco principio, caractere, sive discrimine, componi, atque à ceteris entibus omnibus distingui debet; ut illa proinde, quæ *genere*, vel *specie* differant, variam quoque naturam, atque essentiam habere dicantur. Numerica verò, singularis, vel individualis distinctio à singularibus circumstantiis, & affectionibus illis exoritur, quæ quamvis essentiam minimè constituent, ita tamen huic enti, vel individuo conveniunt, ut omnes unà conjunctæ alteri subjecto inesse, vel convenire non possint; adeoque subjectum ipsum, sive naturam illam prorsus *individuum*, alteri nimirum incommunicabilem efficiunt.

Ea-

Facile verò intelligi, deprehendique poterit quod ejusmodi distinctionum genera tum *substantiæ*, tum *accidenti* communia esse debent; cum accidentia ipsa, substantiarum instar, aut genere, aut specie, aut solum numero differre possint: ut inter odorem, ac motum generica; inter albedinem, ac nigredinem specifica; inter hujus, alteriusque corporis albedinem numerica solum varietas, atque distinctio reperiatur.

V. Quandoquidem vero substantiæ ipsæ ab accidentibus distinguere debent, alia distinctionis varietas admitti solet, quæ ex ipsa substantiarum, ac modorum indole pendere debeat; ut alia nimirum distinctio *entitativa*, alia *modalis*, alia *virtualis* dicatur.

Entitativa distinctio vocatur illa, quæ reperitur inter varias res, quarum entitates ita variæ, distinctæque sint, ut una ab alia separari, una sine alia existere, una denique sine altera concipi perfecte possit; ut inter lunam, ac solem: hominem, ac lapidem.

Modalis vero dicitur illa, quæ reperitur inter rem, & modum rei, hoc est inter substantiam, & accidens. Etenim modus ipse, vel accidens à substantia separari, sine illa existere, vel accurate concipi non potest; adeoque non *entitas* quædam ab entitate substantiæ distincta, sed alterius solum entitatis affectio, censerì poterit.

Virtualis demum distinctio, quæ tamen accurate potius distinctionis causa, & origo censerì, quam vera distinctionis species vocari potest, est illa, quæ ab intellectu nostro concipitur in aliqua re, quæ, quamvis unica, & simplex in se sit, pluribus tamen æquivalet, adeoque occasionem præbet intellectui ut in illa plures veluti partes invicem distinctas concipiat. Sic in homine *animalitas* à *rationalitate* distinguì solet; in aureo

nu.

numero decem librarum singulas fere decem libras veluti distinctas percipimus, in Deo, ejusque attributis distinctionem aliquam inesse concipimus; perinde quasi Deus ipse à suis perfectionibus, sive attributis unum ab alio distingueretur; cum tamen in Deo nulla partium varietas, distinctio, vel compositio admitti possit; sed quidquid in illo concipitur Deus ipse sit, atque ab ipsa Dei natura, & essentia nullo discrimine distinguatur.

VI. Præter ejusmodi varietatis, aut distinctionis species, quæ à Philosophis omnibus admitti solent, plurimi sunt, qui subtilius adhuc alterius distinctionis genus enumerant, quæ *formalis* vocatur; quod illa nimirum inter varias perfectiones, attributa, sive *formalitates* illas concipiatur, quæ in ipsa re concepta reperiuntur, ut ab illa separari, mutuo sejungi, una sine altera produci non possit. Ita *genus*, ac *differentia*, quibus veluti partibus *essentia* componitur, ejusmodi distinctionis *formalis* genere distinguuntur: quod illæ neque entitates aliquæ, neque entitatis alterius modi, vel accidentia esse possint; sed intrinsecæ potius formæ quædam, aut *formalitates* sint, quæ nitide, accurateque in essentia ipsa, vel re concepta distinguuntur debent; unde distinctio ipsa *formalis*, *actualis ex natura rei* vocatur quod ab intellectu nostro non pendet, semper in ipsa re reperiatur, atque ab ipsius natura oriatur. Plerique tamen hoc aliud distinctionis genus in creatis præsertim rebus prorsus inutile existimant, cum distinctio illa, quæ inter varias essentia partes, rerum formas, atque ut ab iis vocantur, *gradus metaphysicos* intercedit, *virtualis* solum censeri possit, ut in exemplis superius expositis apparet.

VII. Ceterum ex quatuor istis distinctionis generibus, entitativa, simulque modalis etiam distinctio *realis* vocatur quod ab intellectu non pendeat, sed in objectis ipsis existat; adeoque in seipsis diversa, sive distincta illa sint. Sin vero varietas ipsa, sive distinctio, quæ in objectis concipitur, non in rebus ipsis existat, sed ab intellectu solo oriatur, tunc illa distinctio *rationis* vocatur, ut cum *divinitas* ab ipso *Deo*, *humanitas* ab *homine* distingui solet. Ita *virtualis* ipsa distinctio ad distinctionem *rationis* revocari facile poterit, *formalis* autem inter utramque, *realem* scilicet, ac *rationis* intercedere existimatur, ut hac quidem major, illa vero distinctione minor dicatur.

VIII. Quandoquidem ergo singula varietatis, differentie, vel distributionis genera unitati opponuntur, atque unitas ipsa, quæcumque illa fuerit, ac in re concipitur, alicui distinctioni contraria esse debet, ubi singula distinctionis genera observata jam fuerint, quæ in objectis illis appareant, quæ à nobis percipiuntur, atque inter se comparantur, facile quoque ex unitatis specie agnosci, vel definiri repente poterit, quæ in duobus entibus à nobis perceptis regitur. Itaque, cum in Entis conceptu nulla prorsus partium varietas, neque distinctio reperitur, unitas illa, quæ huic Enti conveniet, omnium maxima, & perfectissima censei debet. Sin verò quodlibet ens aliud concipatur, atque cum aliis entibus conferatur, partim cum illis conveniet, partim etiam discrepabit; adeoque in illa partim *unitas*, partim *distinctio* percipietur, ut in exemplis illis superius expositis apparet.

IX. Quod si in duobus entibus, aut ideis, quæ ab intellectu nostro perceptæ fuerint, nulla prorsus varietas, atque distinctio reperia-

fiatur, unitas illa, quæ in ipsis concipitur, *identitas* appellatur; ut inter *triangulum*, ac *figuram tribus lateribus circumscriptam* identitas esse concipitur. Ita, si ens aliquod in certo quodam entium genere concipiatur, *unum* dicitur; si vero in eodem ipso entis genere nullum ens aliud ipsi simile reperiat, tunc *unicum* vocari solet, ut *unicus* filius vocatur ille, qui fratribus careat.

X. Observari denique poterit quod ens aliquod interdum *unum* vocatur, quod omnino simplex, & incompositum sit, adeoque unitas illa ex *simplicitate*, veluti fonte, pendere debet. Aliquando vero unitas ipsa ex partium *unione*, sive *compositione* resultat, qua partes ipsæ ita conjunctæ connexæque sint, ut subjectum *unum* efficiant. Ejusmodi vero compositum variis ex partibus una conjunctis formatum aliquando dicitur ens *unum per se*, aliquando vero ens *unum per accidens*. Si partes illæ, quibus ens ipsum componitur, suapte natura comparatæ sint ut ens illud constituent, tunc *unum per se* vocatur: ut variæ partes, quibus humanum corpus componitur. Sin vero partes illæ temere solum, fortuito, & contingenter una conjunctæ fuerint, *unum per accidens* appellatur, ut *exercitus*.

XI. Altera communis, & transcendentalis Entis affectio, sive proprietas dicitur *Veritas*. Etenim cum quodlibet ens, sive possibile, sive impossibile, sit, ab intellectu cognosci, vel cognitionis objectum esse possit, quidquid autem ab intellectu percipitur, ipsique cognoscenti veluti objectum proponitur, *verum* dicatur, *veritas* ipsa singulis omnino entium generibus ita conveniet, ut universali, communique *entis* idæ ærtissime jungatur. Itaque veritas ipsa nihil est aliud, quam ens ipsum, ut ab
intel-

Intellectu nostro, sive divino concipitur: cumque plurima, ac infinita fere entium genera cognosci possint, ipsorum singula suam veritatem habere debent, iisque imaginibus, & archetypis ideis illis accuratissime respondent, quæ in divina mente reperiuntur. Ejusmodi autem veritas, quæ entibus, & objectis omnibus inesse debet, *objectiva* vocatur: unde, quemadmodum entitas ipsa, vel archetypa divinæ mentis imago variari non potest, ita quoque metaphysica, transcendentalis, & objectiva veritas alterari, sive mutari non poterit; ut ens ipsum aliquando *verum*, aliquando *falsum* dicatur. Fieri tamen subinde poterit, ut, si cognitio nostra cum ente cognito conferatur, aliquando quidem ipsi conveniens, aliquando vero repugnans sit, adeoque aliquando *vera*, aliquando *falsa* dicatur. Hæc altera veritatis species, quæ non in objecto cognito, sed in intellectu cognoscente, reperitur, *formalis* vocatur: quamvis illa ex objecto cognito, sive objectiva veritate pendere debeat juxta celebre effatum illud: *Ex eo quod res est, vel non est, perceptio, vel propositio dicitur vera, vel falsa*. Itaque veritas ipsa formalis ita variari subinde poterit, ut cognitio nostra vel vera, vel falsa esse possit; & interdum una eademque propositio, si de re mutabili formata fuerit, aliquando vera, aliquando falsa esse potest, ut opportunius in Logica demonstratur.

XII. Quæcumque vero de *objectiva*, simulque de *formali* Veritate jam diximus, de tertia quoque Entis affectione, vel attributo observari, vel intelligi profecto poterunt, nimirum de *Bonitate*; nisi quod veritas ad *intellectum*, ejusque cognitionem, *bonitas* autem ad *voluntatem*, ejusque amorem refertur. Itaque cum quidquid est *ens*, verique

ENTIS

entis instar concipitur ab aliqua causa, vel saltem à Deo produci, adeoque ab illo diligì, probarique possit, perspicue apparet quod ens omne voluntatis objectum esse, ideoque *bonum* censi poterit: ut proinde bonitas ipsa, quæ *objectiva* vocatur, unitatis, ac veritatis instar, entibus omnibus inesse, adeoque communis, & transcendentalis. *Entis* affectio, sive proprietas haberi debeat. Bonitas autem illa nihil est aliud, quam ipsum ens quatenus ab aliqua voluntate diligì, vel amari potest; adeoque Bonitas ipsa, veritatis instar, alterari, mutarique non poterit, ut ens ipsum aliquando *bonum*, aliquando *malum* dicatur; sed ens omne, quodcumque fuerit, hac *objectiva*, vel *intrinseca* bonitate præditum esse debet. Itaque, cum quidquid ab ipso Deo producat ens esse debeat, ipsaque repugnet in operando vel à proposito fine, vel ab ipsa rei producendæ perfectione deficere; quidquid à Deo productum fuerit, ab ipso amabile, vereque bonum censendum erit, ut optime proinde in sacris Litteris de Deo dicatur (a) *diligis omnia, quæ sunt, & nihil odisti eorum, quæ fecisti*; cumque (b) *omnia per ipsum facta sint, & sine ipso factum sit nihil quod factum est*, dubitari certè non poterit quin creatæ res, quæcumque illæ fuerint, in se ipsis bonæ censi, vocarique debeant. Peccatum verò à Deo neque diligì, neque probari, neque produci unquam poterit, cum peccatum ipsum non ens, sed *entis privatio*, sit; ipsumque non a *potentia* quadam, sed ab *impotentia*, oriatur: ab illa nimirum causa.

(a) Sap. cap. 17. v. 24.

(b) Ioan. cap. 1. v. 3.

sa producat, quæ a fine sibi a natura proposito aberrat, & effectum ipsum debita perfectione, vel ordine, vel honestate privatum producat. Itaque, cum humana voluntas ad *verum*, aut ad *apparens* bonum inflecti, a fine sibi a natura proposito deflectere, actum aliquem exercere, possit, qui legibus opponatur, adeoque debita rectitudine, vel honestate privatur, humanæ voluntatis actus aliquando *bonus*, aliquando *malus* dicitur; extrinseca nimirum, atque *formali* bonitate præditus, aut destitutus, esse illa poterit, quæ ex ipsa objecti amati natura, ex hominis indole, & statu, præsertim verò naturæ jure, ceterisque legibus oritur. Etenim, si actus ipse, qui a nobis exercitur, sepositis legibus, atque moralis bonitatis causa, & origine, in se concipiatur, semper *ens* aliquod, adeoque physice *bonum*, esse debet: unde non ab homine solum, sed ab ipso quoque Deo, veluti prima supremaque entium omnium causa, produceretur.

C. A. P. U. T. III.

De essentia, existentia, & subsistentia.

I. **Q**Uemadmodum in *Entis* idea, sive conceptu, quamvis ille maxime simplex; & incompressus sit, *unitas* tamen, *veritas*, ac *bonitas*, distinguere facile poterit; ita quoque si conceptus ille ad varia entium genera referatur, hoc est *ens* ipsum in variis veluti statibus concipiatur, exinde facile novæ affectiones aliæ, vel attributa orientur, quarum ope, veluti discrimine, vel caractere quodam *ens* unum ab alio distinguatur. Ejusmodi certe sunt *essentia*, *existentia*, *subsistentia*, de quarum singulis clariori quo poterit ordine nunc differetur;

cum.

cum præsertim ex attributis illis, ipsorumque legibus plurima in disciplinis omnibus usurpata dimanent.

II. Essentiæ nomine intelligi, vocarique solet *id, quod intrinsece ens aliquod constituit*, adeoque in illo veluti primum, aliorumque attributorum omnium fons, & origo concipitur; illud nimirum, quo ens ipsum est *id, quod est*, ut aliud esse non possit; sed ejusmodi potius essentiæ, sive principii vi à ceteris entibus omnibus accuratissime distinguatur. Ita radiorum omnium æqualitas *circuli* essentia vocari, censerique solet; neque enim circulus ipse alia de causa *circulus* esse concipitur, vel intrinsece ab omnibus figuris aliis distinguitur, nisi quod ille radios omnes invicem æquales habeat. Hominis essentia vocatur principium illud, quo homo intrinsece redditur *homo*, trianguli essentia in hoc uno posita reperitur quod sit figura tribus lineis, sive lateribus circumscripta; Siquidem ubi principium illud in *circulo, homine, triangulo* nitide accurateque perceptum fuerit, circulus ipse, homo, triangulum nitide accurateque concipitur esse quod est, atque à ceteris entibus aliis intrinsece, ac necessario distinguitur.

III. Itaque essentia quælibet ex principii omnibus, vel attributis illis exoritur, quæ rei *intrinseca*, vel *essentialia* dicuntur; hæc nimirum, quæ ita rei conveniunt, ut, si ipsorum aliquod auferatur, illa quoque res omnino auferri, vel destrui videatur; Sin vero illa posita, simulque conjuncta concipiantur, ipsa quoque res constituta, vel repente posita concipiatur. Ejusmodi vero principia, vel attributa rei essentialia, ac intrinseca ita distingui solent, ut aliud quidem *genus*, aliud vero *differentia* dicatur; cum res, & essentia quælibet ita duabus veluti par-

partibus componatur, ut alia quidem pluribus etiam entibus aliis conveniat, ideoque *genus*, sive attributum *essentiale genericum* appellatur, altera vero huic uni rei, vel essentiae conveniat, ipsamque discriminis, & characteris instar ab aliis distinguat, adeoque merito *differentia*, sive attributum *essentiale distinctionum* vocatur. Id certe fusius, atque opportunius in Logica ostendi debet, satisque perspicue in superioribus exemplis apparet: cum *circuli* essentia ex *figura*, simulque *radiorum aequalitate* resultet: circulus autem ipse *figura* nomine atque attributo cum *quadrato*, *triangulo*, aliisque pluribus conveniat, ab iisque tamen *radiorum aequalitate*, veluti discrimine, secernatur.

IV. Quandoquidem ergo nitida, & accurata rerum essentia non ex unico, sed ex attributis omnibus una conjunctis, exoritur, quæ ipsi rei intrinseca, & essentialia fuerint; intima rerum indoles, atque natura plerumque nobis incognita, vel obscura esse solet, cum alterutrum ex principiis, vel attributis illis ab intellectu nostro concipi, vel explorari non possit. Hinc essentiae ipsæ obscuris plerumque, & confusis ideis percipiuntur, obscuris etiam, ambiguis, confusisque vocibus exprimuntur; unde maxima errorum series, aut opinionum varietas oriri solet; quæ tamen facile dirimi vitarique posset, si entis idea nitida, atque accurata conciperetur; id, quod obscurum fortasse fuerit ac incertum, à perspicuo certoque secernatur; & definitiones omnes, quæ exprimendis explicandisque rerum essentiis institutæ sunt, perspicuis distinctisque vocibus efferantur. Quod si attributa illa, quæ rebus intrinseca, vel essentialia fuerint, à nobis intelligi, vel explorari non possint, ita es ipsa definiri, sive describi tunc poterit,

ut



ut expositis, numeratisque pluribus ex affectionibus illis, quæ ipsi conveniunt, ex illis omnibus unâ conjunctis ipsius indoles accurate exponi, atque à rebus aliis distingui possit.

V. Ceterum principium illud, quo intrinsece res constituitur, non *essentia* solum, sed interdum etiam *natura*, vocari solet; hoc uno tamen discrimine, quod ubi principium illud à nobis in re concipitur veluti fons, & origo, ex qua proprietates omnes, & affectiones illæ dimanant, quæ in ipsa fuerint, *essentia* dicatur; ubi verò concipitur tanquam causa, fons, & origo operationum, quæ ab ipsa re producuntur, *natura* vocetur. Verum, cum operari sequatur ad esse, unus idemque censeretur debet fons, ac principium, quo ens aliquod esse, simulque operari concipitur; adeoque *natura*, & *essentia* solo nomine distinguetur.

VI. Exinde vero jam facile intelligi, probarique poterit quod ejusmodi rerum natura, atque essentia semper eadem, constans, ac invariabilis esse debet, ut illa ne quidem ab infinita Dei potentia alterari, mutarique possit. Quamvis enim Cartesius, (a) alique plures existiment intimas illas rerum essentias, reluctantem licet intellectu nostro, à Deo variari mutarique posse, ut circulus angulis præditus, materia cogitandi capax, triangulum quinque lateribus compositum &c. producat, quicumque tamen ejusmodi rerum ideas nitide, accurateque perspexerit, repente profecto intelliget id à Deo fieri, sive produci non posse. Quum enim *essentia* nomine intelligatur principium illud, quod dat

(a) *Respons. ad VI. Obje. 5. 6. & 8.*

dat esse rei, ipsasque in certo quodam distinctoque entis genere constituit, fieri certe non poterit ut principium illud, vel constitutivum varietur, quin ipsa quoque res constituta, quæ hoc esse receperat, atque intrinsece ab illo determinata fuerat, alteretur. Ita si circulo radiorum æqualitas auferatur, circulus esse non poterit: si triangulum quinque lateribus efformatum temere concipiatur, non amplius *triangulum*, sed *pentagonum*, est futurum. Itaque poterit quidem Deus ens quodlibet à se productum destruere, singularem essentiam illam, quæ in ipso reperiebatur, in nihilum redigere, novamque prorsus essentiam aliam, adeoque novum ens aliud repente producere: sed efficere certe non poterit, ut, essentia veteri adhuc incolumi, novum ens producat. Accedit etiam quod ens illud, cujus essentia variata foret, non amplius unica, sed duplici potius, distinctaque essentia constare deberet, quarum una alteram destruere cogeretur, adeoque simul esse, & non esse deberet, quo nihil absurdius magisque repugnans effingi potest: denique, ne argumentis aliis hic immorer, rerum *essentiæ* archetypis ideis illis, ac imaginibus respondere debent, quas ab æterno Deus in mente habuit, & ad quarum similitudinem res omnes produxit. Itaque sicut imagines illæ nitidæ distinctæque esse debent, adeoque confundi, alterari, sive mutari non possunt; ita quoque rerum *essentiæ*, quæ distinctis ideis illis respondent, invariabiles esse debent.

VII. Quamvis autem Deus intimas illas rerum essentias invertere, sive mutare non possit, adeoque illa efficere, quæ *repugnantia*, vel *contradictoria* dicuntur, omnipotens tamen esse, vocarique ille poterit. Siquidem ut *causæ* quædam *omnipotens* sit, aut infinita

vi prædita censeatur, id unum requiritur, ut infinita prorsus rerum genera, vel infinitos effectus producere repente possit. Itaque, cum effectus illi, qui *possibiles* sunt, nullamque repugnantiam continent, sint infiniti, si divina vis ac potestas ad ejusmodi solum possibiles, sive non repugnantes effectus extendatur, ipsisque producendis par esse possit, infinita censeferi vocarique illa poterit; quamvis ad illa quoque non extendatur, quæ intrinsece repugnantia, contradictoria, vel impossibilia fuerint. Addi etiam poterit quod agendi vis infinita ad illa solum extendi debet, quæ vere *entia* fuerint; illa nimirum, in quibus vera, ac realis entitas esse possit, quæ veluti potentia terminus, ac effectus concipiatur. Sed effectus illi, qui *contradictorii* dicuntur, hoc est entia illa, quæ repugnantia, vel impossibilia dicuntur, *entia* non sunt, nec ulla vera, sive realis entitas illis inesse potest, cum ex *entis*, simulque *non entis* idea temere à nobis permixta oriantur, ergo vera, ac realis agendi vis, ac potentia repugnantes illos effectus producere, rerumque essentias alterare non poterit. Denique, ut opportunius alibi demonstrabitur, agendi vis, ac potentia, quæ in ipso Deo reperitur, non modo ex effectibus ipsis, ipsorumque dignitate, vel numero, sed ex ipsa quoque ratione deduci debet, qua res illas produxerit. Itaque, cum Deus omnia ex *nihilo*, sive *non ente* produxerit, idque sine infinita potentia peragi non possit, infinita ipsius potentia tum ex *possibilibus*, tum ex *creatis* etiam rebus manifestissime deduci potest; ut inutile proinde sit omnipotentiam ex *impossibilibus* etiam, vel repugnantibus rebus inquirere, ac demonstrare.

VIII. Illud etiam intelligi, vel inferri facile

esse poterit quod essentia ipsa, sive natura non modo *existentibus* omnibus, *futurisque* rebus conveniet, sed *possibilibus* etiam, sive non repugnantibus convenire debet. Quidquid enim ab intellectu nostro concipitur, quidquid existere, vel esse potest, quidquid intrinsece contradictionem ullam, aut repugnantiam non contineat, essentia sua, naturaque prædictum esse debet; nec alia sane de causa *possibile* censeri, vocarique solet, nisi quod in ipsius essentia rite percepta nulla repugnantia reperiatur. Itaque, cum infinita prorsus rerum genera, simulque in quolibet entis genere infinita prorsus individua esse possint, perspicue apparet quod essentia ipsa infinitis omnibus rebus possibilibus inesse debet.

IX. Quandoquidem vero ex infinitis entibus illis, quæ *possibilia* fuerant, aliqua reperiuntur aut esse possint, quæ suis à causis producta, vel aliquando producenda sint, in ejusmodi rebus jam productis, aut producendis præter *essentiam*, quam possibilibus etiam rebus convenire posse jam diximus, nova quædam, ac distincta perfectio, novusque modus admitti debet, quo eadem entia ab entibus aliis mere possibilibus distinguantur. Ejusmodi nova perfectio, quæ in entibus jam productis resultat, ipsarumque essentia superadditur, vocatur *Existentia*, & à Philosophis optimè definitur *sistentia*, sive *positio rei extra nihil, & omnes causas*.

X. Itaque dubitari non poterit quin in creatis rebus, quæcumque illæ fuerint, ipsarum *essentia* ab *existentia* distingui debeat. Etenim essentia ipsa entibus etiam mere possibilibus convenit, existentia vero iis solum, quæ producta, vel producenda fuerint. Rerum *essentia* invariabilis, ac immutabilis esse debet, ut certæ cuidam, distinctæque rei

certa quædam, ac distincta essentia necessario constanterque conveniat; *existentia* vero, si Deum unum exceperis, fortuito solum, & contingenter in rebus reperitur. Essentia denique iis in rebus accurate concipi, vel inesse debet, quæ adhuc in causæ potentia continentur, nondumque ex nihilo, sive potentia causæeductæ fuerint; *existentia* vero iis solum entibus inesse, vel adscribi debet, quæ ex nihilo, sive causæ potentiaeductæ fuerint.

XI. Quamvis autem *essentia* ipsa ab *existentia*, quæ alterius perfectionis instar adjuncta illi fuerit, alterari non possit: sed in aliqua re, sive *possibilis* solum, sive *existens* illa sit, eadem prorsus essentia perseveret; ubi tamen essentia ipsa existentiam receperit, *singularis* efficitur, cum prius indifferens, ac *universalis* esse deberet. Etenim essentia illa, quæ producta jam fuerit, peculiaribus quibusdam circumstantiis admixta, sive conjuncta esse debet; adeoque in unico solum subjecto, vel individuo reperitur, ut alteri subjecto inesse, vel convenire non possit: ut essentia *hominis* in *Socrate*, natura *circuli* in *circulo B*. Sin vero natura ipsa ab *existentia*, hoc est a subjectis omnibus, abstracta concipiatur, quibus inesse vel convenire possit, ut essentia *circuli* a *circulis* omnibus, qui descripti, vel describendi fuerint, *hominis* natura ab *individuis* omnibus, quæ *existentia*, vel exitura unquam sint, tunc essentia ipsa prorsus unica, & indifferens esse poterit, ut pluribus subjectis conveniat, adeoque *universalis* vocabitur. Itaque communis illa, vel *universalis* natura, quamvis a plurimis in individuis ipsis *existens* dicatur, perinde quasi in individuis delitesceret, & cum individuis, & singularibus naturis admixta foret; non alibi profecto existere, vel ad-

admitti illa debet, quàm in intellectu nostro, qui singularem essentiam aliquam uni subjecto illatam à circumstantiis omnibus, quibus adjuncta fuerat, *precisionis*, vel *abstractionis* ope sejungit, ut omnino indifferens, & apta fiat ut alteri quoque subjecto, vel individuis omnibus inesse possit; cumque ab ejusmodi circumstantiis ita dividatur, ut essentia ipsa in pluribus individuis *multiplex* sit, ubi à circumstantiis ipsis abstracta jam fuerit, omnino *simplex*, atque unica censeretur illa poterit, ut in Logica demonstratur.

XII. Denique præter *essentiam*, & *existentiam* ipsam, quæ tum in *substantiis*, tum in *accidentibus* etiam reperitur, cum accidentia ipsa, substantiarum instar, existere, sive produci possint, nova quædam affectio novusque modus in substantiis ipsis admitti debet, quo veluti caractere quodam, sive discrimine ab accidentibus distinguatur. Hæc nova perfectio, novusque modus, qui non *accidenti*, sed *substantiæ* solum, conveniat, vocatur *hypostasis*, vel *subsistentia*; ultima nempe perfectio, forma, vel actus, quæ res, aut essentia quædam existens, ita perficitur, ut existere, conservari, vel operari possit independenter ab alio, ut in I. Capite jam demonstravimus, ubi de substantiæ, modique discrimine loquebamur. Ejusmodi verò subjectum, cui tres illæ affectiones conveniant, in quo nimirum *essentia*, *existentia*, simulque *subsistentia* reperiatur, non modo *subsistentia*, verum etiam *suppositum* appellatur; atque, ubi incorporea natura præditum sit, vocatur *persona*; ut optime proinde *persona* tum à Boetio, (a) tum à Phi-

(a) Lib. de Pers. & Nat. cap. 2.

Philosophis aliis definitur *rationalis natura individua substantia*. Exinde vero facile apparet quod persona ipsa non ab *essentia*, neque ab *existentia* constituitur, cum illarum utraque non substantiæ solum, ac personæ, sed accidenti quoque conveniat; sed ab *hypostasi* solum, vel *subsistentia* oriri formarique debet; ut ubi plures, distinctæque *hypostases* admittantur, plures etiam, distinctæque *personæ* esse debeant.

XIII. Quamvis autem in creatis rebus *hypostasis* ipsa multiplicari non possit quin *essentia* quoque, sive natura multiplicetur, atque ubi plures *hypostases*, totidemque *personæ* fuerint, totidem etiam singulares *naturæ* esse debeant: in divinis tamen, ubi nulla perfectio, circumstantia, sive proprietas effingi potest, cujus ope natura dividi, varias in partes distingui, adeoque multiplicari unquam possit, *hypostasis* quidem, adeoque *persona*, multiplicari, sed *essentiæ* tamen atque *naturæ* omnino simplex, atque unica in pluribus personis illis admitti poterit. Etenim, cum *essentia* ab *hypostasi* distinguatur, si *hypostasis* ipsa aliqua de causa multiplicari debeat, nulla verò de causa natura dividi, vel multiplicari unquam possit, una prorsus eademque natura pluribus personis inesse poterit. Atque ita certe divinæ fidei lumine, divinæque revelationis præsidio erudimur quod in divinis, atque ineffabili *Trinitatis* mysterio tres *Personæ* invicem distinctæ, sed unica tamen *essentia*, atque natura admitti debet. Ita vicissim in Christo, vel *Incarnationis* mysterio erudimur, quod in Christo ipso duplex quidem *natura*, *divina* scilicet, ac *humana*, duplex etiam voluntas admitti debet; sed unica tamen, eaque *divina*, *Persona*; cum divina divinæ Personæ *hypostasis* creatæ *subsistentiæ*, vel *humanæ* hy-

hypostasis vices impleverit ; adeoque in illo neque humana hypostasis , neque humana persona reperiretur ; sed humana solum natura à divina Persona assumpta , sibi que conjuncta foret . Quandoquidem verò operationes omnes non ab *essentia* , sive natura , sed à *persona* oriuntur , ipsique veluti causæ adscribi debent , operationes omnes à Christo peractæ infiniti valoris , ac dignitatis esse debebant , quippe quæ ab infinita , divina nimirum , Persona veluti causa producebantur . Sed hæc Theologis explicanda , divinæque fidei præsidio subtilius exponenda relinquimus , cum naturæ lumen , adeoque Metaphysicæ nostræ fines , excedant : nonnulla tamen hic obiter , ac opportune indicanda fuerunt , ut facile ostenderetur quod , quamvis ejusmodi *Trinitatis* , & *Incarnationis* Mysteria mentis humanæ vires longissime superent , atque ab illa perspicue intelligi , comprehendique non possint , ab ipso tamen rationis lumine non abhorrent ; nihilque continent , quod impossibile , repugnans , contradictorium sit ; cumque Deus infinita sui perfectione , sive potentia nihil efficere , continere , vel revelare unquam possit , in quo repugnantia , vel contradictio reperiatur , adeoque ~~necidæ distinctæque cognitioni nostræ~~ , primisque entis affectionibus adversetur , perfectiones tamen illas in se complecti , easque nobis in Mysteriis illis credendas proponere , vel revelare potuit , in quibus nulla repugnantia , vel contradictio reperiatur , si *hypostasis* ab *essentia* distinguatur , quemadmodum sane perfectiones illas , sive attributa distinguenda fore jam vidimus .

CAPUT IV.

*De Ente possibili, ac impossibili, necessario,
& contingenti; mutabili, &
immutabili.*

I. EX iis, quæ de Entium natura, existentia, ac hypostasi jam demonstravimus, universa quoque varietas illa nunc exponenda deducitur, quæ Entia quædam *possibilia* vel *impossibilia*; *necessaria*, vel *contingentia*; *mutabilia* demum, vel *immutabilia* dicuntur; simulque discrimina, variique modi deprehendi poterunt, quibus ens aliquod vel possibile, vel necessarium, vel mutabile censi, vocarique possit.

II. Possibile vocatur ens illud, in quo nulla contradictio, vel intrinseca repugnantia continetur ut esse possit; ubi nimirum idea clara & distincta ejusdem entis ab intellectu nostro percepta fuerit, attributum unum, quod in ipso concipitur, alteri non repugnat; sed unum potius alteri conjungi, vel convenire posse percipitur; ut *figura mille laterum*, *mons aureus*, *lactæum flumen*, *corpus gravitatis expers* &c.

Impossibile vero dicitur illud, in quo attributum unum alteri repugnat, ipsumque destruit; ut proinde ens illud unâ concipi, simulque destrui, vel auferri videatur; ut *triangulum quinque lateribus formatum*, *quantitas inextensa*, *infinisum terminis circumscriptum* &c.

III. Atque ejusmodi quidem possibilitas, vel impossibilitas entis *intrinseca*, vel *metaphysica* nominatur ubi ens aliquod in seipso, vel in essentia solum spectatur; hoc est in attributis illis, quibus intrinsece componatur. Sin vero ens ipsum physice spectetur, hoc

hoc est ad existentiam referatur, simulque potentiam, aut causam, à qua producatur, tunc possibilitas illa, vel impossibilitas, quæ in re concipitur, *extrinseca* solum, vel *physica* vocatur.

Itaque quidquid *intrinsece*, vel *metaphysice* possibile sit, *physice* quoque, vel *extrinsece* possibile censendum erit, si vis, ac potentia reperiatur, quæ ipsi producendo par esse possit, atque ens ipsum à potentia ad actum, hoc est ab *essentia* ad *existentiam* transferre possit. Sin vero nulla omnino causa, vel agendi vis esse potest, quæ ens ipsum producere, ipsique existentiam conferre possit, ens illud *intrinsece* quidem possibile, sed *extrinsece* tamen impossibile, *physiceque* repugnans dicatur. Quandoquidem ergo in creatis quidem causis finita, in Deo autem infinita vis, ac potentia reperitur, plurimæ à creatis causis illis produci non poterunt; adeoque *physice impossibilia* dicentur; hæc ipsa tamen ab infinita Dei potentia, quæ nullis omnino creatæ naturæ legibus circumscribitur, atque illud omne efficere profecto potest, in quo *metaphysica*, vel *intrinseca* repugnantia non reperitur, produci poterunt, ac interdum etiam producta sunt, ut mortuis vitam restituere, calorem ab igne producendum impedire, corporibus gravitatem, ejusque motum auferre &c.

IV. Exinde vero perspicue apparet quod ubi fortasse inquiri, vel definiri debeat an effectus aliquis *possibilis*, *impossibilis* sit, prius *intrinseca*, vel *metaphysica* ipsius *possibilitas* inquiri debet; deinde vero causa quoque explorari, quæ ipsi producendo par esse possit. Etenim, si in ipsius *essentia*, vel attributis illis, quibus effectus ipse, vel ens *intrinsece* componatur, aliqua contradictio,

vel repugnantia deprehendatur, omnino *impossibile* censendum erit, ut nequidem ab ipso Deo produci possit. Sin vero metaphysice quidem possibile sit, atque intrinsece non repugnet; sed solum naturæ creatæ viribus adversetur, tunc à solo Deo produci poterit, physiceque solum repugnans, vel impossibile censendum erit. Quod si postremo creata quoque caussa, sive potentia reperiatur, quæ ens ipsum producere perfecte possit, tunc *physice* quoque *possibile* dicetur, ut in exemplis superioribus demonstratur.

V. Aliquando tamen effectus aliquis, quamvis intrinsece, & extrinsece quoque possibilis sit, adeoque neque physice, neque metaphysice repugnet, ac interdum etiam producatur, communi quodam loquendi more *impossibilis*, sive *repugnans* vocatur: quod nimirum admodum raro, difficile, ac vix contingat; adeoque impossibilitas illa non *metaphysica*, aut *physica*, sed *moralis* solum, vocatur. Ita *moraliter impossibile* censi debet ut homo sanæ mentis seipsum interimat, ut quidquid ab omnibus, vel à pluribus ingenuis peritisque viris asseritur, falsum sit; atque de ejusmodi solum impossibilium genere intelligi debet Poeta, cum ait. (a)

Plurima denique repugnantia, vel impossibilia dicuntur quod *illicita*, sive *prohibita* sint; adeoque non rerum essentia, vel naturæ viribus adversentur, sed honestati solum, aut morum legibus opponantur; eoque solum sensu fieri non posse dicuntur quod incolumi honestate, salvisque morum legibus illa produci non possint.

VI. Altera quoque varietas, atque distinctio

(a) Multaque jam fiunt, fieri quæ posse negabam.

Atio in *possibilibus* ipsis admitti solet, ut illa sive physica, sive moralia fuerint, aliquando *absoluta*, aliquando *conditionata* dicantur.

Absoluta, vel absolute *possibilia* vocantur illa, quæ existere, sive produci repente poterunt, si causa solum producendis illis idonea reperiatur; nihilque prorsus præter causam ipsam requiritur ut producantur: ut possibile est lucem caloremque ab igne diffundi.

Conditionata vero, vel hypothetica *possibilia* dicuntur illa, quæ existere, sive produci non possunt, nisi præter ipsorum causam aliquid etiam adesse contingat, ex quo veluti conditione, hypothesi, vel circumstantia quadam illorum existentia, sive productio pendere debeat; ut proinde, si ejusmodi conditio sublata fuerit, neque causa operari, neque effectus ipse produci possit. Ita visus objecti corporei intueri non poterit, nisi lux intercedat; ignis corpus aliquod comburere non potest, nisi hoc igni proximum sit; adeoque sublata luce visus intueri, sublata corporis proximitate ignis excitari non poterit, quamvis in visu consociendi, in igne comburendi potentia reperiatur.

Eadem quoque varietas, ac distinctio, quæ in *possibilibus* admitti solet, in *futuris* etiam agnosci poterit; ut proinde alia simpliciter, & absolute, alia hypothetice solum, vel conditionate futura esse possint, ut superioribus exemplis ipsis apparet. Itaque in entibus illis, quæ conditionate solum futura, vel *possibilia* vocantur, duo futura, vel *possibilia* contemni debent, quorum unum ab alio pendere debeat; adeoque si primum ex illis auferatur, aliud existere, sive produci non possit.

VII. Ex ejusmodi vero discrimine, seu

varietate, quas ens aliquod *possibile*, sive *impossibile* vocatur, simulque ex ratione, qua ens ipsum vel *metaphysice*, vel *physice*, vel *moraliter* repugnans, sive possibile cense-ri debet, varietas etiam alia, sive discrimen exoritur, qua ens aliquod vel *necessarium*, vel *contingens* vocatur.

Necessarium ergo vocatur ens illud, quod ita est, ut aliter esse non possit, ideoque ipsius oppositum perspicue repugnans, vel impossibile fore concipitur. Itaque ens ipsum vel *metaphysice*, vel *physice*, vel *moraliter* necessarium esse poterit.

Metaphysice necessarium est illud, quod si ipsius essentia spectetur, non esse non potest, adeoque ipsius oppositum metaphysice repugnat. Ita metaphysice necessarium est radios omnes in circulo æquales esse; eoque sensu singulas rerum essentias intrinsece necessarias, ac immutabiles esse jam diximus. Quod si non essentia ipsa, sed existentia solum spectetur, ens illud necessarium dicitur, quod ita existit, ut non existere non possit; ipsius non existentia metaphysice impossibilis sit, ejusque essentia repugnet; ipsius existentia ab essentia minime distinguatur; adeoque, sicuti essentia invariabilis, æterna, necessaria esse debet, ita quoque ipsius existentia perennis, æterna, necessaria sit futura. Ejusmodi vero ens, quod existentiam hanc necessariam habere possit, adeoque essentialiter, ac necessario existat, Deum unum esse oportere in III. Metaphysicæ Parte ostendetur; cum entia cetera, quæcumque illa sint, contingenter solum existant, existere vel non existere etiam possint; quod in iis existentia ab essentia perspicue distinguatur, adeoque illorum essentia sine existentia concipi perfecte possit.

Physice vero necessarium vocatur ens illud,

lud, cujus oppositum naturæ creatæ viribus, seu Physicæ legibus repugnat; adeoque solis naturæ creatæ viribus esse, existere, sive produci non potest; quamvis metaphysice possibile sit, ac infinita Dei potentia præstari possit. Ita necessarium est physice ab igne calorem emitti, lapidem gravitare, flumina ad imum, vel in mare delabi &c.

Moraliter denique necessarium est illud, quod, quamvis & physice, & metaphysice non esse possit, ejusque oppositum moraliter solum repugnet; plerumque tamen produci-
tur, vixque fere contingit ut ejus oppositum producat. Ita *moraliter necessarium* est hominum sanæ mentis impendentis mortis periculum vitare, quidquid ab omnibus asseratur, verum esse.

VIII. Quemadmodum vero *possibilia*, ac *futura* quoque ita distingui posse jam diximus, ut alia quidem *absoluta*, alia vero *conditionata* dicantur, ita quoque *necessaria* ipsa ita distingui solent, ut alia *simpliciter*, *absolute*, vel in se ipsis necessaria sint, alia vero *hypothetice* solum, *secundum quid*, sive *conditionate* necessaria dicantur.

Absolute necessaria vocantur illa, quæ ex sua ipsorum indole, sine natura aliter esse, sive produci non possint, ut in exemplis superius expositis apparet; adeoque in illis necessitas ex intrinsecis ipsorum principiis exoritur.

Hypothetice vero necessaria dicuntur illa, quorum necessitas, & existentia ex aliqua conditione pendere debet, qua posita necessario concipi, vel existere, ea vero sublata, auferri illa debeant: quamvis conditio illa non necessaria, sed potius indifferens, possibilis solum, & conringens sit. Ita necessarium est hominem objectum aliquod intueri, si objectum ipsum sibi propositum sit, &

lux intercedat, si oculos aperiat, æque in objectum ipsum convertat; & quamvis conditiones illæ mere possibiles, liberæ, & contingentes sint, iis tamen positis objectum ipsum non *liberè*, sed *necessariò* percipiatur.

IX. Contingens autem vocatur ens illud, quod ita est, ut etiam non esse possit; adeoque cum ejus essentia nitidè distincteque percepta fuerit, prorsus indifferens esse concipitur ut existere, vel non existere fortasse possit: Itaque, cum *contingentia necessitati* opponatur, quemadmodum *necessitas* ipsa vel *metaphysica*, vel *physica*, vel *moralis* esse potest, itidemque *necessitas* ipsa aliquando *absoluta*, aliquando vero *conditionata* solum, vel *hypothetica* censeri debet; ita quoque varietas illa, sive distinctio in *contingentia* admitti poterit ut ens aliquod vel *metaphysice*, vel *physice*, vel *moraliter*, vel *absolute*, vel *hypothetice* contingens dicatur, prout ipsius oppositum vel *metaphysice*, vel *physice*, vel *moraliter*, vel *absolute*, vel *hypothetice* possibile sit.

X. Exinde verò perspicuè apparet quod humanæ voluntatis arbitrium perfecte liberum esse non poterit, nisi *metaphysica*, simulque *physica* *necessitas* excludatur; adeoque actus ipse prorsus indifferens, & contingens sit, ut proinde voluntas ita in actum ipsum inclinaret, ipsumque producat, ut oppositum quoque, si velit, amplecti possit. Itaque quidquid in homine necessario produceretur, liberum, contingens, indifferens esse non poterit; adeoque *necessitas* illa, quæ *absoluta* fuerit, arbitrio opponitur, humanamque libertatem omnino perimit. Sin verò *necessitas* illa non *absoluta*, sed *hypothetica* solum, vel *conditionata* sit, optime cum libertate componi, sive cum indifferentia conjungi poterit, cum *necessitas* illa ex hypo-

pothefi ſolum, vel conditione oriatur, quæ cum indifferens, & contingens foret, libere, conſultoque poſita, vel electa fuit; adeoque libere, conſultoque illud etiam electum cenſeatur, quod ex ejuſmodi conditione poſita neceſſario conſequatur. Ita libere conſultoque homines objecta corpora adſpicient, ſi libere ad ipſa accedant, oculos aperiant, ac in illa convertant. Cum actum aliquem exerimus non operari non poſſumus, hoc eſt uno eodemque tempore operari ſimulque non operari non poſſumus; ſed libere tamen operamur, quippe qui libere, ſponteque nos ipſos ad operandum determinavimus. Illa, quæ a Deo producta fuerint, neceſſarium eſt ut extiterint, infecta eſſe non poſſunt, Deusque ipſe efficere non poterit ut infecta illa ſint; ſed illa tamen in ſeipſis non *neceſſaria*, ſed *contingentia* cenſenda ſunt, cum neceſſitas illa ex ſola hypothefi oriatur, quod illa nimirum aliquando libere ſponteque à Deo producta ſint.

XI. Atque ejuſmodi quidem *neceſſitas*, & *contingentia*, quas hactenus expoſui, rebus ipſis conveniunt ſi ad ipſarum eſſentiam, aut exiſtentiam referatur, adeoque ens aliquod in re ipſa ſpectatum vel neceſſarium, vel contingens dicatur. Quod ſi ens aliquod ad aliud ens referatur, ac modus ille ſpectetur, quo ad ipſius eſſentiam vel exiſtentiam conferre poſſit, ipſique producendo ſive formando requiratur, tunc ens ipſum novo diſtinctoque ſenſu *neceſſarium*, ſive *contingens* dicetur. Ita perfectiones illæ, vel attributa, quæ rei cuidam *intriſeca*, vel *eſſentialia* vocantur, ad ipſius eſſentiam & exiſtentiam *neceſſaria* dicuntur; quod ens illud ſine attributis ipſis exiſtere, vel eſſe non poſſit. Ita cauſæ, à quibus res, & effectus aliquis produci debet, ipſi producendo *neceſſaria* vocantur, quod ablatis illis ipſe produci

duci non possit. Ita plurimæ conditiones alix, & rationes sufficientes, ut alibi mox ostendetur, *necessariæ* sunt ut effectus aliquis à causa sua producat; cum iis sublati causa operari, & effectus ipse produci non possit. Itaque ens aliquod, quamvis in seipso *contingens* sit, adeoque existere, vel non existere fortasse possit, respectu tamen alterius entis *necessarium* diceretur; cumque Deus solum utroque sensu *necessarius* haberi vocarique debeat, quod necessario ipse sit, nihilque proisus sine illo existere, sive produci possit, creatæ res omnes in seipsis quidem *contingentes*, sed in ordine tamen ad aliud *necessariæ* aliquando esse poterunt, cum ens illud independentem ab ipsis existere, vel esse non possit.

XII. Eadem quoque varietas, atque distinctio, quæ in entibus, ac objectis illis reperitur, quæ ab intellectu nostro præcepta fuerint, ut alia metaphysice, alia physice, alia moraliter necessaria dicantur, nostris etiam cognitionibus inesse debet, atque in illa certitudine distinguere solet, quam in cognoscendis objectis illis acquirimus. Itaque certitudo ipsa ita distinguere debet, ut alia quidem *metaphysica*, alia *physica*, alia *moralis* dicatur.

Metaphysica certitudo vocatur illa, quæ entia metaphysice necessaria, eorumque attributa percipimus; ubi nempe res ipsa aliter esse non potest, quam ut à nobis percipitur: fit: ut metaphysice certi sumus in circulo radios omnes æquales esse; totum esse majus sua parte; idem non posse simul esse & non esse &c.

Physica certitudo dicitur illa, quæ cognoscimus attributa, quæ physice necessario rei perceptæ conveniunt; ut proinde res ipsa salvis naturæ legibus aliter esse non possit: ut
phy-

physice certi sumus corpora gravitare, defunctum hominem reviviscere non posse &c.

Moralis denique certitudo est illa, quæ entia moraliter solum necessaria, siue attributa cognoscimus, quæ moraliter ipsi rei necessario conveniunt; ut proinde res ipsa raro, aut numquam fere aliter contingat, quàm ut à nobis concipitur. Ita moraliter certi sumus Virgilium, Cæsarem, Pythagoram extitisse, id quod ab omnibus, vel à pluribus ingenuis, peritisque viris asseratur, esse verum &c.

Quamvis autem ejusmodi cognitionis, vel certitudinis *moralis* genus in *theoreticis* disciplinis omnibus infrequenter admodum adhiberi consueverit, ac in iis perspicuitas illa, & certitudo inquiratur, quæ ex ipsa rerum indole, ac natura, simulque ex observatione, vel experimento physico oriatur; in *practicis* tamen facultatibus, in iis, quæ ad mores pertinent, in civilis vitæ regendæ ratione, in humanis actibus exerendis frequentissime utiliter, ac necessario usurpatur. Etenim, si in rebus gerendis, eligendisque severior illa certitudo expectanda foret, humanus animus mira atque inextricabili prope modum anxietate torqueretur; nihilque fere eligere, vel amplecti posset; cum subtilior illa certitudo in tanta rerum vicissitudine, opinionumque varietate obtineri, siue sperari vix possit. Itaque prudentis erit *moralem* hanc certitudinem inquirere, eaque duce operari, ut fusius, & accuratius, in *Ethica* demonstratur.

XIII. Quemadmodum verò si entium natura, vel existentia spectetur, entia quædam vel necessaria, vel contingencia dicuntur; ita quoque, si attributa illa, vel affectiones spectentur, quæ entibus ipsis inesse possunt; entia

entia quædam *mutabilia*, quædam *immutabilia* vocantur.

Mutabilia dicuntur illa, quæ aliter existere, & esse possunt ac in re sint; illa nimirum, quæ novum esse, novumque statum recipere subinde possunt.

Immutabilia vero censentur illa, quæ aliter esse non possunt, ac in se sint; adeoque novum esse recipere, aut vetus esse amittere non possunt.

Itaque *mutabilitas* ipsa, vel *immutabilitas* entis non aliunde oriri, vel repeti debet, quam ex modo, quo affectiones ipsæ, vel attributa, quæ in re concipiuntur, ipsi conveniant. Si attributum ipsum *metaphysica*, aut *physica*, aut *moraliter* necessitate rei conveniat, tunc eadem res *metaphysice*, *physice*, aut *moraliter immutabilis* dicetur. Sin vero attributum vel *metaphysica*, vel *physica*, vel *moraliter contingencia* subjecto jungatur, subjectum *metaphysice*, vel *physice*; vel *moraliter mutabile* censendum erit, ut in exemplis mox proferendis constabit.

XIV. Quandoquidem vero in omni mutatione, quæcumque illa fuerit, novum esse produci debet, nova nimirum entitas, aut modus, qui veluti mutationis ejusdem terminus, finis, & effectus esse concipitur, ex varia ejusmodi entitate, sive pro vario entis genere, quod acquiratur, varia quoque mutationis genera distinguere solent, ut alia quidem *substantialis*, alia vero *accidentalis* dicatur.

Accidentalis mutatio vocatur illa, in qua nova solum accidentalis entitas novusque modus in substantia, veteri prorsus incolumni, producat: ut cum lignum ex frigido fit calidum, cera rotunda quadrata fiat &c. Itaque juxta varia *Modorum*, aut *Accidentium* genera, quæ subtilius, & opportunius

in Logica recensentur, mutatio ipsa accidentalis varias in classes accurate dirimi, variisque nominibus appellari solet, ex vario nimirum affectionis, accidentis, aut modi genere, qui in ejusmodi mutatione producat, varia quoque mutationis indoles, idea, vel nomen orietur.

Ita mutatio illa, quæ ad *Quantitatem* veluti terminum dirigatur, *augmentatio*, vel *diminutio* vocatur; quod in illa nova extensio, vel quantitas acquiratur, adeoque substantia vel *augeri*, vel *decrescere* concipiatur. Quod si quantitas eadem perseveret, sed tamen ad majus, minusque spatium redigatur, *rarefactio*, vel *condensatio* dicetur: ut eadem aquæ, læ, aeris, vel spongiæ moles, & quantitas aliquando majus, aliquando minus spatium occupare conspicitur.

Mutatio, quæ nova *qualitas* acquiratur, dicitur *alteratio*; ac plerumque nomen ipsum, ac discrimen à vario qualitatis acquisitæ, si-ve productæ genere sortitur, ut *calefactio* à calore, *dealbatio* ab albedine. Itaque hæc mutationis species latissime patet, atque infinita fere mutationis tum corporeæ, tum incorporeæ genera complectitur; ut cum humanus animus ex *injusto justus*, ex *imperito peritus* fiat &c. adeoque si mutationes illas exceperis, quæ ad *quantitatem*, *figuram*, *motum*, *situm* veluti terminum diriguntur, ceteræ ad *alterationem* referri, novamque *qualitatem* producere existimantur.

Mutatio, quæ corpus ex uno in locum alium transfertur, *motus* vocatur; adeoque localis hic motus optimè definitur *migratio corporis è loco in locum*.

Mutatio, quæ corporis partes alio ordine disponuntur, *situs*, *ordo*, vel *positura* vocatur; atque ex ejusmodi positura vel ordine ipsa quoque corporis *figura* dependet. Ita G
cry-

crystallus confusa in pulverem, tritici grana in farinam, convertantur, eadem crystalli, triticique partes novum ordinem, situm, vel dispositionem acquirant; atque eadem ceræ partes ita disponi, varioque situ collocari poterunt, ut exinde vel rotunda, vel quadrata *figura* oriatur.

Mutatio, qua res aliqua, quæ prius indifferens, iners, ac otiosa fuerat, operatur, aut effectum, sive actionem ab altera re productum excipit, *Actio*, vel *Passio* vocatur; & qualitas illa, sive dispositio, propensio, facilitas, quæ ex pluribus iteratis actibus acquiratur, ut novus actus veteribus jam iteratis similis producat, *Habitus* vocari solet: ut ex pluribus canendi actibus rite frequentatis *Musicæ habitus*, ex pluribus iustitiæ actibus ipsa *Iustitiæ virtus*, aut habitus contrahitur.

XV. Substantialis verò mutatio censetur illa, in qua non accidentia solum, aut modi, sed ipsa quoque res ac *substantia* nova producitur: ut cum ex ligno fit ignis, ex cera igni imposita fumus, ex cibo sanguis & caro &c. Quandoquidem vero creatæ naturæ viribus aliquid ex nihilo produci non potest, uti nova quædam substantia producatur, vetus alia substantia destrui, corrumpi, vel interire debet, ut in exemplis illis apparet. Quod si increatæ, hoc est divinæ potentiae viribus res, & substantia quædam ex nihilo producatur, productio illa non generatio, sed creatio diceretur; quemadmodum, si res ipsa non in substantiam aliam, sed in nihilum, redigatur, non *interitus*, *corruptio*, vel *mors*, sed *annihilatio* vocatur. Ita quoque si substantia una in alterius generis substantiam divinæ potentiae viribus convertatur, adeoque materiæ, seu corpori, cui certa quædam *substantialis forma* inerat, ea de-

destructa, substantialis alia distincta forma concedatur, mutatio illa transsubstantiatio diceretur.

XVI. Quo vero discrimine, vel caractere cognosci possit. an mutatio illa, quæ nobis explicanda contigerit, *accidentalis* solum, vel *substantialis* potius censenda sit, opportunius, & accuratius in Physica ostendi debet. Illud unum hic obiter observasse juverit, quod substantialis mutatio neque ex uno, neque ex pluribus etiam accidentibus inferri potest, quæ variata fuerint; cum una eademque substantia perenni fere accidentium mutationi obnoxia esse possit; ipsa tamen adhuc incolumis, atque eadem perseveret, adeoque uno prorsus eodemque nomine designetur. Ita Seneca (a) præclare observavit quod *nemo nostrum idem est in senectute, qui fuit juvenis; nemo est mane, qui fuit pridie. Corpora nostra rapiuntur fluminum more, & tamen maxima, ac infinita fere varietas illa non efficit quin eadem hominis natura, ac substantia in puero, adulto, ac sene reperiatur. Ita, licet perennis quædam varietas, & alteratio in humano corpore producat, iisque materiæ partibus, quæ ipsi inerant, continuo fere fluxu in aerem avolantibus novæ partes aliæ succedant, una tamen eademque corporis humani substantia vocatur; eoque sensu intelligitur defuncta corpora iterum divinæ potentie viribus instaurari, animo conjungi, adeoque defunctos homines reviviscere posse, ut à pluribus Ethnicis etiam Philosophis admittebatur.*

XVII. Illud etiam hic observari facile potest.

(a) *Epist. 58.*

poterit, quodd in Deo quidem nullum prorsus mutationis genus effingi poterit; cum ipse neque in substantia, neque in attributis, aut affectionibus, quæ in illo concipiuntur alterari possit, sed omnino perennis, ac *immutabilis* esse debeat, ut alibi demonstrabitur. Creatæ verò substantiæ quæcumque illæ fuerint, ita *mutabiles* esse debent, ut si corporeæ illæ sint, tum *accidentali*, tum *substantiali* quoque mutationi obnoxia esse possint. Sin vero incorporeæ sint, partibusque careant, adeoque dividi, discerpi, corporeisque moribus percelli non possint, *accidentalem* quidem mutationem subire illæ poterunt, novasque incorporeas affectiones induere, sed ipsarum *substantia* neque corrumpi, neque interire, neque generari, sed à Deo solum ex nihilo creari, aut in nihilum redigi poterit, ut accuratius ostendetur ubi de incorporea, ac immortalī humanæ mentis substantia agendum erit.

XVIII. Observari denique poterit, quod, quamvis ejusmodi mutationis *substantialis*, & *accidentalis* genera corporeis præsertim rebus conveniant; aliquando tamen abstractis etiam; incorporeis, aut mortalibus ~~enibus adscribi solent, ut illa quoque in sua~~ veluti substantia destrui, aliquando verò *accidentaliter* solum, incolumi tamen substantia, variari videantur. Ita plerumque dicitur historiam aliquam sic à variis Scriptoribus exprimi, ut ipsius *substantia* diversa sit, ubi quod ab uno asseritur, ab alio destruitur. Sin vero in quibusdam solum circumstantiis varietas habeatur, *accidentalis* solum mutatio censei solet, quæ facti *substantiæ* non adversetur. Contractus cujusdam vis, & auctoritas aliquando leviter solum, vel *accidentaliter* mutatur, aut infingitur; aliquando vero ipsa quoque *substantia* infingi, vel

vel interire concipitur. Ita *possessio*, *dominium*, *jus*, *actio*, *debitum*, *jurisdictio* &c. aliaque id genus ex uno in subjectum aliud *transferri* dicuntur: perinde quasi locali quodam motu ex uno in aliud migrarent. Ita denique laudatis viris honorem accedere, vituperatis honorem detrahi, vel auferri dicimus; quod *honorem* ipsum veluti realem quandam affectionem concipere consueverimus, quæ hominibus inesse possit: cum tamen *honor* ipse in externa solum aliorum hominum opinione positus sit, nihilque sit aliud quam *extrinseca* quædam *denominatio*, quæ alicui concedi, vel auferri possit. Cum tamen in iis, quæ ad mores pertinent, atque ad tranquillam cum hominibus aliis societatem referri possunt, ejusmodi *moralium entitatum*, ac *denominationum* vis, & auctoritas maxima esse debeat, quippe quæ ex veris quibusdam, & realibus affectionibus veluti causis oriantur, plurimumque ad tranquillam hominum societatem conferre possunt, ipsarum singulæ veri, ac realis entis instar haberi poterunt, ut ab Ethicis, & Jurisconsultis optime demonstratur.

CAPUT V.

De Spatio, Motu, ac Tempore.

I. **V**arietas illa, sive distinctio, quam in extrema superioris Capitis parte complexi sumus, illa nimirum, qua ens aliquod aut *mutabile*, aut *immutabile* censei, vocarique debet, accurate intelligi, vel explicari non poterat, nisi prius in nobis idea quædam *Spatis*, *Motus*, ac *Temporis* excitaretur. Etenim ens illud *mutabile* à nobis intelligi, dicique solet, quod vario distinctoque tempore varios veluti status acquirat; ut ali-

aliquo nimirum temporis spatio novum esse recipiat, quo superiori tempore carebat. Mutabilitas illa, sive mobilitas, qua corpus aliquod ex uno in locum alium migrare concipitur; sine *Spatii* extensione, & successiva quadam corporis translatione percipi non poterit; ut scilicet corpus ipsum nunc uni, mox alteri spatio, sive spatii parti respondeat. Itaque, ut illa, quæ superius exposita sunt, accuratius adhuc intelligantur, aliaque plurima, quæ in ceteris Metaphysicæ partibus magno usui sunt futura, opportune proponantur, aliqua de *Spatio* ipso, vel *Loco*, simulque de *Tempore*, ac *Motu*, ipsorumque natura, & affectionibus explicari nunc debent.

II. Atque, ut ab ipsa *Spatii* natura exordiar, *Spatii* nomine nihil aliud intelligi; vel designari solet, quàm extensio quædam, intercapedo, sive capacitas, in qua corpus aliquod collocari posse concipitur, ut proinde spatium ipsum à corpore occupari, repletique possit. Ita, si corpus unum ab alio distinctum, ac sejunctum concipiatur, inter illa quædam extensio, longitudo, sive distantia percipitur; at ubi hæc extensio, sive distantia in longum, latum, & profundum replicata fuerit, tunc extensio quædam exsurgit, quæ corpori recipiendo par esse possit, in quo trina dimensio reperitur; adeoque capacitas ille sive extensio corporis recipiendi capax *Spatium* vocabitur. Ejusmodi verò spatii extensio, vel idea longe facilius, & clarius ex *Suavis*, aut *Vacui* notione formari, deducique poterit. Etenim, si vas aliquod, aut cubiculum aere repletum sit, & ab intellectu nostro concipitur hunc aerem à Deo annihilari, simulque exteriorem aerem impediri ne in destructi aeris locum ingre diatur, inter vasis latera, sive cubiculi pa-
rietes

rietes nihil aliud supererit, quam sola trina dimensio, capacitas, intervallum, aut spatium ipsum, quod prius ab aere occupabatur, & ab alio corpore repleri possit. Quandoquidem vero corpus omne, quod existat, extensione præditum est, eaque extensione spatium, aut locum aliquem imple-re debet, perspicue apparet in ipso quoque Spatio extensionem aliquam, variasque partes esse oportere; eamque prorsus in Spatio extensionem admittendam esse, quanta sit illa realis entis extensio, quæ in locato corpore reperitur: perinde quasi loci, seu spatii extensio cum ipsa locati corporis extensione coexistere, atque unâ cum illa penetrari debeat. Sed perspicue quoque intelligitur, quod in spatio quolibet ejus extensio à locati corporis extensione distingui debet; cùm capacitas illa nunc ab uno, nunc ab alio corpore repleri possit, atque corporibus omnibus ex spatio sublatis, vel omnino destructis spatii extensio adhuc superesse concipiatur.

III. Supposita jam hac *Spatii* notione, in qua tum veteres, tum recentiores etiam Philosophi mire conspirant, gravissima quaestio exoritur: an extensio illa, quæ in spatio concipitur, realis ac positiva sit, an verò potius imaginaria cenferi debeat?

Leucippus, Democritus, & Epicurus extensionem illam veram, ac realem esse putarunt; (a) unde Gassendus (b) etiam, qui veterem Epicuri, vel Atomistarum sententiam excitavit, Spatii naturam realem, incorpoream, intactilem, soliditatis expertem, penetrabilem, actionis omnis, perpassionis-

que

(a) Vid. *Arist. Phys. Lib. 4. cap. 8.*

(b) *Phys. Lib. 2. Sect. 1, cap.*

que incapacem esse contendit, idemque prorsus ante Gassendum ipsum docuerat Patricius, (a) qui Spatium ante res omnes à Deo productas extitisse sive productum esse putavit; Spatiumque ipsum *hypostaticam extensionem* esse, adeoque *substantiæ* nomine vocari posse contendit; cum tamen Gassendus spatium ipsum neque corporeum, neque incorporeæ substantiæ modum esse dixerit; sed tertium quoddam entis genus, quod à *Substantia*, & à *Modo* accuratissime distingueretur. Cartesius (b) verò nullum omnino spatium, aut locum corporis expertem esse posse arbitratur; adeoque spatium omnino vacuum, aut inane vel existere, vel produci posse negavit; eamque extensionem, quæ in spatio vacua conciperetur, omnino corpoream, & corpus esse defendit, quippe qui existimet corporis naturam, aut essentiam in triplici dimensione, vel extensione collocatam esse. Itaque juxta Cartesium spatium omne, vel extensio quælibet non modò *realis*, & *corporea* esse debet, sed *corpus* etiam ipsum, materiam, sive substantiam extensione simulque soliditate, vel impenetrabilitate præditam constituit, adeoque in ipsius hypothese *spatium* à *corpore* nullo discrimine distingueretur. Denique *realis* ipsa, vel *positiva* spatii natura à Newtono, (c) Lokio, (d) Keillio, (e) aliisque pluribus asseritur; qui quamvis ipsam corporis essentiam in hac una extensione positam esse non dixerint, adeoque *corpus* à *spatio* distinxerint, hoc uno tamen

(a) *De Rerum natura Lib. 1. cap. 8. 9.*

(b) *Princip. Phylos.*

(c) *Princip. Phil. Schol. gener.*

(d) *Lib. 2. cap. 13.*

(e) *Introduct. ad Physic.*

tamen discrimine *Spatium* à corpore distinguunt, quod utraque quidem tum corporis tum spatii extensio realis ac positiva sit, sed ipsa tamen spatii extensio penetrabilis esse debeat, & a corpore pervadi, occupari, repletique possit, corporis autem extensio soliditate conjuncta, vel impenetrabilis esse debeat. Quandoquidem verò spatium ipsum à Deo produci non poterat, alioquin spatium aliud prius existere, vel concipi deberet, in quo Spatium ipsum produceretur, eique spatio *infinitas*, *immobilitas*, *unitas*, aliaque id genus attributa plurima adscribi debent, quæ Deo conveniunt, Nevvtonus (a) ipse, Morus, (b) Rhapsodus, (c) Clarkius, (d) aliique plures Spatium ipsum nihil aliud esse arbitrantur, quam attributum Dei: adeoque spatii substantiam ab ipsa Dei substantia distingui non posse contendunt, ac utramque tum Dei tum Spatii idem nobis ingentam, ac innatam esse Clarkius existimavit.

IV. Alii verò extensionem illam, quæ in Spatio concipitur, ipsique convenire potest, imaginariam esse arbitrantur. Etenim ne Aristotelem, (e) Hobbesium, (f) Volsum, (g) aliosque plures hic memorem, Leibnitius ipse, qui in *Vheodicae* Gassendo imprudens adhæserat, alibi (h) realem hanc Spatii extensionem improbavit. Atque optimo id quidem

(a) Princip. Phil. Schol. gener.

(b) Enchir. Ethic. Part. 1. cap. 8. §. 8.

(c) Conam. Mathemat. de Spatio cap. 5.

(d) De Exist. & Attrib. Dei.

(e) Phys. Lib. 4. cap. 36. tex. 35.

(f) Phys. cap. 26.

(g) Ontol. Part. 2. Sect. 1. cap. 2.

(h) Act. Lips. an. 1695. pag. 151.

dem maximoque jure. Etenim quicumque nitidam, & accuratam extensionis illius ideam formaverit, quæ in Spatio concipitur, ac Spatium illud rite conceperit, quod in Vacuo, vel Inani percipitur, perspicue intelliget Spatium illud nihil aliud esse, quam abstractam intellectus ideam, sive phantasma quoddam, quo unius ab alio corpore distantiam, locique capedinem ita concipimus, ut in illa nullum omnino corpus, nulla realis, ac positiva entitas, & affectio reperitur; sed imaginaria quædam capacitas ut à corpore occupari, repleri que possit. Itaque *immensitas, unitas, immobilitas*, ceteraque proprietates aliæ, quæ Spatio, vel Vacuo tribuuntur, nihil sunt aliud, quam imaginariæ quædam entis imaginarii affectiones; tantumque abest ut ipsæ veluti Dei attributa censerentur, Deique substantia cum Spatii substantia confundi possit, ut ne quidem vera corporeæ substantiæ attributa esse possint. Accedit etiam quod extensio illa, quæ in Spatio concipitur, partibus una conjunctis continuatisque componi, adeoque mensurari, suas in partes dividi, secernique deberet: quorum singula divinæ substantiæ perspicue repugnant, ut opportunius ostenderetur ubi de Deo, ejusque attributis agendum erit.

V. Interim hoc perspicue certoque constitui poterit, quod Spatium illud, quod extra Universi fines concipitur, ubi realis Universi extensio vel moles finita admittatur, prorsus imaginarium purumque nihil esse debet; ut proinde remere ineptique Lucretius (a) & Lokius (b) illud reale, ac positivum.

(a) Lib. 1. ver. 967.

(b) Lib. 2. cap. 13.

tivum esse putaverint, ibique Cartesius veram corporis substantiam ab ipsa spatii extensione formatam admiserit, adeoque Universum ipsum *indefinitum*, vel *infinisum* esse dixerit. Illud etiam Spatium, in quo Mundus à Deo productus positusque fuit; imaginarium censi debet. Imaginarium denique est Spatium illud, quod ab aliquo corpore, adeoque etiam ab universa ipsorum compage, vel Universo occupatur.

V. Quamvis autem Spatii extensio prorsus imaginaria sit; ejusmodi tamen imaginarii Spatii notio vel idea perspicuè accuratèque localis motus cognitioni conferre plurimum poterit. Siquidem, ubi Spatium ipsum, aut locus veluti indefinita quædam extensio concipiatur, quæ Universo æqualis sit, atque ipsos etiam Universi fines excedat, hæc indefinita, simulque immobilis esse videbitur, quippe quæ terminis, ac initio carens, nec ipsum quoque motus initium, aut finem habere possit. Itaque facile corpus aliquod ex uno in locum alium transferri sive migrare intelligitur ubi concipiatur realem corporis extensionem modo huic, modo alteri imaginariæ Spatii extensionis parti congruere, coexistere, respondere; quemadmodum fere, si corpus aliquod immobile, veluti maris aut fluminis litus percipiatur, facile intelligetur navim flumine, aut mari positam moveri quod illa modo huic, modo alteri littoris parti proximior fiat, nunc uni, nunc alteri littoris parti respondeat. Hæc ipsa tamen localis motus idea, sive cognitio deprehendi formarique poterit si mobile corpus non ad intrinsecum Spatium referatur quod ab illo repleti sive occupari concipitur, sed cum extrinseco quodam, vel ambiente corpore compareretur, à quo recedere, sive ad quod accedere, intelligatur. Ita, si

corpus aliquod, ut telum in aere moveatur, localis motus idea ex aere ipso vel circumposito corpore desumi poterit; quod nempe telum modo ab hac aeris parte, modo ab alia veluti superficie ambiatur; tuncque *loci* notio non imaginario internoque Spatio, sed externo solum, ambienti, sive circumposito corpori tribuetur, ac *locus* ipse locato corpori *extrinsecus* dicetur, ut vinum in vase veluti loco continetur.

VI. Quæcumque tamen vel *intrinseci*, vel *extrinseci* loci notio concipiatur, facile intelligetur motum ipsum nihil aliud esse quam successivam loci mutationem; ut optime proinde definiatur: *migratio*, sive *translatio corporis è loco in locum*. Itaque ut corpus aliquod *moveri* dicatur, non certe requiritur ut ab iis corporibus, quibus proxime & immediate ambitur, recedat; sed omnino sufficit ut corporibus aliis, quæ immora fuerint, proximius, vel remotius fiat; adeoque variis *intrinseci* loci, seu spatii partibus respondeat. Ita, si vinum in dolio positum una cum navi, in qua dolium ipsum existat, transferatur, vinum ipsum moveri dicetur; quamvis ab una eademque dolii superficie ambiatur. Ita, si Tellus moveretur, ab aere sive atmosphæra sibi circumposita simulque circumducta nunquam recederet; sed vere tamen moveretur: quod nimirum illa, si ad solem, vel alia corpora referatur, variam ad illa distantiam, aut situm acquirat, variisque *intrinseci* loci, vel imaginarii spatii partibus respondeat.

VII. Ex ejusmodi vero perspicua nitidaque *Motus* localis idea, *Temporis* etiam notio in nobis producit; adeoque *Motus*, ac *Temporis* ideæ invicem conjunctæ esse solent, ut *Motus* à *Tempore*, *Tempus* à *Motu* mensurari vel definiri consueverit. Etenim,

nim, cum in locali motu duratio quædam, extensio, diturnitas, plurimæ nimirum, distinctæque partes concipiantur, quæ simul existere nequeant, sed una post aliam continuata serie producat, continua illa, nec interrupta successivarum partium series continuatam entis existentiam, adeoque ipsius *durationem* producit, quæ *Tempus* vocatur. Itaque Tempus ipsum optime definitur; *successiva rerum mutabilium duratio, sive continuata existentia rei, quæ mutabilis sit*, adeoque incipere, ac desinere potest; eoque discrimine vel caractere *Tempus* *Æternitate* distinguitur, quæ *rei immutabilis duratio* dicitur, sive *duratio, quæ initio, ac fine carere debet*. Hinc Aristoteles (a) obscure quidem, sed accurate tamen, ait: *Tempus est numerus, & Mensura Motus secundum prius, & posterius*: quod nimirum, ut res numerabiles numero, ita tempore motum metiri consuevimus; adeoque, cum in motu priores aliæ, aliæ posteriores partes esse debeant, atque ipsarum una alteri succedat, ita quoque in tempore hæc ipsa partium successio reperiatur. Ac certe quidem in tempore, veluti extensione quadam, plurimas, ac infinitas partes existere, adeoque tempus ipsum, alterius extensionis instar, in infinitum dividi posse concipimus; cum data qualibet, vel exigua, temporis parte, in ipsa duæ medietates, iterumque cujuslibet medietatis medietates aliæ distingui possint; neque pars ulla concipi, vel admitti possit, quæ iterum in infinitum dividi nequeat; quemadmodum vicissim in ipso motu, quo temporis extensio, sive diuturnitas mensura-

(a) *Phys. Lib. cap. tex.*

tur, totidem prorsus, hoc est infinitæ partes distingui possunt.

VIII. Quamvis tamen in quolibet Temporis spatio distincta quædam partium multitudo reperiatur, ex qua tempus ipsum vel *magnum*, vel *parvum*, vel *breve*, vel *longum* vocatur, plerumque tamen temporis diurnitas ex perceptione, vel reflexione nostra pendere solet, qua singulas, aut certe plures, in illo partes concipimus, ac numeramus: ut, si proinde successivas illas temporis partes non advertamus, ac veluti numeremus, tempus ipsum elabi non percipiamus. Hinc jucundæ rei intenti, vel acrimediatione occupati, vel profundo somno dediti veram temporis durationem non percipimus, ipsumque *breve* fuisse dicimus; vicissim vero dolore quodam affecti; molestaque sensatione, vel spe, vel expectatione solliciti majorem fere temporis durationem esse concipimus, tempusque *longum* fuisse dicimus: quod nimirum plures in nobis ipsis perceptiones, adeoque plures in tempore, ac duratione partes numeremus.

IX. Nihil est autem cur in veteri controversia dirimenda immoremur, utrum nempe duratio ipsa, vel Tempus à re durante distinguatur, utrum Tempus ipsum imaginaria quædam an realis entitas esse debeat, utrum denique corporeum, aut incorporeum ens illud esse, censerique debeat. Siquidem perspicue apparet quod duratio ipsa à re durante, veluti modus à substantia, distingui debet: ut quemadmodum nempe existentia à rei durantis, & existentis naturæ distinguitur, ita quoque duratio, quæ nihil est aliud, quam continuata rei existentia, à rei durantis essentia distingui debet; quamvis ab illa separari non possit, neque duratio sine re durante, neque res ipsa durans sine dura-

duratione habeatur. Itaque, si duratio veluti existentiae modus & affectio concipiatur, corporea quaedam, realis, ac positiva rei durantis affectio censeretur poterit. Sin vero tempus ipsum veluti numerus concipiatur, qui ex numeratis motus partibus oriatur, tunc non in rebus ipsis, sed in intellectu solo numerante, veluti ipsius perceptio reperietur; adeoque incorporea quaedam, ac spiritualis idea censebitur. Hinc Antiphanes ait (a) quod *Tempus est quidpiam, quod non re, sed cogitatione, constat*; & Plato varias Entium classes enumerans ait, quod *sextum genus eorum est, quae quasi sunt, ut Inane, ac Tempus*, (b) quod nimirum *Spatium*, ac Tempus ipsum non in rebus, sed in intellectu solo, reperiantur. Itaque præclare fallitur Gassendus, (c) qui Tempus ipsum, spatii instar, distinctum quoddam entis realis genus esse putavit, quod neque substantiae, neque Modi, neque corporei, neque incorporei Entis genere contineretur; quemadmodum etiam ludicro prorsus phantasmate decepti sunt illi, qui Tempus ipsum veluti ens quoddam ante Mundi creationem extitisse dicunt; perinde quasi Tempus aliquod extiterit, quo Mundus nondum creatus erat. Etenim, si Tempus veluti rei durantis & existentis affectio concipiatur, quis aperte non videat ante rei durantis productionem ipsius durationem existere, siue concipi non posse? Sin vero Tempus ipsum nihil sit aliud, quam incorporea quaedam idea, quae ab intellectu nostro formata fuerit, tempus illud, quod

(a) *Apuł. St. ba. Felog. Phys. pag. 19.*

(b) *Senec. epist. 68.*

(c) *Phys. Par.*

quod ante rerum omnium originem concipiatur, inane prorsus ac imaginarium phantasma censendum erit, quod ex nostro concipiendi more oriatur.

X. Ex ipsâ quoque perceptionis nostræ natura, impotentia, simulque ex præconcepta jam temporis idea sive notione dependet quod sicuti in ipso tempore successivam quandam partium multitudinem necessario concipimus, ita quoque in aliis etiam durationis generibus, hoc est in *Æternitate*, atque *Æxternitate* varias illas, sibi que succedentes durationis partes concipere consuevimus; quamvis in illis nulla partium varietas, distinctio, aut successio reperiatur. Siquidem *Æternitas* ipsa entis omnino immutabilis duratio esse debet; adeoque, cum in illo duratio atque existentia invariabilis esse debeat, ideoque partes in illa existere sibi que succedere non possint, ne quidem in ipsius duratione partes aliquæ admitti poterunt. Hinc *Æternitas* optime definitur: *Interminabilis vitæ tota simul, & perfecta possessio*; adeoque *Æternitate* neque *prius*, neque *posterius*, neque *præteritum*, neque *futurum* effingi poterit; & sicuti in Tempore nulla pars *præsens* admitti potest, sed partes omnes aut *præteritæ*, aut *futuræ* sunt, adeoque indivisibile solum ipsius *instans*, veluti *præsens*, concipitur; ita vicissim in *Æternitate* neque pars ulla *præterita*, neque *futura* esse potest; sed omnia simul *præsentia* atque in indivisibili simul conjuncta, vel *existentia* esse debent. Quæcumque vero de *Æternitate* jam diximus, de ipsa quoque *Æxternitate*, vel *Æro* constitui possunt: illa nimirum duratione, quæ aliquando quidem incæpit, sed nunquam tamen desinere debeat; adeoque initium quidem habuit, sed nullum omnino finem est habitura. Ejusmodi vero durationis

nis genus Angelis, & humanis animis convenire concipitur, qui indole, naturaque suæ perennes, ac immortales esse debent; corporeis quoque substantiis adscribi illa posset, si ita à Deo conserventur, ut in illis nullus omnino interitus, atque mutatio esse possit.

XI. Ceterum ex accurata *Motus*, *Spatii*, & *Temporis* natura jam explicata perspicue apparet quod maxima, & artissima quædam affinitas, & connexio inter illa reperitur, ut unum ab alio mensuretur, hoc est unius intensio, vel magnitudo ex alterius extensione, vel magnitudine deducatur. Hinc motus ille *aquabilis*, vel *uniformis* vocatur, qui æqualibus temporis partibus æquales spatii partes peragit; ille *ceterior* dicitur, qui vel eodem temporis spatio plures, vel minori tempore eandem spatii partem absolvat. Tempus illud *majus*, aut *longius* vocabitur, in quo plures spatii partes peraguntur, aut plures motus partes conficiuntur. Spatium denique *majus* erit, quod diuturniori motu, majorique tempore peragatur. Itaque, cum localis motus quilibet in tempore quodam perficiatur, successivis partibus componatur, variasque spatii partes sibi ordine succedentes successive excurret, adeoque successivis etiam temporis partibus mensuretur, manifeste apparet quod motus ipse in indivisibili temporis spatio, sive in instanti, fieri non potest, ideoque motus *instantaneus* omnino repugnat, contradictionem involvit, nec ab infinita Dei potentia produci potest. Hinc ubi nitida quadam ratione, intimoque sensu percipiatur quod *cogitatio* quædam in instanti, vel in indivisibili temporis in nobis peragatur, certissime inferri poterit perceptionem illam corporeæ substantiæ motum esse non posse; adeoque substantiam cogitantem prorsus in-

corpoream esse oportere. Inferri etiam poterit Angelos, & humanos animos à corpore separatos alio prorsus, quam *localis*, motus genere ex uno in locum alium transire; cum incorporeæ substantiæ illæ sint, adeoque corporum instar moveri non possint. Ubi vero concipimus videndi vim velut ex nostris oculis erumpentem ad objecta corpora pervenire, aut cogitationem nostram ex uno in locum alium, ut *Roma Constantinopolim* transilire, solo infantiae præjudicio fallimur; cum objecta corpora in nobis ipsis, hoc est in ipsorum imaginibus, intueamur, quæ sensibus exceptæ cerebroque impressæ ab anima percipiuntur, adeoque cogitatio non ex una in urbem aliam, sed ex una in imaginem aliam, excurrat, quod in indivisibili, sive momento peragi posse intelligimus.

CAPUT VI.

De Ente finito, indefinito, ac infinito.

I. IN explicanda Motus, ac Temporis, simulque spatii natura sæpius à nobis *finiti*, vel *infiniti* voces, & ideæ usurpari debuerunt, quippe quæ facile ex entium illorum ideis excitari, atque cum illis artificissimo foedere conjungi soleant. Etenim quicumque ideam illam subtilius exploraverit, qua ens aliquod veluti *infinitum* concipimus, facile profecto intelliget *infinitatis* ideam ex solis spatii, durationis, numerique notionibus excitari; quod in entibus illis extensio quædam concipiatur, adeoque cum numerus, & extensio quælibet semel iterumque ac infinities iterari, vel multiplicari posse concipiatur, nullusque numerus, spatium, aut tempus apprehendi possit, qui novis partibus aliis augeri nequeat, exinde veluti fonte in-

finit-

finitas illa, siue infiniti notio profluxit, quam pluribus etiam entibus aliis tribuimus, ut *potentia*, *sapientia*, *perfectiōi* &c. quæ, quamvis incorporea, ac inextensa sint, cuiusdam tamen extensionis vel magnitudinis instar partibus una conjunctis atque iteratis componi concipiuntur.

II. Itaque, ut illa, quæ de *Spatio*, *Tempore*, ac *Motu* superius explicata sunt, clariora fiant, simulque variæ quæstiones, quæ tum in reliquis Metaphysicæ partibus, tum in disciplinis aliis institui solent, facilius dirimantur, de *finito* ipso, ac *infinito* brevissime agendum erit. Quandoquidem verò ex entibus illis, quæ infinita vocari solent, quædam non vere *infinita*, sed *indefinita* potius censerī debent, ut opportune mox ostendatur, ut ambiguitas omnis, atque error auferatur, ens ipsum ita distinguemus, ut aliud quidem *finitum*, aliud verò *indefinitum*, aliud denique *infinitum* dicatur.

Finitum vocatur ens illud, quod in eo entis genere, statu, vel idea, in qua concipitur, limites aut terminos aliquos habere debet, quos excedere, vel superare non potest: illud nimirum, in quo initium aliquod, simulque finis reperitur, quibus veluti terminis utrimque circumscribitur. Ita linea *finita* dicitur illa, quæ utrinque terminos habeat; finitus calor, finita albedo, finita potentia, celeritas, perfectio, &c. dicitur illa, in qua certa quædam, ac determinata intensio reperitur. Itaque facile ens aliquod in suo genere finitum esse concipitur, ubi nitide intelligatur ens illud in hoc ipso genere augeri posse, hoc est illi novas partes, aut gradus prioribus similes adjungi posse. Ita velocitas illa, quæ in Sole reperitur, *finita* censerī, vocarique debet, quod facile censerī alia hac celeritate major concipi

possit ; proposita linea qualibet *finita* vocabitur , quod linea quædam hac ipsa major admitti possit ; eademque linea nobis proposita novis partibus aliis augeri posse concipiatur .

Indefinitum vero vocatur ens illud , in quo termini à nobis intelligi , concipi , vel definiri non possunt ; sed quæcumque demum magnitudo , quicumque vel partium , vel graduum numerus , quæcumque intensio , vel extensio à nobis in hoc ante percepta fuerit , semper tamen in illo extensio nova , novæque partes aut gradus alii supererunt , qui concipi in illo possint . Ita , si Mundus ab æterno conditus foret , aut in æternum duraturus esset , hominum , dierum , horarum &c. numerus *indefinitus* esse deberet . Etenim quicumque demum hominum numerus ab intellectu nostro conciperetur , semper numerus alius superesset , qui in hac ipsa indefinita hominum multitudine contineretur . Materia in indefinitum divisibilis , sive materiz divisibilitas *indefinita* esse dicitur , quia dato quolibet divisionum , aut partium numero , semper aliæ partes supererunt , quæ partibus aliis compositæ in partes alias resolvi , dividique possint . Ita Cartesius Universum *indefinitum* esse putavit , quod ubicumque demum Universi limites ab intellectu nostro concipiantur , semper tamen extra illos nova extensio concipi possit : cumque extensio illa sive trina dimensio juxta Cartesium corporea esse debeat , corporis , ac Universi extensio nullis omnino finibus circumscribi poterit , adeoque *indefinita* cense-ri debet .

III. Infinitum denique dicitur ens illud , quod terminis omnino caret ; tantumque abest , ut in illo fines aliqui concipi , vel admitti possint , ut perspicue potius intelli-
gatur

gatur nullos in ipso terminos esse posse. Itaque in exprimenda *infiniti* idea, vel *infiniti* voce usurpanda plerumque fallimur; ubi *infinitem* ipsum cum *indefinito* temere confundimus, idque *infinitem* vocamus, quod *indefinitum* potius censeretur, vocarique debet; cum tamen unum ab altero perspicue distinguatur, atque infinitas ipsa ita secerni debeat, ut alia quidem *relativa*, alia vero *absoluta* dicatur.

Relativa, vel *negativa* infinitas vocatur illa, quæ ex nostro concipiendi modo dependet, ubi nempe mens nostra terminos, ac fines aliquos in re concipere, vel definire non potest; eaque de causa rem ipsam infinitam esse censemus; quamvis in illa termini, vel fines aliqui nobis incogniti reperiantur.

Absoluta vero, vel *positiva* infinitas dicitur illa, quæ terminos omnes excludit; & quamvis in illa fines aliqui apprehendi consueverint quod infinitas illa tenuem mentis humanæ vim superet, perspicue tamen intelligitur ipsi terminos illos, qui in ipsa temere percepti fuerint, repugnare. Ita duratio, vel æternitas illa, quæ Deo conveniat, respectu nostri *relativa* solum, vel *negativa* concipitur quod ipsius infinitatem alia ratione concipere, vel exprimere non possumus, nisi quod in illa terminos ullos admittere non possumus; sed ipsa tamen in se *vere*, *absolute*, *positive*que infinita sit, quippe quæ terminis omnino careat, cumque nullum initium habuerit, nullum quoque finem sit habitura. Hinc observari facile poterit quod ab intellectu nostro perspicua quidem *infinitatis*, nulla vero *infiniti* idea, quæ nitida, & accurata sit, haberi potest. Perspicue nempe intelligimus rem aliquam terminis carere, adeoque *vere infinitam* esse oportere; at ubi rem ipsam infinitam concipere conamur, ipsius

ipsius ideam angustis finitisque perceptionis nostræ finibus circumscribimus, adeoque ipsam veluti *finitam*, aut saltem *indefinitam* concipere cogimur: quemadmodum fere *chiliogonum*, sive mille laterum figuram possibilem esse, ejusque attributa nitide percipimus, ut externos angulos à productis mille lateribus formatos quatuor rectis æquales esse; sed *chiliogoni* tamen ideam, nonnisi mire confusam, effingere, animoque complecti possumus.

IV. Supposita hac entis absolute, positive, vereque *infiniti* natura, idea, vel caractere, à Physicis, ac Metaphysicis acerrime disputatur an ens aliquod *infinitem* existat, vel possibile sit; sive potius intrinsece repugnet, contradictionem involvat, adeoque juxta principia superius exposita ne quidem ab ipso Deo produci possit?

Plurimi ex veteribus, ac recentioribus etiam Philosophis *infinitem* ipsum non modo ab infinita Dei potentia produci posse, verum etiam productum esse, opinantur. Siquidem plurimi materiam in infinitum divisibilem esse tum physicis tum mathematicis quoque rationibus ostendi posse arbitrantur; adeoque in qualibet extensionis, corporis, materiae parte infinitam prorsus partium multitudinem admittendam esse contendunt, quippe quæ à nullo prorsus divisionum numero exhaustiri possit. Ita Cartesius, quamvis non *infiniti*, sed *indefiniti* potius, vocem usurpaverit, *infinitem* ipsum à Deo creatum admittit cum in spatiis illis, quæ à nobis *imaginarie* dicuntur, extensionem, adeoque in ipsius hypothese corpus admiserit; ut proinde nullus unquam huic extensioni vel Universo finis inesse possit. Etenim argumentum illud, quod hic ab illo usurpatur, perspicue ostenderet nullos in Universo limites esse

esse posse, alioquin, si fines aliqui existerent, adhuc extra illos extensio quædam sine corpore vel Universi parte conciperetur, quod ab ipsius hypothesei abhorreret.

V. Alii vero quidquid à Deo jam libere consultoque productum fuit, finitum esse concedunt, ut *omnia in mensura, & numero, & pondere*, creata sint, ut à Sacris Litteris (a) erudimur. Fieri tamen posse contendunt ut infinitum aliquod ab ipso Deo producat; neque aliter infinitam ipsius agendi vim, sive omnipotentiam intelligi, vel explicari posse arbitrantur, quàm si infinito prorsus effectui, sive infinito effectuum numero producendo par esse possit. Itaque existimant Mundum ab æterno creari potuisse, adeoque infinitam annorum mensiumque multitudinem haberi potuisse; quemadmodum, si Mundus ipse jam conditus in æternum conservetur, infinita prorsus dierum, mensium, annorumque multitudo produceretur. Quinetiam asserunt infinitum unum alio infinito majus haberi posse; ut quemadmodum nempe finitum unum alterius finiti duplum, duodecuplum esse potest, ita quoque infinitum aliquod alio infinito quacumque proposita ratione majus admitti possit; ut, si infinitus hominum numerus admitteretur, duplo infinitus oculorum numerus sit futurus; si infinitus annorum numerus una cum Mundo, qui ab æterno creatus esset, admitteretur, mensium numerus duodecuplo infinitior esse deberet. Hinc illa, quæ *De infinitis Infinitorum, ac infinitè parvorum ordinibus* à plerisque Mathematicis acerrime disputata sunt, ut ostenderent varias classes illas, aut ordi-

(a) *Sapient, cap. II. ver. 21.*

ordines, qui infinitis magnitudinibus admittuntur, in infinitis etiam concipi vel admitti posse. Quandoquidem ergo infinitum ipsum, infinitorum classes, & ordines, ipsorumque attributa nitide, accurateque à nobis intelligi & ostendi possunt; intrinsece possibilia, siue non repugnantia censerì illa debent, ut proinde ab infinita Dei potentia produci possint.

VI. Quamvis autem hæc, aliaque id genus plurima subtiliter inventa, atque exposita sint; alii tamen ingenio doctrinaque præstantes viri infinitum illud, quod terminis careat, vereque infinitum sit, omnino repugnans, impossibile siue contradictorium existimant; ut proinde Deus ipse, quamvis omnipotens sit, infinitum aliquod neque produxerit, neque producere unquam possit.

Ac primo quidem conspicue certoque apparet quod multitudo quædam infinita intrinsece repugnat, & contradictionem involvit. Siquidem numerus omnis, ac multitudo, quæcumque illa fuerit, ex unitatibus una conjunctis, & multiplicatis exoritur; adeoque numerus infinitus ex infinitis unitatibus constare deberet. Quemadmodum ergo numerus ac multitudo quælibet, quæ ab intellectu nostro percepta sit, novis unitatibus augeri posse concipitur, ac nulla prorsus multitudo effingi potest, cui numerus alius, unitates aliæ, aut alia multitudo adjungi non possit, numerus ipse additionibus possibilibus carere, terminis destitui, vereque infinitus esse non poterit. Quæcumque vero de numero, aut multitudine dicta sunt, de linea quoque, superficie, corpore, & alio quolibet magnitudinis genere vera esse debent; cum magnitudo quælibet multitudinis instar, ex partibus iteratis vel multiplicatis exsurgat; adeoque, sicuti intrinsece repugnat

aut

aut impossibilis est magnitudo, cui novæ partes addi non possint, iisque partibus augeri nequeat, ita quoque magnitudo infinita impossibilis esse debet. Accedit etiam quod si magnitudo quædam, aut ens vere infinitum existeret, vel ab ipso Deo productum foret, infinita Dei potentia prorsus exhausta conciperetur: quippe quæ infinitum illud augere, ipsique novas partes adjungere non potest. Itaque Philosophi illi, qui ea præserim de causa infinitum aliquod à Deo produci posse contendunt, ut infinita Dei potentia à nobis intelligi, defendique possit, omnipotentiam ipsam evertunt, fierique posse arbitrantur ut infinita Dei potentia exhaustiatur, quippe qui dixerint ens illud possibile, neque repugnans esse, quo posito sive producto Deus ipse amplius omnipotens esse, vocarique non posset. Hinc ad rationes, & argumenta singula, quibus opposita sententia defendi solet, reponunt quod materiæ divisibilitas non *infinita*, sed *indefinita* solum censi debet; quod fortasse Mundus ab æterno creari non poterat, aut certe motus ipse, & tempus ab æterno incepisse non potuit; & quamvis etiam tum *permanentes*, tum *successivæ*, res ab æterno productæ fuissent, ac Mundus ipse cum permanentibus, ac successivis entibus in æternum conservaretur, duratio tamen illa, rerumque numerus, qui à nobis percipitur, non infinitus, sed solum indefinitus, esse deberet, cum præsens hic dies veluti finis ac terminus esse debeat, à quo indefinita illa duratio exordiat, aut in quem desinat. Ita quoque constanter optimeque docent quod extensio Mundi ne *indefinita* quidem, sed omnino *finita* esse debet; cum Cartesii sententia, cui infinitas illa ininitur, absurda sit, ut sequenti Capite demonstrabitur: quod infinitas illa, quæ à nobis

bis veluti possibilis percipitur, imaginaria sit, atque perspicue entis creati ideæ adversetur. Denique ad argumenta singula, quæ ex Mathematicis proferuntur, accuratè respondent quod quidquid in Mathematicis de Infinito, variisque Infinitorum ordinibus demonstratur, de *imaginario* solum *infinito*, sive potius de *indefinito* intelligi, & admitti debet, ut nimirum quantitas illa *infinita*, vel *infinita magna* dicatur, quæ data qualibet assignabili quantitate sit major; sicuti vicissim quantitas illa *minima*, vel *infinitesimè parva* vocatur, quæ data qualibet assignabili quantitate major sit, quamvis utraque vera finita sit, adeoque tum magnitudinis, tum parvitaris terminos habere debeat.

VII. Atque ista quidem præcipua argumenta sunt, quæ alterutra ex parte proferri solent, ut infiniti possibilitas, vel impossibilitas ostendatur; adeoque breviter explicanda fuerant ut infiniti notio subtilius exponeretur. Ceterum quæstionem ipsam dirimere fortasse nec juvat, nec licet: cum præsertim infinita Dei potentia in utraque hypothesis salvari, optimeque defendi possit. Si tamen omnia subtilius explorentur, fortasse verisimilius admitti poterit quod in infinito nulla prorsus intrinseca repugnantia, vel contradictio reperiat; adeoque prorsus immeritò infinitum ipsum impossibile existimatur. Quod enim asseritur ab ipsa magnitudinis indole, sive natura requiri ut novis semper partibus aliis augeri possit, id de *finita* solum, non autem de *infinita* quoque magnitudine censendum erit; nec ulla perspicua, certa que ratione ostendi poterit ejusmodi finitatem veluti essentielle magnitudinis, reique creatæ attributum esse oportere, ut proinde tum finitæ, tum infinitæ quoque magnitudini convenire illa debeat. Accedit etiam quod in-

finit-

finitum ipsum augeri novisque partibus extendi poterit, nulla nimirum perspicua ratione ostendi unquam poterit infinitum unum alio infinito majus repugnare. Quod vero plurimi divinam potentiam exhaustum iri contendunt si infinitum aliquod ab illa produceretur, reponi facile poterit id inconveniens, & absurdum esse non posse. Quemadmodum enim Deus ubi effectum aliquem libere produxerit, efficere certe non potest ut effectus ille productus non sit, adeoque hac in parte divina potentia velut exhausta concipitur, ita quoque, si libere effectum aliquem produxisset, qui vere infinitus esset, ac impossibile sit infinitum illud augeri, nullum inconveniens & absurdum effingi poterit quod in hac hypothese, vel dependenter à libera Dei voluntate effectus aliquis ab illo productus augeri non possit. Ceterum ne infinito quidem effectu producto divina potentia exhausta foret. Siquidem infinitum illud augere, ac infinitum aliud vel in eodem ipso, vel in alio entis genere producere posset. Si generatio futura in infinitum secundum has species, quæ sunt finitæ, duraret, adhuc plura Deus posset facere; quia posset facere novas species, & hoc in infinitum. *D. Thom. quæst. de Verit. disp. quæst. 20. art. 4.* Itaque, ut uno omnia verbo complectar, cum una ex parte nitide certoque cognoscatur divinæ potentiae vires infinitas esse oportere, adeoque illa solum à Deo produci non posse, quæ repugnantia, vel contradictoria sint; altera vero ex parte ejusmodi infiniti repugnantia vel contradictio nulla perspicua certaue ratione ostendi posse videatur, verisimilius est certe infinitum ipsum à Deo produci posse; ne scilicet Dei potentia, rerumque possibilitas ambiguè solum mentis nostræ viribus, atque imaginibus circumscribarur.

VIII. Quæcumque vero de Infinito jam diximus, siue infinitum ipsum possibile, siue repugnans, ac impossibile censeatur, de utroque *infinitatis* genere intelligi debent, quod ens aliquod vel *extensive*, vel *intensive* infinitum vocatur.

Intensiva infinitas dicitur illa, quæ incerto quodam entis genere continetur, ac in illo terminos omnes excludere concipitur: ut si calor aliquis vere infinitus foret, calor ille intensive infinitus, vel infinite intensus vocaretur; eique substantiæ, cui inesset, infinitam hanc intensionem imprimeret.

Extensiva vero infinitas vocatur illa, quæ nullis entium generibus circumscribitur, sed ad omnia potius ipsorum genera diffundatur; ut proinde ipsorum numerus ac multitudo prorsus infinita sit, quamvis ipsorum quodlibet intensive finitum, vel infinitum sit: ut si infiniti homines, infiniti lapides existerent.

Itaque si infinitum ipsum possibile censeatur, non modo res aliqua intensive infinita à Deo produci poterit; verum etiam res extensive quoque infinitæ, hoc est infinita generis alicujus entia, infinita entium genera, infinita quoque infinitorum generum entia produci poterunt: quemadmodum sane Deum ipsum utroque infinitatis genere infinitum esse ostendemus; cum in quolibet entis ac perfectionis genere infinite perfectus sit, infinita nempe infinitarum perfectionum genera complectatur; atque ita quidem ut infinitas illa in ipso necessaria, essentialis, ac independens esse debeat, eoque discrimine à creatis entibus, quæ infinita fortasse sovent, accuratissime distingueretur, quippe quæ libere, & contingenter infinitatem illam, quæcumque foret, ab ipso Deo sortirentur.

CAPUT VII.

De Ente corporeo, & incorporeo, sive de Corpore, ac Spiritu.

I. **P**Lurima, quæ variis in locis, atque præsertim in explicanda Temporis, & Infiniti natura varioque entium mutabilium, vel immutabilium genere superius exposita sunt, perfecte intelligi vel explicari non possunt, nisi perspicue intelligatur quid *corporei*, vel *incorporei* Entis idea, vel nomine designetur; quove discrimine, vel charactere distinguere possit an ens illud, quod à nobis percipitur, corporeum, vel incorporeum censeri debeat; in quo nimirum *Corporis*, ac *Spiritus* etiam natura, & essentia posita sit. Itaque de corporei, atque incorporei Entis natura ac discrimine agendum erit; cum præsertim ex ejusmodi cognitione perniciosæ quædam, & absurdæ sententiæ refellendæ sint: quas à veteribus, ac recentioribus etiam Philosophis inventas liberius serpere, atque incautis imponere posse conspiciamus. Quandoquidem verò longe facilius est Corporis, quàm Spiritus, cognitio, adeoque ex ipsa Corporis cognitione Spiritus idea sive cognitio pendere & à nobis acquiri plerumque solet, prius de Corpore, deinde vero de Spiritu brevissime differetur.

II. Itaque *Copius*, *materia*, vel *corporea substantia* vocatur illa, in qua trina dimensio, longitudo scilicet, latitudo, atque altitudo, sive profunditas reperitur, plurimæ quoque affectiones aliæ observantur, ut gravitas, durities, fluiditas, calor &c. ceteræque proprietates & qualitates illæ, quæ sensibus percipi, & explorari possunt, adeoque *sensibiles* appellantur; præsertim vero soliditas, aut

aut impenetrabilitas, qua corpus ipsum tactui, vel alteri corpori resistit, ut quamvis maxime fluidum ac tenuissimum sit, corpus tamen aliud excludat, ab alio corpore pervadi vel penetrari non possit, adeoque repugnet unum idemque spatium, aut locum simul eodemque tempore à duplici corpore occupari.

Ejusmodi vero corporis idea, sive materiæ notio evidenter adeo distincteque à nobis percipitur, ut illa clarius exponi vel defini-ri non possit. Sed illud unum à Philosophis inquiritur in quo materiæ vel corporis essentia posita sit, quodnam ex variis attributis illis, quæ corpori inesse solent, aliorum primum, ipsique intrinsecum, necessarium, inseparabile, & essenziale esse debeat; cum certe plurima ex attributis illis contingentia solum, ac separabilia condenda sint. Etenim figura, motus, durities, situs aliæque plurimæ corporis affectiones ab illo sejungi possunt, ipsique contingenter solum conveniunt; non modo quod figura quælibet, situs, motus &c. quæ in corpore reperitur, variari, & auferri possit, quin ipsa corporis idea destruat, verum etiam quod accurate corporis idea à nobis concipi, formarique possit, quamvis affectiones illæ à corpore separantur. Itaque si qualitates, & affectiones illæ, quæ sensu percipiuntur, materiæ intrinsecæ, & essentielles esse non possunt, proprietates aliæ, sive attributum aliud inquiri debet, quod intrinsece, & inseparabiliter ipsi conveniat; ut proinde, si attributum illud ponatur, ipsum quoque corpus admitti debeat; si vero auferatur, ipsa quoque corporis idea, vel essentia destruat, hoc est attributum illud exponi, sine quo corpus esse, existere vel concipi non possit.

III. Cartesius, aliquæ plures existimant attri-

attributum illud nihil aliud esse, quam *extensionem*; ideoque Corporis essentiam in trina dimensione positam esse arbitrantur. Etenim observant quod ubi trina dimensio à nobis percepta sit, ipsa quoque corporis existentia perspicue percipitur; ubi corpori trina dimensio auferatur, corpus ipsum omnino destrui vel auferri concipitur; quemadmodum facile, nitideque percipitur quod ab extensione ipsa veluti fonte primoque corporis attributo *soliditas, impenetrabilitas, figura, mobilitas*, & affectiones aliæ dimanant, quæ sublata extensione corpori amplius inesse vel convenire non possent. Hinc Cartesius Mundi extensionem indefinitam, vel potius intrinsece, vereque infinitam esse putavit quod in iis etiam spatiis, quæ extra Universi limites concipiuntur, ac *imaginarie* vocari solent, extensio, adeoque corpus reperiatur. Spatium vero prorsus inane, corporis expers, aut vacuum ne ab ipsa quidem infinita Dei potentia produci posse contendit: cum in ipso quoque vacuo trina dimensio concipi, ideoque corporis essentia, vel corpus esse debeat.

IV. Sed Cartesius hic, alibique sæpius Corpus *physicum* cum *mathematico* temere confundit; adeoque sicuti in corpore mathematico, illo nimirum, quod mente concipitur, atque in sola mente nostra cogitante existit, nihil aliud, quam trina dimensio reperitur, ita quoque corporis etiam physici essentiam, ejus nimirum, quod extra nos ipsos existere, suasque physicas, & reales affectiones induere potest, in hac ipsa trina extensione collocatam esse putavit. Itaque primum Cartesius ipse in hoc fallitur quod physici corporis essentiam in extensione illa positam esse putavit, quæ à nobis percepta, ac imaginaria sit; cujusmodi sane esse debet
exten-

extensio, quæ in spatio vacuo, vel extra Universi fines admitti debet; cum tamen extensio illa, quæ physico corpori conveniat, realis ac positiva esse debeat. Deinde vero extensio ipsa, quamvis etiam vera, realis, ac positiva sit, perspicuus quidem ac primus materiæ character, primumque attributum esse poterit, quod in corpore concipiatur, & ex quo ceteræ affectiones aliæ dimanent; sed ipsa tamen extensio, ut Cartesius ipse fatetur, (a) cum ex hoc solo quod corpus sit extensum in longum, latum, & profundum recte concludamus illud esse substantiam, quia omnino repugnat ut nihili sit aliqua extensio, idem etiam de spatio quod vacuum supponitur, concludendum est, quod nempe, cum in eo sit extensio, necessario etiam in ipso sit substantia, neque existere, neque accurate concipi possit, nisi tanquam perfectio quædam, attributum, ac modus, qui substantiæ inhæreat, ipsamque *extensam* efficiat; adeoque in corporis idea vel essentia prius substantiæ notio, quam extensionis idea, apprehendi debet; proindeque corpus, ac materia non extensio sola, sed substantia extensione prædita, sive potius substantia extensionis capax, & extensionem exigens esse debet. Itaque nulla prorsus contradictio reperitur ut substantia illa, quæ extensionem receperat actuali extensione destituatur, quamvis illam intrinsicè requirat, ipsius capax sit, atque ad illam intrinsicè, & essentialè ordinem habere debeat.

V. Quod si actualis extensio ad ipsam physici Corporis essentiam spectare, eamque constituere non potest, multo certe minus
impe-

impenetrabilitas ad essentiam illam spectabit. Quamvis enim corpus ita comparatum sit, ut tactui resistat, & corpus aliud à loco, quem occupaverit, excludat; hæc tamen affectio, sine *impenetrabilitas* nonnisi secundaria quædam corporis affectio censi debet, quæ extensionis instar corporeæ substantiæ, sive corporis essentiæ adjungatur, atque ex extensione ipsa oriatur. Itaque hæc altera, vel secundaria corporis affectio & extensionis effectus à Deo impediri vel auferri profecto poterit; ut proinde duo corpora penetrari, hoc est uno eodemque tempore in uno eodemque loco esse possint.

Quemadmodum vero neque actualis *extensio* neque *impenetrabilitas* ipsa velut intrinsecum inseparabile, & essentialiale Corporis, sive materiæ attributum censi potest, ita sane *mobilitas* ipsa, vel *motus*, *energia*, vel agendi vis ipsi corpori, sive materiæ intrinseca, & essentialis esse non poterit. Siquidem corpus ipsum, quamvis etiam extensione, ac impenetrabilitate præditum supponatur, accurate concipi vel esse potest, etiamsi nullus omnino motus in illo existat, sed illud prorsus indifferens esse concipitur ut quiescere, vel moveri possit; atque ubi in illo motus, ac agendi vix apprehendatur, motus ipse velut affectio quædam concipietur, quæ ipsi contingenter conveniat, adeoque prorsus à corpore separari, vel auferri possit quin essentia corporis destruat^(a).

VI. Itaque Leibnitii, ac Tolandi sententia manifestissime refelli debet, qui *activitatem*, vel agendi vim, ac motum materiæ intrinsecum,

(a) *Act. Lips. an. 1695. pag. 146. Epist. 3. & 4. ad Serenam.*

cum, & essentialem esse putarunt; quamvis Leibnitijs *monades* illas, quibus veluti primordiis indivisibilibus minimis, ac inextensis universa corpora componuntur, incorporeas sinxerit, ipsisque activitatem illam, motum, simulque confusam quandam perceptionem concesserit, quæ deinde in universam materiæ, corporumque compagem à monadibus ipsis compositam manaret. Illi quoque facile perspicueque refelli debent, qui singulis materiæ partibus mutuam *attractionis* vim, ac *nisum* quendam ingenitam, ac essentialem esse dixerunt, quo ad mutuum contactum accedere, simulque coalescere, & conjungi conentur. Etenim *nisus* ille, conatus, attractio, quamvis in ipsis materiæ partibus velut immechanica quædam ac universalis affectio admitteretur, semper tamen ipsis contingens, separabilis, & extrinsecus impressa foret; cum ipsæ materiæ corporisque partes natura sua inertes, otiosæ, ac omnino indifferentes concipiantur ut ejusmodi vi donari sive destitui possint, ut optime, accurateque Lokius (a) observavit. Denique universa quoque Chaldæorum, Persarum, Sinesium, Helmontii, Chymicorum, aliorumque sententia refelli debet, qui vim quandam *hylarchicam*, *principium archæum* materiæ inesse putarunt, qua singulæ materiæ, ac Universi partes foveri, agitari, ac dirigi deberent; quemadmodum fere Pythagoras, Stoici, & Plato Spiritum quendam, atque animam per singulas Universi partes diffusam esse dixerunt; eamque tamen non materiæ ipsi ingenitam, sed divinam potius mentem esse putarunt, quæ ita singulas Uni-

versi

(a) Lib. 2, cap. 13. §. 22.

versæ partes pervaderet, foveret, agitarer, ut ex illa singulæ animantium animæ veluti fonte decerperentur.

VII. Ceterum quidquid de obscuris ejusmodi Veterum, ac Recentiorum quorundam sententiis censeretur, perspicue ex iis, quæ demonstrata sunt, inferri jam poterit quod materiæ quidem, corporisque physici nomine intelligi debet ens illud positivum ac reale, quod positiva realique extensione, impenetrabilitate, motu, ceterisque modis, & affectionibus præditum sit; sed ita tamen ut singulæ affectiones illæ corpori, sive materiæ non intrinsecæ ac essentielles, sed contingentes sint, adeoque corporis essentia in hoc uno posita censeretur, quod sit *substantia quædam, quæ extensionem exigat, ejusque capax sit*, ut ex illa deinde juxta naturæ leges à Deo constitutas *impenetrabilitas, soliditas, figura &c.* oriatur. Quod si motus ipse, vel visus aut conatus ad motum, attractio, vel alia quælibet sive mechanica, sive immechanica vis in ipso corpore reperitur, hæc non à materia ipsa, sed ab alio prorsus Ente pendere debet, quod corpus esse non poterit; alioquin ipsum quoque motus principium ab alio moveri deberet: ne scilicet motus, actio, & impulsus ab immota re, agendi vis ab inerti principio oriri posse dicatur. Itaque prima motus causa, primumque movens substantia incorporea esse debet; adeoque præter corporeas incorporea quoque substantia, vel Spiritus admitti debet.

VIII. Id optime profecto viderant Plato, ceterique sapientes omnes, si Atomistas solum exceperis, qui omnia temere & inconsulto ex fortuito solum Atomorum motu prodiisse sinxerunt. Etenim Plato, ceterique melioris notæ Philosophi Mundum ab incor-

porea quædam substantia, vel Mente formatum, miroque hoc ordine distributum esse dixerunt. Sed quum intelligere non possent aliquid ab ipsa divina Mente ex solo nihilo produci posse, materiam ingentam, æternam, ipsique Deo cœvam admiscere, ipsi deinde motum, atque ordinem artifex Deus impresserit. Ubi tamen sapientes illi rerum contingentium indolem subtilius explorassent, melioremque supremi Numinis ideam, & accuratam ipsius potentia notionem efformassent, intelligere profecto illi poterant nullam omnino repugnantiam occurrere quin ens aliquod, ac materia ipsa ex solo nihilo produci possit. Ac certe quidem, si materia ipsa cum Platoniciis, aliisque pluribus ingenta, ipsique Deo cœva supponatur, eique ab æterno quiescenti, ac immotæ motus aliquando à Deo impressus fuit, motus ille ex solo nihilo à Deo productus esset; adeoque materia à *quiete*, hoc est à *nihilo motus* ad *motum* translata fuisset. Itaque, si non repugnat *motum* ex *nihilo motus* produci, cur impossibile, contradictorium, vel intrinsece repugnans censeri debet ens aliud ex nihilo sui, adeoque materiam ipsam ex nihilo materiae produci posse? Deinde verò, cum intimo quodam vividoque sensu percipiamus nobisque conscii simus mentem nostram aliquando incæpisse, cumque incorporea illa sit, ipsam non ex præexistente quadam materia, sed ex nihilo creatam esse, quid prohibet quin ipsa quoque corporea materiae substantia ex nihilo produci potuerit, cum utrobique par difficultas occurrat, eademque vis, quæ Spiritum ex nihilo produxit, eadem prorsus ac æquali jure ac potentia materiam ex nihilo educere repente possit? (a)

Ita-

(a) Vid. Zeki Lib. 4. cap. 10. §. 18.

Itaque nulla prorsus intrinseca repugnantia vel contradictio reperitur ut aliquod ens ex nihilo producat; non ita quidem ut *nihilum* ipsum in *ens* convertatur, aut veluti intrinsecum quoddam rei productæ principium evadat, quo res intrinsece componatur, ut ignis ex ligno productum dicitur, quod materia ligni in ignis materiam convertatur, ignemque componat; sed ita solum quod nihil ipsum veluti terminus concipiatur, qui ante rei productionem extitisse percipitur, producta res antea non extaret, atque repente ex *nihilo ad esse* translata fuerit. Denique, ne argumentis aliis hic immorer, quibus hæc ipsa materiæ creatio possibilis ostendi potest, simulque perspicue certoque ostendi quod materia quædam ingenita, Deoque cœva repugnat, illud unum Platonicos æternæ materiæ assertores impellere profecto poterat, quod si materia ab ipso Deo producta non foret, ab illo moveri, ornari, disponique non potuisset. Etenim, si materia à Deo producta non fuisset, sed independenter ab illo extitisset, ab ipso Deo cognosci non potuisset, cum Dei cognitio non ex extrinsecis objectis ullis oriatur, sed ipsi intrinseca, & essentialis esse debeat, atque illud unum à Deo percipi cognoscique possit, quod in ipsius essentia, attributisque adeoque potentia continetur, ut ab illo vel productum fuerit vel aliquando libere produci possit. Itaque, si materia à Deo producta non foret, in ipsius potentia contineri adeoque ab illo cognosci non potuisset; * cumque proinde Deus materiam ipsam

* Occurrit animo quiddam mirum, sed tamen verum, quod iste Mundus nobis notus esse non posset, nisi esset. Deo autem nisi notus esset, esse non posset. Aug. de Civ. Dei Lib. 11. cap. 10.

ipsam existere ignoraret, ipsi motum, ordinemque imprimere, eamque disponere non potuisset. Quandoquidem ergo, motus omnis, & ordo materiæ ab ipso Deo juxta Platonicos oriri debuit, manifestissime inferre poterant, materiam à Deo cognitam, adeoque productam fuisse; ut quemadmodum nempe ingenue fatebantur materiæ motum ex nihilo ab ipso Deo productum fuisse, ita quoque argumentis ipsis agnoscere profecto illi poterant materiam ipsam ex nihilo produci potuisse; quemadmodum ex ipso materiæ motu contingenter illi impresso perspicue certoque agnoverunt, atque à Philosophis etiam aliis agnoscì poterat primam motus causam incorpoream esse oportere, adeoque præter corporeas substantias incorporeas etiam admittendas esse.

IX. Incorporea verò substantia dicitur illa, quæ partibus & extensione, adeoque soliditate, figura, ceterisque modis, & affectionibus carere debet, quæ ex extensione oriuntur; tantumque abest ut extensionem ipsam corporis instar exigat, ut ipsius potius incapax sit, atque attributa, quæ incorporeæ substantiæ conveniunt, extensionem ipsam excludant: neque aliter ipsi inesse, vel in illa concipi possint, quam si extensio ceteraque corporis affectiones omnino seponantur. Itaque perceptio, quæ incorporeæ substantiæ character esse debet, neque ab extensione oriri, neque cum extensione conjungi poterit, ut opportune ostenderetur ubi de Mentis humanæ spiritualitate agendum erit. Itaque si in Deo, atque in homine perceptio admittatur, dubitari certe non poterit quin ipsorum substantia spiritualis, & incorporea sit; quemadmodum ex ipso quoque motu, qui contingenter materiæ semel inditus, ac impressus fuerit, incorpoream substantiam quandam.

dant agnoscendam esse jam diximus, quæ immoto corpori motum concesserit.

X. Itaque Hobbesius, Tollandus, Collinsius alique plures, qui non aliam quam *materia* substantiam admittunt, adeoque *Materialista* vocantur, ubi incorporeas substantias impossibiles esse dicunt, ipsam quoque materiam, ejusque motum auferre, vel repugnantem asserere profecto debent; cum materia neque se ipsa produci, neque impelli, sed ab extrinseca causa quadam fieri, moverique debuerit, quæ materia non foret. Sic ubi Hobbesius asserit Deum corporeum esse oportere quod illa quæ corpore destituta fuerint, nihil omnino sint; ubi Tollandus incorporeas substantias phantasmata esse dicit, nitidam, atque accuratam substantiæ ideam cum corporeo phantasmate mire confundunt; cum tamen substantiæ notio ab ipsa corporis, & materiæ notione distinguere debeat; quamvis intrinseca illa tum corporeæ, tum incorporeæ quoque substantiæ notio perspicue à nobis intelligi vel apprehendi non possit; sed illa tamen à variis modis, atque attributis illis, quibus affecta fuerit, abstrahi, discernique debeat, ut una proinde corporea, alia incorporea esse possit.

XI. Quo tamen loco observari plurimum debet quod à Stoicis etiam, atque nonnullis Ecclesiæ Patribus humanus animus, Angeli, Deus ipse *corpus* vocatur; sed alio tamen distinctoque sensu, quam ut ipsorum opinio cum nefaria Tolandi, aliorumque sententiæ temere confundi possit. Siquidem Stoici, ac Tertullianus* etiam quidquid ens foret, atque
à ni-

* Quis negabit Deum corpus esse, etsi Deus spiritus est? Spiritus enim corpus sui generis in sua etfigie Tert., adv. Prax.

à *nihilo* distingueretur, *corpus* vocabant; adeoque ipsas etiam rerum *essentias*, *virtutes*, *affectiones*, *actiones* corpus esse dicebant: ut illa nimirum hoc corporis nomine veluti positiva quædam entia à *nihilo* secernerent. At corpus illud à materia, sive corporea substantia perspicue distinguebant, cum affectiones illas, atque attributa, quæ corporeæ substantiæ sive materiæ conveniunt, ab ejusmodi corpore sejungerent; ideoque ipsorum error aut controversia in solo *corporis* nomine minus accurate feliciterque usurpando consisteret. Hobbesius verò ceterique substantias omnes ita corporeas esse volunt, ut corporeas solum affectiones illis adscribant, adeoque à corporeis substantiis nullo discrimine distingui posse contendant.

XII. Exinde verò jam facile universa Spinozæ hypothesi refelli poterit, quippe quæ perspicuis tum corporeæ, tum incorporeæ quoque substantiæ notionibus hætenus expositis adversetur. Afferit ille *substantia* nomine ens illud intelligi, quod in seipso independentem ab alia quacumque re existat; cumque res omnes à Deo pendere intelligeret, *substantia* nomen Deo soli convenire, vel concedi posse arbitratur; ceterasque res omnes, quæ existant, nihil aliud esse contendit, (a) quam modificationes quasdam attributorum, quæ in hac ipsa divina substantia reperiuntur. Itaque diserte ille docuit quod
præ-

Potuit propterea *Tertullianus* putari corpus Deum dicere quia non est nihil; non est inanitas, non est corporis, vel animæ qualitas. *August. Lib. de Haeresib. cap. 86.*

(a) *Part. I. definit. 5.*

præter Deum nulla dari, neque concipi potest substantia; (a) ideoque unam tantum Dei substantiam admisit, quæ æterna, indivisibilis, infinita sit; cumque in illa extensionem quandam infinitam ipse conceperit, ait extensionem illam corpoream esse oportere, unde subdit: *per Corpus intelligo modum, qui Dei essentiam, quatenus ut res extensa consideratur, ceruo, & determinato modo exprimit.* (b) Denique, cum divina substantia cogitandi vi prædita esse debeat, in infinita illa, simplici, æternaque substantia infinitam cogitationem infinitæ extensioni conjunctam esse putavit; ut proinde *extensio*, simulque *cogitatio* veluti duo intrinseca, & essentialia divinæ substantiæ attributa censi debeant. Hinc, cum *extensio*, sive materia à divina substantia non distinguatur, nullaque prorsus substantia præter divinam in Spinosæ hypothesei admitti possit, juxta Spinosam neque materia creari, neque ulla corporea, vel incorporea substantia produci potest, sed quidquid existat, ac fieri videatur, nihil est aliud, quam divinæ substantiæ modificatio: ut proinde neque rerum contingentia, neque arbitrii libertas, neque creata agendi vis, neque effectus aliquis naturæ legibus contrarius sive *miraculum* admitti possit: sed omnia potius necessaria sint, quippe quæ necessariis, ac immutabilibus divinæ substantiæ legibus peragantur.

XIII. Quamvis autem perditæ, ac nefariæ opinionis hujus falsitas aperte satis intelligi deprehendique possit, aliqua tamen hic

op-

(a) Part. I. Proposit. 14.

(b) Part. 2. defin. 1.

opportune, breviterque observasse juverit, ut illustrius adhuc ostendi illa possit.

Ac primo quidem Spinoza fallitur ubi solum ens illud *substantia* nomine vocari posse arbitratur, quod ab alio non pendeat; adeoque nullum ens aliud, præter Deum, substantiam censerì, vocarique posse contendit. Etenim, ut alibi jam demonstravimus, *substantia* nomen, atque idea id unum requirit, ut ens illud, quod *substantia* vocatur, intrinsece in se subsistat, perfecte concipi, & esse possit, quamvis alia existere non concipiantur. Itaque, licet effectus omnes, ut *homo*, *lapis*, *sol*, &c. à Deo, sive à creatis etiam caussis oriantur, atque ab illis existentiam sortita fuerint, *substantia* tamen censerì dicique poterunt quod à nulla alia re dependeant, intrinsece ab aliis distinguantur, existentiam ac operandi vim ita receperint, ut, quamvis nullum ens aliud existeret, illam tamen exercere, & conservare possint. Quod si substantiæ nomen, atque idea ipsam quoque causam excludere deberet, à qua substantia producta fuerit, substantiæ quidem nomen creatis rebus adscribi non posset, solique Deo conveniret; sed intrinseca tamen, atque essentialia rerum attributa à contingentibus solum ipsarum modis, & affectionibus nullo discrimine distingui possent, ut lapis à figura, homo à perceptione, quam exerit; cum tamen inter hominem, ejusque perceptionem, inter lapidem, ejusque figuram perspicua varietas, ac distinctio intimo quodam sensu deprehendatur. Quid verò quod in creatis rebus, ac præsertim in homine, plurimæ tum physicae tum morales imperfectiones reperiuntur, quæ infinitæ Dei potentiæ, perfectioni, bonitati, scientiæ, sanctitati adversantur? Itaque, si quidquid in homine reperitur, quidquid ab

ho-

homine efficitur nihil aliud esset, quam certa quædam divinæ substantiæ modificatio; imperfectiones illæ divinæ substantiæ inesse, ac ab illa produci deberent; quod sine summo scelere cogitari vix potest.

XIV. Deinde verò cum ait Spinosus quod in ejusmodi divina substantia extensio veluti ipse intrinsecum, & essentielle attributum reperitur, quis aperte non videat extensionem ipsam veluti substantiæ cujuslibet essentialiam admitti; cum tamen extensionem illam ne ipsi quidem corporeæ substantiæ essentiallem esse ostenderimus? Ita cum ait extensionem hanc necessario infinitam esse oportere, perspicue fallitur; nam finitas, aut infinitas extensioni contingens est, optimeque concipi potest extensio, quamvis illa terminis circumscribatur. Absurdus est etiam quod extensionem illam indivisibilem esse dixerit; cum extensio quælibet partibus componi debeat, adeoque varias in partes resolvi, dividique possit; ut proinde extensio indivisibilis contradictionem involvat. Accedit etiam quod mira illa motuum varietas, quæ in Universo reperitur, æternæ, infinitæ, atque indivisibili substantiæ convenire non posset, quæ semper una, ac invariabilis esse deberet; ne scilicet ex motu partium divisio, transpositio, adeoque divisio produceretur. Denique cum substantiam illam æternam, infinitam, indivisibilem extensione simulque cogitatione præditam esse arbitratur, repugnantia simul componit; cum perceptio corporeæ extensæque substantiæ convenire non possit, ut opportunius alibi contra Lockium demonstrabitur.

XV. Itaque universa Spinosistæ Systematis labes, atque impietas ex hoc uno profuit, quod ipse Auctor creatas ab increata, corporeas ab incorporea substantia non

distinxit; adeoque materiam cum Deo, materiz, corporisque attributa cum Dei attributis misere confudit: unde repugnantia, vel contradictoria simul conjunxit: cumque Deum asserere videatur, *Rausheismum* potius inducit, quippe qui rerum substantiam à divina substantia non distinguat, unoque verbo libertatem, morum leges, religionem omnem subvertat.

Alteram quoque Spinozicæ sententiæ causam, & origo exinde veluti fonte manavit, quod nefarius Systematis hujus Auctor asseruit quod *una substantia nequit produci ab alia* (a); adeoque unicam solum Dei substantiam existere, vel admitti posse putavit. Ejusmodi verò principium de eo solum productionis genere intelligi profecto poterit, quod *emanatione substantiali* fieri concipitur: siquidem perspicue repugnat substantiam unam ab alia profluere, simulque tamen ab alia distinguui; ut certe substantia lucis, quæ ab ipsa solis substantia manare, diffundi, sive profluere concipitur, à solis substantia minime distingueretur. Hinc illi, qui Mundum à Deo per ejusmodi *emanationem* prodidisse volunt, Mundum ipsum à divina substantia distinguui posse negarunt, Deique nomine universam hanc ad spectabilis Mundi compagem, vimque ipsi inditam intelligendam esse dixerunt. Ubi verò principium illud, aut propositio de eo productionis genere intelligatur, in quo substantia quædam non ex veteri substantia profluere, atque ex illa prorsus incolumi manare, sed ex nihilo prorsus educi dicatur, omnino falsa censeri debet; cum
in

in ejusmodi nova novæ substantiæ productione nulla prorsus intrinseca repugnantia, vel contradictio reperiatur, ut paulo superius contra Platonicos demonstravimus. Ita quoque nulla repugnantia in alio productionis genere reperitur, qua veteri substantia prorsus destructa, nova substantia producat. Quamvis enim in hoc productionis genere, qui creatæ naturæ viribus peragatur, materia ex veteri substantia in novam transire, manare, ac fere profluere videtur, adeoque cujusdam fere *emanationis* instar haberi illa possit; cum tamen vetus *substantialis forma* prorsus intereat, novaque prorsus *substantialis forma*, & affectionum congeries à veteri distincta producat, illa non *emanatio*, sed novæ distinctæque substantiæ *productio* censeri debet.

XVI. Sed, ut à perditis sententiis illis digrediar, quæ maximo Philosophiæ, atque ipsius etiam humani generis dedecore ab iis investæ sunt, qui ingenii acumine, ac Metaphysici nomine prorsus immerito gloriari solent, atque ea complectar, quæ de corporeis, atque incorporeis Entibus exponenda supersunt, observari plurimum debet, quod sicuti duplex substantiarum genus admittendum esse jam diximus, ut aliæ nimirum corporeæ, aliæ incorporeæ dicantur; ita quoque eadem prorsus varietas ac distinctio in modis etiam, attributis, atque affectionibus agnosci debet, quibus eadem substantiarum genera exornari conspiciamus.

Itaque corporeum accidens, modus, & affectio dicetur illa, quæ corporeæ substantiæ conveniat, ipsi inhæreat, ipsamque modificet, ac perficiat; adeoque affectiones illæ ex ipsa corporis extensione oriri, aut ab illa pendere merito existimantur: ut *gravitas, motus, figura, &c.*

in-

Incorporeus autem modus, accidens, & affectio vocatur illa, quæ incorporeæ substantiæ convenit, ipsamque perficit, & exornat: ut *perceptio*, *volitio*, *justitia*, *sapientia*, *fides*, ceteræque virtutes omnes, quæ veluti mentis humanæ quantitates, accidentia, vel affectiones ab illa acquiri, vel ipsi divinitus infundi possunt.

Ita veræ incorporeæ qualitates illæ distinguuntur solent, ut aliæ quidem *actuales*, aliæ *habituales* dicantur.

Actualis virtus, affectio, seu qualitas vocatur illa, quæ cum actione conjungitur, sive potius in ipsa actione consistit: ut cum justitiæ, vel charitatis actus elicitur, charitas illa *actualis* dicetur.

Habitualis autem est illa, quæ præviis actibus, ac plerumque iteratis acquisita fuit, in animo veluti impressa remanet, ipsumque ad actus similes producendos aptiorem, & alacriorem efficit. Ita quoque *intentio*, hoc est voluntatis electio, determinatio, ac imperium, quæ incorporeæ affectionis instar involuntate concipitur, aliquando *actualis*, aliquando vero *habitualis* esse poterit. Ubi nempe voluntas ipsa actum exerit, aliquid actu discernit, eligit, & opus ipsum aggreditur, actualis in illa intentio reperitur. Sin vero actum illum, sive determinationem jam elicuerit, ipsamque contrario quodam actu non revocaverit, intentio virtualis, aut habitualis dicetur; quamvis interdum habitualis ipsa à virtuali intentione distinguifuerit, ut in Ethica demonstratur.

CAPUT VIII.

*De Ente relativo, sive de variis Entium
Relationibus.*

I. **U**Niversa fere, quæ superioribus locis de variis Entium generibus, ipsorumque attributis exposita sunt, *absoluta* censeri vocarique merito solent; quippe quæ singulis Entium generibus inesse, aut ab intellectu nostro concipi possint, si entium ipsorum indoles, ac natura spectetur, ac ens illud in seipso solum, absolute, seorsim ab aliis, vel solitarie consideretur. Ita plane si unicum, ac solidarium ens aliquod concipiatur, optime intelligi, ostendique poterit quod illud *essentiam*, aut *existentiam* habeat, *necessarium* sive *contingens*, *mutabile* sive *immutabile*, *finitum* aut *infinisum*, *corporeum* denique sive *incorporeum* censeri debeat.

Quandoquidem verò nullum propemodum ens ab intellectu nostro percipitur quin facile ens ipsum ad aliud ens vel natura sua referatur, vel saltem ab intellectu referri, sive cum alio comparari possit, atque universa fere cognitio, quæ à nobis acquiritur, ex ejusmodi entium mutuo comparatorum ordinibus pendere solet, plurimæ exinde affectiones aliæ spectari debent, quæ *relative* dicuntur, quod illæ nimirum ex ordine oriuntur, quo res una ad aliam referri concipiuntur. Ita, si magnitudo una cum altera conferatur, ipsius *equalis* *major*, vel *minor* dicitur; adeoque *equalitas* ipsa, vel *inequalitas* relativa solum magnitudinis affectio vocabitur. Humanorum actuum honestas, aut pravitas ex ordine deduci debet, quo actus ipso ad legem dirigatur, ut ipsi *conveniens*, vel *repugnans* dicatur. Nullum denique entis

is genus existere, vel concipi potest, in quo *relativa* quædam affectio inesse non possit; cum ens quodlibet ad ens aliud vel necessarium, vel contingentem ordinem habere possit, ex quo *relativa* hæc affectio oriatur.

II. Exinde vero facile intelligi, vel observari plurimum debet quod affectiones quædam, quamvis ut *absoluta* concipi consueverint, perinde quasi in rebus ipsis existerent, *relativa* tamen censendæ sunt, quippe quæ ex ordine, vel comparatione oriuntur, quæ res una cum altera comparatur. Ita paleam, festucam, aliaque id genus corpora *levia* vocamus, ac si nulla gravitas in iis existeret: ac levitas illa, quæ in iis percipitur, *absoluta*, ac *positiva* foret: cum tamen levitas illa *relativa* solum sit, neque alia de causa ejusmodi corpora *levia* dicamus, nisi quod illa cum ferro, lapide; ceterisque gravioribus comparemus, minoremque in illis gravitatem deprehendamus, quam recepto jam more *levitatis* nomine designamus. Ita male vestitum hominem *nudum* vocamus, minusque locupletem *pauperem* dicimus; repentem aquam, si cum frigida compareretur *calidam* censemus; sin vero cum bulliente comparata sit, frigidam appellamus. Ita denique de sensibilibus externorum corporum qualitatibus ex sola plerumque relatione vel ordine judicamus, quo ad sensus nostros referantur, hoc est ex modo, quo sensus nostros percellant, atque afficiant; ut cibos quosdam suaves, aut insuaves, dulces, aut amaros esse dicimus; odorem, colorem &c. corporibus ipsis inesse credimus; quod nimirum affectiones illas, quæ in nobis peraguntur, in ipsa sensuum objecta transferamus; adeoque qualitates illas corporibus inhaerentes, & *absolutas* esse putemus, quæ tamen *relativæ* solum

solum sunt, quippe quæ ex ordine oriuntur, qui inter objecta corpora, nostramque sentiendi vim, aut sensationem in nobis ipsis peractam reperitur.

III. Sed, ut hæc omnia *Relationum* genera clarius intelligi, exponique possint, observasse juverit quod ipsa relatio, quæ in rebus concipitur, ita distingui solet, ut alia quidem *intrinseca*, alia vero *extrinseca* dicatur.

Intrinseca relatio *realis*, vel *necessaria* vocatur illa, quæ ex ipsa rei natura dimanat: ubi nempe res illa existere vel concipi non possit nisi cum ordine quodam, quo natura sua ad ens aliud referatur. Ita filius ad patrem, effectus omnis ad causam, visus ad colores, accidens ad substantiam, signum naturale ad rem significatam, ut respiratio ad vitam &c. *intrinseco*, *reali*, vel *necessario* quodam ordine refertur.

Extrinseca verò, *rationis*, *contingens* relatio dicitur illa, quæ ab intellectu solo, hominumque arbitrio pendere debet. Ita relatio Principis ad subditos, moralis actus ad legem, quæ libere constituta fuerit, signi arbitrarii ad rem significatam, ut appensæ laurus ad tabernam, vocis ad ideam, quæ ejusmodi voce exprimitur, *extrinseca*, & *contingens* censeri debet, cum facile variari, ac interdum etiam auferri possit.

IV. Ejusmodi verò Relatio quæcumque illa fuerit sive nempe *intrinseca*, sive *extrinseca* sit; sive substantia cum alia substantia, sive modus unus cum alio modo, sive denique substantia cum modo comparetur, tria necessario complecti debet, hoc est *subjectum*, *terminum*, ac *fundamentum*.

Subjectum relationis vocatur ens illud, quo ad aliud ens referatur.

Terminus vicissim est illud, ad quod refertur.

pectus ipse dirigitur, sive ad quod relationis subiectum referatur; ideoque perspicue apparet quod subiectum ipsum, ac terminus *correlata*, seu mutuo relata dicuntur, quod in relatione qualibet subiectum ad terminum, ac vicissim terminus ipse ad subiectum referri possit.

Fundamentum verò relationis vocatur ens illud, perfectio, vel modus entis, qui in utroque relato, vel relationis termino reperitur; ut proinde ipsius occasione, aut vi terminus unus ad alium referatur; adeoque posito fundamento resultet relatio, eo verò sublato ipsa quoque relatio auferatur, quamvis alteruter, ac interdum etiam uterque terminus adhuc supersit. Ita, si nix ad lac referatur, ipsique similis dicatur, *vix* erit *subiectum*, *lac* erit *terminus*, *albedo* vero similitudinis causa, vel relationis *fundamentum* dicetur.

V. Itaque juxta varia entitatum, vel affectionum genera; quæ duobus entibus inesse possunt, varia quoque relationum fundamenta, adeoque etiam varia relationum genera distinguere debent, quæ proinde variis etiam nominibus exprimi, sive distinguere solent.

Ita, si relatio ex substantia sive natura veluti causa, & origine deducatur, relatio illa *similitudinis*, *identitatis*, *convenientiæ*, vocatur: ut unus homo alteri *similis* esse dicitur.

Ex quantitate variæ *æqualitatis*, aut *inequalitatis* relationes oriuntur, ut una res altera *major*, vel *minor*, ipsi *æqualis*, ipsius *dimidia*, *dupla* &c. dicatur; eademque prorsus relationum varietas ex tempore, spatio, motu, potentia, ceterisque rebus exoritur, quæ quamvis incorporeæ sint, extensione quadam, variisque partibus præditæ concipiuntur, ejusque extensionis.

n's præsidio una cum altera comparatur.

Ex qualitate; quemadmodum etiam ex figura, oritur relatio *similitudinis*, vel *dis-similitudinis*: ut ex albedine similitudo lactis cum nive, ex rotunditate similitudo circuli cum alio circulo.

Ex actione, & passione resultat relatio causæ ad effectum, & vicissim effectus ad causam ipsam, possessoris ad rem possessam, aut emptam &c.

Ex loco oritur relatio distantiae, viciniae &c. continentis ad rem contentam, partis ad totum &c.

Ex ipso tempore vel duratione deducitur ordo sive relatio ætatis, ut una res alia antiquior, vel recentior dicatur.

VI. Sed nullus propemodum finis esset futurus si universa relationum genera, ipsorumque fundamenta recensenda forent; ubi præsertim relationes illæ numerandæ forent, quæ ex nostro percipiendi modo, adeoque ab intellectu nostro dependet. Illud unum observari facile poterit quod ubi res aliqua ad aliam referatur, semper aliqua causa, fundamentum, aut ratio concipi vel esse debet, quæ ejusmodi relatio instituat: adeoque, si ratio illa subtilius exploretur, ipsa quoque relationis indoles, ac natura perspicue deprehenderetur, suoque peculiari, distinctoque nomine designabitur. Sic, ut exemplum unum hic proferam, interdum duæ relationes inter se comparantur, ut ipsarum una alteri *similis*, & *aqualis* dicatur; atque ejusmodi rationum, sive relationum similitudo *proportio* vocatur; adeoque termini, seu quatuor entitates illæ, in quibus hæc relationum æqualitas reperitur, *proportionales* vocantur; ut fusius, atque opportunius in Mathematica demonstratur.

VII. Ex ipsa quoque duorum entium com-
para

paratione, seu relatione ipsorum *oppositio* oriri, sive deduci solet. Ejusmodi verò oppositio, qua duo entia a nobis percepta, atque invicem comparata, discrepare, vel repugnare dicuntur, ita distingui poterit, ut alia *contraria*, alia *privativa*, alia *relativa*, alia *contradictoria* vocetur.

Contraria oppositio dicitur illa, quæ reperitur in qualitatibus, quarum utraque positiva sit, simulque in eodem qualitatis genere contineatur; sed una tamen aliam excludat, & una cum illa in eodem subjecto reperiri non possit: ut *frigus*, & *calor*; *humiditas*, & *siccitas*, *durities*, ac *fluiditas* &c. Itaque, cum ex qualitatibus illis, quæ *contraria* censerentur, vocarique solent, utraque positiva fortasse non sit, sed una alterius privatio videatur, ut *frigus* privatio *caloris* &c. oppositio contraria facile cum *privativa* confundi poterit; adeoque substantiæ solam, quæ iis qualitatibus affectæ fuerint, invicem *contraria*, sive contrariæ oppositionis genere mutuo repugnantes appellari poterunt, ut *aqua* & *ignis*, &c.

Privativa verò oppositio vocatur illa, quæ reperitur inter qualitatem aliquam, quæ vera, realis, ac positiva sit, ejusque privationem: ut inter *lucem*, ac *tenebras*, *motum* & *quietem*, *vitam* ac *mortem*, *gratiam* & *peccatum* &c. Quo tamen loco observandum quod si privatio illa, sive carentia qualitatis concipiatur in subjecto, quod alioquin qualitatem illam habere posset, *privatio* vocatur: ut *cæcitas* in homine. Sin vero concipiatur in subjecto, quod perfectionis, & qualitatis hujus incapax sit, *negatio* dicitur, ut *cæcitas* in lapide.

Relativa oppositio, quæ omnium minima censeretur, est illa, quæ reperitur in entibus invicem relatis, ut inter *patrem*, ac *filium*.

Con-

Contradictoria denique, repugnantia, vel oppositio omnium maxima dicitur illa, quæ reperitur inter *ens*, & *non ens*, inter *hominem*, & *non hominem* &c. Itaque, cum in aliis oppositionum generibus entis illa, quæ *opposita* fuerint, in aliquo entis genere plerumque conveniant; contradictoria in nullo entis realis genere convenire unquam possunt; sed ubi alterutrum ex illis ponatur, alterum necessario destrui, vel auferri debet.

VIII. Ita quoque ex relatione, vel ordine, quo entia quædam invicem comparata fuerint, ipsa quoque ratio, vel modus intelligi, deducique poterit, quo res una aliam præcedere, vel ipsa prior esse dicitur. Ejusmodi vero *prioritas* ita distingui solet, ut alia *positionis*, alia *honoris*, alia *nature*, alia *temporis* dicatur, adeoque res una altera vel positione, vel honore, vel natura, vel tempore *prior* vocatur.

Positione sola, vel loco res una prior alia dicitur, ubi fortuito solum ipsam præcedat, atque ante ipsam collocata sit, ut lapis unus ante alium.

Honore vero, dignitate res una aliam præcedit, cum ejus ordinis causa, & origo ex ipsa rei dignitate resultet, ut Princeps prior est subdito &c.

Natura dicitur una res aliam præcedere, cum ipsarum utraque uno quidem eodemque tempore simul incipit, simulque existit; sed una tamen ab alia oriri, pendere, produci-que debet. Ita sol radio seu luce, ignis calore suo prior natura esse dicitur; quamvis enim calor una cum igne, radius una cum sole incæperit, nullumque temporis spatium effingi possit, in quo sol sine luce, ignis sine calore extiterit; radius tamen à sole, calor ab igne produci debet, adeoque sol lucem, ignis calorem præcedere existimatur.

Tem-

Tempore demum, vel duratione res una aliam præcedit, ipsaque prior esse dicitur cum una post aliam producta fuerit; ideoque tempus aliquod inter utriusque productione intercesserit, ut inter patrem, & filium.

Hinc perspicue apparet quod causa quælibet effectum suum præcedere, vel ipso prior esse debet, atque ita quidem ut plerumque non natura solum, sed etiam tempore ipsum præcedat; quamvis interdum uno eodemque tempore simul existant, ideoque causa non tempore, sed natura sola, effectum ipsum præcedere existimetur. Quandoquidem verò in divinis Pater non causa, sed principium Filii vocari debet, ut proximo Capite observabitur, Pater ipse neque tempore, neque natura, sed origine solum Filium præcedit, ipsoque prior origine à Theologis appellatur.

Ceterum quæcumque de variis hisce modis exposita sunt, quibus una res aliam præcedere, vel alia prior esse dicitur, de variis etiam modis illis intelligi poterunt, quibus una res aliam sequi, vel ipsa posterior esse potest; quemadmodum etiam contingere subinde potest ut res una cum alia existere, simulque cum illa concipi debeat, adeoque res illæ simultaneæ dicerentur: ut facile ab exemplis illis intelligi potest, quæ superius exposita sunt ut varia prioritatis genera ostenderentur.

C A P U T IX.

De Causis.

I. **I**Nter innumera Relationum genera, quibus ens aliquod ad aliud ens refertur, sive cum illo comparari posse jam diximus,

mus, principem fere locum obtinet respectus ille, vel ordo, sive relatio, quæ inter *caus-
sam*, & *effectum* illum concipitur, qui ab ipsa causa producat. Siquidem effectus ipse à causa produci, ab illa pendere, adeoque causam ipsam respicere debet; nec effectus ille rite accurateque concipi poterit, nisi necessaria quædam, & arctissima connexio inter ipsum, ejusque causam concipiat, sicuti vicissim causa ad effectum illum dirigitur, quem ipsa produxerit. Itaque varia Causarum genera hic ordine complectemur, ut exinde facile varietas etiam illa ostendatur, quæ relationibus inesse potest, quæ inter causas, ipsarumque effectus repariantur.

II. Atque, ut ab ipso *Causæ* nomine exordiar, ejusmodi voce ens illud intelligi, vocarique debet, quod ad alterius entis existentiam, vel productionem conferat, ipsique producendo requiratur; quemadmodum vicissim *Effectus* nomine ens illud intelligi vocarique debet, quod aliqua ratione à causa dependeat, atque ab illa producat. Itaque effectus omnis à propria causa distinguui, ipsaque posterior esse debet. Siquidem juxta celebre principium illud, *operari sequitur ad esse*, ideoque res ipsa prius existere, deinde vero *operari* concipitur, adeoque causa tum actum illum, quem exerit, tum effectum illum, qui ejusmodi actu producat, aliqua ratione procedere debet. Itaque quoque, cum nihil seipsum producere, nihilque prorsus seipso prius esse possit, causa ipsa, quæcumque fuerit, ab effectu distinguui debet, quem existentia, virtute, & operatione sua produxerit. Hinc veteres Ecclesiæ Patres ubi de divinis loquebantur, Patrem non *causam*, sed *principium* Filii vocarunt, quod nimirum Filius ipse Patre posterior esse

esse non possit, nec ab illo in substantia si-
ve natura distinguatur, sed ipsi cœternus
atque *quædam consubstantialis* sit; quamvis
aliquando Græci Patres *airu causa* nomen
ampliori quodam, promiscuoque sensu usur-
paverint, adeoque Patrem Filii *causam* vo-
caverint; licet ipsi quoque Filium Patri *con-*
substantialem esse contra Arianos defende-
rint.

III. Sed, ut accuratius hæc Causæ no-
tio, simulque universa Causarum varietas
exponatur, observari facile poterit quod
Causa ipsa ita à Philosophis omnibus di-
stingui solet, ut alia quidem *efficiens*, alia
materialis, alia *formalis*, alia denique *finalis*
dicatur. Etenim, ut effectus aliquis exi-
stere, sive produci possit, necessario requiri,
concipi, vel admitti debet ens illud, à quo
producat; cùm nullum ens aut à nihilo,
aut à seipso produci possit. Itaque ens illud,
quod virtute sua effectum producat, ipsum-
que transferat de potentia ad actum, *Effi-*
ciens causa vocatur. Quandoquidem vero
nulla creata vi, quæ finita suisque terminis
circumscripta esse debet, ens ullum ex nihi-
lo produci potest, efficiens causa operari,
vim suam exerere, suumque effectum pro-
ducere non poterit, nisi subjectum aliquod,
siue materia reperiatur, ex qua effectus ille
formetur; ideoque præter *efficientem*, *mate-*
rialem quoque causa, siue *materia* require-
tur. Cumque materia ipsa natura sua pror-
sus indifferens, & vaga sit, ut hoc potius,
quam aliud esse recipiat, hic potius, quam
effectus alter ex ipsa producat, præter
materiam ipsam *formalem* insuper causa, hoc
est *forma*, principium, perfectio quædam
adungi debet, quæ materiam determinet ut
certus aliquis distinctusque effectus oriatur,
adeoque effectum ipsum à ceteris omnibus,
qui

qui ex una eademque materia constare possent, accurate distinguat. Denique, cum res omnes non temere, & inconsulto, ut Epicurus asseruit, sed *finis* alicujus gratia, & amore productæ fuerint, & effectus omnis ad finem aliquem dirigatur, qui vel à natura constitutus sit, aut ab efficiente causa, si libertate, & cognitione prædita fuerit, eligatur, *finis* ipse, vel *finalis* etiam causa agnoscere debet. Itaque maximo optimoque jure quatuor Causarum genera a Philosophis omnibus recensentur, quod ipsarum singulæ in corporeis effectibus producendis necessariae sint, nec effectus ullus existere sive produci possit, nisi quatuor illa causarum genera in ipso producendo simul conspirent. Celebre est quidem Platonicos quorundam aliud causæ genus agnovisse, quam *idealem*, vel *exemplarem* vocabant, quod veluti typus, & exemplar esset, ad cujus imaginem, & similitudinem effectus ille produceretur; sed facile tamen intelligi, ostendique posset quod ejusmodi causæ vel ideæ genus in iis solum causis admitti poterit, quæ cognitione prædita sint, ipsaque prævia operentur, adeoque facile *exemplaris* causa ad *efficientem* ipsam referri potest.

IV. Ceterum sive exemplaris causa ad efficientem referatur, sive, finalis instar, peculiare quoddam distinctumque Causæ genus constituat, perspicue apparet quod ex ejusmodi causarum generibus *efficiens*, *finalis*, & *exemplaris* extra effectum ipsum reperiuntur, adeoque *extrinsecæ* vocari debent. *Materialis* vero, simulque *formalis* causa, hoc est ut communi jam receptoque more à Philosophis appellantur, *materia*, ac *forma* effectum ipsum componunt, in effectum remanent, *intrinsecæ* ac *essentiales* etiam ipsius partes censeri debent, adeoque *intrinsecæ*

vocari solent; quin etiam ab effectu ipso sola intellectus ope, vel concipiendi modo distingui possunt, ut ab intellectu solo hominis substantiam à corpore, & animo simul conjunctis distingui posse concipimus. Itaque, si materia, ac forma veluti intrinsece compositi, vel effectus partes spectantur, finalis autem & exemplaris causa ad efficientem referatur, perspicue apparet quod sola efficiens, vel effectrix causa supererit, quæ vere, propriæque effectum ipsum producere videatur, ideoque præcipuo quodam nobiliorique modo causæ nomine decoretur; quemadmodum sane ubi effectus aliquis ab aliqua causa produci dicitur, de sola efficiente, vel effectrice causa intelligi consuevit.

V. Ejusmodi vero efficiens causa, quæ ceteras omnes excellit, ideoque sola proponi, vel explicari nunc debet, varias in classes distingui solet, quarum præcipuas, utilioresque, simulque ipsarum discrimina brevissime complectemur.

Itaque efficiens causa vel *prima*, vel *secunda* esse poterit. Causa prima vocatur illa, quæ ceteris rebus ita dat esse, ut ipsa à nullo receperit, vel à nullo producta fuerit, ut est solus Deus. Causa vero secunda dicitur illa, quæ alteri quidem dat esse; sed ipsa quoque suum esse ab alio recepit, ut sunt causæ creatæ.

Causa *proxima*, & *immediata* dicitur illa, à quæ proxime effectus ipse producit: ut filius à patre. *Remota* vero, vel *mediata* est illa, inter quam & effectum ipsum intermedia quædam causa intercedit: ut inter avum, & nepotem.

Causa *principalis* vocatur illa, quæ virtute sua effectum producit, adeoque effectus ipsi veluti principio veræque causæ tribuitur,

etur, ut statua artificii. *Instrumentalis* vero dicitur illa, quæ principali velati medium, ac instrumentum inservit, ipsaque dirigente, & applicante effectui producendo conferre potest; nihilque prorsus efficere, nisi à principali applicaretur ad operandum: ut scalprum, serra, penicillus &c.

Causa *per se* vocatur illa, quæ natura sua ad effectum illum dirigitur, quem producit: ut ignis ad comburendum. Causa vero *per accidens* censetur illa, quæ præter naturæ, aut operantis intentionem effectum producat: ut si venator feram jaculo interimere volens hominem occidat.

Causa *generalis* dicitur illa, quæ plures effectus inter se similes; *Particularis* vero, quæ unicum effectum producat.

Causa *univoca* est illa, quæ effectum sibi similem producit: ut planta plantam aliam. *Aquivoca* vero, quæ effectum sibi dissimilem producit, ut artifex statuam; solis calor ceram liquefacit, lutumque indurat.

Causa *totalis*, & *adequata* vocatur illa, quæ solitarie accepta integrum, totumque effectum producat; ut si currus ab uno equo, pondus ab unico homine moveatur. *Partialis* vero, vel *inadequata* censebitur, si in producendo effectu cum altera causâ conjungantur, adeoque effectus ab utraque simul operante oriatur: ut si pondus idem à duobus hominibus feratur. Itaque, ut causæ quædam, quæ in eodem effectu producendo simul conspirant, *partiales*, & *inadequate* censi, vocarique possint, perspicue requiritur ut ejusdem generis sint. Etenim, si disparis distinctique generis forent, utraque *totalis*, & *adequata* dicenda foret, atque ipsarum utraque totum integrumque effectum produceret. Ita singuli humanæ voluntatis actus toti à Deo, simulque toti ab

homine producuntur: quod operationes illæ, quæ à causis creatis fiunt, totæ à Deo veluti causa prima, simulque totæ à creata causa, veluti secunda producuntur; quemadmodum integer totusque effectus à principali, simulque instrumentali etiam causa producitur. Itaque; si præceptor discipuli scribentis manuum dirigat, integri totique characteres ab utroque formabuntur.

VI. Denique effectrix, vel efficiens causa respectu alicujus effectus aut vere *efficiens*, aut *occasionalis* solum censi vocarique debet. Efficiens vereque effectus ejus causa dicitur, si ad effectum ipsum producendum natura sua dirigatur, ipsumque virtute sua producat. Occasionalis verò vocatur illa, quæ quamvis effectum ipsum minime producat, efficientem tamen causam excitat, determinat, impellit ad operandum; ideoque occasionem ipsi præbet ut suam virtutem exerat, ac effectum producat, qui sublata ejusmodi occasione minime produceretur. Ita panis, qui à cane conspicitur, excitat illum ad motum, ejusque motus causa censi, vocarique solet; cum tamen vera atque efficiens ejusmodi motus causa sit vitale principium illud, quod in ipso cane reperitur, ejusque spiritus animales, musculos, ac pedes impellit. Sic, ut illustrius exemplum aliud hic proferam, Sacramentorum Ministri, quamvis à plurimis *efficientes* gratiæ causæ dicantur, quæ in Sacramentis ipsis producitur, verisimilius tamen quod *occasionales* solum gratiæ, hoc est incorporei, mirique effectus, causæ censi illi debeant. Etenim ipsi veluti efficientes veræque causæ corporeum effectum illum producunt, quo posito, veluti occasione, vel conditione quadam, incorporeus effectus alius à Deo veluti efficiente veræque causa producitur, qui à corporea

poreā sive creatā causā produci non posset. Ita prodigia illa, sive miracula, quæ à Sanctis viris patrata memorantur, à solo Deo veluti efficiente causā produci possunt, qui naturæ leges à se constitutas invertere, & abrogare potest; adeoque effectum producere, qui naturæ creatæ vires excedat, ejusque legibus adversetur. Si verò, quibus patrati prodigii gloria adscribi solet, veluti occasionales admirabilis hujus effectus causæ censerī merito debent, quippe qui precibus, meritisque suis divinam clementiam, ac potentiam excitent ut effectum illum producat.

VII. Ad hæc ipsa Causarum *occasionalium* genera revocari facile poterunt *conditiones* illæ, quæ necessario requiruntur, ut efficiens causā vim suam exerat, & effectum producat: ut ignis comburere, novumque ignem producere non poterit, nisi lignum igni propinquum fiat. Itaque qui lignum igni admoverit, *occasionalis* combustionis causā vocabitur; atque ignis proximitas dicetur *conditio*, sine qua non comburet ignis.

Maximo quoque optimoque jure referri etiam poterunt Causæ illæ, quæ non *physice*, vereque virtute sua effectum producant; sed *moraliter* solum, communique loquendi more ad effectus productionem ita conferre videntur perinde quasi physice vereque ipsum producerent; adeoque *morales* ipsius causæ vocantur. Ita qui homicidium imperet, aut consulat, *moralis* homicidii causā vocabitur; unde, si leges ipsæ morumque regulæ spectentur, eadem prorsus in hoc imperio, consilioque gravitas reperitur ac si vere physiceque hominem perimeret; cum operis humani pravitas aut honestas in ipso voluntatis actu, liberaque ipsius electione posita sit, quæ in actum aliquem legi contrarium,

aut convenientem inclinatur, ut in Ethica demonstratur.

Itaque *morales* Causæ, quæ ejusmodi ratione effectum producant, *cognitione*, simulque *libertate* præditæ esse debent; alioquin, si *necessariæ* illæ forent, neque *morales* causæ vocari, neque actus ille morali bonitate, vel pravitate donari posset.

Libere autem causæ dicuntur illæ, quæ ita operantur, ut etiam non operari possint, positisque omnibus, quæ ad effectum ipsum producendum necessaria sunt, adhuc indifferentes sint ut effectum ipsum producant, si ve ab illo deflectant; atque ubi libere consultoque actum ipsum incoeperint, illum abrumperere, & in oppositum actum inflecti possint; ut accuratius ostendetur ubi de humane voluntatis arbitrio, ejusque libertate differendum erit.

Necessariæ vero causæ vocantur illæ, quæ ita operantur, actumque suum producant, ut ab illo abstinere, aliterque operari non possint; ut ignis necessario calorem producit, corpora gravia necessario descendunt, apertis oculis ac intermedia luce necessario videmus &c.

VIII. Exinde vero jam facile intelligi, justisque finibus circumscribi poterunt quæcumque de *Ratione sufficienti* à Leibnitio, Volffio, aliisque pluribus tradita, magnificeque, liberius, ac interdum etiam impudenter constituta sunt. Etenim Leibnitius optime accurateque observavit quod ut effectus aliquis producat, non modo singula quatuor Causarum genera superius exposita, præsertim verò omnium princeps, & efficiens ipsius causa requiritur; verum etiam ratio quædam concipi vel admitti debet, quæ effectricem causam ipsam determinet ad operandum, ut ejusmodi ratione sublata effi.

efficiens causa prorsus indifferens sit, ac effectus ipse non potius futurus quam non futurus concipiatur. Itaque ratio illa *sufficiens* ab illo vocata fuit quod ad causam determinandam sufficiat, ejusque praesidio jam sufficiens ratio concipi, reddique possit cur effectus ipse vere possibilis, vere futurus, vereque productus sit. Itaque concludit Leibnitius neque Deum, neque humanos animos, neque causam ullam, quaecumque fuerit, operari posse nisi praeter agendi vim insuper etiam sufficientem quandam rationem habeat, qua determinetur ad operandum; ideoque, si Deus Mundum non ab aeterno, sed in tempore, non infinitum, sed finitum, non alio, sed hoc potius ordine produxit, Leibnitius asserit id ex certa quadam sufficienti ratione pendere, qua Deus ipse hoc potius, quam alio, pacto operari debuerit; cumque sufficiens ratio, quae Deum impellere, ac determinare potest, non alia esse potuerit, quam melioris, optimique conditio, nitide diserteque ille docet ex possibilibus omnibus illud à Deo factum esse, quod *optimum*, ac *perfectissimum* foret: adeoque non aliud, quam quod factum fuerit, à Deo produci potuisse, Deumque ipsum nec alia ratione operari, nec alia rerum genera, nec alium rerum ordinem efficere potuisse, quam illum, quem actu produxerit; quemadmodum fere Spinoza ipse jam dixerat (a) quod *res nullo alio modo, neque alio ordine à Deo produci potuerunt, quam sunt productae*. Hoc ipsum quoque *Rationis sufficientis* principium, quod à Leibnitio omnium primo subtiliter excogitatum, atque feliciter usurpatum.

(a) *Ethic. Part. 1. prop. 33. 43. 45.*

tum esse putavit, veluti uberrimum cognitionum nostrarum fontem arripuit Volſius, ejusque principii leges, atque usum in universa fere Metaphysica prolixius, atque liberius exposuit.

IX. Ac primo quidem quod Volſius, alii- que plures *sufficientis rationis* ideam, cognitionem, atque usum Leibnitio omnium primo affuisse existimant, facile id plurimis Veterum testimoniis, & exemplis refelli potest, qui sæpiſſime principium illud accurate feliciterque usurparunt. Sic, ut exemplum unum hic proferam: Archimedes, alii- que plurimi veluti certum, atque exploratum supponunt quod æqualia pondera in bilance posita, & ex æqualibus distantis suspensa omnino quiescere, vel in æquilibrio esse debent quod nulla sufficiens ratio concipi, vel esse possit cur pondus unum alteri prævaleat, adeoque unum potius, quam aliud, moveri deprimi-que debeat. Ita Parmenides, ac Democritus, ut ostenderent Tellurem in Universi medio immoram quiescere, hoc ipso *rationis sufficientis* principio usi sunt, quod nimirum nulla prorsus ratio effingi possit cur Tellus ipsa in unam potius, quam in aliam, partem vergere, vel inclinare deberet: dicunt quod, cum æqualiter undequaque à Cælo distet, adeoque, cum non habeat caussum, propter quam huc potius, quam illuc vergat, Tellus in æquilibrio permanet. (a) Quinetiam plurimos hoc ipso *rationis sufficientis* principio abusos esse conspicimus, ut quingentis annis ante Leibnitium ipsam assererent quidquid à Deo productum fuerit, optimum, ac perfectissimum esse

(a) Plutar. de Plat. Philos. Libr. 3, cap. 18.

esse oportere ; adeoque ostenderent Deum aliter operari non potuisse, quam fuerit operatus ; nihilque à Deo fieri potuisse ; nisi quæ facit. (a)

X. Ceterum, ut error omnis, qui ex ejusmodi principio oriri facile posset, nisi cautissime adhibeatur, adeoque omnis etiam ambiguitas dirimatur, observari plurimum debet quod ejusmodi *rationis sufficientis* principium in causis illis ritè, feliciterque usurpari poterit, quæ *necessariæ* sint, ideoque effectum suum non *libere*, sed constanter ac *neccessario* producunt. Itaque nihil in rebus illis, quæ libertate, & arbitrio destitutæ sunt, existere, & admitti potest, nisi sufficiens quædam ratio perspicue appareat cur illud existere potius, quam non existere, debeat ; nullus effectus à causa quadam vere productus censi poterit, quæ natura sua indifferens esse debeat, nisi prius indifferens illa agendi vis ab extrinseco quodam principio inclinata ac determinata fuerit ad operandum ; atque, ubi nulla prorsus ejusmodi *sufficiens ratio* concipi, asserri, vel ostendi possit ; cujus præsidio effectus ipse potius productus, quam non productus, itidemque potius producendus, quam non producendus, ostendatur, effectus illius existentia vel omnino falsa, vel dubia censi debet.

XI. Ubi vero de causis illis differatur, quæ libertate, & arbitrio præditæ sunt, suæque natura ad oppositos actus indifferentes esse debent, sufficiens illa ratio, quæ ipsarum indifferentiam determinet, non aliunde, quam ex intrinseca ipsarum libertate, liberaque electione repeti, oriri, vel inquiri

potest.

(a) Vid. Monigl. advers. Material. Tom. 2. pag. 152.

poterit, quæ sese ad unum potius, quam objectum aliud, inflectant. Etenim quæcumque demum ratio, quæcumque objecti cogniti bonitas, atque amabilitas observetur, quæcumque cupiditas, aut amor in voluntate libera excitetur, ejusque vim ad unum potius, quam actum alium, alliciat, inclinet, ac veluti abripiat, semper tamen agendi vis, quæ in causa libera reperitur, indifferens esse debet; nec ulla ratio sufficiens esse poterit, quæ causam ipsam determinet, nisi libera ipsius electio, quæ ita objectum unum amplectatur, ut aliud etiam eligere, vel amplecti possit. Quod si in creatis etiam rebus, quæ vere liberæ sint, sola ratio sufficiens eligendi est libertas illa, atque arbitrium, quo præditæ sunt, quis aperte non videat quod in ipso Deo nulla prorsus *ratio sufficiens* effingi potest, quæ ipsum impulerit ad operandum, nisi perfectissima, atque infinita libertas illa, quæ in ipso infinitæ sapientiæ, bonitati, potentiæ conjuncta reperitur? Itaque nulla ratio sufficiens aut concipi, aut inquiri, aut afferri poterit cur hoc potius, quam alio, modo res produxerit, nisi quod ita voluit; cur hæc potius, quam alia, entium genera creaverit, nisi quod ita voluit: ut optime proinde intelligi, dicique debeat, quod alio prorsus producere, alio prorsus modo operari potuisset, si id libero ipsius arbitrio libuisset. Sed hæc, aliaque id genus plura fusius, & opportunius ostendentur ubi de humanæ voluntatis arbitrio, ipsaque Dei libertate suis in locis agendum erit.

XII. Interim vero coronidis loco addidisse juverit quod effectus omnis in causæ suæ *potentia* aliqua ratione contineri debet, ut ab illa produci possit; quamvis interdum *formaliter*, interdum vero *eminenter* solum, aut

aut *virtualiter* effectus ipse in causa contineri dicatur. Etenim, si effectus ille causæ similis sit, adeoque ipsius essentia, intrinseca nempe & essentialia attributa, in ipsa quoque causa reperiuntur, tunc effectus in causa *formaliter* contineri dicitur; ut filius in patre, novus ignis in veteri &c. Sin vero effectus ipse causæ dissimilis sit, diversaque prorsus essentia præditus fuerit, sed causa tamen, quæ illum produxerit, virtutes omnes, & perfectiones contineat, quæ in ipso reperiuntur, adeoque potentiam, & agendi vim complectatur, quæ singulis effectus perfectionibus producendis par esse possit, tunc effectus *eminenter* solum, aut *virtualiter* in causa sua, sive causæ potentia contineri dicitur. Ita, cum Deus possibles omnes creaturarum rerum perfectiones uberissime in se complectatur, atque infinita prorsus potentia præditus sit, creatos effectus omnes non *formaliter*, sed *eminenter* solum complecti dicitur; quemadmodum fere artifex ipse picturam, aut statuam, quam effinxerit, in virtute, sive potentia sua continere censetur.

XIII. Atque ex hac ipsa ratione, vel modo, quo causa quælibet antequam effectum suum produxerit, ipsum in essentia, sive potentia sua complecti, vel continere dicitur, varietas alia, sive distinctio deduci solet, qua causa ipsa vel *in actu primo*, vel *in actu secundo* concipitur. Etenim, si effectus ipse in sola causæ potentia adhuc contineatur, adeoque causa operandi quidem potentia prædita sit, sed nondum aliam exerat, nec effectum ipsum producat, tunc illa *in actu primo* concipitur, sive in actu primo operativa censetur. Sin vero effectus ipse nunc producat, adeoque ab actu primo ad secundum, sive à potentia ad actum transfe-

ratur, tunc eadem causa in actu secundo concipitur, sive in actu secundo efficiens, ac operativa censetur.

XIV. Ita quoque ex hoc ipso fonte, sive ratione, qua effectus aliquis ex ipsa causæ potentia prodire dicitur, discrimen illud oriri, vel observari facile poterit, quo effectus ipse aut actio, qua producat, interdum *immanens*, interdum *transiens* appellatur. Si terminus ille, ad quem causæ operantis actio dirigitur, hoc est effectus ipse, qui producat, in ipsa causa veluti subiecto remanet, tunc effectus, aut actio *immanens* vocatur: ut *perceptio*, & *amor*, qui ab humana mente productus fuerit, in ipsa mente, veluti ipsius affectiones, remanent. Sin vero terminus ille, qui ab actione produci- tur, ab operante causa distinguatur, adeoque effectus ipse in extrinseca distinctaque re veluti subiecto producat, effectus, & actio quoque *transiens* vocabitur: ut cum ab homine motus lapidi imprimitur.

METAPHYSICÆ

PARS SECUNDA,

S I V E

PNEUMATOLOGIA, AUT PSYCHOLOGIA, AUT NOOLOGIA.



Omnibus Entium omnium principis, & affectionibus, quæ singulis rerum generibus inesse solent, meliori quo poterat ordine jam demonstratis, altera Metaphysicæ Pars explicanda nobis occurrit, in qua juxta seriem, atque ordinem superius constitutum de *Creatis Spiritibus*, præsertim vero de *Mentis Humanae* natura, ejusque viribus, ac attributis agendum erit; ut exinde ad tertiam, supremamque Metaphysicæ Partem, adeoque ad accuratam Dei cognitionem quibusdam veluti gradibus ascendatur. Itaque hæc altera Metaphysicæ nostræ Pars communiori quidem nomine *Pneumatologia* inscribi solet, quod in illa de creatis Spiritibus differatur; sed plerumque tamen *Psychologia* nomine vocari consuevit, quod in illa *Animi*, vel *Humanae Mentis* natura accuratissime demonstratur; ideoque à pluribus clariori quodam, distinctoque nomine *Noologia*, Mentis nimirum cognitio, vel scientia appellatur; ut ab illa Physicæ Parte distingui possit, in qua de variis *Animæ* generibus disputatur. Quanta vero cognitionis hujus utilitas, vis, ac præstantia esse debeat, facile profecto intelleget quicumque observaverit incorporeæ substantiæ, Animique nostri naturam ceteris

crea-

creatis rebus puriorem longeque nobiliorem
 esse oportere; simulque perspexerit nihil ab-
 surdus esse posse, quam si humanus animus
 exteriora objecta, vel corpora contempletur,
 seipsum vero, naturamque suam, originem,
 vires ignoret. Accedit etiam quod ex per-
 spicuis Animi nostri dotibus, præsertim ve-
 ro ex ipsius *spiritualitate*, atque *immortali-
 tate*, ex arbitrii vi, seu *libertate*, quæ rite
 accurateque demonstratæ jam fuerint, pluri-
 ma veluti ex fonte dimanant, ex quibus
 universa fere morum doctrina; humanorum
 actuum honestas, legum robur, sincera deni-
 que hominum felicitas oritur; ut optimo
 proinde jure Mentis humanæ cognitio velu-
 ti præcipua Ethicæ, veræque Religionis ori-
 go, & fundamentum haberi consueverit. Ita
 verò universam hanc Metaphysicæ partem,
 Animique nostri cognitionem brevissime com-
 plectemur, ut initio quidem de Animi ipsius
natura, ac *origine* differatur; deinde verò
 ipsius *spiritualitas*, atque *immortalitas* osten-
 datur; singulæ ipsius *facultates*, & agendi
 vires, hoc est intelligendi ratio, & arbitrii
 libertas mox demonstrantur; arcanæ denique
 leges, ac modus ille indicetur, quo incor-
 poreus, ac perennis Animus mortali corpori
 conjungatur. Quandoquidem verò ad hanc
 ipsam Metaphysicæ partem ea omnia refe-
 renda esse jam diximus, quæ de creatis *Spiri-
 ritibus* aliis, nimirum de *Angelis*, solo ra-
 tionis lumine cognosci possunt, supremo tan-
 dem loco de *Angelis* ipsis brevissime agen-
 dum erit.

CAPUT I.

De Mentis humanæ natura, & origine.

ESI Mentis humanæ cognitio ex plurimis veterum Philosophorum sententiis repetenda foret, Animique nostri vis, & origo ex variis illorum opinionibus explicanda, facile cum Heraclico, (a) aliisque pluribus suspicari quis posset ipsius naturam abstrusam adeo, & obscuram esse oportere, ut omnis illius inveniendæ spes nobis adempta videatur, cum maxima, ac infinita fere varietas in sententiis illis appareat.

In hac ipsa tamen admirabili opinionum varietate facile intelligi, vel observari poterit quod ipsarum plurimæ absurdæ adeo sunt, ut contemni potius, ac irrideri, quam serio refelli debeant; quemadmodum sane deprehendi vel observari poterit quod illustriores omnes Philosophi, licet obscurius sententiam suam exprefferint, in hoc tamen mirifice consensere, ut Animi naturam incorpoream, ac immortalem esse putaverint, ut sequenti Capite mox ostenderetur.

Antequam tamen *spiritualitas* illa, ceteræque Mentis humanæ dotes, affectiones, vires, ac munera demonstrentur, ipsius indoles, natura, & existentia demonstrari nunc debet, ut exinde singulæ ipsius affectiones clariori quo poterit ordine deducantur.

II. Itaque *Animi*, vel *Mentis humanæ* nomine nihil aliud intelligi, vel designari solet,

(a) *Apud La. rt. Libr. 9. segm. 7. Tertul. de Anima cap. 2.*

let, quam principium illud, quod in homine reperitur, ut ipsius præsidio ille cogitet, verum intelligat, bonum velit, sibi que ejusmodi *cogitationum*, *perceptionum*, ac *volitionum* conscius sit: ut quemadmodum nempe nostrum quilibet admirabili quadam partium textura, sensuum varietate, gravitate, figura, motu, aliisque id genus corporeis affectionibus motus varios, variosque corporeos actus producit, ita quoque Mentis, aut Animi præsidio, veluti puriori quodam distinctoque principio, nobiliores actus alios superius memoratos efficiat, qui neque à corporea substantia, neque à corporeis ullis affectionibus oriri possint. Hinc principium illud, quod ejusmodi *cogitationum* causa, fons, & origo esse debeat, *Rationalis Anima* vocari etiam solet, quod nimirum incorporeæ cognitionis, aut rationis capax sit; adeoque perspicuo certoque discrimine ab *Anima* distinguatur, quæ corporeis quibusdam rebus adscribi solet, cum *Planta* quoque, ac *Bruta* peculiari quodam *Anima* genere præditæ existimentur.

Ita propemodum à Græcis (a) *Animus* ab *Anima* distingui, distinctoque nomine vocari solet; ut solo quidem ὕψις *Anima* nomine *Vita*, ac inferior illa *Anima* species designetur, quæ alterno aeris inspirati, ac respirati motu fovetur, alitur, ac conservatur: peculiari vero nomine Νῦν *Mens* appellatur nobilior altera vitæ, vel *Animæ* species, quæ ratione prædita sit, adeoque *intelligere*, atque *amare* potest. Itaque à Latinis etiam *Animus* ipso ab *Anima* distingui solet;

(a) Vid. Plat. in Phædi.

let : * ut optime proinde dixerit Macrobius : (a) *Animus proprie Mens est, quam diviniorum Anima nemo dubitavit; ac Lucretius ipse, quamvis Animum corporeum, ac mortalem esse putaverit, ipsum tamen ab Anima distinguendum esse demonstravit (b).*

Vnde Anima, atque Animi constet natura videndum.

III. Ejusmodi vero principium, sive Animum, aut Mentem in nobis existere, quæ in nobis ipsis intelligat, ac velit, simulque eorum actuum sibi conscia sit, intimo vividoque sensu percipimus; ut nihil proinde certius, aut evidentius effingi possit. Itaque præclare dixit Aphrodisæus (c) Animum esse *γνωστικόν τε, ἔ, φαινόµενον* rem nempe maxime cognitam, ac manifestam: quemadmodum enim nihil omnino perspicuum magis, ac exploratum esse potest, quam nos cogitare dum cogitamus, aliquid velle cum volumus, percipere, dubitare, recordari; cum percipimus, dubitamus, recordamur; ita quoque perspicuum nobis certumque esse debet principium illud in nobis existere, quo singulæ operationes, & actus illi in nobis peragantur.

Hinc optime, accurateque Cartesius observavit quod, quamvis aliquis de rebus omnibus, atque de ipsa quoque existentia sua dubitare conetur, ex hac ipsa tamen dubitatione, vel cogitationis genere, quam intimo

* Non est idem Anima, & Mens; aliud est enim, quo vivimus, aliud quo cogitamus. *Last. Divin. Inst. lib. 7. cap. 12.*

(a) *Senn. Scipi. cap. 14.*

(b) *Lib. 2. vers. 132.*

(c) *De Anima lib. 2. cap. 1.*

rimo quodam vividoque sensu pertipiet, manifestissime inferre debet rem, aut Animum, aut Mentem cogitantem existere; cum certe nihil aut operari, aut cogitare, aut percipere, aut dubitare unquam possit, nisi prius existat, & cogitandi vi, sive principio præditum sit.

IV. In eo tamen Cartesius ipse a ceteris Philosophis omnibus distingui debet, quod ceteri quidem *cogitationem* omnem, quæcumque illa fuerit, nihil aliud esse arbitrantur, quam affectionem quandam, modificationem, & æctum, qui ab humana Mente, veluti substantia producat, quæ cogitandi vi prædita sit, & cogitationem ipsam exerere subinde possit; ut proinde *cogitatio* à *re cogitante* distingui debeat. Cartesius vero cogitationem ipsam à re cogitante distinguendam esse negavit; atque Animi, sive Mentis humanæ naturam, ac essentiam in hac ipsa cogitatione positam esse putavit; quemadmodum prorsus Corporis naturam in *actuali extensione*, vel *trina dimensione* collocatam esse jam dixerat, ut opportunius alibi demonstravimus. Itaque Cartesius ex ejusmodi Animi natura à se constituta necessario deduxit quod Animus ipse semper aliquid operari, vel cogitare debet, atque à perenni cogitatione cessare, sive desistere non potest; ideoque tum somni, tum infantie, tum ebrietatis tempore semper aliquid ab Animo percipi, vel agitari putavit. Quæ quidem in re Cartesio præluxisse videntur Veteres illi, quæ perennem, æternumque motum Animo concessere: perinde quasi ipsius natura in hoc uno perenni motu consisteret. Ita Pythagoras (a) Animam esse di-

xit.

(a) Plutar. de Plat. Philos. Lib. 4. cap. 2.

αὐτὸ ἀεὶ κινεῖται *numerum seipsum
mōventem*; Thales οὐτὴν ἀεικίνητον *substantiam
perenni motu agitatam*; adeoque motum
illum ab Anima divelli non posse putarunt.
Ita Philo Judæus (a) ait quod, si Animæ
ἑαυτὴν ἀεὶ κινεῖται *perpetuum motum ademeris*,
ipsam quoque eximas rebus, ut amplius exi-
stere, vel comprehendi non possit.

V. Sed hæc Cartesii, VVolſii aliorumque
opinio facile refelli potest. Etenim, ut ce-
lebre effatum à Philosophis omnibus rece-
ptum habet, *Operari sequitur ad esse*; ideo-
que cogitatio, quæ actus aliquis, aut ope-
ratio esse debet, supponit esse, aut ens il-
lud; quod cogitat; hoc est ipsa Mens co-
gitandi capax concipi debet antequam illa
hanc suam cogitandi vim exerat, & actu
cogitet; cum præsertim Deus solus, qui mi-
ra ac infinita simplicitate, & perfectione
præditus est, ab actu suo non distinguatur;
creatæ verò res, quæcumque illæ fuerint,
partim actu, partim potentia componantur;
adeoque in illis potentia ab actu, operandi
vis, ac substantia quæ operetur, ab opera-
tione distinguatur. Accedit etiam quod
cogitationes illæ, quæ ab homine producan-
tur, dissimiles omnino, variæque sunt; ut
interdum una, interdum alia ab Animo
producatur, Animusque ipse ex unius obje-
cti cognitione, & amore ad objectum aliud
repente rapi, vel convolare videatur. Itaque
nulla peculiaris cogitatio tanquam Animi
essentia haberi poterit; alioquin essentia illa
variabilis, multiplex, inæqualis, diversa fo-
ret, cum tamen intima rerum indoles, ac
natura semper eadem, constans, ac invaria-
bilis esse debeat. Quod si fortasse cum Car-
tesio

(a) Libro de Mundi incorrupto.

resio quis dixerit Animi naturam atque essentiam non in peculiari quadam, distinctaque cogitatione collocatam esse, sed cogitationes omnes complecti, adeoque ex illis omnibus una conjunctis oriri, reponi facile poterit quod in hac hypothese Animus ipse ex pluribus ac infinitis partibus constaret, quod incorporeæ ipsius naturæ repugnat. Deinde vero, sicuti quælibet peculiaris cogitatio Animi essentia censeretur non poterit, ita quoque cogitationum omnium complexus essentiam illam componere, vel efformare non poterit; alioquin, sicuti cogitationes ipsæ variis subinde temporibus in nobis peraguntur, ita quoque Mentis, Animique natura sensim augeri, novisque veluti partibus effingi deberet. Plurima quoque ex Cartesii sententia perspicue deducuntur, quæ, licet à Cartesio facile concedantur, falsa tamen, ac absurda censeretur debent. Ita communis, & optima Philosophorum omnium, ac Theologorum sententia est quod infantia, vel ebrietatis, vel somni, vel amentia tempore nulla prorsus cogitatio, nulla nimirum spiritalis, & incorporea perceptio, ab Animo producat; adeoque operationes illæ, quæ tunc temporis in homine peraguntur, neque bonæ, neque malæ esse possint. Denique occulto quodam, atque admirabili fœdere ita Mens nostra humano corpori conjuncta suo, ut nihil percipere, cogitare, vel amare possit, nisi rerum ideæ vel ab ipsa Mente sensuum præsidio formatæ fuerint, vel à sensibus excitatæ, ut Cap. VI. ostendetur. Ergo perceptio, quæ ab extrinsecis principiis illis oriri, sive pendere debet, semper Animo inesse, ejusque ipsius naturam, ac essentiam constituere non poterit. (a)

VI. Ita-

(a) Vid. Leki. lib. 2. cap. 2.

VI. Itaque cogitatio nihil est aliud, quam affectio quædam, proprietas, actus, & operatio; quæ Menti cogitanti inesse, vel ab Animo cogitante produci debeat; adeoque character, quo Mens ipsa à Corpore, sive à substantia cogitandi viribus destituta perspicue distinguatur. Hinc Animus ipse nihil aliud erit, quam substantia quædam, quæ ejusmodi cogitandi vi prædita sit, adeoque cogitationes illas in homine producat. Hinc optime, accurateque ait Augustinus: (a). *Si definiri tibi Animum vis, & ideo quæris quid sit Animus, facile respondeo: nam mihi videtur esse substantia quædam rationis particeps, regendo corpori accommodata.* Atque optime quidem Animus substantia vocatur quod ille operandi vi præditus sit, plurimosque actus exerat, quod uni substantiæ, non vero modo, vel accidenti convenire potest. *Rationis particeps* appellatur quod ita profecto cogitet, ut ejusmodi cogitationis sibi conscius sit, cogitationem unam ex alia deducat, adeoque ratione præditus videatur. Denique *regendo corpori accommodatus* ille dicitur, quod miro quodam, ac libero divini Opificis consilio humano corpori conjunctus fuerit; adeoque hoc ipso veluti discrimine non solum à Deo, sed ab Angelis etiam, creatis nempe Spiritibus aliis, distinguatur, qui, quamvis incorporeæ, & rationales substantiæ dicantur, nullo tamen fœdere, aut ordine ad humana corpora diriguntur, ut una cum illis compositum aliquod efformetur.

VII. Quod autem ad humanæ Mentis originem attinet, aut modum, quo humano

cor-

(a) *De Quant. Anim. num. 12. al. cap. 13.*

corpori conjungatur, antiquissima Ægyptiorum sententia fuit, quod olim Animi ex æthere, Universi Anima, sive ab ipsa divina substantia decerpti, ac delibati, forent, humanisque corporibus ita conjuncti, ut cum corpus aliquod fatiscentibus viribus effectum jam foret, vitiataque jam & destructa partium textura vitalibus actibus peragendis impar ineptumque fieret, ac moreretur, Animus ex illo moriente corpore in corpus aliud migraret. (a) Hypothesim, ac opinionem illam Pythagoras ab Ægyptiis ad Græcos transtulit, ac mirifice propagavit, ut à Cicerone, Laertio, (b) Ovidio, (c) aliisque pluribus erudimur, qui Pythagoricam hanc *Metempsychosim*, sive *Animorum transmigrationem* uberrime declararunt, simulque causas indicarunt cur humanus Animus aliquando non humano solum, sed bruto quoque corpori, aut Plantæ conjungeretur.

Plato * verò divinam Mentem, ac Universi Animam ita singulas Universi partes aut corpora singula pervadere existimavit, ut pro varia corporum ipsorum indole; textura, ac dispositione varios in illis actus, ac motus produceret; quemadmodum fere Ani-

(a) Vid. Herod. Lib. 2.

(b) Lib. 8. segm. 4. & 32.

(c) Metam. Lib. 15. ver. 158.

* Esse apibus partem divinæ Mentis, & haustus Æthereos dixere, Deum namque ire per omnes Terrasque, tractusque maris, cælumque profundum. Hinc pecudes, armenta, viros, genus omne ferarum. Quemque sibi tenues nascentem arcescere vitas. Virgil. Georg. Lib. 4. ver. 219.

Spiritus intus alit, totamque infusa per artus Mens agit molem, & magno se corpore miscet, Æneid. Lib. 6. vers. 720.

Animus ipse dum varias corporis humani partes pervadit; varios in ipsarum singulis actus producit, ut in osse nutriet, in carne sentiat &c. Itaque Plato humanos Animos nihil aliud esse putavit, quam *aethereum haustum*, sive, ut ait Horatius, (a) *divinae particulae auræ*, divinae nimirum Mentis, aut Substantiae partem; quod à Manichæis etiam Hæreticis, aliisque pluribus admittebatur. (b) Origenes autem, Tertullianus, (c) alique plures Ecclesiae Patres, (d) ut originis peccati, quo universi Adæ posterii infecti, viciatique sunt, diffusionem, ac veluti propagationem facilius exponerent, existimarunt humanos Animos ex parentibus in filios traduci; ut quemadmodum nempe ex accensa face ignis in faces alias diffunditur, traducitur ac propagatur, ita quoque parentum Anima in filios traduci, diffundi, vel propagari posset.

VIII. Sed opiniones illæ manifestissime refelli debent. Siquidem ægritudines, errores, ac innumera propemodum vitia, quæ in humanis Animis observantur, ipsa quoque Animorum varietas, atque distinctio perspicue ostendunt Animos ipsos divinae Substantiae partem esse non posse; alioquin in Deo mira partium varietas, mira affectuum, errorum, malorum colluvies admittenda foret, quod ab incorporea, simplici, omnisca, perfectissimaque ipsius natura maxime abhorret. Ita quoque cum Animus ipse incorporeus sit, ut

infe-

(a) *Lib. 2. Satyr. 2. ver. 79.*

(b) *Vid. Hieronj. Epist. 82. & Augusti Libr. de Hæres.*

(c) *De Ani. cap. 7.*

(d) *Vid. Noris. Vindic. Aug. cap. 4. §. 3.*

inferius ostendetur, nullisque partibus componatur, varias in partes dividi, diffundi, vel propagari non potest; ideoque Animus unus ex alio decerpi, traduci, vel propagari certe non poterit. Quid vero quod hæc ipsa hypothesis, atque animorum origo, quæ originis peccato ejusque diffusioni facilius explicandæ proposita, ac inventa fuit, absurda plurima complectitur, neque peccatum illud in singulos omnino homines diffundi posse probaret? Certe, qui à parentibus jam baptizatis orientur, ejusmodi labis expertes essent; nihilque prorsus effingi, vel asserri poterit cur si originis peccatum ex parentibus in filios traduci debeat, virtutes etiam, ac vitia, ceteræque affectiones omnes, quibus parentum Anima imbuta fuerat, in filios una cum Animi substantia, & originali peccato traduci, diffundique non debeant. Itaque Animorum origo alio prorsus ex fonte deduci, ejusque peccati propagatio alia prorsus ratione explicari debet, ut à Theologis, divinarumque Litterarum Interpretibus factum esse conspicimus.

IX Quo ad Philosophos attinet, perspicue certoque defendi debet quod Animorum origo non alio prorsus ex fonte, causa, principio deduci poterit, quam ab ipso Deo, (a), qui eorum singulos infinita vi sua ex nihilo repente eduxerit, atque admirabili quadam lege, inferius explicanda corpori humano conjunxerit. Etenim, si humanus Animus incorporeus, & partium expertus esse debet, ut proximo Capite demonstrabitur, ille ex materia quadam aut subjecto præexistente educi, compingi, formarique non pote-

(a) Vid. Lat. de Opific. cap. 19.

poterit; sed solum ex nihilo repente educi, hæc est à nihilo, sive à non esse ad esse transferri debet, quod nulli creatæ finitæque causæ, sed infinitæ solum potentiæ, divinæque causæ concedi poterit. Hinc optime à Plutarcho quoque Ethnico viro dictum fuit quod *πᾶσα ψυχὴ γένεταί ἐκ τοῦ Θεοῦ Anima qualibet opus est Dei*; Aristoteles perspicue diserteque testatur quod Mens humana extrinsecus advenit, ac divina est; (a) atque Aratus (b) de Jove, supremoque Numine loquens ait: *Τὴ γὰρ ἡ γένος ἐσμέν nam & ipsius genus sumus*: quod Paulus (c) Apostolus usurpavit ut humanos Animos à solo Deo productos esse probaret; quemadmodum sane in Sacris Litteris (d) dicitur quod cum Deus humanum corpus ex limo finxisset, *inspiravit in faciem ejus spiraculum vitæ*, alibique dicitur quod moriente homine revertetur *pulvis in terram suam, unde erat, & spiritus redibit ad Deum, qui dedit illum*. (e)

X. Quo vero tempore Animus ipse à Deo creatus fuerit, variis omnino rationibus à variis Philosophis explicatur. Etenim, ut obscuriores, levioresque sententias alias dissimulem, Plato (f) putavit humanos Animos ab æterno creatos, ac in aliqua Cæli parte, præsertim verò in sideribus collocatos fuisse, ut ibi incorporeis rerum ideis sibi impressis intenti perenni quadam cognitione fruerentur. Ubi vero corpus aliquod geni-

tum

(a) De Gen. Anim. Lib. 2. cap. 3.

(b) Phan. ver. 5.

(c) Act. Apost. cap. 17. ver. 28.

(d) Genes. cap. 2. ver. 7.

(e) Ecclesiast. cap. 12. ver. 7.

(f) Vid. Gassend. Lib. 3. cap. 1.

Corsoni Metaphys.

rum riteque dispositum foret, Animus quidam ex sidere descendens ipsi conjungebatur, iterumque moriente corpore ad sidus redibat. Origenes (a) Animos, ante corpora extitisse dixit: Nemesius, (b) Synesius, (c) aliique Veteres Animos omnes in ipsa Mundi origine creatos esse putarunt, quod, superiori etiam seculo nostraque hac ætate Leibnitijs, ac VVolfius existimant.

Communis est tamen Philosophorum, ac Theologorum omnium opinio humanos Animos tunc solum incipere è nihilo educi, sive creari, cum humano corpori conjunguntur novusque homo genitus existimatur. Id facile ex Sacris Litteris, Christianæque doctrinæ dogmatis à Theologis demonstratur. (d) Quod vero ad Philosophos, purumque rationis lumen spectare potest, illud unum hic observasse nunc juxerit, quod nulla prorsus *sufficiens ratio*, vel causa à Philosophis illis allata fuit, vel afferri unquam poterit, qua perspicue ostendatur humanos Animos ante corpora extitisse; adeoque, si nihil turpius est Phycico, quam sine causa aliquid fieri dicere, nihil est certe cur Animi ante corpora extitisse fingantur. Accedit etiam quod humanus Animus regendo corpori accommodatus, vel destinatus esse conspicitur; adeoque longe verisimilius videtur ipsum tunc solum à Deo creari cum corpori conjungi debet, quamvis ex indole, naturaque sua morienti corpori super-

(a) Hieron. *Epist. ad Pammach.* Vid. Huet. in *Orig. lib. 2. q. 6.*

(b) *De nat. hom.*

(c) *Epist. 105.*

(d) Vid. S. Hieron. *adv. Ruffin. Apostol. 2.*

perfectus sit futurus. Denique in Leibnitii, aliorumque sententia, difficultates, incommoda, & absurda plurima occurrunt; nihilque profus in opposita hypothese experimento vel rationi contrarium reperitur; adeoque hæc altera opinio, Origenis, Leibnitii, aliorumque sententia præferri debet.

C A P U T II.

De Animi spiritualitate.

I. EX Animi natura superius exposita facile ipsius affectiones, ac dotes omnes perspicua quidam, nativæque serie deduci possunt; præsertim verò quod ille incorporeus, spiritalis, simulque perennis, incorruptibilis, & immortalis esse debeat. Ejusmodi vero Mentis humanæ dotes, ex quibus ceteræ, veluti fonte dimanant, hic unà complectimur, quod illæ artissimo fovere inter se conjungantur, atque ipsarum una ex altera necessario consequatur.

II. Atque ut ab ipsa Mentis humanæ spiritualitate exordiamur, ipsius substantiam profus incorpoream, materiæ expertem, ac spiritalem esse oportere ex variis ipsius operationibus, nimirum ex variis cogitationum generibus manifestissime deduci potest. Etenim perceptio, vel cogitatio, quæcumque illa fuerit, à corpore, aut à corporeis affectionibus oriri certe non poterit. Siquidem affectiones omnes, quæ corpori inesse, vel in corpore concipi possunt, adeoque in nitida, perfecta, distinctaque corporis idea continentur, ex quantitate, extensione, variisque partibus oriuntur, quibus corpus ipsum componitur; unde figura, motus, ordo, ceteræque proprietates omnes, aut modi, quibus corporea substantia ornari, variarique

posse concipitur, ex partibus ipsis inæquali, variaque lege dispositis oriri debent, ut in Physica demonstratur. Itaque, si cognitio à corporea substantia produci posset, illa ab extensione, motu, figura, vel ordine produceretur, quo tenuissimæ corporis partes dispositæ, agitæ, conjunctæque forent; ideoque nobiliora quædam, ac puriora corpora cogitandi vi prædita censerentur quod illa subtilioribus partibus, tereti, mobilique mole, ac figura, mira denique textura, vel ordine composita viderentur. Quis vero, si nitidam, accuratam, distinctamque *cogitationis* ideam formaverit, illam à corporeis partibus, ab ipsarum figura, motu, vel ordine exsculpi posse putaverit? Quis ullam corporis, aut materiæ partem ita concidi, tenuari, disponi, percelli, vel agitari posse concipiat, ut illa tandem motum hunc suum percipiat, aliarumque partium aut corporum motus, figuras, & affectiones alias cognoscat? Quis in tenuissima lucis, ætheris, ignis, spirituum animalium substantia, quæ mira certe subtilitate, motuque celerrimo prædita sit, cogitandi vim inesse posse concipiat, cum *cogitationis* idea ab *extensionis*, *motus*, *figure*, aliarumque affectionum idea prorsus abhorreat; tantumque absit ut ideæ illæ una confundi, aut aliquo fœdere conjungi possint, ut una potius alteri repugnet, una alteram excludat, una denique alteram destruere videatur?

III. Hæc ipsa cogitantis substantiæ, corporisque distinctio ex variis quoque planeque contrariis affectionibus evinci potest, quæ *cogitationi*, corporique, sive materiæ conveniunt. Etenim materia, sive corporea substantia sine pluribus, ac infinitis etiam partibus esse, vel concipi non potest; sed quæcumque vel tenuissima materiæ particula,

quæ

quæ ab intellectu nostro percepta fuerit, partibus aliis in infinitum divisibilibus constare debet, ut in Physicis, ac Mathematicis demonstratur, adeoque extensio, ac divisibilitas, quamvis cum Cartesio corporis *essentia* censi non possit, aliqua tamen affectio, modus, character, proprietas esse debet, quæ cuilibet materiæ parti necessario, ac inseparabiliter inesse debeat. Sin vero cogitationis indoles, atque natura subtilius exploretur, illa omnino simplex partium omnium expers, ac indivisibilis esse concipitur; adeoque non successive, sed repente potius, ac temporis momento, in nobis peragitur; ac, licet in indiciis quibusdam, ratiocinationibus, ceterisque cogitationum generibus, quæ simplicibus aliis compositæ sint, quædam partium varietas, hoc est perceptionum numerus, haberi secernique possit; in ipsa tamen objecti unius perceptione nulla partium varietas, ac divisibilitas effingi potest. Ergo si proprietates illæ, intimæque affectiones, quæ corpori, adeoque corporeis etiam affectionibus inesse debent, ab iis omnino dissident, quæ cogitationi inseparabiliter, intime, ac necessario conveniunt, quis aperte non videat ipsas quoque substantias, ex quibus affectiones illæ veluti fontibus oriuntur, omnino dissimiles, contrarias, ac distinctas esse, adeoque humanos Animos omnino incorporeos, ac spirituales esse oportere?

IV. Ac certe quidem, si Mentis humanæ substantia corporea, variisque partibus una conjunctis composita foret, adeoque cogitatio à Materia, pluribusque Materiæ partibus oriri posset, ejusmodi cogitatio vel ab una solum materiæ parte, vel à partibus omnibus una collecta oriretur. Si fortasse quis dixerit cogitationem non à pluribus, sed ab

una solum Materiæ, sive Animi corporei parte produci, perspicue apparet id temere prorsus effingi, cum partes omnes, quibus integra Mentis humanæ substantia constata foret, extensæ subtilioribus partibus aliis in infinitum usque divisibilibus compositæ sint, adeoque ipsarum quælibet iisdem viribus prædita censenda sit: nihilque proinde esse possit cur Animi cogitatio, vel Animi cogitantis actus ab una solum, non vero à ceteris Animi partibus oriatur. Sin vero dicatur cogitationem à partibus omnibus una collectis oriri, totidem partium varietas in ipsa cogitatione distingui vel admitti deberet, quos fuerint partes illæ, quibus corporea Animi substantia constata foret, adeoque in quolibet cogitationis actu infinitus partium numerus admittendus esset: quod ab ipsa cogitationis indole, intimoque sensu mirifice abhorret.

V. Exinde vero jam facile refelli poterit Epicuri sententia, qui cognitionem omnem à tenuissimis solum, rotundisque corpusculis oriri putavit, Animumque nostrum ex levibus solum, ac mobilibus atomis compositum existimavit; ut ille, cum vividæ, tenuissimæque flammæ instar in sano, ac vigente corpore nutriatur, effato jam ac languente corpore extingui, vel evanescere deberet. Iæ quoque nuperrima Lokii (a) sententia refelli debet, qui, licet humanæ Mentis substantiam incorpoream, atque immortalem esse censere, non obscure tamen fieri posse putavit, ut materiæ partes in infinita Dei sapientia, ac virtute ita fortasse conceisæ, dispositæ

(a) Lib. 4. cap. 3.

positæ, contextæ, agitæ forent, ut ex hac ipsa admirabili partium textura, ordine, figura, tenuitate perceptio oriretur. Etenim quæcumque demum partium subtilitas aut ordo; quicumque motus, figura, quæcumque affectiones aliæ in materiæ partibus, aut corpore concipiantur, nunquam tamen perceptio, vel perceptionis idea exsculpi inde poterit: longeque facilius erit incorpoream cogitationem omnem hominibus adimere, quam illam ex solo corpore, aut corporeis affectionibus veluti fonte deducere. Quod si materia cogitans, aut corpus percipiendi vi præditum intrinsecam hanc repugnantiam, aut contradictionem involvit, ne quidem infinitæ Dei potentiae effectus ille concedi poterit; cum infinita illa agendi vis nullisque limitibus circumscripta, quam Deo inesse fatemur, ad impossibilia quoque, contradictoria; vel repugnantia extendi non possit, ut opportune jam alibi demonstravimus. Ergo perceptio, vel cogitatio à corporea substantia, sive à materia, aut à corporeis affectionibus oriri certe non poterit; adeoque humanus Animus, cui plurimas ejusmodi perceptiones, aut cogitationis species inesse intimo quodam, vividoque sensu percipimus, incorporeus, immaterialis, ac spiritalis esse debet.

VI. Quandoquidem verò perceptio quædam, sensatio, aut obscurior cogitationis species à pluribus in Brutis ipsis admitti solet, plurimique Philosophi existimant illorum Animam, quamvis aliqua percipiendi vi prædita sit, corpoream tamen, ac materialem esse oportere, unaque cum corpore interituram, suspicari fortasse quis posset ipsam quoque hominis Animam quamvis cogitandi vi prædita dicatur, alterius instar, corpoream esse posse; adeoque Animi spiri-

qualitatem ex sola cogitationis indole, ac natura inferri non posse.

Ac certe quidem plurimi, cum perceptionem à corporeâ substantia produci non posse intelligerent, nullamque prorsus incorpoream substantiam in Brutis admitti posse putarent, eo sunt abrepti, ut omnem prorsus percipiendi vim, sensum omnem, atque animam Brutis negarent; ideoque actus omnes, qui in iis peraguntur, ex sola partium textura, ordine, motu, figura repetendam esse censerent: perinde quasi Bruta machinarum instar motus illos efficiant, in quibus tamen nullus omnino dolor, nulla sensatio, memoria nulla, nulla perceptio reperitur. Alii vero, cum Brutis cognitionem, ac sensum adimi non posse putarent, nullamque prorsus cognitionem ex corporea substantia oriri posse intelligerent, in Brutis etiam incorpoream quandam Animam admiscere, quæ tamen rudior, unaque cum corpore interitura foret: quod nimirum Deum ipsam moriente corpore in nihilum redigeret. Peripatetici vero mediam quodammodo inter extremas opiniones illas sequuti, Brutorum animam neque *spiritum*, neque *corpus*, neque *corporeum*, neque *incorporeum* accidens, sed *substantialem* quendam *actum*, *formam*, principium corporeum existimarunt; ut quemadmodum nempe *motus*, *figura*, *extensio* &c. neque corpus, neque materia, sed corpori solum modi sunt, qui corpoream quandam, sed *accidentalem* perfectionem, rebus imprimunt; ita quoque corporeus actus aliquis, & corporea forma admitti possit, quæ *substantialis* tamen dicatur, quod ipsi rei *substantiale* esse tribuat, hoc est subjectum ipsum ita perficiat, ut *substantia* sit, aliarumque substantiarum instar per se subsistere, operari, sibi que convenientes actus exercere perfecte possit.

VII. Quis.

VII. Quis ex Philosophis istis palmam alteri præcipiat, asserere, & obscuram hanc, mireque implicatam de Brutorum Anima controversiam dirimere ad Physicos spectare debet. Quod hujus est loci, numerisque nostri, facile argumentum illud, quod ex corporea Brutorum cognitione, vel Anima deduci solet, perspicue certoque refelli poterit; ut proinde, quamvis etiam corporea quædam cognitio a corporea quadam forma, principio, vel causa repetenda in Brutis admittatur, perspicue tamen ex puriori, nobiliorique cognitionis genere, quod in homine reperitur, ostendi possit ipsius Animam corpoream quandam formam, alterius instar, esse non posse.

Etenim duplex cognitionis genus in homine admitti debet, ut alia quidem cognitio corporea, alia vero incorporea, dicatur. Corporea cognitio vocatur illa, quæ ad corporea objecta dirigitur, corporeis ideis, atque imaginibus peragitur, corporeis organis, sive sensoriis acquiritur, cujusmodi certe sunt perceptiones illæ, quæ somni, infantie, ebrietatis, vel amentie tempore in nobis producuntur. Incorporea vero cognitio dicitur illa, quæ ad incorporea objecta dirigitur, nullius phantasmatis ope, nullaque prorsus corporea imagine, aut corporis sensu comparatur. Quod autem in hominibus purius hoc etiam, ac nobilius incorporeæ perceptionis genus admitti debeat, intimo quodam sensu perspicue cognoscimus, ac experimur. Quis enim ignoret ab intellectu nostro *tempus*, *veritatem*, *justitiam*, *existentiam* &c. aliaque id genus plurima subinde percipi, quæ prorsus abstracta, incorporea, ac insensibilia sint, nullaque prorsus corporea imagine exprimi, sive cognosci

possint. * Quis intimo, vividoque sensu non videat affectus etiam, Animique propensionem ad bonum, ad honestatem, ad virtutem, incorporea nempe, & abstracta objecta à corporeis imaginibus longissime distita ferri? Quid vero quod ipsa quoque corporea objecta eo perceptionis genere sapissime concipiuntur, quod à corporea perceptione mirifice abhorreat? Ita corporea sensuum perceptio *Antipodas* velut homines capite deorsum inverso incedentes nobis exhibet; eos tamen, reluctante licet sensu nostro, rectos Telluri insistere percipimus. Corporea perceptio, quæ Solē conspicimus, illum nobis veluti bipalmarem exhibet: sed alio tamen perceptionis genere illum veluti Tellure longe majorem esse concipimus, quod facile pluribus exemplis aliis ostendi posset. Ergo, quamvis etiam ex Brutorum exemplo corpoream quandam cognitionem ex corporea quadam forma, sive principio oriri posse concedatur, incorporea tamen perceptio ex incorporea solum substantia, sive principio oriri poterit; adeoque, licet incorporea Animi nostri natura ex singulis ipsius actibus, aut corporeis etiam perceptionibus inferri non posset, ex incorporeis tamen actibus, ac perceptionibus inferri illa debet; & quamvis etiam corporea, *Solis*, *Antipodum* &c. aliarumque rerum perceptio ex sensibus, corporeo nempe, ac mortali principio oriri possedicatur; altera tamen cognitio, quæ priori
adver-

* Si corporea corporeis oculis mira quadam rerum cognatione cernuntur, oportet Animum, quod videmus illa incorporalia, corporeum, corpusve non esse. *S. Aug. Solil. Lib. 2. cap. 19. & de Quantit. Anim. cap. 4. al. 13.*

adversatur, & objectum ipsum nova, meliorique ratione nobis exhibeat, ab alia, nova, meliorique causa, incorporeo nempe principio, deduci debet.*

VIII. Denique, ne argumentis aliis hic immorer, observari postremo nunc poterit quod innumeræ cognitiones nostræ *reflexioni* conjunctæ, sive *reflexæ* esse solent. Etenim sapissime non modo nos objectum aliquod rite percipimus, verum etiam hanc ipsam perceptionem in nobis peragi adverimus; non modo sentimus, verum etiam sensationem illam in nobis effici, sive nos sentire sentimus, sensationis, cognitionisque hujus nostræ intimo quodam vividoque sensu conscii nobis sumus: adeoque sicuti prima perceptio ad rem perceptam veluti objectum dirigitur, ideoque *directa* dicitur, ita *reflexio*, vel cognitionis cognitio ad cognitionem ipsam antea in nobis formatam veluti objectum tendit, ideoque *reflexæ* vocatur. Itaque, licet cognitio *directa*, si præfertim ad corporeum objectum aliquod dirigatur, corporea censeatur, atque à corporeo solum principio deduci fortasse possit, reflexa tamen cognitio, quamvis etiam ad corporeum objectum dirigatur, semper incorporea censeatur, atque ab incorporea causa pendere debet. Fingatur enim quod humanus Animus ex tenuissimis materiæ partibus componatur, adeoque perceptio ex peculiari quadam partium figura, extensione, motu, situ, vel ordine producat, perspicue apparet quod, si eadem illa dispositio, figura, mo-

* Quare conficitur ut aliud simus nos, aliud sensus. Siquidem cum ipse fallitur, possumus nos non falli. *August. Solili. Lib. 2. cap. 2.*

morus &c. idem nempe affectionum complexus perseveret, ex quo perceptio prodierat, eadem quoque perceptio ab iis orta perseverabit: adeoque nova, ac distincta perceptio, perceptionis nimirum perceptio à corporeis affectionibus illis oriri non poterit, nisi novus alter affectionum complexus in materiæ partibus oriatur. Ubi vero novus ille affectionum complexus, nova scilicet agitatio, figura, situs, celeritas in materiæ partibus oriatur, adeoque nova perceptio ab iis producat, quemadmodum prior ille affectionum complexus prorsus evanuit, atque una cum novo, varioque complexu simul existere, simulque componi non potest, ita quoque prior illa perceptio à priori complexu producta evanescet, adeoque cum posteriori perceptione simul existere, sive componi non poterit. Itaque posterior hæc perceptio priorem aliam jam prorsus extinctam percipere non poterit, adeoque reflexa cognitio ex corporeis affectionibus, ex materiæ partibus, ex corporea demum substantia oriri, vel exsculpi non posset. Ergo, cum reflexæ cognitiones illæ certissime admitti debeant, quibus perceptionem adhuc in nobis superstitem atque existentem percipimus, dubitari certe non poterit, quin humanus Animus ejusmodi reflexa cognitione præditus incorporea quædam, partium expertus, indivisibilis, ac spiritalis substantia censeri debeat.

IX. Hinc mirari plane non possumus si nobiliores omnes Philosophi, qui maxima ingenii, æ doctrinæ gloria florere, perspicuum hoc inter materiam, sive corpora, atque humanos Animos discrimen agnoverunt, ideoque Animos ipsos materiæ expertes, indivisibiles, & incorporeos admiserunt. Ac, ne in Philosophis illis recensendis immorer,

Pla.

Platonis, aliorumque sententiæ apud Ciceronem observari facile poterunt, qui incorpoream hanc Animi naturam uberrime, ac elegantissime demonstravit. (a) Quod si plures alii tum ex veteribus, tum ex recentioribus etiam occurrunt, qui Animos ipsos corporeos existimarunt, observari etiam poterit illos plerumque non alia de causa in opinionem illam abreptos fuisse, nisi quod nitidam, atque accuratam incorporeæ substantiæ, vel *Spiritus* ideam concipere, vel efformare non poterant; * ideoque non modo humanos Animos, sed ipsum quoque Deum corporeum esse dixerunt. (b) Itaque, cum in *Spiritus*, vel incorporeæ substantiæ idea nulla prorsus repugnantia effingi possit, ac perspicuis argumentis appareat tum Deum, tum Animum nostrum corporeum esse non posse, incorporea quædam substantia, vel *Spiritus* admittendus erit, quamvis ipsius idea nitide, accurateque ab intellectu nostro formari non possit: quod ille nimirum corporeis imaginibus assuetus, corporeas affectiones illas reponere vix possit, adeoque in illarum quoque rerum, quæ prorsus incorporeæ sint, ideis efformandis ad incorporea phantasmata relabatur. Nec alia sane de causa Tertullianus.

nus.

(a) Vid. adnot. ad cap. seq.

* Εἰ τίς φησὶ μὴ σῶμα ἔχειν εἶναι, καταφρονῶντες τὸ παράπαν, καὶ εἰς ἐθέλοντες ἄλλο ἀνέιναι, quis dicat existere aliquid, quod non sit corpus, statim despiciunt, nihilque aliud, quam corpus, audire vident. Plato in Sophista.

(b) Hobbes, in Leviat. cap. 12. §. 34.

nus * ipse, alique nonnulli veteres Ecclesiæ Patres (a) humanos Animos aut Corpus esse, aut ex subtiliori quadam, puriorique materiæ constare dixerunt, nisi quod illi incorpoream quandam substantiam concipere vix poterant; ideoque quidquid existeret, atque à *nihilo* distingueretur, corpus esse putarunt, ut optime de Tertulliano differens observavit Augustinus. * * Quandoquidem ergo perspicue certoque cognoscimus Deum, Animumque nostrum neque *nihil*, neque corpus esse posse distinctum aliquod Entis genus admittendum esse percipimus, quod incorporea substantia, vel *Spiritus* appelletur, quamvis ille à nobis accurate concipi, vel definiri non possit; cum in ejusmodi rebus, in quibus vivida quædam perceptio, vel perspicuitas obtineri vix potest, sola certitudine dirigi debeamus.

C A P U T III.

De Mentis humanæ, vel Animi immortalitate.

I. Ceteris attributis, ac perfectionibus, quæ humanis Animis inesse possunt, excell.

* Cum autem sit, habeat necesse est aliquid, per quod est. Si habet aliquid, per quod est, hoc erit corpus ejus. Omne, quod est, corpus est sui generis; nihil est incorporale, nisi quod non est. *Tertul. de Anim. cap. 7.*

(a) Vid. Hieron. in Matth. 10. Aug. de Gen. ad lit. lib. 7. cap. 7. 8. 9.

* * Quia corpus esse Animam credidit non ob aliud fecit, nisi quod eam incorpoream cogitare non potuit; & ideo timuit ne nihil esset, si corpus non esset, S. Aug. de Genes. ad litter. libr. 10. cap. ult.

excellere, adeoque principe loco subtilius, & accuratius explorandas esse jam diximus *spiritualitatem*, atque *immortalitatem*; cum præsertim ex illis plurimæ perfectiones aliæ mox explicandæ nitida quadam serie deducantur. Quemadmodum ergo superiori Capite perspicuis certisque rationibus ostensum fuit quod humanus Animus partium expers, indivisibilis, & incorporeus admitti debet; ita quoque perspicuis etiam, certisque rationibus ostendendum erit quod ille perennis, interitus expers, ac immortalis esse debebit; ea nimirum indole, natura, ac substantia præditum ipsum esse oportere, ut illud esse, quod habet, perenniter, constanterque conservet, nihilque prorsus admitti, vel effingi possit, quod Animi substantiam destruere fortasse valeat, si maxima solum, ac infinita Divini Opificis potentia excludatur; ut mox accuratius explicabitur. Quandoquidem vero hæc ipsa Mentis humanæ perfectio, Animique immortalitas variis rationum generibus ostendi solet, ut aliæ quidem *physicæ*, aliæ vero *metaphysicæ*, aliæ denique *morales* dicantur, singulas ejusmodi rationes hic ordine complectemur, supremoque tandem loco quidquid à pluribus contra utramque Animi dotem afferri solet, accurate refellimus.

II. Itaque, ut à primo, clariorque argumenti genere exordiamur, Mentis humanæ immortalitas ex ipsius spiritualitate manifestissime inferri debet; ubi nimirum ipsius substantia partium expers, indivisibilis, & incorporea concedatur, incorruptibilis etiam, perennis, ac immortalis admitti debeat. Etenim, ut opportune, ac perspicue in Physica demonstratur, id interesse, mori, vel corrumpi concipimus, quod
ita

ita variari, vel alterari potest, ut vetus illud esse, quod habuit, prorsus * amittat, ac novum aliud esse à veteri prorsus distinctum recipiat; alioquin si vetus illa substantia in nihilum abiret, interitus ille, sive mutatio non *corruptio* vel *mors*, sed *annihilatio* diceretur, quæ *creationis* instar à nulla finita vi, adeoque à nulla creata causa produci potest, ut in I. Metaphysicæ Parte jam demonstravimus. Itaque, ut aliquid mori, sive corrumpi dicatur, necessario requiritur ut partibus aliquibus componatur, quæ dividi, secerni, disjungi, novoque prorsus ordine disponi sic possint, ut exinde nova sensibilibus affectionum congeries, adeoque nova substantia à veteri distincta oriatur. At in substantia, quæ spiritualis, & incorporea sic, nullæ omnino partes, nulla partium varietas, textura, motus, unio, disjunctio effingi potest, ergo illa mortis, aut corruptionis capax esse non poterit; ideoque, si Mentis humanæ substantia spiritualis, & incorporea dicatur, incorruptibilis etiam, ac immortalis admitti illa debet. * *

III. De-

* Intervals, viz, connexis, pondera, plagæ, Concurfus, motus, ordo, positura, figura cum permutantur, mutari res quoque debent. *Lucretius Lib. 2. ver. 120. & 724.*

* * Cum tanta celeritas Animorum sit, tanta memoria præteritorum, futurorumque providentia, tot artes, tantæ scientiæ, tot inventa, non possit eam naturam, quæ res eas contineat, esse mortalem; & cum simplex Animi natura sit, neque habeat in se quidquam admixtum, dispar sui, atque dissimile, non possit eum dividi, quod si non possit, non possit interire. *Cicero de Senect. cap. 21.*

In Animi cognitione dubitare non possumus, nisi in physicis plane plumbei sinus, quia nihil sit Animi admixtum, nihil concretum nihil copulatum, **nihil**

III. Deinde vero, si Mens humana aliquando deficere, mori, vel interire unquam posset, deberet amittere illud esse, quod haberet. Ergo vel ipsa sibi hoc esse, quod haberet, eriperet, ac se ipsam destrueret; vel ipsi potius hoc esse, quod haberet, ab altero adimeretur, ut à Deo, vel ab alio creato spiritu, vel à corpore. At ipsa sibi suum hoc esse eripere, seipsam nimirum destruere, vel *annihilare* non potest, cum nulla creata vis, quæcumque illa fuerit, ens aliquod ex nihilo producere, vel ens aliquod in nihilum redigere unquam possit; ideoque, sicuti humanus Animus seipsum producere, sive creare non potuit, ita quoque se ipsum perimere, destruere, *annihilare* non potest. Eadem quoque ratio perspicue ostendit quod humanus Animus ab alio creato spiritu, vel ab alia humana Mente destrui non potest; cum præsertim creatus spiritus unus in alium agere, vel potenter adeo influere non possit, ut ipsum perimere posse concipiatur. Multo etiam minus humanus Animus à corpore destrui, variari, corrumpi, atque in nihilum redigi poterit, cum corporeæ affectiones omnes, quæcumque illæ sint, natura sua Animæ substantiam, quæ spiritualis, & incorporea sit, afficere non possint; neque corpus ullum in substantiam ullam influere, vel operari possit, quæ partibus, ac extensione prædita, adeoque corporea non sit. Ergo id unum supererit, ut Mentis humanæ substantia à solo Deo destrui variarique possit; ut quemadmodum

nempe

nihil coagmentatum, nihil duplex: quod cum ita sit, certe nec secerni, nec dividi, nec discerpi, nec diltrahi potest, nec interire. *Cic. Tust. l. 6. 29.*

nempe Deus ipse infinita vi sua Mentem ex nihilo repente produxit, ita quoque Mentem ipsam in nihilum redigere repente possit. Quamvis tamen in hac una hypothefi, eoque sensu humanus Animus finis, ac interitus capax dicatur, eoque discrimine ab æterna, invariabili, ac necessaria Dei natura distinguatur, intrinsece tamen, hoc est indole, natura, essentiaque sua incorruptibilis, ac immortalis haberi, vocarique debet; quod ille nimirum vi sua, sive creatæ naturæ viribus destrui, corrumpi, vel mori non possit; sed illud idem esse, quod habet, atque à Deo recepit, semper invariabiliter, constanterque sit habiturus.

IV. Argumentis hisce, quæ partim ex intima Animi natura deducuntur, adeoque *metaphysica* vocari possunt, partim ex naturæ legibus, hoc est ex interitus ac mortis idea reperuntur, quæ in caducis, mortalibus, tandemque interituris rebus concipiuntur, ideoque *physica* dicuntur, illa quoque subtexi nunc poterunt, quæ, quamvis *extrinseca*, vel *moralia* sint, plurimum tamen roboris habere debent ut ingenuos animos ac veritatis cultores ad immortalem hanc humanæ Mentis naturam facilius agnoscendam inflectant. Itaque Cicero immortalitatem ipsam exinde quoque facile ostendi, vel confirmari posse putavit, quod nobiliores omnes Philosophi ingenii doctrinæque gloria commendati, Gentes omnes, barbaræ quoque Nationes in hac asserenda conspirent. Quamvis enim Pherecydes Sirus id omnium primus docuisse feratur; (a) idque Thaleri
Mile-

(a) Cic. *Tusc. Lib. 1. cap. 16.*

Milesio ab aliis (a) concedatur; comper-
tum est tamen Ægyptios, (b) Druidas (c),
Cascos, quos antiquissimos Ennius appel-
lat, Magos, Arabes, aliosque plures (d)
longe ante Pherecydis ætatem humanos Ani-
mos incorruptibiles, perennes, ac immorta-
les admisisse; ac, licet in explicanda Animi
nostri natura, & origine diffiderent, omnes
tamen Animos corpori tandem superstites,
futuros dixisse. Ita quoque Nationum om-
nium animis æte infederat, quod, nisi futu-
rus aliquis vitæ status post hominis mortem
admitteretur; in quo bonis præmia, iniquis
pœnæ tribuerentur, vindex Deorum justi-
tia, supremique Numinis æquitas, ac pro-
videntia rite intelligi, vel explicari non pos-
set. Etenim, ut optime Lactantius, (e) ali-
que plures (f) observarunt; Deus justus es-
se non posset, nisi justis solum præmia,
scelestis etiam solis pœnas distribueret. Ejus-
modi vero præmiorum, pœnarumque distri-
butionem in hac miserrima ac brevi morta-
lis vitæ conditione salvari posse quis dixe-
rit, cum aliquando boni egestate, morbis,
calumniis premantur, injusti vero felices ac
beati videantur? Ergo, ut æquabilis illa, &
accurata Dei justitia defendatur, perennis
alter vitæ status post hominis mortem agno-
scendus erit, in quo scelesti solum pœna,
justique soli præmiis afficiantur.

V. Nihil est autem cur in pluribus argu-
mentis illis refellendis hic immorer, quibus

Epi-

(a) *Lucret. Lib. 1. cap. 24.*

(b) *Herod. Lib. 2.*

(c) *Cæs. de B. G. Lib. 6. & Strab. Lib. 15.*

(d) *Vid. Gassen. Lib. 14. cap. 1.*

(e) *Divin. Inst. Lib. 1. cap. 17.*

(f) *Chrysost. ser. 4. de Provid.*

Epicurus, Lucretius; alique plures humanos Animos corporeos, corruptibiles, morales, unaque cum corpore interituros ostendere nitebantur.

Pleraque ex argumentis illis exinde deduci solent, quod humanus Animus una cum corpore producat; quod Animi vires, & actus una cum corpore perfici, adolescere, vigere, languere videantur; quod affectiones omnes, motus, & ægritudines, quæ excitantur in corpore, ipsam quoque Animi substantiam percellere, afficere, alterare soleant; adeoque, si tanta ac mira prorsus, & perennis affinitas, connexio, dependentia inter Corpus ipsum, atque Animum reperitur, Animus ipse corporeus, ideoque Corporis instar corruptibilis, & mortalis haberi, unaque cum corpore interire ille debeat, quemadmodum sane in languente corpore Anima sensim deficere, prius in extremis corporis partibus, tandemque in ipso corde veluti extingui conspicitur.

VI. Sed hæc facile dirimi, ac refelli poterunt, ubi admirabilis illa connexio explicata jam fuerit, qua Mentis humanæ substantia non ex indole, naturaque sua, sed libero solum divini Opificis consilio ita regendo corpori destinata, ideoque humano corpori conjuncta fuit, ut in exerendis actibus suis ab illo penderet; quamvis illos etiam à corpore sejuncta exerere perfecte posset.

Interim vero observari facile poterit quod quamvis humanus Animus in corpore reperitur, dependenter ab illo operetur, ab ejus ægritudinibus afficiatur; ii tamen actus, qui ab Animo producantur, hoc est innumera cogitationum genera, quæ in nobis existunt, à corpore oriri non possunt; ideoque semper in homine principium aliquod admitti debet, quod incorporeum sit :
quam

quamvis occulta quadam, atque admirabili lege à corporeis sensibus, veluti instrumentis, & occasione quadam in operando pendere debeat.

Observari etiam debet quod, licet plerumque maxima sit affinitas, atque connexio inter Animi, Corporisque motus, & affectus illos, qui in alterutro, vel utroque excitantur, aliquando tamen in Animo plures motus, affectiones, & actus excitantur, qui corporas affectiones omnes excedunt, atque interdum etiam ipsis perspicue adversantur. Itaque sicuti ex mutua affectionum vel actuum dependentia, ac similitudine Animi naturam aut corpoream, aut mortalem esse quis crederet, ita potius ex maxima dissimilitudine, vel repugnantia manifestissime inferri debet hanc incorpoream, atque immortalem esse oportere.

VII. Quicumque sane hæc omnia subtiliter, accurate, præsertim verò ingenuo veritatis inquirendæ amore perpenderit, fieri certe non potest quin sententiam illam, quæ humanos Animos incorporeos ac immortales asserit, perspicuis, certisque rationibus probari, oppositam verò levibus, ambiguis, falsisque principiis inniti non videat. Sed, ut liberaliter etiam cum Epicuro, ceterisque Philosophis ipsum sequutis agatur, atque in re gravissima, ea nimirum, ex qua morum doctrina, hominum felicitas, legum vis, honestatis studium, ipsa denique religio dependet, effugium omne, liberioris ingenii viris præcludatur, observari facile hic poterit, quod quamvis etiam argumenta singula, quæ ab Epicuro, ceterisque afferuntur, tanti roboris esse possent, ut ambiguum plane, ignotum, ac incertum efficerent an humanus Animus incorporeus ac immortalis, siue corporeus unaque cum corpore in-

te-

interiturus admitti debeat, ipsum tamen rationis lumen, ac humanæ prudentiæ leges impellerent, ut incorporeum potius, ac immortalem, quam corporeum, & interituum admitteremus. Etenim ille, qui humanos Animos incorporeos, ac immortales esse arbitratur, adeoque perennis ac futuræ vitæ amore operatur, si fortasse fallatur, exiguum certe, levissimum, ac breve commodum amitteret, eam nimirum voluptatem, ac licentiam, quæ humanis etiam legibus, ac societatis officiis vetatur; si vero meliorem, veramque sententiam institisset, perennem sibi beatitatem comparasset. Ille vicissim, qui corporeos, ac interituos Animos existimasset, ejusque hypothesis, ac principii lumine omnem præmii futuri spem, ac pœnæ formidinem abjecisset, levissimum certe, breve, ac mortale commodum adeptus inde foret, ut corporeis nempe voluptatibus, caducisque bonis alacrior, ac timoris expers frueretur. Sin vero in hac ipsa opinione deceptus fuerit, eamque opinionem amplexus, quæ moriente corpore falsa deprehendatur, is infiniti mali, æternæque pœnæ periculo se exposuisset. Quandoquidem ergo perspicuis humanæ prudentiæ legibus impellimur, ut ex duabus opinionibus eam semper eligamus, in qua levioris quidem detrimenti timor, majoris vero boni spes affulgeat, eamque deseramus, in qua levissimi boni spes, gravissimi damni timor impendeat, quis aperte non videat, quod, quamvis etiam incorporea, ac immortalis Animi natura divinæ fidei lumine, certisque rationibus demonstrata non foret, & argumentis illis, quæ contra afferuntur, ea vis inesset, ut nos hac in parte ancipites ac incertos efficerent, unius tamen prudentiæ legibus, puriorique rationis lumine dirigi, ac impel-

impelli debemus, ut humanos Animos incorporeos, ac immortales esse putemus, ejusque opinionis præsidio, perennis nimirum pœnæ formidine, ac præmii perennis amore mortalis hujus vitæ cursum honeste, sancteque transigamus?

C A P U T IV.

De Mentis humanæ intellectu, ejusque cognitione, ideis, & affectionibus.

I. **Q**Uæ de Mentis humanæ viribus, ac potentiis explicanda nobis occurrunt, facile ex ipsius natura superius exposita, & ex variis actibus, quos ab illa produci intimo quodam vividoque sensu percipimus, inferri possunt; ut proinde hac in parte Philosophi, quamvis interdum varios explicandi modos inire, variisque nominibus uti consueverint, ubique fere consentiant. Itaque singulas humanæ Mentis vires, potentias, ac facultates hîc ordine complectemur, earumque proprietates, & affectiones omnes brevissime exponemus. Ejusmodi vero potentiarum tres à Philosophis numerari, sive distingui solent, *Intellectus* nimirum, *Voluntas*, ac *Memoria*; quamvis hæc ultima ad Intellectum facile revocari possit, ut inferius ostendetur.

II. Ut autem à prima Animi potentia exordiamur, *Intellectus* vocatur vis, ac facultas illa, qua Mens humana ad verum veluti objectum dirigitur, innumera entium genera cognoscit, ideoque innumera perceptionum genera, veluti peculiare quosdam, sibi que convenientes actus producit. Quandoquidem vero nihil ab intellectu percipi, vel apprehendi potest, nisi incorporea quædam rei perceptæ species, & imago Mentis nostræ

nostræ obversetur, quæ rem perceptam Menti cogitanti veluti præsentem exhibeat, imagines illæ, vel ut appellari jam solent, *ideæ* admitti debent, quarum præsidio perceptio nostra peragatur, in quibus nempe Mens nostra rem perceptam nitide contempletur. Idque facile intelligi, & clarius exponi poterit, si incorporeæ cognitionis origo cum corporeæ cognitionis origine conferatur; atque admirabilis illa ratio observetur, qua corporea quædam sensibilis objecti perceptio sensuum ope in nobis produci censeatur. Etenim cum sensibile objectum aliquod sensui nostro obversatur, accurata ipsius species ab ipso erumpere, ad organa nostra deferri, ipsa percellere, tandemque nervorum, ac spirituum animalium ope ad cerebrum, Animique sedem deferri concipitur, ut ejusmodi speciei præsidio Anima nostra corporeum, ac externum objectum illud percipiat, ac veluti præsens intueatur. Quemadmodum ergo ex rosa, quæ speculo objecta fuerit, pulcherrima ipsius imago prodire, atque in speculi superficie depingi concipitur, ita ex corporibus omnibus accurata ipsorum species, ac imago erumpi existimatur, quæ per aerem ad oculos delata pupillam subeat, retinæ imprimatur, per opticos nervos ad cerebrum feratur, ibique picta, ac impressa ab Anima percipiat. Ita ex sonoro corpore *soni* species erumpit, tremulæ nimirum, atque agitatz corporis partes motum in aere quaquaversum imprimunt, atque exterior aer ita agitatus, cum ad aures pervenerit, internum aerem auri inclusum commover, animales spiritus *acusticis* nervis inclusos percellit, iique sic agitati Animam cerebro insidentem afficiunt, ut in illa *soni* sensatio producat. Tenuissimæ partes, ac effluvia, quæ ab odoris, lapidis, cali-

calidis corporibus emanant, ac nerveas papillas in naribus, lingua, manibus dispositas commovent, spiritusque animales nervis inclusos certa quadam vibratione irritant, ac motus ille ad cerebrum, nervorum originem, Animæque sedem delatus Animam percellit, ut ex inita jam consuetudine Anima ipsa tum corpoream affectionem illam, tum corporeum objectum, à qua oriatur, percipiat. * Quemadmodum ergo corporea, ac sensibilis corporei alicujus objecti cognitio in nobis produci, vel excitari non potest, nisi præter objectum illud, quod extra nos positum sit, corporea quoque species, quæcumque illa sit, habeatur, quæ à corporeo objecto prodiens ad sensuum organa deferatur, Animam percellat, ipsique objectum illud exhibeat, ita quoque incorporea quædam incorporei objecti perceptio in nobis produci, vel excitari non poterit, nisi præter incorporeum objectum, quod à nobis percipitur, incorporea quoque species, & imago admittatur, quæ objectum ipsum

Ment-

* Quondam Porticus attulit.
Obscuros nimirum senes,
Qui sensus, & imagines
E corporibus extimis
Credant Mentibus imprimi;
Præcedit tamen excitans
Ac vires Animi movens
Vivo in corpore passio,
Cum vel lux oculos ferit,
Vel vox auribus instrepit,
Tum Mentis vigor excitans
Quos intrus species tenet,
Ad motus similes vocans
Notis applicat exteris,
Introrsumque reconditis
Formis miscet imagines.

Boet. de Consol. Lib. 5. met. 4.

Corsini Metaphys.

G

Menti nostræ veluti præsens exhibeat. Itaque, licet à Lokio, Arnaldo, aliisque nonnullis *imagines* illæ ab ipsa *perceptione* non distinguantur, incorporeæ tamen rerum *imagines* admitti debent, quas Plato omnium primus *Ideas* appellavit, quarum ope incorporea cognitio, incorporei nempe objecti perceptio in nobis peragatur. Atque hætenus quidem Philosophi omnes, si veteres solum, ac recentiores etiam Epicureos exceperis, qui incorporeas cognitiones, adeoque incorporeas etiam *imagines* fustulerunt, una veluti voce conspirant, ut incorporeas quasdam *ideas* nobis inesse fateantur, quemadmodum ipsorum quilibet, ac Epicurus etiam corporeas *imagines*, species, *idola*, spectra, phantasmata à corporeis sensibus acquiri putavit, ut is proinde, qui sensu quodam careat, ea quoque *idea*, & cognitione carere debeat, quæ ejusmodi sensu acquiratur.

III. In explicanda vero spiritualium *Idearum* natura, & origine tum veteres, tum recentiores etiam Philosophi mirifice dissident. Etenim Aristoteles incorporeas *Ideas* à sensibus oriri, ex corporeis nempe imaginibus, quæ sensibus exceptæ, ac cerebro impressæ fuerant, abstrahi vel educi arbitrat. Ille nimirum existimat intellectum tabulæ rasilis instar habendum esse, cui nulla prorsus imago, vel rerum *idea* depicta, insculpta, vel impressa fuerit. At ubi Mens ipsa corporeas *imagines*, ac phantasmata contempletur, quæ sensibus excepta ac cerebro impressa sint, illa incorporea quadam, puriorque luce perfundit, à corporeis affectionibus, & singularibus circumstantiis ita separat, abstrahit, ac sejungit, ut exinde incorporea quadam species efformetur, quæ ab intellectu, incorporea nimirum potentia,

cognosci, atque incorporeum objectum exprimere perfecte possit. Hinc Aristoteles intellectum ipsum partim *agentem*, partim *patientem* esse dixit; quod nempe vi sua incorpoream speciem exsculpat, abstrahat, ac efformet; deinde vero speciem ipsam, ac imaginem sic efformatam veluti sibi impressam recipiat; quemadmodum species ipsa, quatenus in intellectu imprimitur ipsique inhæret, *impressa* dicitur, quatenus vero ab intellectu procuditur, ac percipitur, *verbum*, aut *species expressa* vocatur; unde celebre effatum illud à Theologis etiam usurpatum quod *omne intelligens intelligendo efformat verbum*. Quæcumque verò in Aristotelis hypothese de spiritualium idearum origine dicta sunt, eadem fere in Gassendi quoque, & Lokii sententia facile intelligi exponique possunt; cum ipsi quoque ejusmodi idearum originem à sensuum ope, Animique viribus repetendam esse opinentur; quamvis Lokius incorporeas illas imagines non à corporeis abstrahi, sed ab Animo formari putaverit dum corporeis imaginibus ille percellitur, adeoque meditatione, conjectura, disserendique viribus novas, sensimque puriores ideas sibi procudit.

IV. Ac certe quidem, inquit illi, si incorporeæ imagines singulis hominibus impressæ, ac innatæ forent, hominum quilibet eandem prorsus *justitiæ, honestatis, Dei &c.* ideam haberet, adeoque par, & æqualis spiritualium rerum cognitio in omnibus hominibus haberetur; cum tamen mira idearum varietas in variis hominibus habeatur; nec eadem, & æqualis, sed mire potius diversa, cognitio, vel ad artes, & cognitiones ipsas comparandas dispositio in variis hominibus observetur.

1. Ita quoque pro varia sensuum, &

organorum indole, & perfectione, pro vario sensuum usu, variaque ratione, qua pueri educati fuerint, varia quoque rerum cognitio, virtutum idea, atque, ut Lokius ait, *principia practica* in iis deprehenduntur; cum tamen hæc prorsus eadem, & æqualia sint futura, si virtutum, aliorumque objectorum idea mentibus ipsis ingenua, ac impressa forent.

3. Deinde vero, si idæ illæ innatæ, adeoque Animi substantiæ semper impressæ forent, semper etiam ipsi præsentessent; ideoque semper ab Animo percipi deberent; ac humanus Animus illarum ope, sive in illis incorporea quædam objecta semper cognosceret, etiam infantia, somni, velebrietatis tempore incorpoream cognitionem aliquam exereret: quod tamen falsum, & absurdum esse jam vidimus.

4. Accedit etiam quod infinitus propemodum ejusmodi spiritualium idearum numerus, varietas, ordo, series admittenda foret, cum infinita prorsus incorporea objecta ab intellectu cognosci possint, atque admirabilis quædam, & inexhausta cognitionum series in artibus, ac scientiis acquiratur. Quis vero immensam illam tot idearum seriem, quarum plurimæ vix unquam excitarentur, in simplici & incorporea Animi substantia pingi, vel imprimi potuisse concipiat?

5. Denique eam vim nobis inesse experimur, ut ex corporeis etiam, concretis, & singularibus ideis corporeo sensu exceptis incorpoream speciem efformemus; quemadmodum à Sacris etiam Literis erudimur, quod (a)

(a) *Ad Rom. cap. i. v. 20.*

invisibilia Dei per ea, quæ facta sunt, intellectus et conspiciuntur; quod nimirum incorporearum Dei cognitio, & idea ex corporeis creaturarum rerum imaginibus exsculpi potest. Ergo, si incorporearum quædam imagines ex sensibus oriri, vel ab Animo formari possunt, ceteræ quoque ab Animo educi, vel effingi poterunt; ideoque imagines illæ, quæ ingenuitæ, vel impressæ dicuntur, inutiles censeri, adeoque refelli debent.

V. Quamvis tamen hæc, aliaque id genus plurima, quæ à Peripateticis, & Loxio mirro-mentis acuminæ, & elegantia proferuntur, maximam veri speciem præferant, Platonici tamen; Cartesiani, alique plurimi corporeas quidem ideas à sensibus acquiri, & cerebro imprimi posse concedunt, incorporeas tamen ideas prorsus ingenitas, hoc est ab ipso Deo mentibus nostris impressas, esse arbitrantur; ut à corporeis quidem imaginibus, veluti occasione quadam, excitari illæ possint; sed à corporeis tamen imaginibus abstrahi, educi, vel ipsarum præsidio, ac sensuum ope ab intellectu formari non possint: quamvis Cartesius, Malebranchius, Regius, Leibnitijs, alique idearum innatarum assertores tum in asserendis illis, tum in explicanda lege, qua à nobis cognoscantur, plurimum differant.

1. Etenim, inquit illi, nulla prorsus affinitas, connexio, similitudo, sive proportio inter corporeas, & incorporeas ideas reperitur; ideoque illæ ex illis abstrahi, educi, vel oriri non possunt.

2. Neque modo corporeæ, ac spirituales ideas, si inter se conferantur, omnino dissimiles, sed oppositæ quoque, ac dissidentes esse debent; ut illæ quidem corporeas, extensas, divisibiles res, & objecta nobis exhibeant; hæ vero incorporeas, par-

tiam expertes , ac indivisibiles res exprimant.

3. Ac certe quidem corporeæ imagines ea solum objecta exprimere , vel repræsentare possunt , quæ corporeis , aut sensibilibus affectionibus prædita sint , ut *odore* , *colore* &c. At in spiritualibus , vel incorporeis objectis , ut *justitia* , *tempore* , *veritate* &c. nullus omnino color , nulla prorsus corporea qualitas reperitur , ergo in corporeis ipsis imaginibus nihil omnino incorporeum esse potest , quod ex illis abstrahi , secerni , vel educi possit .

4. Denique id prorsus immerito à Peripateticis , à Philosophis his aliis asseritur quod corporeæ quædam imagines ab objectis erumpant , sensibus excipiantur , ac cerebro sic imprimantur , ut Animas illas inspicere , atque ex iis incorpoream quandam speciem elicere possit . Etenim , licet à corporeis objectis imagines quædam , sive phantasmata prodire , ad sensuum organa deferri , cerebroque impressa conservari putentur , ut paulo superius jam diximus , exque imagines suis fere coloribus ornatae somni tempore excitari videantur , quidquid tamen ab externis objectis ad sensus defertur , ac illorum ope ad cerebrum , animique sedem deducitur , nihil est aliud , quam peculiaris quidam spirituum animalium motus , certa quædam vibratio , qua tenuissimæ nervorum , & cerebri fibræ percelluntur ; ut Anima diuturna observatione , vel consuetudine erudita pro vario vibrationum genere , ac motus indole hanc potius , quam aliam , sensationem , hujus potius , quam alterius , objecti perceptionem in se excitari cognoscat . Itaque , cum ex ejusmodi fibrarum motu , vel spirituum animalium vibratione nulla prorsus spiritualis idea exsculpi , abstrahi , vel educi possit , incorporeæ imagines à sensibus ori-

ri, vel sensuum ope ab Animo procudi non poterunt; ideoque potius innatæ à Deo, nimirum Animis impressæ censerì debent; quamvis admirabili quodam, & arcano divini Opificis consilio imagines illæ ea lege mentibus nostris impressæ fuerint, ut actu cognosci non possint, nisi prius à corporeis imaginibus excitentur. Quæ quidem lex, & arcana prorsus corporeæ simulque incorporeæ cognitionis connexio in ipsa quoque Aristotelis, & Lokii sententia admitti debet; cum ipsi quoque incorporeas illas imagines, quæ jampridem sensuum ope, Animi que viribus formatae fuerant, semper quidem Animo impressas esse velint, neque tamen illas semper ab Animo cognosci dicant, nisi prius à corporeis imaginibus, à corporeis nempe spirituum animalium motibus, excitentur.

VI. Hujus principii lumine quidquid à Peripateticis contra ideas innatas oppositum fuerat, ita à Platonicis diluitur, ut in ipsa quoque Peripateticorum hypothesi eandem illam difficultatem reperiri contendant Platonici; perinde quasi utraque opinio iisdem difficultatibus premi videatur.

1. Itaque ad primum Lokii argumentum reponere plerique solent quod quamvis eadem prorsus spirituales ideæ singulis hominum mentibus impressæ fuerint, maxima tamen in hominum ideis varietas observatur, quod imagines illæ inæqualiter à corporeis imaginibus excitentur. Quemadmodum ergo Peripatetici docent, quod, quamvis iidem sensus, eademque Animi substantia, ac percipiendi facultas singulis hominibus concessa fuerit, non omnes tamen homines easdem ideas efformant quod illi inæqualiter sensibus in efformandis incorporeis ideis utantur, ita quoque Platonici existimant incorporeas ideas

inæqualiter in variis omnibus observari quod inæqualiter sensuum ope in variis hominibus excitentur.

2. Ita, si cerebri fibræ, nervorum textura, spirituum animalium motus, & sensuum organa acriora, meliusque disposita sint; ac pueris accuratior educatio concedatur, idæ quoque meliores sunt futurae; non quod illæ à sensibus, aut à corporeis imaginibus exculpantur, sed solum quia ab imaginibus ipsis pro varia sensuum indole, ac perfectione inæqualiter excitentur.

3. Quamvis autem spirituales idæ Mentibus nostris innatæ, adeoque semper præsentēs sint; non tamen semper ab Animo percipi, siue cognosci debent; sed ubi solum à corporeis imaginibus excitentur: quemadmodum prorsus Peripatetici ipsi docent quod spirituales idæ semel acquisite, aut ab Animo formatae semper quidem Animo impressæ remanent; neque tamen semper ab Animo cognoscuntur, sed solum ubi à sensibus, aut corporeis imaginibus excitantur.

4. Quod vero plurimi opponunt infinitum fere idearum numerum, ordinem, varietatem admittendam esse, facile dirimi profecto poterit, si mentis humanæ vis, indoles, ac natura observetur. Etenim, si Animus ipse dum infinitarum rerum cognitionem acquirit, infinitum illum idearum numerum abstrahere, procudere, sibi que comparare potest, ut Lokius ceterique opinantur, cur idem ille idearum numerus ab ipso Deo Mentibus imprimi, siue concedi non poterit? Si Deus in illorum hypothēsi Mentibus nostris vim illam concessit, qua idæ etiam illas procudere possent, quas tamen nunquam erant facturæ, cur Animo idæ etiam illas imprimere non potuit, quas nunquam tamen à sensibus excitandæ, adeo-

que

que nunquam ab Animo cognoscenda fuerant?

5. Denique cum Lokius ceterique docent vim quandam Mentibus nostris inesse, quas spirituales ideas ex corporeis exculpere, sibi que formare possint, prorsus immerito, frustra que id ab illis asseritur; cum nulla prorsus corporea imago à sensibus acquiratur, nihilque prorsus sensuum ope ad cerebrum, Animique sedem feratur, nisi spirituum animalium motus, & certa quædam ipsorum vibratio, ut paullo superius est observatum. Ergo; si incorporeæ imagines à sensibus ori-ri, aut sensuum præsidio ab Animo formari debeant, spiritus illi incorpoream Animi substantiam percellere, afficere, movere deberent, Animusque ab iis perculsus incorporeum aliquid ex illis abstrahere, quæ tamen vix ac ne vix quidem concipi vel affirmari posse videntur. Itaque non alio sensu Dei cognitio à sensuum ope, & creaturarum rerum cognitione pendere dicitur, nisi quod ipse idea nobis impressa admirabili quadam, occultaque lege à sensibus excitatur; non vero quod à corporeis imaginibus abstrahatur; idemque prorsus de ceteris etiam incorporeis ideis asseri, vel admitti debebit.

Atque ista quidem de celeberrima questione utramque in partem dicta sint, ut ingenuus veritatis amator eam opinione n seligere, & amplecti possit, quæ rebus omnibus rite exploratis concinnior, ac verisimilior videatur. Quod si fortasse idearum origo longe obscurior appareat, ac opiniones illæ pluribus difficultatibus impeditæ, graviori-que caligine circumfusæ videantur, quam ut alterutra ex illis veluti certa liberius, ac temere seligatur, illud unum tanquam indubium, atque exploratam admitti nunc poterit, quod incorporeæ quædam imagines aut

ideæ. Mentibus nostris inesse debent, quarum præsidio incorporeas res & objecta percipimus; quamvis ipsarum origo tenues ingenii nostri vires eludat, adeoque ab intellectu nostro nitide, certoque deprehendi non possit.

VII. Quandoquidem vero ex ideis ipsis, quocumque demum ex fonte illæ oriuntur, plurimæ cognitiones in nobis producuntur, atque ex iteratis ejusmodi Mentis actibus, vel cognitionibus major quædam facilitas, propensio, ac dispositio ad actus illos iterum producendos exoritur, facilitas illa, si ve propensio *Habitus* appellatur; adeoque nonnulla de Habitibus ipsis supremo tandem hoc loco dicenda nobis occurrunt. Ejusmodi *Intellectus Habitus* ita distingui solent, ut alius quidem *Scientia*, alius *Opinio*, alius *Fides*, alius *Ars* appelletur.

Scientia vocatur habitus ille, qui ex cognitionibus certis ac evidentibus oritur; adeoque definiri illa solet *Cognitio certa*, & *evidens*; si ve *Cognitio rei per causam*; si ve *cognitio per demonstrationem acquisita*; ubi nempe intellectus objectum aliquod perspicue, certoque cognoscit, ideoque non libero, sed necessario ipsi assentitur.

Opinio vero vocatur habitus ille, qui ex probabilibus solum, dubiis, ac incertis rationibus oritur, ut proinde intellectus in objectum aliquod, vel partem unam inclinet, sed rationibus tamen, ac momentis aliis in oppositam quoque partem inflectatur. Hinc opiniones ipsæ inter se comparatæ aliquando quidem *æque probabiles* appellantur, aliquando vero ipsarum una altera *probabilior*, altera *minus probabilis* vocatur, ut opportunius in Logica demonstratur.

Fides est habitus, quo humanus Animus in objectum aliquod ab alio sibi propositum in-

inclinat; ubi nempe objectum ipsum aut proposita veritas ab intellectu non percipitur, sed tamen intellectus ipse cognoscit quod alteri objectum hoc proponenti, vel asserenti credendum est; ideoque in ipso propensio, fides, ac intima quædam persuasio ex variis ejusmodi argumentis exoritur, quibus objecti propositi *credibilitas* innititur. Hinc Fides ita distingui solet, ut alia quidem *humana*, alia vero *divina* dicatur: quod ista nimirum Deo aliquid asserenti, vel revelanti, illa verò hominibus aliquid asserentibus assentiatur. Itaque scientia duos characteres, aut affectiones habere debet, *certitudinem* scilicet, ac *evidentiam*, ut certitudine quidem ab Opinione, perspicuitate vero, sive evidentia à Fide distinguatur. Quamvis enim Fides divina semper certissima esse debeat, fallique non possit, ac humana etiam Fides aliquando certissima esse possit, semper tamen ipsarum utraque obscura, ac inevidens esse debet.

Artis denique nomine vocari solet habitus ille, sive cognitio, qua præcepta quædam rite constitui, percipi, & exponi solent, quamvis ejusmodi præceptorum bonitas nulla ratione demonstretur, ut in *Poesi*, *Pictura*, *Musica* &c. Quod si fortasse non modo leges ac præcepta quædam tradantur, sed ipsorum quoque bonitas, ac ratio demonstretur, ut in *Dialectica*, ceterisque liberalibus Artibus fieri plerumque solet, tunc habitus ille nobiliori quoque *Scientiæ* nomine donari poterit; quemadmodum sane *Dialecticam*, *Ethicam*, *Musicam* &c. interdum *Artibus*, interdum *Scientiis* accenseri consuevisse conspiciamus.

VIII. Quæcumque verò de prima Mentis humanæ potentia, sive *Intellectu* jam diximus, facile de altera quoque ipsius facultate

intelligi possunt, quæ *Memoria* vocatur, & ad Intellectum ipsum facile referri potest. Etenim, si objectum aliquod *actu* percipimus, dicimur *intelligere*; sin vero illud idem objectum percipimus, quod antea quoque perceptum fuerat, ac veterem cognitionem illam in nobis antea peractam advertimus, dicimur *recordari*. Itaque ad Memoriam non modo objecti cujusdam perceptio, sed veteris etiam perceptionis cognitio, reflexio, vel *advertentia* requiritur; quod ab incorporea percipiendi vi repetendum esse jam vidimus; quamvis corporea quoque Memoria in Brutis, atque in Hominibus habeatur. Quæ verò ratione corporeæ Memorix vis, ac perceptio in nobis peragatur, quave ratione corporeæ imagines, ac phantasmata in cerebro imprimi, conservari, & excitari subinde possint, in Physica demonstratur. Illud autem coronidis loco nunc observandum, quod cum Platonici humanos Animos ab æterno creatos, atque in sideribus collocatos esse putarent, ut ibi perenni rerum omnium cognitione fruerentur, dum incorporeas ideas sibi impressas perspicue contemplantur, cognitionem illam in Animis corporis mox conjunctis sensuum ope excitari dixerunt: adeoque celebre apud illos effatum erat quod *Scire nostrum est reminisci*.

C A P U T V.

De Mentis humanæ Voluntate, ejusque libertate, & affectionibus.

I. **A**ltera Mentis humanæ potentia, vis, ac facultas appellatur *Voluntas*, potentia nimirum humanis Animis à Deo concessa; ut ipsius præsidio ad bonum vel ad malum veluti objectum dirigantur; hoc est
in.

in objectum aliquod ab intellectu sibi propositum amando inclinent, aut ab illo refugiant, ipsumque averfentur. Etenim ubi intellectus objectum aliquod antea percepit, Voluntas ipsum veluti sibi conveniens, bonum, amabile cupere, diligere, & amplecti potest; sicuti vicissim, si illud idem objectum veluti malum, atque inconveniens ab intellectu cognoscatur, Voluntas ab illo deflectere, ipsumque averfari, vel odisse potest. Hinc Voluntas ab Intellectu necessario pendere debet, nec ullus unquam voluntatis amor, aut electio in humanis Animis excitari potest, nisi prius Intellectus cognitio præcedat, qua objecti bonitas, ac amabilitas cognoscatur: unde celebre effatum illud: *Nihil volitum quin præcognitum*; nihil nempe à voluntate dirigi; vel respui posse, quod prius ab Intellectu perceptum, ipsique voluntati propositum non fuerit.

II. Quamvis tamen voluntas in singulis actibus ab Intellectu pendere debeat; ab illo tamen distinguitur non modo quod ille ad *verum*, voluntas autem ad *bonum* velut objectum feratur; verum etiam quod Intellectus objecto suo, nimirum veritati sibi perspicue propositæ, non *libera*, sed *necessario* assentiatur; voluntas autem indifferens esse debeat ut bonum aliquod sibi propositum eligat, aut averfetur; ut proinde nobilior, ac præcipua voluntatis affectio, siue proprietates sit. *Libertas* ipsa, hoc est indifferens ac flexibilis arbitrii vis, qua voluntas objectum aliquod sibi propositum eligere potius, quam respuere, amare potius, quam non amare possit.

III. Sed, ut hæc ipsa voluntatis indoles, ac perfectio subtilius exponatur, ejusque libertatis character, & natura ostendatur, quæ in humanis Animis admitti debet, ob-

ferre.

servasse plurimum juverit; quod actus illi, qui in nobis peraguntur, aliquando quidem *voluntarii*, aliquando vero *involuntarii* esse possunt. Voluntarii dicuntur illi, qui à voluntate veluti causa oriuntur; in quibus nimirum eliciendis Animus ipse propensione quadam, ac veluti pondere inclinatur, aut certe ab iis non abhorret, nec illos invitus exerit. Involuntarii vero vocantur illi, qui in nobis vel insciis, vel invitis peraguntur; ubi nempe nulla Mentis perceptio, nulla prorsus electio, propensio, vel determinatio præcesserit, & actus ille à nobis temere prorsus, & inconsulto producat. Hinc optime *Voluntarium* ab Aristotele (a) definitur *id, quod fit à principio intrinseco cognoscente singula, in quibus est actio*; id nimirum, quod ab ipsa Mente eligitur postquam illa finem, objectum, & circumstantias omnes rite exploraverit, quæ actum ipsum consequuntur. Involuntarium vero definitur, *id, quod fit vel vi, vel ignorantia*; ubi nempe nulla intellectus cognitio, vel nulla voluntatis electio, ac propensio reperitur, quin etiam interdum aversio, vel repugnantia continetur.

IV. Deinde vero voluntarium ipsum, aut voluntarius actus ita distingui solet, ut alter quidem *spontaneus*, alter vero *indifferens*, perfecteque *liber* dicatur. Spontaneus actus vocatur ille, in quo producendo voluntas, Animusque noster ab extrinseca vi, causa, principio non cogitur, aut necessario impellitur ad operandum; & quamvis ipse objecto sibi proposito resistere, vel dissentiri non possit, ac tacito veluti pondere in ipsum feratur,

(a) *Ethic. Nicom. Lib. 3. cap. 1.*

ratur, adeoque necessario operetur, nulla tamen opposita propensione, & amore ad objectum aliud inclinatur. Itaque spontaneus actus vim, coactionem, & repugnantiam omnem excludit, ideoque dicitur coactionis expertus, vel *immunis à coactione*; quamvis necessario producat, atque ita produci debeat, ut non produci non possit. Indifferens vero, perfecteque liber vocatur actus ille, qui sic à voluntate exeritur, ut illa prius indifferens fuerit ad operandum; actum illum potius, quam ejus oppositum consulto elegerit, ita operetur, ut ab operando desistere repente possit. Hinc ejusmodi liber, ac indifferens actus non modo vim omnem voluntati impressam, verum etiam necessitatem omnem, omnemque determinationem excludit, quæ ab altera quacunque causa, sive principio oriatur; ideoque necessitatis expertus, vel *immunis à necessitate* vocatur; atque ita indifferens esse debet, ut à libera, ac flexibili voluntatis electione, & arbitrio oriatur. Ejusmodi vero discrimen, quod in voluntariis actibus admitti debet, ut alii quidem spontanei solum, alii vero spontanei simulque liberi dicantur, optime accurateque observavit Aristoteles, cum ait quod quilibet electivus actus spontaneus esse debet, neque tamen vicissim quilibet spontaneus actus semper etiam indifferens; liber, & electivus esse potest; (a) *Electio spontaneum quoddam esse apparet, non idem tamen prorsus est; spontaneum enim latius patet; nam & spontaneum cum pueris, cum reliquis animalibus commune est, electio minime; & quæ de im-*
provi-

(a) *Ethic, Nicom, Lib. 3. cap. 2.*

provisio fiunt, spontanea sunt, non autem ex electione.

V. Ac spontaneos quidem actus in nobis existere, eos nimirum, in quibus exerendis nulla prorsus extrinseca vis, aut interior voluntatis aversio, vel repugnantia reperitur, intimo sensu percipimus; ut proinde *libertas à coactione* à Philosophis omnibus in humanis Animis admittatur; idque ex innumeris actibus illis ostendi potest, qui necessario quidem, sed sponte tamen, in nobis producantur. Ita bonum non libere, sed sponte tamen amamus; apertis oculis necessario, simulque libenter, ac sponte intuemur; necessario quidem, sed tamen sponte respiramus &c. ut actus illos præteream, quos in pueris, in subitis casibus, ac inopinis sponte quidem, sed necessario, sine ulla cognitione, electione, vel indifferentia peragi Aristoteles ipse observavit. Longe gravior est difficultas, opinionumque varietas in explicanda, asserendaque ea libertate, quæ necessitatem omnem excludat; an scilicet hæc alia quoque purior, ac nobilior libertatis species in homine admitti debeat; siue potius in ipso prima solum libertatis species habeatur. Ac certe quidem plurimi sunt, qui humanos Animos occulta quadam, sed ineluctabili tamen vi inflecti, vel determinari putant ad operandum; ut, quamvis illi sponte, ac libenter actum aliquem exerant, ab illo tamen desistere, ac oppositum eligere non possint; neque ipsi sibi libere, ac indifferenter actum illum eligant; sed ipsum veluti ab alio sibi præscriptum exequantur; non ideo denique operentur quia operari voluerint, sed quia potius ipsorum voluntas ab extrinseca quadam, siue intrinseca vi, causa, aut principio inflectatur ad operandum, illaque, necessario, ac insuperabiliter ad actum.

actum illum feratur. Alii vero utramque potius libertatem in hominibus admittendam esse contendunt; ut proinde in singulis ipsorum actibus indifferens, ac libera prorsus voluntatis electio, vel determinatio præcedat, ac voluntas ipsa sic operetur, ut etiam non operari potuerit; ita actum aliquem exerat, ut oppositum quoque amplecti possit, si velit; ita denique suorum actuum domina sit, ut ipsos imperio, electione, arbitrioque suo eligere, respuere, revocare, inverti, suspendere perfecte possit.

VI. Atque, ut à prima Philosophorum sententia, sive ab argumentis illis exordiar, quibus hæc indifferens arbitrii libertas impugnari, ac inevitabilis quædam necessitas in humanis actibus induci solet, plurimi existimant libertatem illam ab humani cordis affectibus, & originali peccato; alii à sideribus, aut à Fato, alii ab invariabili Dei præscientia, alii denique à physica præviaque Dei motione, divinisque decretis violari putarunt.

Etenim plurimi perfectam illam arbitrii libertatem, qua humanus Animus ad alterutrum ex duobus objectis sibi propositis eligendum prorsus indifferens foret, adeoque libere aut bonum, aut malum amplecti posset, tunc solum in ipso futuram fuisse putant, cum adhuc innocens, perfectusque ille foret, adeoque purior, & princeps hominis pars sensibus omnibus, & affectibus imperaret. Ubi vero primi parentis peccato vehemens voluptatis ardor, concupiscentiæ fomes, errores, ægritudines, & affectus in humanis Animis excitati sunt, voluntas ipsa ad malum pronior, quam ad bonum esse cæpit, adeoque nunc ad malum ipsum tacito quodam pondere abripitur. Hinc Calvinus, Lutherus, alique plurimi libertatem ipsam

ipsam primi parentis peccato nobis ereptam, aut mire viciatam vulneratam, immo confectam, & extinctam (a) esse dixerunt; ut proinde nunc homines sponte quidem, sed necessario tamen, ad objecta ferantur, atque ingenuito voluptatis ardori resistere, vel repugnare non possint.

Assyrii vero, Chaldæi, alique plures, quibus præsertim hæc originis labes ignota fuit, arbitrii nostri vires ab occultis siderum influxibus violari, adeoque in humanis Animis inevitabilem quandam necessitatem induci putarunt. (b) Illi nimirum eventus omnes ab occulto quodam siderum influxu, & adspectu ita pendere opinantur, ut ipsi quoque humanæ voluntatis actus aliter contingere, sive produci non possint, quam ut varius ille siderum ordo, influxus, adspectus portenderat, sub quo hominum quilibet natus foret. Hinc Genethliaci, Chaldæi, Astrologi, vel Mathematici, cum ejusmodi siderum adspectus observassent, futuros hominis cujusque casus, omnemque actuum seriem prædicere se posse gloriabantur. Ita quoque futuros omnes singularum rerum eventus à Fato præscriptos, ac definitos esse plerique Veteres existimarunt; ac Fatum ipsam veluti supremum quoddam Numen hominibus, ac Diis ipsis imperans effinxere, quod futura quælibet invariabili, æternoque Decreto ita sanxisset, ut nemo prorsus Fatorum vim effugere, iisque adversari posset; sed hominum quilibet in exerendis actibus omnibus Fatorum ordinem sequi, ac necessario implere deberet.

VII. Hæc

(a) Calvin Instit. Lib. 2. cap. 2.

(b) Vid. Cic. de Fato cap. 5.

VII. Hæc tamen omnia facile profecto dirimi, siue refelli poterunt. Etenim, quamvis primi parentis peccato indifferens illa, æquabilis, perfecteque libera arbitrii vis, quæ homini concessa fuerat, prænior ad malum, quam ad bonum, evaserit; perspicuo tamen certoque sensu percipimus, ac experimur vim, potestatem, ac imperium illud adhuc in nobis existere, quo sensuum illecebris, corporeis motibus, & affectibus adversari possimus; cumque tacito corporeæ cupiditatis ardore ad objectum aliquod impellimur, eam tamen vim nobis inesse sentimus, qua objectum illud respuere, ipsique oppositum amplecti possimus. Itaque plena voluntatis libertas violata, ac vulnerata quidem, non vero prorsus erepta, vel extincta fuit; adeoque nunc etiam non sponte solum, sed etiam libere, cum volumus operamur.

Quod vero ad occultam siderum vim, ac influxum attinet, qui ab Assyriis, Astrologis, aliisque id genus hariolis effingebatur, jamdiu est quod impudens illa, ac levissima aruscatorum hominum opinio melioris Physices præsidio rejecta fuit: ut proinde argumenta, quæ adversus hominis libertatem ex variis siderum aspectibus afferebantur, contemni potius ac irrideri, quam serio graviterque refelli nunc debeant.

Ita quoque Fati natura, ejusque decretorum series, de qua Stoici præsertim subtiliter adeo disputarunt, una cum Ethnicæ Religionis erroribus obsolevit, puriorque rationis lumine facile innotuit. Fatum illud, quod à vero, supremoque Numine distinctum à Stoicis, aliisque pluribus effingebatur, imaginarium prorsus, ac inane nomen esse oportere; quemadmodum sane Seneca, (a) quam-

(a) *Nat. Quæst. Lib. 2. cap. 45.*

quamvis Stoicæ doctrinæ assertor, *Fati* nomine nihil aliud intelligi posse putavit, quam *Deum*, qui futuris omnibus legem præscripserit, hæc futura potius, quam non futura, decreverit; adeoque eventus omnes, & singulos humanæ voluntatis actus invariabili decreto, atque immutabili serie constituerit.

VIII. Itaque id unum supererit, ut libertas ipsa, ac indifferens agendi vis à divina solum præscientia, divinisque decretis impediri, violari, vel extingui posse dicatur. Etenim Deus quidquid in creâs causis omnibus erat futurum, perspicue, certoque cognovit; futuros omnes humanæ voluntatis actus perspicue prævidit; atque ejusmodi Dei præscientia decipi fallique non potest, nihilque prorsus alia ratione contingere, vel produci potest, quam ut à Deo prævisum fuerat. Ita quoque constitui supponique debet, quod Deus ab æterno futuros effectus omnes, aut casus invariabili decreto sancivit; nihilque prorsus alia ratione fieri, contingere, vel esse potest, quam ut ab ipso Deo decretum, vel invariabili decretorum serie constitutum fuerit. Ergo, inquit aut *Fati*, aut *Necessitatis* assertores, si illud unum ab hominibus eligi, sive produci debet, quod ab æterno invariabili Dei cognitione prævisum, ac immutabili Dei decreto constitutum fuit, ac humana voluntas aliquid eligendo ab ejusmodi Dei præscientia, decretisque desistere, vel dissentiri non potest, qui fieri, salvari, vel explicari unquam poterit quod humanus Animus adhuc indifferens, necessitatis expertus, ac liber sit, ac voluntas ipsa operari vel non operari possit, hoc est actum illū exercere, vel non exercere, quem Deus ab illa producendum esse jam viderat, certoque decreverat? Itaque

que certissima Dei præscientia, ac immutabilis ipsius decretorum series cum humanorum actuum contingentia, humanæque voluntatis arbitrio, indifferentia, libertate componi non poterit; cumque scientia illa, ac decreta certissime admitti debeant, indifferens illa arbitrii libertas intelligi, vel explicari non poterit; adeoque in humanis Animis ea solum libertas supererit, qua sponte, libenterque divinæ voluntatis impulsu sequantur, ac tacito quidem & occulto, sed insuperabili tamen pondere ac motu quidquid à Deo prævisum ac decretum fuerit, exequantur. Ejusmodi verò argumenti vis, quæ maxima certe esse debet, ab Ethnicis quoque Philosophis observata fuit; ut proinde Cicero, * cum humanos Animos intelligeret liberos esse oportere, divinam præscientiam, ac Fati decreta negaverit; alii verò, cum divinam præscientiam, supremique Numinis decreta negari non posse censerent, ** humanæ libertatis arbitrium sustulere; quod nimirum utrique præscientiam, ac decretum illud cum humana libertate componi, certoque fœdere conjungi non posse putarent.

IX. Ac facile quidem ejus argumenti robur eludi, vel infringi posset, optimeque humana libertas cum divinâ præscientia, ac voluntate componi, si decreta ipsa, ac præ-

scien-

* Ne in Deum quidem cadere videtur ut sciat quid casu, & fortuito futurum sit. Si enim scit, certe illud eveniet. Sin certe eveniet, nulla fortuna est. Est autem fortuna, rerum igitur fortuitarum nulla est præsentio. Cic. de divinatione cap. 18.

** Confiteri esse Deum, & negare præscium futurorum apertissima infania est. S. Aug. de Civit. Dei Lib. 5. cap. 9.

scientia ex humanis actibus libere futuris ; hoc est ex ipsa hominis voluntate penderet, ut aliqui existimarunt. Siquidem opinantur illi quod Deus ab æterno nitida, ac infinita comprehensione sua exploravit quid hominum quilibet solis arbitrii sui viribus in singulis rerum, temporum, locorum circumstantiis esset factururus; cumque in ipsis hominum voluntatibus, veluti liberis causis, actus omnes ab illis libere producendos prævidisset, hac ipsa prævisione, vel scientia duce eosdem illos actus à singulis hominibus producendos invariabili decreto suo sancivit, quos libere ab iis producendos esse jam noverat. Itaque, licet Dei cognitio falli, ejusque decreta variari non possint, nihil tamen libertati nostræ illa detrahunt, cum illud idem à Deo veluti futurum decernatur, quod ex libera hominis voluntate futurum esse præviderat.

X. Sed hypothesis illa, sive concordia species rationis lumini, creatæ voluntatis indoli repugnat, divinæque potentia, dignitati, supremoque imperio plurimum detrahit. Etenim, ut opportunius in *Physica* demonstratur, creata causa, quæcumque illa sit, quamvis agendi vim à Deo receperit, eam tamen exerere, vel actu operari non poterit, nisi prius ab ipso Deo, veluti prima, supremaque causa applicetur, moveatur, ac determinetur ad operandum; * adeoque ipsa quoque voluntas, quamvis arbitrio, liber-

* Certum est nos velle cum volumus; sed Deus facit ut velimus bonum. Certum est nos *facere* cum facimus; sed ille facit, ut faciamus præbendo vires efficacissimas voluntati, *S. Aug. de Grat. & lib. arb.* 32. al. cap. 16.

libertate, eligendi viribus prædita fuerit, actu operari, aliquid eligere, seque ad obiectum aliquod inflectere, vel determinare non potest, nisi prius ab ipso Deo prævia, physicaque motione determinata fuerit ad operandum; alioquin, si voluntatis electio, ac determinatio à voluntate sola, non autem à Deo oriretur, admitti deberet ens aliquod, quod à Deo productum non foret; ac voluntas ipsa sive voluntatis arbitrium, quod prius indifferens erat, si independenter à Dei motione se ipsum inflecteret, ac determinaret ad operandum, seipsum nobilius, ac perfectius efficeret, quam ut à Deo creatum fuerat. Itaque tantum abest ut Deus ab æterno explorare, vel prævidere potuerit quid singulæ hominum voluntates solis arbitrii viribus essent facturæ, ut nitide potius, certoque cognoverit quod ipsæ indole naturæque suæ prorsus inertes, ac indifferentes esse debebant, nihilque prorsus ab iis produci poterat, nisi prius indifferens ipsarum potentia prævio quodam veroque influxu divino determinatæ fuissent ad operandum. * Certe infinitum illud imperium, supremumque jus, quod Deus in quodlibet entis genus, adeoque in ipsas etiam hominum voluntates, earumque actus habere debet, non patitur ut actus aliquis independenter à Deo futurus admittatur; tantumque abest ut Deus ens aliquod futurum potius, quam non fu-

* Ut ergo velimus sine nobis operatur Deus; cum autem volumus, & sic volumus, ut faciamus, nobiscum cooperatur: tamen sine illo vel operante ut velimus, vel cooperante cum volumus ad bona pietatis opera nihil valeamus. *S. Aug. de Grat. & lib. arb. n. 33.*

turum, præviderit; aut decreverit ex eo quod illud independenter à Dei motione, & decreto foret futurum, ut potius ens quodlibet ideo solum futurum concipi debeat, quia Deus ipse illud futurum esse decrevit, atque in decreto ipso ipsam veluti futurum agnovit. * Hinc de supremi Numinis potestate, ac imperio longe nobilius Ethnici sapientes illi senserunt, qui res omnes ideo futuras putarunt quod ab illo decretæ libereque constitutæ forent: quamvis ii perperam aut libertatem sustulerint, aut ipsam inepta prorsus ratione cum Fato, divinisque decretis componere tentaverint.

XI. Exinde verò dissidentes illæ tum veterum tum recentiorum quoque Philosophorum opiniones, aut errores manarunt quod ejusmodi concordia genus, quod inter humanæ voluntatis arbitrium, divinamque præscientiam admitti debet, ab hominibus inquiri, percipi, vel explicari posse putaverint; adeoque plurimi hypotheses illas temere excogitarunt, quæ ad alterutrum extremum vergerent, ideoque aut humanæ libertati, aut divinæ potentia detraxerent, aut certe detrudere viderentur. Illud unum hic à Philosophis ingenue, accurateque inquirendum fuerat an indifferens arbitrii vis in humanis reperiatur, an invariabilis futurorum omnium præscientia, immutabilis decretorum series in Deo admittenda sit, quæ res omnes potius futuras, quam non futuras efficiat; deinde vero, cum utroque admit-

ten-

* Universas creaturas spirituales, & corporales, non quia sunt futuræ, ideo novit Deus; sed ideo sunt futuræ, quia novit. *S. Aug. de Trinit. Lib. 4. c. 22. al. c. 13.*

tendum esse perspicuis, certisque rationibus explorassent, utrumque rite componi possit fateri tenebantur; non vero modum, leges, aut fœdera inquirere, quibus ejusmodi concordia peragi, salvari, exponique posset. Cum enim fœdus illud ex infinita Dei potentia, sapientia, agendique vi, ex innato, atque admirabili operandi modo oriatur, quo Deus in creatis rebus omnibus uti potest, admirabilis ille agendi modus tenues humanæ Mentis vires excedit, adeoque nitide à nobis percipi, vel explicari non potest. Quemadmodum ergo in plurimis rebus aliis, atque in ipso quoque Corporis, Animique fœdere explicando ingenuè fateri cogimur, plurima à Deo fieri posse, quæ nos investigare, vel explicare certe non possumus, atque in iis certitudinem solum, non perspicuitatem inquirimus, ita quoque cum de admirabili Dei præscientia, decretis, imperio, ac potestate differimus, solam certitudinem inquirere debemus, perspicuis nempe rationibus assentiri, quibus indifferens illud arbitrii genus in nobis existere sentimus; quamvis occultum prorsus, & arcanum sit quo fœdere, quibusque legibus arbitrium illud cum divina præscientia, divinisque decretis conjungatur.

XII. Ejusmodi vero flexibilem arbitrii vim, adeoque perfectam illam indifferentiæ libertatem in nobis existere non aliunde melius, quam ex conscientia, experimento intimoque sensu ostendi potest. Etenim nostrum quilibet, si voluntatis indolem, ejusque vires, & actus consideret, perspicuo sane ac vivido sensu percipiet se in exerendis illis plane liberum, ac indifferentem esse, ut objectum aliquod eligat, quod averfari etiam poterat; ita operetur, ut etiam non operari potuerit; ita seipsum determinet, perinde
Corsini Metaphys. H. quasi

quasi nulla Dei præscientia, nulla Dei motio, nullumque decretum præcessisset. Ergo, licet perspicue certoque intelligat se nihil omnino eligere, cupere, operari posse, quod invariabili Dei decreto sancitum, ac prædefinitum non fuerit, nihilque profus operari se posse, quod ejusmodi decretis adversetur; perspicue tamen certoque uno eodemque tempore intelligit, sentit, ac experitur præscientiam illam, ac decretorum seriem libertati, arbitrioque suo nihil detrahere, seque in ipsis etiam divinæ voluntatis decretis exquendis, sub ipsis etiam divinæ motionis, ac potentiæ viribus adhuc indifferentem, actus sui dominum, ac liberum esse oportere.

XIII. Hæc ipsa quoque propriæ libertatis persuasio, intimusque sensus, quod, suppositis etiam divinis decretis, nos adhuc liberos, ac indifferentes esse percipimus, adeoque singula arbitrii, liberæque voluntatis nostræ viribus futura potius, quam non futura, intelligimus, ex innumeris actibus illis apparet, quos certe exerere nunquam vellemus, nisi earum quoque rerum exitum, quæ à Deo decreta, ac præcisa fuerant, à nobis pendere, sive in imperio, ac potestate nostra collocatum esse putaremus. Ita navita, qui fluctibus ac tempestate jactatur, quamvis à Deo sancitum esse arbitretur ut ipse aut fluctibus absorberi, aut incolumis portum subire debeat, remis tamen ac velis utitur, perinde quasi nihil à Deo de salute, vel interitu suo decretum fuisset. Itaque, si ii quoque qui Fatum, divinam præscientiam, divinumque decretum admittunt, tacito quodam, ac perenni naturæ ductu, rationisque lumine impelluntur, ut ipsi quoque suos actus exerant, ex pluribus objectis unum potius, quam aliud eligant, futuros rerum

exitus liberos, ac in arbitrii potestate positos arbitrentur, quis aperte non videat arbitrii nostri cognitionem, sensum, persuasionem nobis ingentem esse; neque innatam hanc, vividamque libertatis ideam in nobis extinguere posse?

XIV. Ex hac ipsa libertatis idea, intimoque sensu, aut persuasione, quæ singulis hominum mentibus impressa fuit, tum divinarum, tum humanarum legum æquitas, & obligandi vis veluti fonte dimanat. Etenim, nisi in hominibus ipsis ea libertatis species, & arbitrii vis existeret, quæ necessitatem omnem excluderet, ipsique non libere, sed necessario suos actus exercent, prorsus iniquum fuisset determinatos quosdam actus ipsis præscribere; longeque iniquius foret pœnas ab iis exigere, qui actus illos elicere neglexissent. Ille nimirum, qui legem violasset, aut actum aliquem ipsi contrarium produxisset, facile aut homini aut Deo vindicti, acultori reponere profecto posset se actum illum non libere, sed necessario potius produxisse; invariabili nempe Dei decreto sanctum fuisse ut hunc potius, quam actum alium, eligeret, sibi que libertatem, indifferentiam, ac potestatem illam ademptam fuisse, quæ quodpiam divino decreto contrarium efficere posset. Quod si hoc immane injustitiæ, ac tyrannidis genus in Legumlatoribus, præsertim vero in optimo, æquissimo, amantissimo, sapientissimoque Deo sine summo scelere fingi non potest, necessario dicendum erit quod cum invariabili divina præscientia, cum immutabili divino decreto flexibilis arbitrii vis, indifferens ac libera hominis voluntas componi potest; quamvis ejusmodi concordie modus ab intellectu nostro percipi, comprehendique non possit.

XV. Denique libertas ipsa, ac indifferens agendi, vel non agendi potentia alia quoque ratione ostendi poterit, simulque causa demonstrari, ex qua veluti fonte in nobis oriatur. Itaque libertas illa, ac indifferens eligendi vel non eligendi vis partim quidem ab *intellectu*, partim vero à *voluntate* repeti, sive pendere debet. Etenim intellectus, ut experimento ipso perspicue apparet, non semper unum idemque objectum percipit, aut unum idemque objectum semper uno eodemque modo voluntati proponit; verum potius ex unius objecti cognitione ad objectum aliud digreditur, atque unum idemque objectum aliquando quidem ut bonum, utile, conveniens, aliquando vero ut malum, inutile, ac repugnans apprehendit. Itaque, si voluntas intellectum veluti ducem sequi, ejusque cognitione in suis actibus exerendis dirigatur, tanta vero ac infinita fere varietas in intellectus cognitione reperitur, dubitari certe non poterit quin maxima quoque, ac infinita affectuum, ac *volitionum* series in voluntate esse debeat; ideoque prima libertatis causa & origo ex ipsa intellectus cognitione deduci possit. Altera vero libertatis causa ex ipsa voluntatis indole deduci debet. Siquidem voluntas indole naturaque sua non ad unicum, & peculiare, quoddam bonum, sed ad omnia potius ac infinita bona dirigitur, cum ens quodlibet bonum, perfectum, adeoque amabile esse possit, ut alibi jam demonstravimus. Ergo voluntaris cupiditas, amor, potentia, capacitas, & amandi vis propemodum infinita à nullo finito, peculiari, creatoque bono perfici, expleri, satiarique potest; ideoque, si voluntas in objectum aliquod inclinet, ejusque bonitate vel amabilitate ducatur, interim tamen dum illud diligit ad objectum aliud con-

converti, ipsius bonitate, ac amabilitate trahi poterit; ita demum actu aliquem eliger, ut oppositum quoque amplecti possit, si velit.

XVI. Quandoquidem ergo voluntas ita libera, vel indifferens esse debet, ut non modo actum aliquam eligere, vel non eligere, verum etiam aut actum ipsum, aut ipsius oppositum amplecti possit, libertas ipsa ita distingui solet, ut alia quidem *contradictionis*, alia vero *contrarietatis* dicatur. Libertas contradictionis vocatur illa, qua voluntas ad alterutrum ex duobus contradictoriis dirigitur ut alterutrum ex illis eligat, adeoque *operetur*, vel *non operetur*. Libertas vero contrarietatis dicitur illa, qua voluntas ad alterutrum ex duobus objectis invicem contrariis, hoc est ad *bonum*, aut ad *malum* dirigi, & inflecti potest. Utramque libertatem in nobis existere superius demonstravimus; & quamvis ad *essentiam* humanæ libertatis hæc ultima ipsius species necessario non requiratur; in hac ipsa tamen hominum conditione, vel statu libertas etiam contrarietatis admitti debet, ut fusc, accurateque à Theologis demonstratur; quemadmodum prorsus ab iis contra Jansenium, aliosque plures ostenditur *meritum*, aut *demeritum*, quod humanis actibus inesse possit, ex *indifferencia* perfectaue libertate oriri debere, quæ necessitatem omnem excludat, ideoque interdum quidem ad contraria, interdum vero ad contradictoria objecta converti possit. Quamvis autem Deus perfectissima, ac infinita libertate præditus sit, ut suo loco mox ostendetur; sola tamen libertas *contradictionis* in illo admitti potest; cum bonum quidem agere, aut non agere, nunquam vero malum eligere, vel operari ille possit.

XVII. Quemadmodum vero intellectus suas affectiones, habitusque suos ex iteratis actibus acquirit, ita quoque voluntas ipsa suis habitibus, affectionibus, aut qualitatibus exornatur, quæ cum ex bonis, aut malis actibus oriuntur, ad bonos vel malos actus iterum producendos inclinent, adeoque mores respiciant, *morales Habitus* appellantur. Ejusmodi certe sunt *Virtutes* omnes, *Vitia*, & *Affectus*; sed ita tamen ut virtutes ipsæ semper bonæ sint, ex bonis actibus oriuntur, atque ad honestos actus semper inclinent; vitia vero tum prava in se sint, tum ex pravis actibus acquisita ad pravos etiam, ac inhonestos actus iterum producendos impellant. Quod enim ad Affectus ipsos, aut Animi motus, & ægritudines attingit, indole naturaque sua neque boni, neque pravi sunt, sed prorsus indifferentes ut ad bonum, aut ad malum dirigi, adeoque in virtutes, aut vitia converti possint. Itaque Stoicorum opinio, qui Affectus omnes suapte natura pravos, adeoque ex humanis Animis extirpandos esse putabant, longe severior censeri debet, quam ut hominibus proponi possit; cum præsertim virtutes ipsæ ex temperatis Animi motibus, sive Affectibus rite compositis oriuntur, ut post Aristotelem (a) fuse, & elegantissime Cicero (b) demonstravit. Sed hæc, aliaque id genus, quæ ad morales Animi perfectiones, habitusque pertinent, in Ethicæ demonstrantur; quemadmodum in Physicis ostendi solet, quæ lege, quibusque viribus Affectus ipsi ex varia humani corporis indole, ac dispositione

(a) *Moral. Nicom. Lib. 2. cap. 4.*

(b) *Tuscul. Lib. 4. cap. 20.*

ſione, externorum corporum actione, viviori ſanguinis, ac ſpiritus animalium motu in nobis excitari, ſoverique conſueverint; ut proinde ſubtilior, & accurata Affectuum, virtutum, ac vitiorum cognitio partim ex Phyſicis, partim ex Ethicis, partis etiam ex Metaphyſicis reperenda merito videatur.

C A P U T VI.

De Corporis, Animique unionē, ipſorumque commercio.

QUAMVIS Animi noſtri, humanæque Mentis natura, vires, affectiones, ac operandi modus æge a nobis intelligi, vel explicari poſſit; atque, ut præclare dicebat Cicero, (a) illud maximum ſit Animo ipſo Animum videre, naturam tamen ejusdem Animi intuenti multo difficilior occurrit cogitatio, multoque obſcurior, qualis Animus in Corpore ſit tanquam alienæ domi, quam qualis cum exierit; quemadmodum Auguſtinus ait quod modus, quo Corporibus adhaerens Spiritus, & animalia ſunt, omnino mirus eſt, nec comprehendere ab homine poteſt. Ac certe quidem, ſi Animus ipſe veluti ſejunctus à Corpore concipiatur, ejusque vires, & affectiones omnes accurate explorentur, facile profeſſo intelligi, oſtendique poteſt ipſius ſubſtantiam incorpoream, ac immortalẽ eſſe oportere; ipſum duabus agendi viribus prædictum eſſe, ut altera quidem ad verum, altera vero ad bonum veluti objectum.

(a) Tuſc. Lib. 1. cap. 22.

Etum dirigatur; ex ipsarum una plurima cognitionum genera, ex altera libera ac indifferentes voluntatis actus oriantur, ut superioribus Capitibus demonstravimus. Sin vero Animus ipse veluti Corpori conjunctus concipiatur, quis nitide certoque intelligat qua lege, quo fœdere, quibusve nexibus incorporea, ac immortalis Animi substantia materiali, & mortali Corpori jungatur, à corporeis sensibus, & affectionibus ita pendere debeat, ut nihil propemodum independentem ab illis operari possit; in quam Corporis parte veluti sede reperiatur; quadenique ratione non incorporeos solum actus Deo, & Angelis communes, verum etiam plurimos actus alios producere videatur, qui corpori ac Plantis etiam, & Brutis communes censentur. Itaque hæc omnia meliori quo poterit ordine nunc ostendemus, ut illustriores tum veterum, tum recentiorum quoque Philosophorum sententiæ proponantur, ac ipsarum aliqua, si fieri id quidem poterit, quæ clarior, & accuratior fuerit, eligatur.

II. Atque illud in ipso veluti limine tanquam certum constituit nunc debet, quod humanus Animus, sive ut frequentius appellatur, *Anima rationalis*, est intrinsecum, ac substantiale principium, quo homo intrinsece perficitur, ut ab illo novum esse substantiale recipiat; & à ceteris animantibus, ac rebus omnibus essentia, substantiaque sua distinguatur; quemadmodum sane in Vienne[n]si, ac Lateranen[si] Concilio definitum fuit Animam rationalem esse *formam substantialem* hominis contra Philosophos illos, qui ipsam nihil aliud esse putarunt, quam principium, ac substantiam quandam, quæ Corpori solum adesset, ipsi fortuito ac veluti extrinsece conjungeretur, eodemque prorsus modo.

modo Corpus afficeret, moveret, moderaretur, quo navita navim impellit, ac humanum Corpus ab Angelo, vel ab alio corpore impelleretur. Ejusmodi vero sententiam non modo divinæ fidei lumini, sed perspicuis quoque certisque rationibus adversari inferius opportune ostendetur ubi de Cartesii, Leibnitii, aliorumque opinionibus agendum erit. Itaque dubitari sane non poterit quin Anima rationalis intrinseca, & essentialis quædam perfectio, substantia, sive principium sit, quod hominem ipsum constituit, ut proinde *substantialis* ipsius forma, intrinsecus ejusdem actus haberi illa debeat.

III. Exinde vera Peripatetici veluti nitido, certoque argumento deduci posse arbitrantur quod Animi nostri substantia, quamvis incorporea, inextensa, partium expers, ac indivisibilis sit, in singulis tamen corporis partibus reperitur, adeoque per totum Corpus admirabili quadam, ac peculiari ratione diffundatur; non ita quidem ut aliqua Animi pars in aliqua Corporis parte, tandemque tota Animi substantia in toto Corpore reperitur; sed ita potius ut integra, ac tota Animi substantia in toto Corpore, simulque eadem integra, ac tota in quolibet vel exigua Corporis parte esse debeat; ea tamen lege, ut non æqualiter ipsarum singulas *informet*, actuet, perficiat, eodemque modo in ipsarum singulis operetur; sed in aliquibus *vegetativæ*, in aliis *sensitivæ* Animæ vires exercent; & quamvis unica, simplex, ac indivisibilis illa sit, eadem tamen munera, & actus omnes in humano corpore præstare possit, qui in Plantis, ac Brutis à Vegetativa, vel Sensitiva Anima peraguntur: perinde quasi tres Animæ invicem distinctæ in humano Corpore reperirentur;

quemadmodum sane à pluribus Peripateticis aliis hæc Animarum varietas, atque distinctio admitti solet, ut proinde homines *Vegetativa*, *Sensitiva*, & *Rationali* Anima præditi sint, earumque viribus ac præsidio tria operationum genera producere illi possint. Quandoquidem vero triplex illa Animarum varietas Animi dignitati detrahere existimatur, longeque verisimilius censeri solet quod purior, sublimior, ac perfectior Animi substantia inferiorum Animarum vires, & facultates omnes *virtualiter*, ac *eminenter* in se complectatur, ideoque simplex Animi substantia aliarum vices implere, actusque singulos exerere subinde possit, plerique sane Peripateti, Aristotele duce, unicam rationalem Animam in humano corpore admittunt, adeoque ipsam, formæ substantialis instar in toto Corpore diffusam esse contendunt.

IV. Ac certe quidem quod Animus in singulis humani Corporis partibus adesse, adeoque singulas partes pervadere, illas intime perficere debeat, ex variis ipsius operationibus inferri posse arbitrantur. Etenim, inquit illi, in singulis extremis etiam Corporis partibus nutritio, ac vegetatio reperitur, in omnibus fere perceptio, ac sensatio peragitur; ut cum manus igni admovetur, ipsoque adurit, caloris sensatio, ac doloris perceptio in ipsa manu sentitur. Itaque si operationes illæ ab Animo veluti fonte oriuntur, ac operationes ipsæ non alibi, quam in variis, externis etiam Corporis humani partibus peraguntur, dubitari plane non poterit quin Animi substantia partibus ipsis inesse, eas pervadere, totique Corpori coextensa esse debeat. Accedit etiam quod *formæ substantiales*, adeoque *primi*, & *substantialis actus*, quicumque illi sint, materiam suam

suam perficere debent, nihilque prorsus in materia, cui substantialis illa forma intrinsece conjuncta fuerit, produci potest, quod à forma substantiali non oriatur, ac vicissim in formam ipsam influere, ac manare non debeat. Ergo humanus Animus aliarum formarum substantialium instar materiam suam, humanum nempe Corpus, afficere, in ipsum agere, ac influere poterit; adeoque vicissim à materie Corporisque motibus affici, miraque lege percelli poterit. Itaque mutua illa Corporis, Animique connexio, simulque mutua operationum dependentia ex ipsa *formæ substantialis* idea, ac natura deduci debet; ideoque, cum humanus Animus ejusmodi formæ substantialis indole, natura, charactere præditus sit, exinde facile Corporis, Animique connexio repeti, intelligi, exponique poterit.

V. Quamvis tamen hæc maximam veri speciem præferre videantur, adeoque celebris illa Peripateticorum opinio sacris Theologiæ dogmatis, experimento, perspicuis rationibus inniti censeatur; nulla tamen auctoritas, aut certa ratio proferri unquam poterit, quæ hæc Animi diffusio, vel extensio demonstraret. Etenim utut humanus Animus *substantialis hominis forma* dicatur, quod in Viennensi, ac Lateranensi Concilio definitum fuit, non certe requiritur ut illa corporearum formarum instar singulis materiæ suæ, Corporisque partibus inesse debeat, ac operationes omnes, quæ in homine producantur, ab illa solum velut unico, communique principio oriantur; alioquin illorum opinio, qui simul in homine *formam corporeitatis*, aut *vegetativam* insuper, ac *Sensitivam* Animam admittunt, hæretica divinæque doctrinæ contraria censenda foret, quod nemo profecto dixerit; sed illud unum requiritur, ut

humanus Animus veluti intrinseca, essentialis, substantialis hominis pars in ipso reperitur, ipsi novum, verum, intrinsecum, substantialem actum, perfectionem, aut esse concedat, quod à principiis, actibus, formis, ac perfectionibus aliis oriri non possit. Id vero facile intelligi, optimeque salvari poterit, quamvis etiam vegetatio non ab Animo, sed aut ab Anima vegetativa, aut potius à sola partium textura, corporisque *organizatione* oriatur; ut quemadmodum nempe in Plantis ipsis nutritio, vegetatio, ceteraque operationes omnes sine ulla prorsus Anima ex solo partium ordine, humorum varietate, fibrarum textura, ceterisque corporeis affectionibus oriuntur, ita quoque in humano Corpore non ab Animo, sed ab ipsa Corporis indole producantur. Quod vero ad sensationes attinet, illæ quoque non ab incorporea Animæ nostræ substantia, sed ab Anima sensitiva, quæ ab Animo distincta sit, ut Peripateticis pluribus placuit, oriri possunt. Sed, quamvis etiam ab Animo solum, veluti fonte ac principio producantur, quod Animæ sensitivæ vires, ac muneræ in hominibus peragat, non inde tamen inferri poterit quod illæ in singulas Corporis partes diffundatur: cum sensationes ipsæ in externis quidem Corporis partibus incipere debeant, ubi nervorum fibræ, spiritusque animales nervis inclusi percipiunt, moveri, certaque vibratione percipi ad cerebrum, si-ve nervorum originem, urgeri debent; sed in solo tamen cerebro perfici possunt, ubi Animus externorum corporum actionem, nervorumque motum percipit, ac in illo ex initiata jam consuetudine, & experimento, sensationem, affectionemque suam impressam percipit; ut opportunius in Physica demonstratur. Ergo, licet nutritio, ac sensatio non ab

Ani-

Anima, sed à principiis aliis oriri dicatur, semper tamen Animus ipse *substantialis hominis forma* vocari, censerique poterit, cum ab illo solum *volitio*, *cognitio*, ceteraque cogitationum species, quæ hominis propria, ac peculiare sunt, oriantur, adeoque novum, ac substantiale quoddam esse homini concedat, quod à formis, ac principiis aliis oriri non potest. Et quamvis etiam non modo *cogitatio*, sed ipsa quoque *sensatio* ab Animi substantia oriri dicatur, cum sensationes omnes non in externis Corporis partibus, sed in solo cerebro peragantur, nihil est certe cur Animi substantia per totum Corpus diffusa censeatur, idque ex sacris illis Conciliorum decretis perspicue traditum temere existimetur.

VI. Itaque plerumque tum ex veteribus, tum recentioribus præsertim Philosophis Animum in aliqua solum Corporis parte collocatum esse putarunt, ac ipsorum plerique in eo consensere, ut principem Animæ partem, hoc est Animum ipsum, in solo cerebro veluti sede positum existimarent; (a) ut quemadmodum nempe in illo nervorum omnium origines reperiuntur, & affectiones omnes, ac vibrationes spiritibus animalibus impressæ ad cerebrum deferuntur, ita quoque verisimilius in cerebro veluti sede, Animus constitui debeat.

Quæcumque tamen Corporis pars Animo veluti sedes tribuatur, & quamvis etiam ipsius substantia admirabili quadam lege per universam corporis compagem extensa supponatur, semper tamen obscurum, mentibus

que

(a) Vid. Plutar. de Plac. Phil. lib. 4. cap. 3.

que nostris impervium supererit quâ ratione Animus ipse humanum corpus fovere, impellere, moderari, in ipsum influere, variolque motus libere ac repente producere in illo possit: sicuti vicissim Corpus ipsum in Animi substantiam agere, motusque suos, & affectiones ad incorpoream ulque Animi substantiam propagare, ut mutua quâdam operationum connexio, dependentia, societas, & commercium habeatur.

VII. Cartesius, alique plurimi, qui ipsius vestigiis insistere, mutuam hanc Corporis, Animique dependentiam à solo Deo veluti efficiente causa repetendam esse arbitrantur; ut proinde Corporis, Animique motus *occasionales* solum causæ censeri debeant, quibus positis Deus ipse admirabili quadam constantique lege motus aliquos, aut affectiones inter se similes, sibi que convenientes in Animo, vel Corpore producat. Itaque existimant quod ubi corporeus quidam motus in corpore producat, ipsius occasione Deus ipse incorporeum quendam motum, & affectionem corporeo huic motui similem, consonam, aut respondentem exciter in Animo; si uti vicissim ubi incorporeus quidam motus, affectio, cogitatio excitatur in Animo, Deus ipse occasione illius incorporei motus corporeum motum, & affectionem illi respondentem, illi nimirum juxta leges ac fœdera à Deo constituta convenientem, in Corpore producat; quo plane fieret ut neque Corpus in Animum, neque vicissim Animus in Corpus agere, ac influere unquam possit; sed corporei motus in solo Corpore, incorporei vicissim in solo Animo remaneant; ac Deus ipse efficiens motuum illorum causa censendus sit, qui tum in Animo, tum in Corpore producantur.

VIII. Hæc tamen hypothesis, vel ut à
Car-

Cartesianis appellatur, *Causarum occasionalium Systema*, quamvis elegans, & explicanda Corporis Animique connexioni mire accommodatum videatur; fortasse tamen liberius, Animique viribus, ac dignitati contrarium censeretur poterit. Etenim, licet Cartesianis ipsis facile concedatur quod humanum corpus in Animi substantiam physice, vereque influere non possit, ac spirituum animalium motus, seu vibrationes illæ, quæ in spiritibus ipsis, nervorum fibris, sensuum organis, ac cerebro peraguntur, Animum percellere, afficere, commovere nequeant; ideoque Corpus non *efficientis*, sed *occasionalis* solum motuum illorum causa esse debeat, qui in Animo excitantur, quis tamen nitide certoque nobis ostendat quod incorporei quoque Animi motus ad Corpus ipsum diffundi, ipsumque afficere, ac movere non possint? Certe Dei substantia, quamvis incorporea, simplex, atque à materia vel corporis indole mire distincta, secreta, ac diversa sit, cum tamen ille infinita agendi vi præditus sit, corpus creare, disponere, & quo libuerit impellere profecto potest. Quid ergo prohibet ne Deus creatis etiam Spiritibus, Animisque nostris, quos regendo Corpori destinavit, tum nobilioribus aliis agendi viribus eam quoque concesserit ut Corpus ipsum movere possent; ideoque voluntatis actus, qui in Animo excitentur, in Corpus ipsum non corporeo quidem, sed physico tamen, veroque influxu agere, adeoque corporeum motum incorporeo voluntatis actu consonum producerent? Id ipsa fere Corporis Animique conjunctio postulare videtur; ut, si Corpus ipsum vehiri inferior hominis, sive compositi physici pars, cui rudiores solum agendi vires, sive potius sola perpassionis, recipiendique motus capacitas

com-

concessa fuit, in nobiliorem partem aliam agere, ac influere non potest, nobilior tamen pars alia, nimirum Animus in Corpus sibi conjunctum physico, veroque influxu operatur; alioquin nobilior illa, ac vividior Animæ substantia nihil à Corpore hac in parte, vel agendi modo distingueretur. Itaque quoque jus, ac imperium illud, quod Animo in Corpus concessum fuit, ut ipsum regere, ac moderari dicatur, vix ac ne vix quidem intelligi, & explicari poterit, si Corpus ipsum ab Animo non veluti efficiente, sed occasionali solum causa moveretur: Corporisque motus non ab Animo, sed à Deo producerentur. Accedit etiam quod ubi incorporea quædam affectio, aut voluntatis actus in Animo excitatus fuerit, corporeus motus illi consonus aliquando facilius, difficilius aliquando in Corpore excitari conspicitur: quod optime profecto intelligi, & explicari poterit, si motus ille ab Animo veluti efficiente causa repetatur, quæ modo vividius, modo languidius in Corpore operari, ejusque resistantiam modo celerius, modo lentius superare possit: vix autem concipi, vel explicari poterit, si motus ille à Deo veluti effectrice causa produci dicatur, qui ea lege, pacto, seu fœdere Corpus Animumque conjunxerit, ut ipse solum divina vi suæ motum illum in Corpore produceret, quem Animus in Corpore produci cuperet. Ergo lex illa, fœdus, aut pactum, quod à Cartesianis effingitur, admitti non potest; atque ubi fœderis, & pacti leges violari videntur, tunc efficiens actuum illorum causa non Deus, sed humanus Animus esse deberet; aut certe Cartesianis ipsis explicandum foret cur Deus incorporei cujusdam motus occasione aliquando quidem similem, aliquando vero dissimilem corporeum actum in-

cor-

corpore excitaret, quod ab iis intelligi, vel explicari certe non poterit.

IX. Hæc, aliaque id genus incommoda, & absurda plurima, quæ in Cartesii, aliorumque hypothefi reperiuntur, superiori seculo, nostraque fere ætate Leibnitium impulere, ut hypothefin aliam proponeret, quæ tum elegantia sua, tum Auctoris nomine plerosque abripuit ut illam amplecti, novisque rationibus asserere niterentur. (a) Itaque Leibnitius observavit quod humanus Animus, quamvis arbitrii vi, ac libertate præditus existimetur, in singulis tamen actibus eliciendis semper aliqua *sufficienti ratione* percelli, moveri, determinari debet ad operandum, ut nimirum hunc potius, quam actum alium eligat, ad hoc potius, quam objectum aliud inclinet; adeoque, si plures ac distincti quidam actus, plura, ac diversa quædam objecta proponantur, semper & actum illum, & objectum eligit, in quo maiorem quandam rationem, ac motivum reperit, ut circumstantiis omnibus rite exploratis alteri objecto præferri mereatur, aliòque postposito, vel omisso eligatur. Quandoquidem ergo Deus ab æterno humanos quosdam Animos creare decrevit, quibus incorporeas rerum ideas, intelligendum, voluntatem, eamque facultatem concederet, quæ pro varia rationis sufficientis indole varios actus efficere, variisque modis se inflectere, ac determinare possent, Deus ipse ab æterno circumstantias omnes, ideas, & objecta, quæ singulis Animis proponi poterant, nitide cognovit, adeoque singulas

(a) *Vof. Rffchol. ration. Sect. 3.*

ejusmodi rationes *sufficientes* in Animo futu-
 ras prævidit, quæ nimirum in circumstantiis
 illis liberam, ac indifferentem Animæ vim ad
 actum aliquem inflectere, ac determinare
 debebant; ideoque nitida certaquæ cognitio-
 ne, prævidit actuum illorum seriem; quam
 quilibet humanus Animus erat factururus.
 Altera vero ex parte observavit Leibnitius
 quod in humano Corpore plurimi, ac infi-
 niti fere motus, & actus ex admirabili ipsius
 textura, partium ordine, situ, simulque ex-
 ternorum corporum motu, & compage oriun-
 tur; ut proinde pro vario partium ordine,
 figura, situ, ac varietate, quæ in certo quo-
 dam humano Corpore reperitur, certoque
 modo ab externis corporibus percellitur, va-
 rii quoque distinctique motus in illo produ-
 ci debeant, ideoque in quolibet humano Cor-
 pore, cui certa quædam cum corporibus
 aliis connexio, & certa quædam, ac distin-
 cta partium textura concessa fuerit, certa
 quædam ac distincta motuum series erat fu-
 tura, & quemadmodum certa, ac peculiaris
 illa connexio, vel dispositio infinitis modis
 à Deo variari poterat, ita quoque infiniti
 prorsus, distinctique corporeorum motuum
 ordines ex infinitis illis texturarum possibi-
 lium ordinibus admitti debent. Itaque Deus
 infinitos omnes cogitationum ordines cogno-
 vit, qui in infinitis humanis Animis depen-
 denter ab infinitis rationum sufficientium
 complexibus, ac ordinibus erant futuri, si-
 mulque infinitos motuum ordines, qui in in-
 finitis humanis corporibus dependenter ab
 infinitis texturarum ordinibus essent futuri.
 Ubi vero certum quendam Animum, in quo
 nimirum certa quædam, ac distincta cogita-
 tionum series esset futura, cum humano Cor-
 pore conjungere voluit, ex infinitis humanis
 Corporibus illud unum elegit, quod ex in-
 dale,

dole, texturaque sua eam motuum seriem foret habiturum, quæ primæ seriei similis, consona, & accurate conveniens foret; ac utramque simul Animi Corporisque substantiam ita conjunxit, ut ex iis mirum quoddam compositi genus resularet, quod *hominem* appellamus. Ejusmodi fœdere, ac unionē sic constituta humanum Corpus independentē ab Animo motus suos, suorumque actuum seriem producit, perinde quasi nulli Animo conjunctum esset, sicuti vicissim Animus independentē à Corpore motus suos, suarumque cogitationum seriem exerit, perinde quasi nulli Corpori conjunctus esset; sed tamen duo ordines illi, vel motus, qui simul eodemque tempore tum in Animo, tum in Corpore peraguntur, inter se similes, sibi que consoni sunt: non quod Animus in Corpus, aut Corpus in Animum influere, agere, motusque suos imprimere, ac transferre possit; verum potius quod Deus ex infinitis tum corporeorum, tum incorporeorum motuum ordinibus duos illos selegit, unaque simul conjunxit, quos sibi consonos futuros esse jam noverat. Ita, si in Animo movendū brachii cupiditas exciteretur, brachium moveretur; non quod ejusmodi Animi cupiditas in brachium propagetur, Animusque imperio suo Corpus afficere, brachium impellere, ac movere possit; sed solum quia ex Corporis textura erat futurum ut eodem illo temporis momento, quo peculiaris ille voluntatis actus, movendique brachii cupiditas in Animo oriebatur, peculiaris alter Corporis actus, aut brachii motus in Corpore produceretur; & quemadmodum prorsus, si humanus Artifex duas machinas eo consilio, eaque lege construxisset, ut interim dum motus aliquis in ipsarum una peragitur, similis omnino motus in altera produ-

catur 232.

catur, utriusque machinæ motus accuratissime conspirarent, quamvis ipsarum neutra in alteram influeret; ita quoque hæc mira proportio, connexio, harmoniz inter Animi Corporisque motus reperitur, quia divinus Artifex infinita vi, scientiaque sua duos motuum ordines ab Animo, & Corpore veluti distinctis sejunctisque machinis peragendos ita selegit, unaque conjunxit, ut ipsorum uterque simul conspiraret. Hinc Leibnitius hypothese[m] hanc suam, sive mutui commercii caus[s]am, quod inter Animi, Corporisque motus reperitur, *Harmoniam præstabilitam*, sive *prædestinatam* vocavit; quod illa nimirum, non temere, ac fortuito contingat, aut à Corpore vel Animo veluti causa oriatur; sed quod jampridem ab ipso Deo definita, sancita, ac invariabili tenore decreta fuerit.

X. Quacumque tamen elegantia, verborum lepore, quibuscumque exemplis hæc Leibnitii hypothesis exponatur, fieri certè non poterit quin ipsius levitas, ac falsitas facile intelligi, ostendique possit. Ac primo quidem celeberrimum illud *Rationis sufficientis* principium, quo Leibnitius, ac Volfius in omnibus fere naturæ effectibus, in ipsis etiam Dei operibus explicandis uti solent, in necessariis quidem caus[s]is admittendum esse jam vidimus (a), sed in liberis tamen caus[s]is, hoc est in ipso Deo, ac humanis Animis admitti non posse demonstravimus; cum *ratio sufficiens*, qua divina, ac humana voluntas ad hoc potius, quam ad objectum aliud determinatur, ad hunc potius, quam actum alium inflectitur, non ab extrinseca objecti boni-

(a) Caput 9.

bonitate, ac amabilitate, sed ab intrinseca potius voluntatis vi, liberoque voluntatis arbitrio pendere debeat, quæ quamvis etiam in partibus objectis sibi propositis aut parem, aut inæqualem intrinsecæ bonitatis rationem perspiciat, quodcumque tamen libuerit ex illis amplecti potest. Ergo perennis illa, constans, ac invariabilis actuum series, quam Leibnitius dependenter à solis Animi viribus, ac rationum sufficientium serie in Animo futuram fuisse, adeoque perspicue à Deo prævideri potuisse supponit, tanquam liberior, ac absurda refelli debet, quippe quæ libertatis arbitrio, ac voluntatis imperio repugnet. Ita quoque temere prorsus, ac immerito constans quædam, perennis, ac invariabilis motuum series dependenter à sola partium textura externorumque corporum ordine, & actione in humano Corpore futura supponitur; cum experimento ipso comperitum sit Corporis nostri motus ab extrinsecis etiam, subitisque causis mirifice variari: ut proinde motuum nostrorum series non ex intrinseco quodam, tranquillo, constantique principio, sed ex innumeris prorsus, fortuitis, violentisque causis oriatur. Accedit etiam quod experimento ipso perspicue appareat Animum aliquando motibus, & affectionibus illis obsequi, & assentiri, quæ excitantur in Corpore; sed aliquando tamen iis resistere, ac dissentiri: ut nulla proinde constans, ac invariabilis similium motuum series, vel *harmonia* effingi possit, qua dum motus quidam in Corpore excitatur, similis alter, & consonus in Animo producat. Quid vero quod in humanis Animis, ipsorumque motibus mira celeritas, varietas, voluntas, observatur, ut Animus ipse, ab unius objecti cognitione, & amore ad objectum aliud repente convolare soleat? Quæ vero

vero ratione concipi, vel explicari poterit quod ex æquabili corporis textura, cum præsertim tranquilla sit, nullisque externis objectis percellatur, eadem illa celeritas, motuumque dissidentium varietas haberi debeat, nisi corporei motus ab incorporeis Animi motibus excitari, ac pendere dicantur? Quis à sola corporis textura varios motus illos repetendos esse putaverit, quibus Orator innumeras voces sola ratione duce, liberoque voluntatis arbitrio dispositas proferre possit, nisi voluntas ipsa, quæ has potius, quam ideas alias selegit, his potius quam vocibus aliis uti velit, ideoque hæc potius quam alia ratione vocis organa impellat?

Denique, ne argumentis aliis immorer, perfecta libertatis idea requirit, ut humanus Animus suorum actuum dominus, auctor, & causa esse debeat; non alia de causa illos exerat, nisi quod illos exercere velit; eoque imperio, ac libertate corporis etiam motus sequi aut iis resistere, eos efficere, aut ab iis abstinere possit: perinde quasi motus illorum causa, & origo non in ipso Corpore, ejusque textura, sed in Animo reperitur. Ergo nisi physicus ille Animi in Corpus influxus admittatur, vera libertas intelligi, vel explicari non poterit; quemadmodum sane plurimi, qui Leibnitii hypothesin admisere, veram perfectamque libertatem ex homine sustulerunt; ac Leibnitius ipse, cum absurda plurima probe intelligeret, quæ ex ipsius hypothesi necessario manabant, ingenue sanctoque testatus est se hypothesin illam non serio graviterque, sed joco solum, & ludicra quadam arte proposuisses (*) quamvis

(*) V. d. Minigl. pag. 131. adv. Fatal.

vis deinde à plurimis rei novitate, Auctoris fama, Systematis elegantia fere perculsis veluti seria, pulcherrima, atque omnium optima defendatur.

XI. Quod si rationes omnes, hypotheses, & argumenta, quæ tum à veteribus, tum à recentioribus etiam Philosophis inventa sunt, ut miram hanc Corporis, atque Animi concordiam exponerent, obscura, incerta, vel falsa sunt, quid tandem supererit, nisi ut concordiam illam, arcanique fœderis, & commercii leges adhuc nobis incomperias esse fateamur; atque ejusmodi concordia genus, quod ab infinita Dei potentia, arte, ac sapientia pendere debet, perspicue ab intellectu nostro comprehendendi, vel explicari non posse dicamus; adeoque hac etiam in parte sola certitudine contenti simus, non vero evidentiam, aut perspicuitatem temere frustra inquiramus, quæ fortasse tennes ingenii vires semper eludat, adeoque facile oprari, sed inveniri certe non possit? Itaque primum perspicuis rationibus, intimoque sensu nobis conscii certique sumus quod Animus noster, quamvis incorporeus, ac inextensus sit, in nostro Corpore reperitur, Corporisque nostri motus efficit, temperat, ac moderatur: ut quemadmodum nempe Deus, quamvis incorporeus sit, corpora tamen cognoscere, creare, movere potest, ita quoque creatis etiam Spiritibus, Animiisque nostris, quos regendo Corpori destinavit, hanc vim concesserit, ut in Corpus sibi conjunctum agere physicè, vereque influere, ipsumque movere possent. Deinde vero intimo sensu, ac experimento ipso nobis conscii, certique sumus, quod corporei motus certa quadam, occultaque ratione ad Animi substantiam propagantur; licet adhuc obscurum, incertumque sit an ejusmodi corporei motus efficiens,

ciens, aut *occasionalis* solum causa illorum motuum censendi sint, qui simul eodemque tempore in Animo peraguntur.

XII. Quandoquidem ergo hæc duo perspicue vivideque percipimus, eamque Corporis Animique connexionem incolumi voluntatis arbitrio, potestate, ac imperio à Deo constitutam esse sentimus, hujus intimæ cognitionis ac persuasionis præsidio singulos Corporis, atque Animi motus ita temperare, ac moderari debemus, ut ad honestatem dirigantur; ideoque tum ex corporeis, tum ex incorporeis objectis, quæ aut Animum, aut Corpus perculerint, ea solum seligamus, liberoque voluntatis arbitrio amplectamur, quæ humanis, divinisque legibus convenient. Quamvis enim ejusmodi corporei motus, sensationes, ac interdum etiam Animi cogitationes in nobis vel invitis excitentur, semper tamen Animi imperio subesse illæ debent; non modo quod Animus ipse Corporis organa, ac sensuum instrumenta libere inflectere, mutare, ac impedire possit; verum etiam quod fortiores atque oppositam cogitationem aliam excitare in se potest, quæ prior illa honestati contraria rerundatur, atque ex Animo repellatur. Sed hæc, aliæque id genus plura fufius, & opportunius in Ethica proponi debent, ubi de temperandis Affectibus, moribusque ritè componendis disputatur.

METAPHYSICÆ

PARS TERTIA,

S I V E

THEOLOGIA NATURALIS.



Ostrema, ceterisque longe nobilior, ac sublimior Metaphysicæ Pars Deum ipsum veluc objectum considerat; ideoque *Theologia naturalis* inscribi illa solet, quod Deum veluti Naturæ auctorem, primamque rerum omnium Causam, ac Universi Opificem non divinæ Fidei lumine, aut divinæ revelationis præsidio, sed solis naturæ viribus, solo nimirum rationis lumine, contempletur; adeoque perfectiones omnes, atque attributa demonstrat, quæ ex ipsius essentia perspicua quadam serie deduci, aut ex creaturarum rerum cognitione facile inferri possunt. Itaque in hac præstantissima Metaphysicæ Parte initio quidem de ipsa Dei existentia differetur: ut illa adversus veteres, ac recentiores etiam *Atheos* perspicuis, certisque rationibus demonstretur; deinde vero ipsius essentia, ac natura, perspicuus nimirum character ostendetur, quo Deus ipse à ceteris entibus omnibus accuratissime distinguatur; denique singula ipsius attributa, vel perfectiones omnes clariori quo poterit ordine demonstrabuntur: ut exinde facile ad uberiores illam divinarum rerum cognitionem aditus aperiatur, quæ in *Theologia*, Sacraque Doctrina divinæ Fidei, naturæ

Corsini Metaphys. I que

194 METAPHYSICÆ
que luminibus una conjunctis acquiri debet. *

C A P U T I.

De existentia Dei.

I. **U**T celeberrima hæc quæstio de primæ Causæ, primi Motoris, supremi nimirum Numinis, ac Dei existentia, quæ certe nulla gravior, ac præstantior à Philosophis institui potest, accuratius proponi, dirimique possit, illud in ipso veluti limine observari, vel constitui nunc debet, quod Dei nomine nihil aliud intelligi, vel designari solet, quam *Ens illud, quod à seipso, necessario, natura, essentiaque sua, independenter ab alio existit, ut ab illo res omnes, quæ existunt, libere, consultoque productæ sint, & conserventur.* * Atque in ejusmodi quidem idea, vel nomine explicando nulla propemodum controversia, vel opinionum varietas esse potest, cum illo tum Veteres, tum Recentiores etiam ita conspirent, ut non ii solum, qui Deum existere constanter asserunt, sed illi quoque, qui Deum aperte negant, nihil aliud hoc ipso Dei nomine intelligant, quam Ens illud, quod à seipso necessario existat, à rebus omnibus ita distinguatur, ut illas libere consultoque pro-

* Γυμνάσιον τῆς Ψυχῆς ἢ ἀνδραπένη σοφία, τέλος δ' αὖ θεῶν, *exercitatio Animi est hominis cognitio, finis vero Dei contemplatio.* Origen.

* Illum, qui intelligentiæ, sapientiæque se amatorem profiteretur, necesse est intelligentis, sapientisque Naturæ primas causas conquirere. *Cicero de Univ. cap. 14.*

produxerit, conservet, moderetur. Itaque, ut ostendatur *Deum* ipsum existere, nihil aliud requiritur, vel præstari nunc debet, nisi ut perspicuis certisque rationibus demonstretur Ens illud necessarium, ac independens existere, vel admitti oportere.

II. Id verò facile præstari profecto poterit, si rerum omnium indoles, ac natura observetur, quæ in Universo, immensa nimirum existentium Entium compage, reperiuntur. Etenim ipsarum quælibet perspicuo, certoque rationis lumine *contingens* esse concipitur; ita nimirum existit, ut etiam non existere potuerit: integra & accurata ipsius essentia concipi perfecte potest quin ipsius existentia concipiat; ideoque existentia illa, quæ in nitida, & accurata rei ipsius idea, vel essentia non continetur, ipsi intrinseca, necessaria, & essentialis esse non poterit: sed ita potius rerum illarum quælibet existet, ut libere solum, fortuito, vel contingenter existat. Ac certe, si à nobis ipsis exordiamur, intimo sane, vividoque sensu percipimus quod nostrum quilibet ita nunc existit, ut antea non extiterit, ac definire aliquando possit; ideoque non necessario, sed contingenter solum, illud esse, quod habet, ab alio receperit. Illud idem de plurimis rebus aliis, quæ in Universo reperiuntur, deprehendi facile poterit, quæ, cum antea non forent, initium aliquando habuerunt, finemque, ac interitum aliquando sunt habituræ. Quod si fortasse nonnulla, ut *materies, sidera, Terra &c.* perennia potius, ac immutabilia, quam aliquando producta, ac interitura videantur; attamen hæc ipsa quoque non necessaria, sed contingentia solum deprehendi facile poterunt, si eorum indoles ac natura subtilius exploretur. Siquidem in illis etiam *essentia* ab exi-

Entia distingui concipitur; intrinsecæ nimirum perfectiones illæ, principia, vel attributa, concipi perfecte possunt, quibus hæc Entia componuntur, atque à ceteris entibus omnibus accuratissime distinguuntur, quin ejusmodi res existere atque essentiam cum existentia arctissimo, ac necessario nexu conjunctam habere deprehendantur. Accedit etiam, quod si res illæ, vel quodlibet ens aliud in Mundo existeret, quod non contingens, sed necessarium esse deberet, ipsius privatio, sive destructio *metaphysice impossibilis*, intrinsece repugnans, & contradictoria censeretur, nitideque deprehendi deberet. Itaque, cum nulli prorsus ex innumeris Entibus illis, quæ in Universo reperiuntur, ejusmodi privatio, interitus, ac destructio intrinsece repugnant, impossibilis, & contradictoria effingi possit, perspicue certoque deduci debet quod Entia singula, quæ in Universo continentur, intrinsece, natura, substantiaque sua contingentia censeretur debent.

III. Quæcumque vero de singulis Entium generibus, ipsorumque substantia jam diximus, de variis etiam ipsorum affectionibus ostendi facile possunt: quod nimirum, sicuti quodlibet ens, quod in rerum natura reperitur, in substantia, & existentia sua ita contingens est, ut etiam non existere potuerit, ita quoque peculiare affectiones illæ, quæ in ipso reperiuntur, contingenter solum ipsi conveniant, ut etiam ab illo separari vel abesse potuerint. Ita *figura*, *magnitudo*, *situs*, aliæque plurimæ affectiones, quæ in corporibus observantur, ita corporibus ipsis conveniunt, ut corpus, quod peculiari quadam, distinctaque figura, magnitudine &c. præditum sit, aliam prorsus figuram, ac magnitudinem, incolumi ipsius natura, & essen-

essentia, habere possit; & quamvis materies, aut corpus aliquam figuram, situm, aut ordinem habere debeat, nulla tamen peculiaris, ac determinata figura, situs, aut ordo in corpore existere, vel assignari poterit, qui corpori intrinsecus, inseparabilis, & essentialis haberi debeat. Sic motus ipse, vel nisus, aut tendentia ad motum, sive ex mutua partium attractione, sive ex alio qualibet impulsu, causa, & origine deducatur, ipsi corpori, sive materię prorsus intrinsecus, & contingens esse concipitur. Etenim materies essentia, naturaque sua indifferens esse concipitur tum ad motum, tum ad quietem; optimeque materies ipsa percipitur, quamvis adhuc indifferens sit ut ad motum potius, quam ad quietem inclinet, in motu potius quam in quiete posita sit; ideoque, si fortasse motu prædita sit, motus ille veluti materię affectio, ipsius essentię prorsus extrinsecus, fortuitus, & contingens erit. Ergo, si quidquid in rerum natura reperitur contingens est; si affectiones omnes, quę in illo observantur, contingenter illi conveniunt; si motus ipse, ex quo veluti fonte rerum varietas, & origo deduci debet, fortuito solum, & contingenter materię, sive corporibus inesse potest, manifestissime inferri debet quod præter Entia contingentia contingentibus affectionibus prædita Ens aliud necessarium admitti debet, quod singulis contingentium Entium generibus substantiam, & affectiones omnes concesserit. Et sane, ut opportune jam alibi demonstravimus, quodlibet ens *contingens* illud esse, quod habet, ab alio recepisse debuit; alioquin Ens ipsum aut à nihilo productum foret, quod est impossibile; aut sibi ipsi dedisset esse, quod itidem absurdum ac impossibile censeri debet, cum Ens illud an-

requam foret ; purum nihil esse debuerit . Ergo quidquid ita est , ut etiam non esse potuerit , hoc est quodlibet Ens contingens ab alio Ente produci debet . Sed hoc ipsum Ens , quod ens aliud produxit , nisi *necessarium* , ac independens dicatur , ipsum quoque ab altero productum erit ; ergo vel Ens aliquod independens , ac necessarium inveniri postremo debet , quod à nullo productum fuerit , & entia quælibet contingentia produxerit , vel certe infinita Entium contingentium series admitti , quorum unum ab alio productum fuerit , ac series illa non contingens , sed necessaria dicatur .

IV. Ac certe quidem Veteres , ac Recentiores illi , qui Deum existere vel obscurius , vel apertius negarunt , ut superioris argumenti robur eliderent , eo demum confugere , ut quodlibet ens contingens ab alio quodam ente producendum esse concederent ; sed ita tamen ut nunquam ad Ens aliquod necessarium , primamque Causam perveniendum esse putaverint , quæ ab altero producta non foret ; cum in quolibet Entium contingentium genere infinitam ipsorum seriem admitti posse censerent , in qua nullum prorsus veluti primum , effingi , vel designari posset . Ita perspicue fatentur hominem , animal , plantam quamlibet ab alia planta , animali , atque homine produci debuisse ; sed tamen asserunt infinitam hominum seriem admitti posse , quorum quilibet ab alio suum esse receperit ; neque tamen ipsorum ullus veluti primus ab Ente necessario productus fuerit . Itaque existimant Universum , ac rerum omnium compagem , & singula Entium genera ab æterno fuisse : & hanc ipsam infinitam infinitorum entium seriem non contingenter , sed necessario existisse ; adeoque nullum Ens aliud necessarium extra hanc seriem

rient admittendum esse contendunt, quod infinitam illam entium contingentium seriem, aut ipsorum primum produxerit.

V. Ut effugium istud, quod unicum plane superesse potuit, Atheis præcludatur, Philosophi plurimi constanter asserunt quod infinita, ac æterna rerum series, infinitus entium numerus ac multitudo, sive, ut Scholastici loquuntur, progressio, aut *processus in infinitum* repugnat, intrinsece contradictorius, ac impossibilis haberi debet. Certe Aristoteles variis in locis (a) repugnantiam illam fuscè accurateque demonstrare nititur; atque, ut innumeros Philosophos alios omit- tam, Volhus (b) ipse plurima argumenta subtiliter, ac ingeniose congeffit, quibus hæc infiniti repugnantia, vel contradictio ostendi possit, ut opportune jam alibi est observa- tum, ubi de Entis finiti, ac infiniti discrimine agebatur. Ergo, si progressus ille in infinitum repugnat, ac perspicuè certæque cognitioni nostræ adversatur, hæc infinita rerum contingentium series effingi sane non poterit; ideoque finita solum contingentium rerum multitudo admitti poterit, quæ sicuti in se nunc existente definit, ita quoque ab alia veluti prima incœperit; illa vero non ab alia se contingenti, quæ prorsus excluditur, sed ab Ente non contingenti, adeoque necessario producta fuit. Ita quoque à plurimis, ac ipso quoque Lucretio (c) Epicuri sectatore observatum quod Mundus, ac universa rerum compages, quæ in illo conspicitur, non ab æterno semper extitisse, sed

(a) *Phys. Lib. 3. cap. 7.*

(b) *Opusc. Pars. 2. Sect. 2. cap. 3.*

(c) *Lucr. Lib. 5. ver. 325*

sed aliquando potius incæpisse debuit, ut ex variis indiciis inferri facile poterit, quæ fuisse & opportune in Physica proponuntur. Ergo, si rerum motus, ipsarum productio, adeoque entium contingentium series aliquando incæpit, in quolibet Entium contingentium genere ipsorum primum admitti debet, quod cum omnino contingens foret, ab altero non contingente produci debuit; quemadmodum motus ille, situs; ac dispositio, quæ informi, inertique materiæ tum impressa concipitur, ut inde rerum varietas oriri posset, ipsi materiæ contingens, adeoque non à materia, vel ab alio corpore, quod æqualiter indole naturaque sua vel iners, vel ad motum aut quietem indifferens esse debuit, sed ab incorporeo quodam Ente, vel spiritu produci debuit.

VI. Quandoquidem tamen pluribus acutisque Philosophis aliis, ac Mathematicis placuit quod infinita quoque entium series possibilis sit, atque in infinita rerum multitudine ac numero nulla prorsus repugnantia, vel contradictio perspicue deprehendatur, adeoque adhuc obscurum, & incertum videri fortasse posset an infinita entium contingentium series possibilis, vel impossibilis censenda sit, ideoque Atheorum responsio possibili, vel impossibili principio innitatur, ne Dei existentia ab incerto, lubrico, vel inexplorato principio deducatur, Atheorum effugium alia clariori, certiorque ratione præcludi, sive refelli debet. Itaque dicimus quod, quamvis etiam Mundus ab æterno existisse dicatur, quamvis etiam infinitæ rerum contingentium series admittantur, quamvis etiam infinita infinitorum generum multitudo concipiatur, semper tamen extra infinitos illos rerum contingentium ordines Eus aliquod admitti debet, quod infinitos ipsos

re-

rerum ordines produxerit, adeoque prima
ordinum illorum, ac entium omnium Causa
extra infinitam hanc contingentium entium
seriem collocata censenda sit. Etenim hæc
ipsa quoque infinita entium contingentium
series neque à nihilo neque à seipsa produci
potuit, sed potius suum esse ab alio Ente
recepisse debuit, quod contingens esse non
poterat, alioquin ipsum quoque in infinita
illa entium omnium contingentium serie con-
tineretur, adeoque necessarium esse debebat.
Accedit etiam quod rerum numerus, ac mul-
tiplicatio quæcumque illa fuerit, ejusmodi
quidem rerum multitudinem, aut molem
augere profecto potest; sed intimam tamen
indolem, ac essentiam variare non poterit;
ideoque quidquid ipsarum singulis intrinse-
ce, & essentialiter repugnat, ipsarum quo-
que aggregato vel multitudini, quamvis in-
finitæ, intrinsece repugnabit; sicuti vicissim
quidquid ipsarum singulis intrinsece, ac ne-
cessario convenit, ipsarum quoque multitu-
dini, vel aggregato, quamvis infinitum hoc
foret, intrinsece, ac necessario conveniet.
Quemadmodum ergo cuilibet enti contingen-
ti repugnat ut à se ipso, vel à nihilo pro-
ducatur, ipsique vicissim intrinsece convenit
ut ab alio suum esse recipiat, ita quoque
contingentium entium multitudini, quamvis
infinita illa foret, intrinsece repugnabit ut
à se ipsa, vel necessario existat; intrinsece
vero conveniet ut ab altero producta fuerit. Er-
go sive finita, sive etiam infinita contingen-
tium rerum series admittatur, semper tamen
Ens aliquod necessarium admittendum erit,
quod seriem illam produxerit, adeoque con-
tingens non sit, sed intrinsece essentiaque
sua, independentem ab alio existat; cumque
Entis hujus independentis, ac necessarij no-
mine *Deus* intelligatur, Dei existentia veluti

perspicue certoque demonstrata admitti debet. Hæc ipsa quoque primæ Causæ, vel necessarij cuiusdam. Entis existentia ex humanis Animis, vel Mentis. humanæ naturæ perspicue, certoque deduci poterit, sitamen illa partium ac materiæ expers, adeoque spiritalis, & incorporea supponatur, quod opportune jam alibi demonstravimus. Etenim, si Mentis humana substantia prorsus incorporea concedatur, neque ex materia, neque ex ulla corporis affectione, motu, mirum, figura, situ, vel ordine pendere, ac oriri illa poterit, sed è nihilo solum repente educi. Ergo, cum ipsa quoque aliquando incæperit, ac illud esse, quod habet, neque à corpore, neque ab alia Mente, neque ab ullo finito Spiritu finitis proinde agendi viribus prædito recepisse poterit, perspicue appareat quod ab alio Spiritu, siue Causa produci debuit, quæ infinita agendi vi polleat, adeoque mentem ipsam è nihilo educere repente poterit. Quod si præpotens, liberum, incorporeum Ens illud admitti debet, quod incorporeas substantias illas è nihilo produxerit, quis aperte non videat quod illud idem Ens corporeas etiam substantias è nihilo produxisse poterat, & sicuti Ens illud, quod incorporeas substantias produxit, independens, ac necessarium esse, censeri que debet, ita quoque necessarium aliquod Ens admitti debet, quod corporeas omnes, & contingentes res, illarumque seriem produxerit? Quod si fortasse quis dixerit ac temere prorsus effingat humanos Animos ab æterno exitisse, ac ipsorum singulos non ab alio productos, sed indole naturæ suæ existentes fuisse, ipsa certe connexio, certumque fœdus, quo Animorum quilibet humano cuidam corpori recens formato coniungitur, argumento esse poterit connexio-

REM.

nem illam non ab Animi natura, quæ prorsus indifferens erat ut à corpore sejuncta perseveraret, aut corpori conjungeretur, neque à corporis natura, quod fortuito solum & contingenter Animo conjungitur, sed ab alio prorsus principio, Causa vel Ente repetendam esse, quod tum Animo, tum Corpori dominetur, utroque nobilius sit, utrumque disponere, movere, certisque legibus vincire possit: quod incorporeo solum, libero, omnipotenti, adeoque increato, ac necessario Enti, primæque Causæ conveniet.

VII. Atque ejusmodi ratio ab Ethnicis quoque Philosophis usurpata, ut primi Mororis, primæ Causæ, supremi Numinis, Deique existentia demonstratur, *metaphysica* vocari solet, quod ex ipsa *contingentis*, ac *necessarii* Entis indole, natura, ac discrimine deducatur, quod in Metaphysicis ostendi solet. Proximum vero argumentum aliud *physicum* vocatur, quod ex solo naturalium rerum ordine, pulchritudine, ac varietate deducatur. Itaque tum veteres, tum recentiores etiam Athei, qui Deum negarunt, nihilque prorsus in rerum natura admittendum esse opinabantur, nisi infinitam, æternamque rerum contingentium seriem, illud etiam asserere cogebantur; quod universa rerum compages, singulæ Universi partes, & effectus omnes, qui in illo reperiuntur, temere solum, ac fortuito à materia æterna, æternisque ipsius motibus, & affectionibus producti sunt; nullaque certa ratione, nulla cognitione prævia, nulloque consilio hoc potius quam alio modo formati, dispositi, conjunctique fuerint. At fieri profecto non potest ut pulcherrimus ordo, infinita partium varietas, admirabilis connexio, quæ in Universo conspicitur, præsertim vero mira partium textura, ac dispositio, quæ

in singulis animalium corporibus observatur, à fortuito solum, ac temerario materiæ motu producta fuerit; cum partium illarum quælibet ad certum finem aliquem manifestissime referatur, eandemque prorsus indolem, naturam, figuram, ordinem, ceterasque affectiones omnes sortita sit, quæ huic fini assequendo aptissima, & maxime conveniens erat; ut, si fortasse alia ratione disposita, vel constituta fuisset, finem illum consequi, vel obtinere non posset. Atque in ejusmodi quidem argumenti genere maximam prorsus vim esse oportere in Physica demonstratur, ubi pulcherrima, sibi que mire consentiens Universi, ejusque partium dispositio, corporum etiam inanimatorum, præsertim vero Plantarum, ac Animalium textura ita describitur, ut ex illa infinita Creatoris sapientiæ manifestissime deduci possit; cumque maxima ingenii vis, ac solertia in hominibus esse debeat, ut effectus ipsos cognoscant, atque ille ingenio, sapientiæque excellere videatur, qui creatarum rerum pulchritudinem, ordinem, finem, & affectiones cognoscat, insaniam profecto, ac furori simile censeri debet, si quis hæc omnia sine consilio, ratione, cognitione, sed fortuito solum, ac temerario corporum motu, à fortuitis materiæ affectionibus, à fortuitis solum, & contingentibus causis produci, ac disponi potuisse putaverit.

VIII. Argumentis istis, quibus existentia Dei partim Metaphysicæ, partim Physicæ Facultatis præsidio perspicue, certoque demonstratur; gravissimum aliud argumenti genus adjungi nunc poterit, quod ex perenni, constantique Philosophorum omnium auctoritate, ac Gentium consensione deduci solet. Itaque præclare sapienterque Cicero observavit quod *nulla Gens sit tam immanis.*

neque tam fera, quæ non, etiamsi ignores
qualem Deum habere deceat, tamen habendam
sciat; (a) unde firmissimum hoc afferri vi-
detur cur Deos esse credamus quod nulla Gens
tam fera, tam omnium sit immanis, cujus
mentem non imbuerit Deorum opinio. (b) Quan-
doquidem ergo, ut idem Cicero jam alibi
dixerat, omni in re consensus omnium Gen-
tium lex naturæ putanda est (c), superni
Numinis, primæ Causæ, denique cognitio
Animis ipsis à natura impressa, ac veluti in-
genita censeretur debet; ut proinde de ipsius
existentia ambigere, vel dubitare non liceat.
Ac, ne quis aut Gentium illarum barba-
riem, aut ruditatem opponat, Deorumque
opinionem aut ex timore, * aut ex poten-
tiorum hominum fraudibus, aut ex naturæ
ignoratione profluxisse arbitretur, observari
facile poterit quod illustriores omnes Philo-
sophi, * * qui maximo ingenii acumine, ac
libertate rerum omnium indolem, ac naturæ
effectus, ipsorumque originem subtilius ex-
plorarunt, Deum ipsum veluti primam, cer-
tamque rerum omnium Causam admitten-
dum esse dixerunt; ut proinde paucissimi ex
Veteribus memorentur, (d) qui Dei exi-

(a) De Leg. Lib. I. cap. 8.

(b) Tuscul. lib. I. c.

(c) Tuscul. lib. I. cap. 12.

* Primus in orbe Deos fecit timor, ardua Cælo
Fulmina cum caderent.

Petron. Satyræ.

** Epicurus ipse vidit esse Deos, quod in omnium
animis eorum notitiam impressisset ipsa natura. Quæ
enim est gens, aut quod genus hominum, quod
non habeat si.e doctrinam anticipationem quamdam
deorum, quam προληψιν appellat Epicurus? Cfr. de
Nat. Deor. Lib. I. cap. 16.

(d) Vid. Cic. de Nat. Deor. lib. I.

ffentiam sustulerint, aut in dubium revocaverint. Quod si fortasse plures nostra hac ætate, ac superioribus etiam temporibus existisse dicantur, qui Dei cognitionem aut ex suis, aut ex aliorum Animis extorquere conati fuerint, vividamque lucem, qua Dei notitia nobis affulget, extinguere; ipsorum certe numerus, atque auctoritas, quæcumque illa sit, nobis imponere, atque in errorem abripere profecto non poterit; cum ii gravioribus, innumeris, ac illustrioribus Philosophis aliis conferri non mereantur; & argumenta singula, quibus inniti, vel abuti illi solent, perspicue certoque refelli possint.

VIII. Nihil est autem cur in variis ejusmodi Atheorum argumentis hac ordine recensendis, ac refellendis immoremur. Ipsorum pleraque ac omnia fere ex eo repetuntur, quod effectus aliqui in Universo reperiuntur, qui Dei bonitati, sanctitati, justitiæ, ac providentiæ adversantur; adeoque neque Dei sanctitas, neque justitia, neque beneficentia, neque providentia admitti potest; cumque Deus ipse, si existeret, his attributis carere, vel perfectionibus illis destitui non possit, sed ipsarum quælibet cum Dei natura necessario quodam, & arctissimo nexu conjuncta esse debeat, si divinæ perfectiones illæ existere, vel admitti non possunt, ne ipsa quidem Dei substantia existere vel admitti debebit. Quod vero plurima in Universo reperiuntur, quæ divinis attributis illis repugnent, exinde facile ostendi posse arbitrantur Athei quod plurima in Universo nobis occurrant, quæ inutilia, noxia, & mala sint, adeoque divinæ beneficentiæ adversantur; plurima temere solum, ac fortuito producantur, quæ proinde cum divinæ providentia componi non possint; scelestis homi-

hominibus aliquando felicitas, justis vicissim, honestisque hominibus infortunia, ac infelicitas aliquando contingat, quod tamen à divina justitia perspicue abhorreret. Ergo, si divinæ perfectiones illæ admitti non possunt, vel Deus attributis illis destitutus effingi deberet, quod ipsius ideæ ac naturæ repugnat, vel nullus omnino Deus admittendus erit; adeoque singula ex fortuito solum, & contingentî materiæ motu, vel infinita contingentium Entium serie repetenda erunt. Sed hæc, aliæque id genus opportunius in extremo Capite mox dirimentur, ubi de *moralibus* Dei attributis, justitia nimirum, bonitate, ac providentia agendum erit. Interim vero observari facile poterit quod, quamvis etiam argumentis ipsis, quæ ab Atheis afferuntur, vis aliqua inesse posset, atque ubi cum superioribus argumentis aliis conferantur, quibus Dei existentia demonstrata fuit, humanum Animum in oppositam partem inflectere fortasse possent, adeoque ambiguum adhuc, & obscurum efficere an Dei existentia admittenda potius, quam neganda foret; unius tamen humanæ prudentiæ legibus ingenuus quisque impelli deberet ut Deum existere potius, quam non existere fateretur. Etenim quicumque Deum ipsum sustulerit, aperteque negaverit, timores quidem, anxietatem, religionem, poenarumque metum excutiet, quemadmodum Epicurus (a).

inexorabile Fatum

Subjecit pedibus, strepitumque Acherontis,
quod unum sane Atheis cordi fuerat, * ipsosque

(a) Virg. Georg. II. vers. 29a. Vid. Lucr. lib. 1. ver. 99.

* Τίλος τε μὴ νομίζειν Θεός, μὴ φοβεῖσθαι:

Finis non credendi Deus esse, est metu vacare.

Plutarch. de Superst. pag. 165.

que ad impietatem impulerat; levissimum nempe fructum; aut commodum consequeretur; ut liberius ac impune illud idem operari fortasse possit; quod ab honestate, humanisque etiam legibus vetitum sit; ac si fortasse in neganda Dei existentia aberraverit, Deusque existat; æterno supplicio, infinitæque jacturæ se exponet. Quicumque vero Deum existere crediderit, ejusque persuasionis lumine, ac præsidio operetur; levissimi quidem commodi, ac libertatis expertus erit; ac si Deus existat; ideoque veram ille sententiam elegerit; infinitum præmium ab illo fidelibus justisque promissum consequetur. Quandoquidem ergo prudentis esse debet ex duobus objectis tibi propositis illud unum eligere; in quo minoris mali timor; majorisque boni spes affulgeat; illud vero respuere, in quo gravioris mali timor; leviorisque boni spes obversetur; quis aperte non videat quod ipsis etiam humanæ prudentiæ legibus impellimur ut Dei existentiam admittamus, ejusque opinionis ac persuasionis præsidio ipsum colere; revereri, venerari, leges ab illo constitutas servare velimus, quidquid ab illo traditum fuerit alacriter credere; quidquid ab illo promissum sit constanter sperare conemur, ut poenas ab illo infligendas vitare; simulque præmium ab illo propositum obtinere possimus. Quamvis autem ejusmodi Dei cultus, timor, ac religio, quæ ex hac ipsa humanæ prudentiæ lege, morali solum, vel extrinseco fere principio penderet; vera religio, verus amor, verusque Dei cultus esse non posset; cum religio vera omne prorsus dubium excludere, atque in Deum perspicue certoque cognitum dirigi debeat; plurimum tamen ad Deum ipsum ingenue mox inquirendum, tandemque perspicue certoque cognoscendum.

scendum disponderet; quemadmodum prorsus ad veram religionem agnoscendam facilius inflectitur quicumque prius aliarum falsitatem rite perspexerit. Vicissim vero maxima Atheorum temeritas, impudentia, ac infelicitas ex ejusmodi argumenti genere deduci poterit, qui reluctantibus etiam humanæ quoque prudentiæ legibus sententiam illam elegerunt, quæ graviori periculo obnoxia esse debet, omnemque fere facem extinxerunt, quæ ipsos ad Dei cognitionem deducere potuisset.

C A P U T II.

De essentia, vel constitutivo Dei.

I. **S**apientes illi, qui puriori, clariorque rationis lumine de rebus divinis disputarunt, quamvis Dei existentiam perspicuis adeo, certisque rationibus ostendi posse putaverint, ut ipsius cognitio mentibus nostris ingenita videatur, atque humanis Animis vel invitis etiam affulgeat; ipsius tamen ideam, naturam, atque essentiam perfectam adeo, mentibusque nostris imperviam existimarunt, ut illa tenues humanæ cognitionis vires excedat, ideoque ab intellectu nostro perspicue explorari, vel comprehendere certe non possit. * Hinc optime dicebat Cicero (a) quod quanto diutius hæc infinita Dei natura exploratur, ac subtilius inquiritur, tanto illa obscurior & sublimior apparet.

* Lucem inhabitat inaccessibilem, quam nullus hominum vidit, sed nec videre potest. *Epiſt. 1. ad Timoth. cap. 6. vers. 16.*

(a) *De Nat. Deor. Lib. 1. cap. 22.*

ret: quod nimirum, ut facile mox ostendetur, perfectiones illæ, vel attributa, quæ in Deo reperiuntur, infinita sint, adeoque à tenui, finitoque rationis lumine comprehendendi non possint. * Quamvis tamen intima, & accurata divinæ naturæ cognitio hic ab hominibus sperari, vel obtineri certe non possit, ex innumeris tamen perfectionibus illis, quæ in Deo reperiuntur, eam facile inquirere vel demonstrare nunc possumus, quæ aliarum omnium veluti fons, & origo videatur; & cuius opè Deus ipse veluti perspicuo certoque discrimine, & caractere à rebus omnibus distinguatur. Itaque brevissime de ejusmodi caractere, vel principio agendum erit, ut intima Dei ipsius naturæ ac essentia, quantum mortalibus liceat, accuratius exponatur.

II. Ac initio quidem illorum opinio exponenda nobis occurrit, qui characterem illum, quo Deus à ceteris rebus omnibus perspicue, & accuratissime distinguatur, adeoque ipsius essentiam, & constitutum in hoc uno positum esse arbitrantur quod ille infinitum perfectionum omnium cumulum complectatur; ideoque, cum quodlibet aliud Ens, quod ab intellectu nostro concipitur, finitum sit, & perfectiones omnes, quæ in illo reperiuntur, quibusdam veluti finibus circumscriptæ sint, Deus ipse in quolibet entis, vel perfectionis genere sit infinitus, & hac ipsa infinita infinitarum perfectionum congerie à ceteris entibus omnibus distinguatur. Quæ sane pulcherrima divini Entis
idea,

* Deus ineffabilis est. Facilius dicimus quid non sit, quam quid sit. *St. Augustin. in Ps. 85.*
num. 12.

idea, siue descriptio verissima censeretur debet; cum infinitus ille possibilium omnium perfectionum cumulus non alteri, quam primæ, supremæque Causæ, necessario nimirum Enti conveniat, ut proximo Capite demonstrabitur; ceteræ vero res omnes, quamvis plurimas, earumque singulas, infinitas etiam proprietates habere posse censeantur, nunquam tamen à seipsis existere, adeoque *independentia*, siue necessitatis perfectionem habere poterunt. Quandoquidem tamen hoc loco ubi perspicuus ille Dei character inquiritur, nondum variæ, ac infinitæ ipsius perfectiones, atque attributa demonstrata sunt; atque in infinitis illis perfectionibus, quas ipsi inesse mox ostendetur, ordo quidam, aut series ab intellectu nostro concipitur, ut una ab alia oriri, una ab altera deduci, omnesque simul ab aliqua veluti fonte, ac principio manare videantur, à Philosophis, ac Theologis etiam inquiritur quænam ex his perfectionibus veluti aliarum causa, & origo censeretur facile possit, in qua Dei natura, & essentia posita sit, quo denique clariori, certiorique discrimine Deus ipse à qualibet alia re, vel à creatis Entibus distinguatur.

III. Itaque Philosophi plures, cum in Deo duplicem agendi vim, ac potentiam admittendam esse observassent, *intellectum* scilicet, ac *voluntatem*, Dei naturam, primumque veluti ipsius principium, & constitutum in ipsarum prima, hoc est in intellectu, positum esse dixerunt; cum sane intellectus ipse, vel intellectus cognitio alterius potentia, seu voluntatis actus præcedere concipitur. Ita vero distingui, vel dissidere illi solent, quod alii quidem divinam essentiam in ipsa potius intelligendi potentia collocandam esse arbitrantur; alii vero in-

telles-

tellectionem ipsam, aut actum, quo *vis* illa exeritur, veluti primam divinarum perfectionum originem, divinæque essentiae principium, & characterem esse putarunt. Verum, cum intelligere, ac velle veluti quidam substantiæ cogitantis actus à nobis concipiantur, & actus illi ab intellectu nostro percipi non possint, nisi prius *vis*, ac potentia quædam percepta fuerit, à qua actus illi producantur, simulque illud esse, quod ejusmodi intelligendi, ac volendi viribus præditum sit, adeoque intelligendo, ac volendo operetur, suspicari fortasse quis poterit quod intelligendi *vis*, aut intelligendi actus, sive ut Scholastici loquuntur, *intelligere radicale*, aut *intelligere actuale* primus divinarum perfectionum omnium fons, & origo, adeoque primum divinæ naturæ principium, ejusque character, & constitutivum haberi non possit; cum præsertim duplex illa intelligendi, ac volendi *vis* in creatis etiam quibusdam Entibus reperiatur; ideoque semper ambigere quis possit an perfectiones illæ, sive principia, quæ creatis etiam rebus inesse, & aliqua ratione convenire possunt, perspicuus divinæ naturæ character, ideoque accuratum ipsius constitutivum haberi debeat.

IV. Hinc facile, ut opinor, accuratius loquuntur illi, qui perspicuum hunc characterem, quo Deus ipse à ceteris entibus omnibus accuratissime distinguatur, non aliud esse arbitrantur, quam *independentiam*, vel *necessitatem*, qua Deus existit: ut proinde ipsius essentia, & constitutivum in hoc uno positum sit, ut ille sit *Ens Necessarium*, Ens ab alio quolibet independens, Ens denique, quod à se ipso, natura, essentiaque sua existit. Etenim, ut superiori Capite jam demonstravimus, quodlibet Ens, quod in rerum
natu-

natura reperitur, fortuito solum, & contingenter existit; ut proinde non alteri, quam soli Deo, perennis, independens, necessaria, & essentialis existentia convenire possit. Ita quoque quodlibet ens, quod in Universo existere, vel concipi potest, semper ab alio produci ac pendere debet; solusque Deus à nullo fieri, sive pendere poterit; atque ubi fortasse Deus etiam ab alio fieri, sive pendere concipiatur, jam ille Deus amplius esse non poterit; perspicua nimirum Dei, vel Entis necessarii idea manifestissime destrueretur. Ergo character ille, sive principium, quod in ipsa Dei idea repente affulget, quod ipsi intrinsece ac necessario conjungitur, ipsumque constituere, atque à ceteris entibus omnibus distinguere concipitur, erit illa *necessitas*, ac *independentia*, quæ in illo manifestissime concipi, vel admitti debet. Accedit etiam quod ceteræ proprietates illæ, perfectiones, atque attributa, quæ in Deo reperiuntur, aliqua ratione creatis etiam quorundam entium generibus inesse, ipsis nimirum à Deo concedi, vel communicari possunt: ut in aliquibus agendi potentia, spiritualitas, immortalitas, sapientia, bonitas &c. reperiri possit; atque in illorum hypothese, qui in quolibet Entis genere infinitum aliquod à Deo produci posse arbitrantur, perfectiones illæ, quæ singulis, aut certe pluribus creatis Entibus inesse possent, infinitæ forent, adeoque Deus entibus illis attributa sua nobiliori, atque infinita prope modum ratione communicasset. At fieri profecto non poterit ut Ens ullum independentem à Deo existat, adeoque creata res ulla *independentiam* illam à Deo recipere, vel obtinere unquam possit; &, quamvis Deus omnipotens sit; & alteri creatæ rei infinitam quoque, si libeat, perfectionem aliquam

quam tribuere fortasse possit, axamen ens aliquod independens, vel necessario existens producere non potest: cum in hac ipsa producti, simulque independentis Entis idea contradictio manifestissima reperiatur. Itaque nullum aliud clarius discrimen asseri unquam poterit, quo Deus ipse à ceteris entibus omnibus distinguatur, nulla clarior divinarum perfectionum origo, nullusque certior divinæ naturæ character asseri jam poterit, quam necessitas, independentia, sive, ut barbare à Scholasticis hæc appellatur, *Aseitas*, quæ ita intrinsece, ac necessario ipsi convenit, ut alteri convenire certe non possit. Hinc in Sacris etiam Litteris (a) Deus ipse, ut essentiam, naturamque suam exprimeret, ait: *Ego sum qui sum*, sive ut illustrius in græco textu legitur, *Ego sum Ens*; quod nimirum hoc *Entis* nomen intrinsece, ac necessario, essentiaque sua ipsi Deo conveniat, atque hoc ipso necessario, ac independenti existendi modo à ceteris rebus omnibus accuratissime distingui possit, quibus existentia fortuito solum, ac dependenter ab alio conveniat, adeoque in iis essentia ab existentia distingui debeat, ut superiori Capite jam demonstravimus.

CAPUT III.

De attributis physicis Dei.

I. **Q**uemadmodum ex sola creatarum rerum indole, ac natura superius exposita, ex ipsa nimirum contingenti rerum existentia perspicue certoque inferendum esse jam

(a) Genes. cap. 3. vers. 24.

jam vidimus Ens aliud existere, quod independens, ac necessarium sit, adeoque ex creaturarum rerum cognitione supremi cujusdam Entis, primæque Causæ existentiam deducendam esse demonstravimus; ita quoque ex eodem illo principio, ex libera nimirum, aut contingenti rerum productione perfectiones illæ, vel attributa cognosci, & ostendi facile poterunt, quæ divinæ naturæ conjuncta esse debent, ipsique Deo necessario conveniunt. Itaque de attributis ipsis hic ordine differemus; ut initio quidem illa exponantur, quæ *physica* vocari solent quod ipsam Dei naturam, substantiam, atque intellectum afficeret, sive ad illum referri videantur; proximo deinde loco cetera proponantur, quæ ad Dei voluntatem referri, ipsamque perficere concipiuntur, ideoque *moralia* censerent, vel appellari consueverunt.

I I.

Omnipotentia.

Ac primo quidem Dei omnipotentia, infinita nimirum agendi vis, ac potentia nullis omnino terminis circumscripta perspicue deduci, vel ostendi poterit. Etenim, si quidquid in Universo reperitur, *contingens* est, ita nimirum existit, ut etiam non existere potuerit, perspicue apparet quod illud esse, quod habet, à Deo recepit, & antequam existere inciperet, sive à Deo productum foret, erat purum *nihil*; ideoque singula entium genera, quæ nunc existunt, ex solo nihilo à Deo producta sunt, sed, ut ens aliquando ex nihilo producat, sive ut ex nihilo transferatur ad esse, infinita vis aut potentia requiritur, quæ infinitum illud intervallum superet, quod inter *esse*, & *non esse*,
sive

Sive inter *ens*, & *non ens* reperitur, ergo ex qualibet etiam minimi contingentis entis productione infinita Dei vis, aut omnipotentia deduci debet, certe quidem, ut aliquid ex solo nihilo producat, non modo infinitam, sed infinito quoque majorem vim requiri. Vetēres omnes existimaverunt, qui celebre effatum illud (a.)

De nihilo nihil, in nihilum nil posse reverti

non modo de creatis omnibus, finitisque causis; verum etiam de ipso quoque Deo intelligendum putarunt, * quamvis illi infinitam prorsus agendi vim concesserint. Etenim ipsi ne infinitæ quidem Dei potentiae concedi posse censebant ut ens aliquid è nihilo producere repente posset; ideoque Plato, alique plurimi *materiam*, aut *Chaos* Deo cœvum, atque ab illo independens admiscere; nec alia ratione Deum Universi Opificem, auctorem, aut causam vocarunt, nisi quod ille materiam hanc antea confusam in ordinem digesserit, ipsi prius inertis motum concesserit, atque ex illa veluti subjecto singula rerum genera eduxerit. (a.) Ergo, si materię creatio ipsius quoque infinitæ potentię vires excedere videtur, quis aperte non videat quod si revera Deus non modo rerum ordinem, motum, ac perfectiones omnes, sed ipsam quoque illarum materiem, quæ prorsus contingens erat, aliorum entium contingentium instar,

(a.) Persii Sat. 3. Vid. Lucr. Lib. 1. v. 151.

* Nullam rem è nihilo gigni divinitus unquam.
Lucr. Lib. 1. ver. 151.

(b.) Virg. Ovid. Metamorph. init.

instar, produxit, * infinitam omnino vim, ac potentiam habere, adeoque omnipotens centeri ille debet?

Hæc ipsa tamen omnipotentia clarius ex infinito possibilium entium numero demonstratur, quæ à Deo produci possunt. Etenim quidquid *actu* ab ipso Deo aliquando productum fuit, atque nunc temporis fortuito solum, & contingenter existit, ante quam fieret, & à Deo produceretur, erat purum nihil, aut ens *possibile*; sed illa, quæ *possibilia* fuerant, & adhuc *possibilia* remanent, ea nimirum, in quibus intrinseca repugnantia, vel contradictio nulla reperitur, sunt infinita, cum nullum prorsus ens, aut entis genus ab intellectu nostro concipi vel effingi possit, extra quod ens aliud, aut aliud entis genus possibile concipi, vel assignari non possit; ergo quemadmodum Deus ex infinito entium possibilium numero, in quibus omnino paret æqualis *possibilitas*, si-
ve *non repugnantia* reperiatur, quædam selegit, ut illa ex nihilo ad esse, vel ex *possibilitate* ad *existentiam* transferret; ita prorsus quodlibet ens aliud, aut quodlibet entis genus, quod æque possibile, vel non repugnans sit, creare poterat, eaque proinde vi si-
ve potentia præditus est, ut infinita prorsus entium genera, ac infinitum ipsorum numerum producere possit; sed infinitis illis entium generibus, si-
ve infinito rerum numero producendo infinita vis, & omnipotentia requiritur; ergo in Deo infinita illa agendi vis, ac omnipotentia admitti debet.

Quam-

* Deus facit sibi esse materiam, quia potest: posse enim Dei est; nam, si non posset, Deus non esset. *Last. Instit. Lib. 2. cap. 10.*

Quamvis autem ejusmodi agendi vis infinita in Deo agnosci debeat, ad illa tamen entia producenda extendi non poterit, quæ intrinsece repugnantia, contradictoria, metaphysice, essentiaque sua impossibilia sint. Plurimi quidem ex veteribus, ac recentioribus etiam Philosophis memorantur, (a) qui, Cartesii instar, eam agendi vim Deo tribuendam esse putaverint, ut nivem nigram, circulum quadratum, spiritum bipalmarem creare ille posset, simulque efficere ut ea, quæ facta fuerant, infecta sint. * Sed, ut alibi jam demonstratum, ejusmodi contradictoria neque *entia*, neque *possibilia* in se sunt; adeoque divina potentia, quæ solis *entibus*, licet infinitis, producendis par esse debet, ad *non entia*, sive ad contradictoria extendi non debet; ac Deus ipse semper *omnipotens* esse, vocarique poterit, quamvis ejusmodi contradictoria efficere, vel rerum essentias invertere, ac mutare non possit.

III.

Libertas.

Exinde quoque libera, ac prorsus indifferens

(a) Vid. Moshem. in notis ad Cudwor. Cap. 5. Sect. 1.

* Τὸ δὲ γεγονός οὐκ ἐνδέχεται μὴ γενέσθαι. διὸ ἀγαθὸς Ἀγαθόν.

Μὲν γὰρ αὐτὸ καὶ Θεὸς ἐπερίσκειται.

Ἀγένητα ποιεῖν ἀσὸς ἂν ἢ πεπραγμένα.

Quod factum est, ut sit infectum fieri non potest. Unde optime Agatho:

Hoc namque dumtaxat negatum est Deo

Quæ facta sunt, infecta posse reddere.

Arist. Moral. Nicom. Lib. 6. cap. 2.

rens eligendi vel non eligendi vis, agendi vel non agendi voluntas demonstratur, quæ in Deo reperitur. Etenim entia mere possibilia sunt infinita, & ipsorum cuilibet prorsus eadem, par, & æqualis possibilitas, si ve capacitas, & aptitudo, vel indifferentia convenire debet, ut existere, si ve produci fortasse possit; nihilque prorsus in ipsorum aliquo concipi, vel esse potest, quo ceteris æque possibilibus entibus præferri mereatur, ideoque ex infinito possibilium entium numero seligi, ceterisque omisissis produci debuerit. Ergo quod ex infinito possibilium entium numero hæc potius, quam alia, producta, atque ex possibilitate ad existentiam translata fuerint, hoc potius, quam alio tempore, loco, & modo producta fuerint, id à solo divinæ voluntatis arbitrio, adeoque libera Dei electione pendere poterit; ut proinde perfecta libertas in Deo admittenda sit. Leibnitius quidem, Vossius, alique plures opinantur quod Deus in operando *Ratione sufficienti*, veluti perenni, constantique lege dirigatur; adeoque illa solum produxerit, aut producere aliquando possit, quæ magis huic rationi sufficienti convenientia sint, ideoque ceteris omnibus rite spectatis meliora, & perfectiora sint: ut proinde hic Mundus à Deo creatus Mundorum omnium possibilium optimus, ac perfectissimus esse debeat. Cui quidem sententiæ Veteres illi facem prætulisse videntur, qui temere existimarunt Deum nihil aliud efficere potuisse, quam quæ fecit; nec alia ratione Universum hoc disponere, ac moderari potuisse, quam vere disposuerit, ac moderetur. Sed ejusmodi *Rationis sufficientis* principium, quod in necessariis causis admittendum esse jam vidimus, prorsus immerito in Deo quoque admitti opportunius ali-

bi demonstravimus; cum in rebus possibili-
bus, quæcumque illæ fuerint, nihil prorsus
intelligi, vel effingi possit, quo produci po-
tius, quam non produci meruerint; nec alia
divinæ voluntatis ratio, motivum, aut suffi-
ciens agendi causa effingi possit, quàm li-
bera, ac indifferens potestas illa, qua ex in-
finitis entibus æque possibilibus unum potius
quam aliud selegit, ex variis agendi modis
unum potius, quam alium adhibuit; ex va-
riis entium ordinibus qui perfecti, perfectio-
res, vel perfectissimi esse poterant, illum se-
legit, qui perfectus esset; sed ita tamen ut
perfectiorem alium eligere potuerit.

IV.

Scientia.

Quandoquidem vero Deus ex innumeris,
planeque infinitis entium generibus, quæ æ-
qualiterabilia fuerant, unum seligere,
velle, ac producere non poterat, nisi prius
Ens illud perspicue, distincteque cognovis-
set, quod ex possibilibus aliis eligendum,
atque ex possibilitate ad existentiam transfe-
rendum erat, simulque universam entium
omnium æque possibilium seriem perspexis-
set, quæ adhucabilia relinquenda fue-
rant, perspicue apparet quod entium omnium
possibilium cognitio in Deo admitti debet.
Sed entiaabilia sunt infinita, ergo in
Deo infinitorum entium, vel objectorum co-
gnitio, adeoque infinita scientia, vel omni-
scientia reperitur.

Ejusmodi verò Dei cognitio ita distingui
solet, ut illa quidem, qua Deus entia mere
possibilia cognoscit, *Scientia simplicis intel-
ligentiæ* dicatur; illa vero, qua res existen-
tes vel futuras cognoscit, eas nimirum,
quas

quas Deus ipse produxit, vel producere decrevit, *Scientia visionis* vocetur. Hinc Deus possibilia quælibet in omnipotentia sua, veluti speculo contemplatur, quod nimirum illa in infinita Dei potentia veluti causa contingantur, existentia vero, sive futura Deus ipse in libero suæ voluntaris decreto cognoscit, quo res illas aliquando futuras esse constituit; adeoque ipsarum singulas veluti jam existentes, sibi præsentes intueatur, cum in Deo, ejusque æternitate nulla temporis varietas esse possit, ut inferius ostendetur.

Opportune verò jam alibi demonstravimus quod nihil prorsus, ne liberi quidem, vel contingentes humanæ voluntatis actus independentes à Deo, vel divinæ voluntatis decreto futuri esse possunt; ideoque Deus ejusmodi quoque liberos humanæ voluntatis actus non in ipsis hominum voluntatibus tercio quodam scientiæ genere speculatur, quæ *Scientia media* à pluribus appellatur; sed in ipso potius decreto suo *scientia visionis* ab æterno cognovit; * quamvis hæc invariabilis divina cognitio vel præscientia, ac immutabile divinæ voluntatis decretum, quod ejusmodi scientiæ conjungitur, humanæ libertatis arbitrio detrahere, ideoque huma-

næ

* Profecto desipitis, *Pelagiani*, qui dicente Veritate: Non ex operibus, sed ex vocante dictum est: Jacob dilexi, Esau autem odio habui: dicitis ex futuris operibus, quæ Deus illum facturum esse præsciebat, Jacob fuisse dilectum: atque ita contradicitis Apostolo dicenti: non ex operibus; quasi non posset dicere non ex præsentibus, sed ex futuris operibus. Sed ait non ex operibus, ut Gratianum commendaret. *S. Augustin. contra Epist. Pelag. Lib. 2. cap. 7.*

222 METAPHYSICÆ
næ voluntatis actibus necessitatem inferre
non possit.

V.

Spiritualitas.

Ejusmodi verò scientia, ac libertas, infinita nimirum cognitio, simulque liberrima agendi vis, qua Deum præditum esse jam vidimus, perspicue certoque nobis ostendit Deum ipsum spirituale, & incorporeum esse oportere. Etenim cognitio, atque indifferens agendi vel non agendi vis materiæ, sive corporeæ substantiæ convenire certe non potest, ut alibi jam demonstravimus ubi de incorporea Mentis humanæ natura agebatur. Ergo, si in Deo perfectissima, ac infinita cognitio, simulque perfectissima, ac infinita libertas reperitur, ille incorporeus, & spiritualis esse debet. Accedit etiam quod inter alia entium genera, quæ libere, consultoque à Deo producta sunt, aliqua reperiuntur, quæ spiritualia, vel incorporea sunt, ut humanæ Mentis, & Angeli; ergo, si Deus incorporeos effectus quosdam produxit, aliosque infinitos illorum instat æque possibiles creare potest, ipse quoque incorporeus censendus erit; ne scilicet effectus aliquis causa sua nobilior, atque perfectior effingi debeat; ac Deus perfectionem aliquam alteri concessisse dicatur, quam in se non habebat. Denique prima Causa, primusque Motor, qui corporibus omnibus, ipsique materiæ motum impressit, corporeus ac materialis esse non potest; alioquin ipse quoque motum illum materiæ contingentem ab alio recepisset. Ergo Motor ille, primusque rerum Opifex omnino Spiritus esse debet, quem

quemadmodum Aristoteles * ipse Deum prorsus immobilem, partium expertem, & incorporeum esse oportere ex perspicua primi Motoris idea manifestissime demonstravit.

VI.

Simplicitas.

Infertur etiam divinam substantiam ita simplicem, atque indivisibilem esse oportere, ut compositionem omnem excludat. Certe, cum Dei substantia spiritualis, & incorporea sit, *physicam* compositionem admittere, variisque partibus constare non poterit. Nec ipsa quoque *metaphysica* partium varietas, ac distinctio in Deo effingi poterit, ut in illo *potentia*, & *actus*, *genus* & *differentia*, *substantia*, & *accidens*, *essentia* demum ab *existentia* distincta, aut alii quilibet metaphysici gradus invicem distincti reperiantur. Etenim quidquid vel *potentie*, vel *generis* ideam habere concipitur, imperfectum censeretur, ideoque ab *actu*, vel *indifferentia* perfici, sive compleri concipitur; quemadmodum prorsus *accidentia*, vel *modi*, vel *attributa* substantiam perficere, ipsique novum aliquod esse, quo destituta fuerat, tribuere conspiciuntur; atque *existentia* veluti nova quædam & con-

* Οτι μὲν ὅν ἐστιν οὐσία τις αἰδῖος ἢ ἀκίνητος ἢ ἀμεταβλητὴν ἢ ἀσυνθέτην φανερόν· διότι καὶ διὰ τὴν μέγιστον οὐκ ἐνδεχεται ἔχει τῶν τῶν πᾶσι οὐσίαν, ἀλλὰ ἀκίνητος ἢ ἀδιαίρετος ἐστὶ. Quod itaque est quædam æterna immobilisque substantia, & à sensibilibus separata constat. Ostensum autem est quod nec ullam magnitudinem possibile est hanc substantiam habere, verum impartibilis, ac indivisibilis est. Arist. Metaph. Lib. 14. cap. 7.

& contingens perfectio ipsi *essentiæ* superaddi censetur. Itaque, cum nulla prorsus imperfectio in Deo admitti possit, quidquid in Deo reperitur, ac ipsa quoque existentia natura essentiaque illi conveniat, adeoque neque existentia neque ceteræ perfectiones ab ejus essentia, sive substantia distinguuntur, in Deo summa, ac infinita simplicitas admitti debet.

Quamvis ergo perfectiones illæ, vel attributa, quæ in Deo reperiuntur, ita ab intellectu nostro concipi consueverint perinde quasi inter se, aut à divina substantia, ac essentia distincta forent, illa tamen neque inter se, neque à Deo distinguuntur; sed quidquid in Deo reperitur, est ipse Deus, divina cognitio, divina potentia &c. nihil est aliud, quam eadem illa divina substantia, quæ cum infinitas vires, & actus exercat, distinctis fere principiis æquivalere, adeoque perfectiones illæ, sive attributa, quibus actus illi adscribuntur, non *entitative*, neque *modaliter*, sed *virtualiter* solum, à divina substantia, tum inter se distinguuntur.

VII.

Infinitas.

Quod vero Deus ipse in quolibet perfectionis genere infinite perfectus sit, ex ipsius natura superius exposita demonstratur. Quemadmodum enim finitis illis creaturarum rerum generibus, quæ jam existunt, plurimæ perfectiones inesse conspiciuntur, quæ priusquam libero divinæ voluntatis arbitrio productæ, rebusque singulis concessis forent, mere possibiles erant: ita quoque infinitis aliis infinitarum rerum æqualiter possibilium generum.

generibus infinitæ perfectiones aliæ inesse poterunt; adeoque aliarum existentium vel productarum instar ab infinita Dei potentia produci possunt. Ergo, sicuti finitæ perfectiones illæ jam productæ in Deo veluti causa continentur; ita quoque perfectiones aliæ possibiles, quamvis infinitæ, quæ à Deo infinitis entium possibilium generibus concedi possent, in Deo possibilium omnium causa contineri debent; ideoque Deus in quolibet perfectionis genere infinite perfectus erit. Ac certe quidem, si Deus aliquo perfectionis genere, vel gradu carere posset, aut in illo perfectionis genere finitus esset, ab alio perfici, complerique posset: quod ab Entis necessarii, vel independentis idea perspicue abhorret; & quemadmodum Deus infinitis infinitorum generum entibus possibiles omnes, hoc est infinitas perfectiones tribuere profecto potest, ita quoque illas ipsas sibi tribuere posset; nec ulla ratio effingi poterit cur possibiles perfectiones omnes sibi non concesserit; cumque in Deo *possibilitas* ab *existentia*, sive *potentia* ab *actu* distingui nequeat, & quidquid illi possibile, vel conveniens esse concipitur, necessario, essentiaque sua in illo existere, vel admitti debeat, dubitari certe non poterit quin possibiles, ac infinitæ perfectiones omnes in illo reperiantur.

Quo tamen loco observari plurimum debet quod perfectiones illæ, quæ creatis rebus inesse possunt, ita distingui solent, ut aliæ quidem *simpliciter*, & *absolute* tales; aliæ vero *secundum quid* perfectiones esse dicantur. Simpliciter, & absolute perfectio vocatur illa, quæ defectum aliquem adjunctum non habet, neque alteri majori, nobiliorique perfectioni opponitur, quamvis ipsa finita, ac limitata in se sit. Ita *justi-*

zia ; bonitas , existentia &c. simpliciter , & absolute perfectio vocatur , quod quamvis finita sit , in eo tamen genere defectum excludit , nec alteri nobiliori perfectioni adversatur . Perfectio vero secundum quid appellatur illa , quæ aut defectum aliquem complectitur , aut certe nobiliori cuidam perfectioni opponitur . Ita *extensio , figura , color &c.* quamvis in suo genere perfectiones aliquæ sint , alteri tamen nobiliori perfectioni , nimirum *spiritalitati* , adversantur , neque cum illa componi possunt . Ita ratiocinando vis , ac facultas , qua veritas una ex alia inferatur , perfectio quidem est ; sed nobiliori tamen perfectiorique cognoscendi modo opponitur , quo veritates omnes unico , eodemque intuitu cognoscantur . Itaque cum dicimus quod infinitæ perfectiones omnes , quæ tum creatis , tum possibilibus etiam entium generibus inesse possunt , in Deo reperiuntur , hoc sane discrimen in perfectionibus illis admitti debet , ut perfectiones illæ , quæ simpliciter , & absolute tales dicuntur , in Deo *formaliter* , ac entitate sua reperiuntur ; ceteræ verò perfectiones omnes , quæ secundum quid tales fuerint , cujusmodi certe sunt corporeæ affectiones , in Deo non *formaliter* , sed *eminenter* solum , ac *virtualiter* inesse dicantur ; quod ille nimirum vim , ac potentiam habeat , qua perfectiones ipsas producere , creatisque rebus tribuere repente possit ; quamvis illas in se non contineat.

VIII.

Æternitas , ac Immortalitas.

Ipsa quoque Dei æternitas ex perspicua ipsius idea , ac natura manifestissime demonstratur.

stratur. Etenim Ens illud, quod ita natura sua, vel essentia necessario existit, ut non existeret non possit, semper existisse debet; alioquin, si aliquando incēpisset esse cum prius non existeret, tunc non essentia sua, & necessario, sed contingenter solum existeret; atque illud esse, quod habet, aut à nihilo, aut ab alio recepisset.

Ita quoque perspicue apparet quod Deus ipse semper existeret, vel immortalis esse debet; alioquin, si aliquando desinere, vel auferri posset, non essentia sua, ac necessario, sed contingenter existeret, ac illud esse, quod habet, ab alio ipsi auferri posset, ejusque duratio, vel existentia ab alio penderet: quod ab Entis necessarii, vel independentis idea, ac natura manifestissime abhorret.

Æternitas autem illa, sive perennis duratio, quæ Deo convenit, differentias omnes excludit, quæ in tempore ab intellectu nostro distingui solent, in illa nimirum duratione, quæ aliquando incēpisse concipitur, ut aliquando finem habere possit; adeoque plurimis, ac infinitis etiam partibus ita componitur, ut illæ simul existeret non possint, sed potius ipsarum una alteri succedat. Itaque in æternitate neque prius, neque posterius, nec ullæ proinde partes admitti possunt; sed perennis illa, ac infinita duratio, prorsus indivisibilis esse debet, adeoque singula tum præterita, tum futura veluti præsentia complectitur. Hinc à Boethio Æternitas illa definitur (a) *Interminabilis vitæ tota simul, & perfectæ possessio*; quod nimirum Deus beatitatem illam, durationem, ac per-

(a) *Consol. Philos. Lib. 5. p. c. 6.*

perfectiōnes omnes, quas ab æterno habuit, atque *in æternum & ultra*, ut in Sacris Litteris legitur (a), est habiturus, quolibet momento, quod à nobis concipitur, habere, eaque perfectissima, ac infinita beatitate felix esse debeat.

IX.

Immutabilitas.

Infertur etiam Deum prorsus immutabilem, ac invariabilem esse oportere. Siquidem Deus ab alio Ente mutari non potest, cum ab alio pendere, aut ab alio quidpiam recipere non possit. Nec etiam à se ipso mutari ille poterit, hoc est sibi tribuere aliquod esse, quo prius careret, vel sibi eripere aliquod esse, quod prius haberet; alioquin, si vel ente, vel attributo, vel perfectiōne quadam caruisset, infinite perfectus esse non potuisset; & si perfectiōnem aliquam, aut attributum amitteret, infinite jam perfectus, adeoque Deus esse non posset. Itaque, cum Deus æternus, ac immortalis esse debeat, neque incipere, neque desinere aliquando potest; adeoque in substantia sua immutabilis esse debet; cumque infinite perfectus haberi, vocarique debeat, nunquam prorsus perfectiōnem ullam acquirere, aut amittere, ideoque in attributis ipsis mutari ille poterit; sed in utroque genere invariabilis, constans, ac immutabilis est futurus.

Ejusmodi vero immutabilitas optime intelligi, salvarique poterit, quamvis Deus non
ab

(a.) Exod. cap. 16. v. 18.

ab aeterno, sed potius *in tempore* Mundum produxerit, & humanos Animos, & effectus alios subinde producat. Etenim illa mutatio non *intrinseca*, sed prorsus *extrinseca* censeri debet; illa nimirum in effectu solum concipi, vel admitti debet, qui prius non existerat, ac esse coepit; non autem in Deo, in quo nulla temporis varietas, nihil aut prius, aut posterius, nulla denique partium varietas, ac successio effingi potest; sed effectus omnes, qui respectu nostri, vel temporis partim *futuri*, partim *præteriti* censeri, vocarique possunt, respectu Dei semper una conjuncti, ac *præsentēs* esse debent, ut in explicanda ipsius æternitate jam demonstravimus.

X.

Immensitas.

Immensitas etiam, ex superioribus attributis inferri facile poterit, quia Deus ipse cuilibet enti creato, vel loco intime præsens sit. Quemadmodum enim Deus cuilibet enti, quod in Universo reperitur, libere, consultoque dedit illud esse, quod habet; itaque quoque illud ipsum esse, quod dederat, auferre ipsi potest; nihilque aut incipere, aut durare poterit, nisi Deus ipsum conservet, eademque vi, qua produxerat, ipsum perenniter tueatur; unde conservatio non aliud, quam continuata quædam productio censeri, vocarique solet. Itaque, cum Deus neque rem ullam creare, neque rem ipsam antea productam conservare possit, nisi virtute, potentia, adeoque substantia sua ipsi præsens sit, divina substantia creatis rebus omnibus intime adesse debet. Accedit etiam quod motus, & actus omnes; quicumque illi fuerint.

sint, qui creatis rebus inesse, aut ab illis exeri live produci possunt, à Deo veluti primo Motore, supremaque causa pendere debent; ut proinde nullum ens concipi, vel effingi possit, quod ab ipso Deo veluti causa non oriatur, quæ tum in necessariis, tum in liberis etiam entibus, aut causis operetur. * Ergo, si Deus rebus omnibus à se productis, & conservatis operati, ipsisque intime adesse debet, singulis omnino rebus ac locis præsens esse, adeoque immensus esse debebit; ut nulla proinde res, aut Universi pars, aut spatium effingi possit, in quo Deus hujus præsentia, vel immensitatis ope non existat.

Quamvis autem universa creaturarum rerum compages certis quibusdam finibus circumscripta sit, adeoque Mundus ipse neque *infinitus*, ut plurimi existimant, neque *indefinitus*, ut putavit Cartesius, sed omnino *finitus* sit, ideoque Deus finitæ solum rerum compagi præsens sit; divina tamen immensitas, aliorum attributorum instar, infinita esse debet. Etenim ille infinitis rebus, ac Mundis aliis possibilibus inesse, vel præsens esse potest; & quemadmodum prorsus Deus ipse, quamvis finitas res, & effectus produxerit, omnipotens tamen censi vocarique debet, quia infinitos effectus alios producere potest; ita quoque immensus erit, quia infinitis rebus aliis inesse potest: quo plane fieri oportet ut Deus ab æterno quoque immensus fuerit, quamvis effectum nullum extra se produxisset; nullique proinde extrinse-

cæ

* Deus non longe est ab unoquoque nostrum; in ipso etiam vivimus, & movemur, & sumus. *Act. Apost. cap. 17. v. 28.*

ex rei præsens esset; quia nimirum ab æterno quoque res producere, ipsisque adesse poterat.

XI.

Unitas.

Denique ex ipsa Dei natura, idea, vel charactere superius explicato ipsius unitas manifestissime demonstratur. Etenim Dei nomine intelligitur Ens illud, quod essentia sua necessario existit, quod infinitam agendi vim, infinitas perfectiones alias infinito modo complectitur, ceterasque res omnes libere, consultoque produxit, sed contingens illa rerum productio optime intelligi salvarique potest, quamvis unicum necessarium Ens admittatur, quod independens, omnipotens, æternumque sit; ac nulla prorsus ratio, vel demonstratio ex contingentibus productisque rebus afferri potest, quæ nos ad plura necessaria Entia, pluresque Deos deducat; ergo Deus ille rerum omnium causa, vel opifex unicus admitti debebit.

Deinde vero, si plura necessaria Entia, pluresque Dii admitterentur, ipsorum unus ab alio certo quodam discrimine, vel charactere distingueretur; alioquin, si quidquid in uno reperitur, alteri quoque inesset, adeoque eadem prorsus natura, eadem attributa, eadem perfectiones omnes singulis Entibus, ac Diis illis communes essent, Ens unum ab alio distingui, sive Deus unus ab alio secerni non posset; ideoque non multiplex, sed unicus admitteretur. Sin vero attributum aliquod effingatur, quod uni solum inesse debeat, & alteri convenire non possit, nullum ex Entibus illis infinitum, aut infinite perfectum erit, adeoque Deus haberi, vocarique non poterit.

Ita

Ira quoque, si quidquid à pluribus Entibus illis efficitur: ab unico solum Ente præstari potest, plures illi superflui, inutiles, adeoque rejiciendi sunt: sin vero quidquid à pluribus illis efficitur, ab unico, sive ipsorum aliquo præstari non potest, unicus ille omnipotens esse, ideoque Deus haberi non poterit.

Quod si ipsorum quilibet parem, ac infinitam potentiam haberet, ac ipsorum quilibet effectum aliquem producere vellet, nunquam effectus ille produceretur. Etenim, si Deus unus certo cuidam corpori certum quendam motum, aut celeritatem imprimere vellet, ut ex. gr. graduum quatuor; & par in altero quoque Deo voluntas, ejusdemque celeritatis producendæ cupiditas haberetur, adeoque uterque quatuor illos celeritatis gradus imprimeret, corpus non *quatuor*, sed *octo* celeritatis gradibus moveretur; ea nimirum celeritas oriretur, quæ à nullo prorsus Deo imperata, vel impressa fuisset. Sin verò dispar voluntas, aut oppositus voluntatis actus in iis reperiretur, ac Deus unus calorem, alter frigus; unus motum, quietem alter, unus rotundam, quadratam figuram alter producere vellet, unius potentia, vel agendi vis ab æquali prorsus alterius potentia veluti extingueretur; adeoque neuter ex illis operari, & effectum producere profecto posset.

Denique, nisi Deus omnino simplex, atque unicus admittatur, infinita prorsus Deorum multitudo admittenda foret. Etenim, si duo vel plures Dii possibiles essent, in Entis necessarii idea vel essentia nulla repugnancia reperiretur, ut illa multiplex esse, adeoque pluribus Entibus convenire posset. Sed eadem illa ratio, quæ duo, vel plura Entia necessaria veluti possibilia ostenderet, infinitos.

res etiam Deos æque possibiles, vel non repugnantes esse demonstraret: cum eadem illa possibilitas, quæ secundo, ac tertio inesse posset, nullis omnino finibus circumscribi, sed eodem ipso jure ad innumeras ac infinitas etiam extendi possit; ergo infiniti Dii æqualiter possibiles concipi, vel admitti deberent. Ergo, quemadmodum unus ex illis necessario, essentiaque sua existit, ita quoque aliorum quilibet, cui par & æqualis possibilitas, ac Entis necessarii idea convenire debet, necessario essentiaque sua existeret; ideoque Dii prorsus infiniti existerent. Sed infinitus ille Deorum numerus, evidenter adeo repugnat, ut ne ipsi quoque *Polytheitæ*, Ethnici nimirum, qui plures nempe Deos admiserunt, infinitum illum Deorum invicem æqualium numerum effinxerint, ergo, ne infinitus hic Deorum numerus admittatur, simplex omnino, atque unicus Deus agnoscendus debet.

Nihil est autem cur exponendis, refellendisque Ethnicorum erroribus immoremur, qui plures, invicem contrarios, genitos, longeque hominibus scelestiores Deos effinxerunt. Quam graviter impudenterque in ejusmodi Diis effingendis illi aberraverint, Lucianus, Cicero, Plato, alique plurimi demonstrarunt; ne Justinum, Clementem, Tatianum, Hermianum, Augustinum, aliosque Patres hic memorem, qui contra veterem Ethnicorum sententiam subtiliter, & accuratissime disputarunt. Illud unum observasse nunc juverit, quod nobiliores omnes Philosophi (a) contempto Deorum popularium grege Deum unum, æternum, omniscium, omnipo-

(a.) Vid. Cudworth. cap. 4. §. 20.

impotentem, invisibilem, incorporeum, immutabilem, immensum admisere; quamvis aut vulgi opinionibus, aut animi ægritudinibus, aut alio quodam impetu abrepti, Deum ingenuè fateri, ac venerari noluerint.

CAPUT IV.

De moralibus attributis Dei.

I. SUPremo tandem hoc loco perfectiones illæ, vel attributa proponi ostendique debent, quæ divinæ substantiæ conveniunt, ac *moralia* vocari plerumque solent; sive quod illa ad voluntatem potissimum referantur; sive potius quod, sicuti in homine perfectiones illæ vel attributa, quæ ad bonum, veluti objectum diriguntur, *moralia* vocantur; ita quoque perfectiones illæ, quæ in Deo ad bonum ipsum referri concipiuntur, *morales* dicuntur, ut perspicuo quodam discrimine à cæteris distinguantur, quæ substantiam ipsam perficere existimantur, ideoque *physica* vocantur. Ejusmodi verò *moralia* Dei attributa ad quinque præsertim capita revocari possunt, de quibus hæc ordine agendum erit.

II.

Bonitas.

Si *bonitatis* nomine intelligatur illa perfectio, vel ratio, quæ ens, & objectum aliquod amari potest, ut in prima Metaphysicæ Parte jam diximus, dubitari certe non poterit, quin maxima, & infinita bonitas in Deo reperiat; cum ille in quolibet entis, ac perfectionis genere sit infinitus; adeoque infi-

infinitam prorsus bonitatem, atque amabilitatem contineat, quæ omnes humani cordis affectus, desiderium omne, omnemque amorem allicere, satiare, & explere perfecte possit; ut proinde Deus ipse ceteris objectis amabilibus, vel bonis omnibus præferri, si-ve super creata, ac possibilia bona diligidebeat.

Quod si *bonitatis* nomine intelligatur illa perfectio, qua Deus nonnisi bonum efficere, cupere, & probare potest, perspicue deprehendi poterit quod hæc ipsa bonitas in Deo reperitur. Etenim quidquid ab infinita Dei potentia produci potest, *ens* esse debet, adeoque essentiam, existentiam, naturam, variasque affectiones habere, quarum quælibet ens esse, adeoque *bonitatem*, quæ cui- libet enti necessario conjungitur, continere debet. Ergo nihil à Deo fieri, vel produci potest, quod omni physica bonitate carere, idèoque *physice malum* censeri, vocarique possit, ut inferius etiam ostenderetur. Quod vero ad *malum morale*, si-ve *peccatum* attinet, illud à Deo fieri, si-ve produci non potest; cum peccatum ipsum non *positiva* quædam, ac realis entitas, sed sola *privatio* sit ejus ordinis, honestatis, ac perfectionis, quæ liberis voluntatis actibus inesse deberet; adeoque ab illa solùm causa producatur, quæ in exerendis actibus deficere, ac imperfecta esse possit. At Deus, cum in quolibet entis, ac perfectionis genere sit infinitus, nihil imperfectum efficere, nunquam à fine sibi proposito deficere, nihil essentiæ, majestati, dignitarique suæ contrarium moliri, cupere, ac probare potest; ergo, licet peccatum ipsum, ac morale malum in liberis hominum voluntatibus permittere subinde possit, ut inferius exponetur; nunquam tamen peccati causa censeri ille poterit, adeoque.

que peccatum, in hominibus permissum divinæ bonitati detrahere, vel adversari non potest.

Denique, si hoc ipso *bonitatis* nomine ea potius perfectio, sive propensio intelligatur, qua Ens aliquod alteri consulere, prodesse, bonum tribuere concipitur, adeoque *beneficium* appellatur, hæc ipsa quoque bonitatis species, aut *beneficentia* maxima in Deo, ac infinita prorsus agnosci debet. Ille nimirum singula rerum existentium genera libere sponteque produxit, cum ipsarum quælibet indole, naturaque sua contingens, possibilis, nihilque foret; ex infinito rerum æque possibilitium numero quosdam secrevit, ut illas ex nihilo ad esse, ex possibilitate ad existentiam transferret: non quod in ipsarum aliqua meritum ullum, aut ulla ratio concipi vel inesse potuerit, ut ceteris præferri, atque ex infinitis aliis eligi deberet; verum potius quod libero solum divinæ voluntatis arbitrio, liberalitate, ac beneficentia producta fuerit. Itaque, si Deus, qui natura essentiaque sua perfecte felix, sibi sufficiens, ac beatissimus esse poterat, innumera fere rerum genera libero, ac beneficentissimo arbitrio suo produxit, eadem variis perfectionum generibus exornavit, eademque perenni tenore ac potentia sua conservat, quis aperte non videat quod infinita bonitas, ac beneficentia in illo admitti debet; nihilque prorsus effingi potest, in quod ex uberrimo hoc beneficentiæ fonte aliquid non manaverit?

III.

Justitia.

Quandoquidem vero Deus ipse inter alia Entium genera, quæ libere, sponteque produxit, humanos Animos esse voluit, qui incorporeæ cognitionis munere, ac libero voluntatis arbitrio præditi forent, adeoque prorsus incorruptibiles, ac immortales esse deberent, ipsorum singulis ultimum quendam finem ipsorum naturæ convenientem præscribere profecto debuit, ad quem in liberis ejusmodi voluntatis actibus exerendis constantissime dirigeretur. Itaque naturæ legem ipsorum singulis veluti impressit, variasque leges alias constituit, quarum præsidio voluntas ipsa dirigeretur, in servandis illis honestas, ac moralis bonitas, in violandis autem pravitas, in humanis actibus oriretur. Quo plane fieri oportuit ut hominibus illis, qui leges à Deo constitutas servarent, præmia; iis vero, qui legibus adversarentur, pœnas proponere, & æquissima lance distribuere deberet. Hinc plurimis attributis aliis, quæ Deo veluti primæ supremæque Causæ, adeoque etiam ultimo supremoque Fini conveniunt, Æquitas ipsa, sive Justitia adjungi debet; alioquin ille temere prorsus, & inconsulto homines ad ultimum finem aliquem direxisset, ipsorum singulos moralis bonitatis, æternæque felicitatis capaces fecisset, iisque & rationis lumen, & honestatis cognitionem, & virtutum semina, & naturæ legem concessisset; nisi deinde honestis quidem præmia, scelestis autem pœnas tribueret. Quod verò in ejusmodi præmiis aut pœnis tribuendis accuratissima, ac infinita prorsus æquitas, ac justitia

stitia in Deo reperiatur, ex ipsius bonitate, sive beneficentia superius exposita manifestissime demonstratur. Etenim, si fortasse Deus iniquis præmia, vel justis pœnas tribueret, odio, livori, aliisque ægritudinibus obnoxius esset, quod ab optimæ, perfectissimæ, ac beneficentissimæ naturæ idea abhorret; &, quemadmodum humanus Animus perfectus esse non potest, si malum diligat, iniquis præmia, pœnas honestis infligat, ita quoque Deus ipse perfectus esse non posset, si in præmiis, pœnisque tribuendis æquitatem illam constantissime non observaret, ut justis tantummodo præmia, iniquis solum pœnas decerneret.

IV.

Sanctitas.

Hæc ipsa ratio perspicue simul ostendit quod in Deo maxima, & infinita sanctitas admitti debet, qua nonnisi bonum præcipere, consulere, probare possit; malum vero prohibere, aversari, & odisse debeat; ut proinde ritus omnes ac leges, quæ ab illo propositæ vel constitutæ sunt, honestati, decori, rationi, & sanctitati repugnare non possint. Exinde vero constans, intrinseca, & invariabilis quorundam humanorum actuum bonitas oriri debet, ut illi nimirum, qui indole naturaque sua honestati sunt, ut accuratius in Ethica demonstratur, à Deo improbari; ii vicissim, qui intrinsece suaque natura pravi vel indecori sunt, ut mendacium, perjurium, blasphemia &c. nunquam à Deo probari, consuli, ac præscribi possint; quamvis incolumi Dei sanctitate actus illi in hominibus ab infinita Dei sapientia, ac providentia permitti possint.

V.

V.

Veracitas.

Itaque moralibus attributis aliis, vel perfectionibus, quæ in Deo reperiuntur, Veracitas etiam adjungi debet, quo aliquid revelando fallere, vel aliquid promittendo deesse non possit. Etenim mentiri, fallere, in errorem alios inducere, promissis deesse, vel fidem alteri obstrictam violare summæ ac infinitæ bonitati, sanctitati, vel perfectioni repugnat, ac in hominibus ipsisturpe, & indecorum censetur, ideoque sanctitati, justitiæ, beneficentiæ, finitis nimirum ipsorum perfectionibus, adversatur. Ergo nulla prorsus ex imperfectionibus illis in infinita, perfectissimaque Dei natura concipi, vel effingi poterit; sed ille potius virtutes, ac perfectiones omnes iis ægritudinibus, erroribus, aut vitiis oppositas infinito modo complectetur. Itaque, sicuti Deus, cum infinita rerum cognitione vel scientia præditus sit, errare, decipi, vel falli non potest; ita quoque, cum infinita sanctitate, beneficentia, ac perfectione polleat, alios fallere, decipere, ac mentiri non poterit; ideoque quidquid ab illo traditum, vel revelatum fuerit, quamvis ab intellectu nostro concipi, comprehendique non possit, sed tenues humanæ mentis vires excedat, verissimum censi, ingenue modesteque admitti, & constanter etiam à nobis defendi debet. Ita quoque quidquid ab intellectu nostro perspicue certoque cognoscitur, tanquam certum admitti debet, ut proinde perspicuitas ipsa, vel evidentia veluti Veritatis character, nota, sive ut à Græcis vocatur, *Criterion* censi debeat. Etenim, cum sensus ipsi, atque in-

intellectus nobis à Deo concessi fuerint , ut ipsorum ope , ac præsidio res cognoscere , aut veritatem inquirere possemus , si sensus omnes , vel intellectus in iis etiam deciperet , quæ nitide , constanter , ac evidenter ab illo cognoscuntur , tunc error ille , qui necessarius , non libere , à nobis admitteretur , adeoque à nobis percipi , corrigi , vel deprehendi non posset , in Deum veluti auctorem refundi posset , quod ipsius perfectioni , beneficentiæ , ac Veracitati repugnat .

Denique quidquid ab ipso Deo nobis forrasse promissum fuerit , constanter ab illo sperare , vel expectare debemus , quidquid ab illo propositum , prævisum , decretumque fit , constanter , invariabiliter , certoque futurum censere ; quamvis ejusmodi propositi , consilii , vel decreti causa , præsertim verò divinæ præscientiæ , motionis , decretique concordia cum humanæ voluntatis arbitrio perspicue ab intellectu nostro percipi , vel explicari non possit , ut alibi demonstravimus .

VI.

Providentia.

Postremo ex principiis , & argumentis illis , quibus Dei existentia , & attributa singula superius exposita demonstrantur , ipsius etiam providentiæ manifestissime inferri potest . Etenim *Providentiæ* nomine intelligitur illa ratio , cura , & consilium , quo singula ad certum finem aliquem constantissime diriguntur , ut omnia rite , & consulto , nihilque prorsus inconsulto , vel temere fiat : ideoque quidquid in Universo fieri , contingere , vel esse conspicitur , perenni lege , consilio , prævisione , rectaque ratione

tione administraretur. Ejusmodi vero curam, præscientiam, ordinem, & consilium in Deo reperiri ex ipsa Universi pulchritudine, partium ordine, concinnitate, nexu, dependentia, præsertim vero ex admirabili animatorum corporum textura perspicue demonstratur; innumeris nempe certisque indiciis ostenditur singulas ipsorum partes ad certum aliquem finem dirigi, eamque prorsus figuram, magnitudinem, & affectiones alias habere, quæ huic fini consequendo pares esse poterant. Ex ipsa quoque infinita Dei cognitione, ac infinita prorsus agendi potentia ipsius providentia demonstratur: cum nihil existere, sive produci unquam possit, quod à Deo prævisum non fuerit, nec aliud esse, vel existendi modum habere, quam qui libere consultoque ipsi à Deo constitutus, vel concessus fuerit; cumque Deus in variis rerum finibus præscribendis, in consilio decretoque suo nihil indecorum, temerarium, æquitari, rationi, justitiæ, ac bonitati contrarium eligere, decernere, ac operari unquam possit, in variis effectibus producendis nunquam à perennis providentiæ suæ legibus aberrabit.

VII. Atque hætenus quidem præcipua, vel clariora certe divinæ naturæ attributa complexi sumus, quæ bonum respicere, ad ipsius voluntatem referri, ideoque *moralia* vocari solent, in quibus bonitatem, justitiam, ac providentiam principe fere loco habendam esse demonstravimus: cum perfectiones illæ cum ipsa Dei, supremæque causæ natura, vel idea artissimo veluti fœdere jungantur: ut ii proinde, qui Deum existere negarunt, hoc uno potissimum erroris, & argumenti genere abrepti fuerint, quod infinita quædam, per-

Corfmi Metaphys.

L

fe-

fecta, ac divina bonitas, justitia, ac providentia admitti non debeat; adeoque ne divina quidem substantia, vel Ens perfectissimum admitti possit; quod attributis illis præditum esse deberet. Quod vero infinita illa, perfectissima, Deoque conveniens bonitas admitti non possit, exinde conjicere, vel asserere nitebantur, quod in Universo mala plurima occurrant, ac innumeri prorsus effectus subinde producantur, qui imperfecti, vitiosi, nobisque noxii sint. Ita ægritudines, ignorantia, errores, egestas, mors, atque ingens illa, ut ait Horatius (a) *februm cohors*, quæ terris, ac humano genere incubuit, *physica* quædam *mala* censerī, vocarique debent. Ita serpentes, aliaque id genus animalia, quæ veneno, aculeis, feritate hominibus noxia, molesta, ac mortifera sunt, *mala*, aut *malefica* censerī debeant; adeoque bonitati, summæque beneficentiæ repugnant, quæ Deus veluti amantissimus pater humani generis bono, ac faustitati ita consulere debuisset, ut nihil omnino ipsi incommodum, noxium, ac maleficum produceret. Itaque, cum à benefica, divinaque natura abhorreat, ut aliquid malum atque in hominum perniciem creaverit, Epicurus quidem, alii-que plurimi effectus illos non à Deo, sed à fortuito solum materiæ motu productos esse dixerunt; veteres autem Persæ duplex omnino rerum Principium, duplicemque Deum admittendum esse putarunt, quorum unus *bonus*, ac beneficus foret, eosque solum effectus produxisset, qui *boni* sint; alter

(a) Lib. I. Od. 3. ver. 30.

rer. verò *malus*, (a) vel maleficus esse deberet, easque proinde res, & effectus creasset, qui noxii, vel *mali* forent. Persarum vestigiis insitit hæretici Manichæi; & quemadmodum Persæ bonos effectus *Oronti* Deo, malos autem *Arimanio* tribuendos esse dixerunt; ita quoque Manichæi bonos effectus omnes à *Bono*, malos autem à *Malo* Principio, vel Deo repetendos esse putarunt.

Quemadmodum verò *mala physica*, plurimique vitiosi effectus, qui in Universo reperiuntur, divinæ bonitati repugnare videantur, ita quoque plurima *moralia mala*, sive peccata non modo bonitati, sed ipsi quoque Dei sanctitati adversari videntur. Itaque, cum plurima, ac prorsus innumera ejusmodi malorum genera subinde occurrant, perfecta quædam, benefica, & sanctissima rerum omnium Causa admitti non poterit; nam illa si existeret, omnipotens, sancta, ac benefica esse deberet, adeoque singula malorum genera impediret, ne alioquin invida, impotens, aut malefica diceretur.

Denique plurima, quæ subinde observantur, divinæ justitiæ, ac providentiæ adversari ex eo perspicue deprehendi posse plurimi existimarunt, quod plurima temere, ac fortuito contingant; honesti justique viri calumniis, egestate, morbis, aliisque incommodis, ac pœnis premantur; scelesti vero felices, ac beati sint; ut proinde Diogenes ille Cynicus dixerit Harpalum prædonem contra Deos testimonium dicere.

(a) Vide Stanl. Phil. Orient. lib. 2. cap. 6.

dicere , quod in illa fortuna tandiū viveret. (a)

VI. I. Sed hæc , aliæque id genus , quæ ab Atheis , Deistis , Epicureis , & Manichæis contra divina attributa , adeoque facile adversus existentiam ipsam afferri solent , perspicue certoque refelli possunt ; ut proinde facile divina bonitas , sanctitas , justitia , ac providentia defendi , ejusque existentia confirmari possit.

Ac primo quidem observari facile poterit quod effectus omnes , aut affectiones illæ , quæ *mala physica* cenſeri , vocarique solent , ut *dolor* , *agritudo* , *egestas* &c. intrinsece potius , ac *positive* bona cenſeri debent ; quippe quæ semper cum aliqua bonitate , vel perfectione conjuncta sint ; aliquam nimirum entitatem , vel perfectionem contineant , nec alla sane ratione veluti *mala* concipi , sive vocari illa soleant , nisi quod cum melioribus aliis , ac perfectioribus entibus comparentur . Itaque hæc entia cum melioribus comparata *minus bona* dicenda forent ; sed à nobis tamen usitato quodam loquendi more *mala* dicuntur ; quemadmodum prorsus *palea* , si cum gravioribus corporibus compareretur , *minus gravis* dicenda foret , sed tamen *levis* vocatur ; perinde quasi nulla gravitate prædita sit ; eademque ratione virum , qui pauca didicerit , *imperitum* , qui pauca possideat , *inopem* , qui tenui sanitate gaudeat , *infirmum* vocamus . Quod si res , & objecta singula non *relative* , sed *absolute* spectentur , perspicue apparet quod rerum ipsarum quælibet essentia ,

(a) Cic. de Nat. Deor. Lib. 3. cap. 34.

tia, existentia, variisque affectionibus aliis exornatur, adeoque intrinsece physiceque bona censeretur debet: nihilque prorsus occurreret, quod omni physica bonitate sit destitutum, adeoque physice malum vocari, divinæque beneficentiæ adversari possit.

Quamvis etiam dolor, ægrotudo, mors, aliaque id genus intrinsece quoque boni cujusdam privationes, adeoque physica mala dicantur, ea tamen ab optima, & sapientissima Causa permitti poterant; cum exinde rerum varietas, Universi pulchritudo, ac plurima bonorum genera oriantur. Ita ex hominum imbecillitate, egestate, morbis, ac mortis formidine hominum cupiditas, audacia, ac feritas, quæ nullis ferre finibus circumscripta foret, lenitur, ac temperatur; ut exinde tranquilla societas inter homines oriatur. * Pleraque ex malis illis iusta scelerum ac errorum pœna esse solent, quæ à Deo benefico quidem, sed iusto tamen scelerum vindice, infligi debent. Quod si fortasse aliquando iustis etiam contingant, optimè tamen à Deo permitti illa poterunt, ut ipsorum virtus illustrius appareat, ac purior reddatur, ideoque nobiliori præmio tandem coronetur.

Deinde vero observari etiam poterit, quod nos sapissime fallimur cum singula ad nos ipsos referimus, adeoque res, & effectus illos aut utiles, aut bonos vocamus, qui nobis ipsis placere, prodesse, probarique solent;

* Si mors certæ constituta esset ætati, foret homo insolentissimus, & humanitate omni careret. Nam fere jura omnia humanitatis, quibus inter nos coheremus, ex metu, & conscientia fragilitatis oriuntur. *Lactant. de Opif. Dei cap. 4.*

ent; eos vero vicissim noxios, atque inutilis esse censemus, ex quibus nulla nobis utilitas, aut jucunditas oriatur. * Ejusmodi vero judicii genus lubricum, fallax, ac iniquum esse oportere in Physica demonstratur. Illud unum hic observetur, quod si ejusmodi judicii, vel differendi modo vis ulla esse posset, homo ipse ceteris animantibus omnibus deterior esse deberet; non modo quod ille plerisque animalibus aliis inutilis, ac noxius videatur; verum etiam quod nullum prorsus animal aliud homini infestius homine ipso esse possit. Itaque, si de rebus non ex affectu nostro, sed ex ipsarum indole, ac natura judicium feratur, nulla prorsus afferri poterit, quæ inutilis, noxia, vel physice mala censenda sit, adeoque ab optimæ, ac beneficentissimæ Causæ natura abhorreat.

Itaque jam sola supererunt *moralia mala*, sive peccata, quæ vere *mala* censenda sint, omnique proinde tum physica, tum morali bonitate destituta sint; ideoque divinæ sanctitati, vel bonitati repugnent. At peccatum ipsum, cum neque ens sit, neque à potentia, sed ab impotentia solum oriatur, ab illa nimirum causa, vel agendi vi, quæ à fine sibi proposito deficere, ac aberrare possit, adeoque actum exerere, qui debita rectitudine, vel perfectione careat, ab infinita, potentissima, perfectissimaque Causa produci

* S oici dicunt multa esse in numero animalium, quorum adhuc lateat utilitas, sed eam processu temporum inveniri, sicut jam plura prioribus seculis incognita re elicita, & usus invenit. *Laſſant, de Ira Dei cap. 13.*

duci non poterit. * Quod vero Deus ipse peccatum, quod avertere, ac impedire profecto poterat, libere, consultoque permiserit; id ipsius bonitati, vel perfectioni non repugnat; non modo quod liberam voluntatis humanæ vim minuere, ac morale malum impedire non tenetur; verum etiam quod occulta quadam, atque admirabili ratione ex malis ipsis impensius aliquando bonum deducere ille possit, ut facile pluribus exemplis ostendi posset. * *

Quod vero scelestis etiam, ac iniquis hominibus felicitas interdum contingat; boni vicissim, ac honesti doloribus, egestate, calumniis premantur, id optime cum divinæ justitiæ legibus, ac natura componi poterit. Etenim, ut fusc, & elegantissime Cicero (a) ostendit, felicitas illa, voluptas, & gloria, quæ scelestis hominibus inesse concipitur, vera felicitas esse non potest; cum innumeris anxietatibus, ac impendentium poenarum formidine infecta sit, vicissim vero infelicitas illa, quæ justis contingat, vera infelicitas haberi non poterit; quippe quæ cum perenni animi rite compositi tranquillitate conjuncta esse possit, nihilque honestis hominibus jucundius esse debeat, quam (b)

Nil

* Duabus ex causis peccamus: aut nondum videndo quod facere debeamus; aut non faciendo quod debere fieri jam videmus; quorum duorum illud ignorantia malum est, hoc infirmitatis. S. Aug. in *Enchir. num. 22. al. cap. 81.*

* * Deus, cum summe bonus sit, nullo modo sineret mali aliquid esse in operibus suis, nisi usque adeo esse omnipotens, & bonus, ut beneficeret & de malo. S. Aug. in *Enchir. num. 3. al. cap. 4.*

(a) *Tusc. Lib. 3. cap. 20.*

(b) *Horat. Lib. 1. Epist. 1. ver. 60.*

Nil conscire sibi, nulla pallescere culpa.
 Et quamvis etiam scelesti vere felices, honesti vero infelices dicantur, adeoque accurata pœnarum, præmiorumque distributio, sive divinæ justitiæ leges in hac brevi ac interitura hominum vita satis intelligi, vel explicari non possit; futurus est tamen perennis alterius, ac immortalis vitæ status, in quo Deus justis solum præmia, iniquis pœnas decernere, ac reservare possit, adeoque justitiæ suæ leges puriori quadam nobiliorique ratione observare, ut inter Ethnicos etiam Plutarchus in aureo Libello demonstravit, ubi de sera Numinis vindicta disputavit.

Denique, ne in re perspectissima diutius immorer, effectus illi, qui temere solum ac fortuito in Universo fieri, adeoque divinæ præscientiæ, vel Providentiæ adversari dicuntur, fortuiti quidem, temereque producti censeri illi poterunt, si ad tennes humanæ cognitionis vires referantur; adeoque cum effectuum illorum causa, finis, connexio nobis incognita, vel obscura sit, effectus illi fortuiti, improvisi, vel contingentes dicuntur. Sin vero finis ille, connexio, proportio subtilius exploretur, atque ex innumeris effectis aliis argumentum sumatur, quæ rudibus ac imperitis fortuita videntur, sed à Phycis tamen necessaria, suisque à causis perenni quadam constantique lege disposita demonstrantur, deprehendi facile poterit quod obscuriores etiam effectus aliqui, quorum finis, causa, & origo nobis incognita fortasse fuerit, à divina præscientia, libertate, beneficentia pendere debent; ut nihil proinde fortuitum, improvisum, temereque in Universo productum effingi possit. Itaque, si res, & effectus omnes, qui in Universo conspiciuntur, admirabili quadam